



BIBL. NAZ.
Vitt. Emanuele III.

RACCOLTA
VILLAROSA

241

4
NAPOLI



1219

605642

Race Vill. C. 241

(4)

MARINI GUARANI
SYNTAGMA

ROMANI JURIS AC PATRII

CONCINNATUM AUDITORIO SUO

SECUNDUM SERIEM

INSTITUTIONUM IMPERIALIUM.

OPPORTUNE ACCEDUNT EXCURSUS

AD JUS HODIE RECEPTIUS.

TOMUS IV.



EXCUDEBANT SIMONES FRATRES

Cum Publica venia.

NEAPOLI 1773.

TROJANO SPINELLO

IN VETUSTISSIMA FAMILIA SUA
OCTAVO LAURINI DUCI

&c. &c. &c.

SCIENTIARUM OMNIUM
FAUTORI ALTORI NUTRICIO
PATRONO SUO PIENTISSIMO

MARINUS GUARANUS

ΕΥΠΡΑΤΤΕΥ.

CEdendo invicem apud te sermones,
Vir Clarissime, eo nos olim devenisse
memini, ut de recta juris seu addi-
scendi, seu docendi methodo sanisper
penitus iurgaremus in confessu doctissimorum
virorum, qui non minus humanitate, quam
subli-

sublimioribus studiis tuis illecti domum tuam
quotidie frequentabant. Inter sententiarum dis-
sidia in eo uterque convenimus, ceteris quidem
scientiis pertractandis methodum certiorē esse,
jurisprudentiæ vero enucleandæ constantem ul-
lam, aut certam vix fingi quidem, nedum
sperari posse. Cum enim aliæ scientiæ per se
consistant magis, neque fere quidpiam a diver-
so Civitatum regimine mutuari soleant, earum
addiscendarum ratio longo rerum usu facile de-
prehendi poterat. Contra cum pro diverso Ci-
vitatum regendarum ritu jurisprudentiam opor-
teat diversam esse, aliæque Principatui leges,
aliæ Optimatum, aliæ adhuc convenient popu-
lari regimini, incertæ suapte ingenio discipli-
næ tradendæ vix certa ratio excogitari posse
videbatur. Illud autem uterque addebamus,
scientiæ sua sponte incertissimæ apud nos, ut
passim in Europa alibi, ob varias Imperiorum
vices difficultates longe maximas accessisse: ex
quo enim jure veluti postliminii post tot sæcu-
lorum intercapedinem Romana jurisprudentia in
Europa recepta fuerit, maximo judicio opus esse
in alienis legibus aliis hominibus, atque aliis Ci-
vitatibus accommodandis. Minime vero omnium
se tibi adprobabat recepta passim juris tradendi
ratio, qua leges Romanas, ac patrias separatim
adolescentibus propinare prælectores solent. Ex
auditoriis enim incertiores, quam pridem, aje-
bas

bas dimissum iri tirones, ubi juri civili unice
operam addixissent suam. Nam defessi quidem
post juris Romani decursa spatia nosse simul
haud poterant, quæ ejus capita vigeant in Re-
gno adhuc, quibus in rebus per patrias Regni
leges, aut mores ei sit obrogatum. Docebas et-
iam, ei incommodo frustra consuli, ubi post
biennii, vel triennii moras sigillarim jus quoque
patrium traderetur. Cum enim jus civile uni-
versum nondum roboratis adolescentum animis
præsto esse non soleat, ab iis sperari posse ne-
gabas, ut sine antecessoris indicio discrimina
Romani juris, ac patrii frequentissima ab ipsis
suo Marte dignoscerentur. Rationibus igi-
tur accurate subductis inde colligebas, juris
docendi viam opportunissimam videri oportere,
quæ, a suis initiis juris Romani vici-
bus enarratis, perpetuo rerum ordine ad pa-
trias Regni leges adolescentes perduceret: si
factum id foret, eadem veluti fidelia duos pa-
rietes dealbari facile posse, & eadem opera
cum jus Romanum, tum patrias Regni leges
facilius intellectum iri: juri enim civili statim
municipali addito, ipsos tirones nullo labore
per se definituros, quatenus hodie apud nos
jus Romanum obtineat, quatenus municipali
Neapolitanorum jure sit ab eo descitum: ita
majori cum emolumento, minori cum fastidio
certe jus perdisci posse. Ubi sententiam novi
tuam,

tuam, ductum tuum sequutus ego praesens ag-
gressus sum argumentum discors quidem sen-
tentiis, opimum in foro •jurgiis, utilitate
tamen enimium, & , quatenus imbecillitati
meae concessum, ad praestitutum a te modu-
lum adlaboravi illud enigere. Quanti ego
facio judicium tuum, si viam a te praemon-
stratam me iniisse pronunciaris, quicquid ob-
ganniant incertes homines, fructum vigiliarum
meorum uberrimum retulisse putabo. Vale,
Vir doctissime, meque, ut facis, tutari perge.
Neapoli prid. id. Jul. 1773.

Excellentiae tuae

Devotissimus, ac devotissimus cliens.

I N D E X

TITULORUM, ET EXCURSUUM.

TIT. I. De obligationibus, quæ ex delicto nascuntur.	Pag. 1
TIT. II. De vi bonorum raptorum.	13
TIT. III. De lege Aquilia.	18
TIT. IV. De injuriis.	27
TIT. V. De obligationibus, quæ quasi ex delicto nascuntur.	33
TIT. VI. De actionibus.	39
Excursus singularis. De jure retractus, & judicio assistentiæ.	78
CAPUT. I. De jure retractus.	79
CAPUT II. De judicio assistentiæ.	96
TIT. VII. Quod cum eo, qui in aliena potestate est, negotium gestum esse dicitur.	102
TIT. VIII. De noxalibus actionibus.	120
TIT. IX. Si quadrupes pauperiem fecisse dicatur.	124
TIT. X. De iis, per quos agere possumus.	127
TIT. XI. De satisfactionibus.	133
TIT. XII. De perpetuis, & temporalibus actionibus, & quæ ad heredes, & in heredes transeunt.	138
TIT. XIII. De exceptionibus.	148
TIT. XIV. De replicationibus.	164
TIT. XV. De interdictis.	168
TIT. XVI. De pœna temere litigantium.	188
TIT. XVII. De Officio judicis.	196
Excursus I. De ordine judiciorum, seu processu civili in Regno Neapolitano adhiberi solito.	203
CA.	

<i>CAPUT I. De vocatione in ius.</i>	205
<i>CAPUT II. De litis contestatione.</i>	212
<i>CAPUT III. De probationibus in causa cognitione adhiberi solitis.</i>	219
<i>CAPUT ULTIMUM. De sententiis, earumque executione.</i>	227
<i>Excursus II. De appellatione, aliisque remediis adversus sententias.</i>	
<i>CAPUT I. De appellatione.</i>	231
<i>CAPUT II. De supplicatione, seu reclamatione in Supremis Regni Tribunalibus interponi solita.</i>	239
<i>CAPUT III. De restitutione in integrum.</i>	245
<i>CAPUT IV. De nullitatibus.</i>	250
<i>TITULUS ULTIMUS. De publicis judiciis.</i>	258

ERRATA.

CORRIGE.

<i>Tom. III. pag. 6. ad avi paterni bona</i>	<i>ad avi materni bona.</i>
<i>Tom. IV. pag. 5. si re cre- dita</i>	<i>si re pignori tradita.</i>

Cetera suppleat lectoris humanitas.

MARINI GUARANI

SYNTAGMA ROMANI JURIS AC PATRII

CONCINNATUM AUDITORIO SUO

SECUNDUM SERIEM

INSTITUTIONUM IMPERIALIUM.

LIBER QUARTUS.

TITULUS I.

De obligationibus, quæ ex delicto nascuntur.

Obligationes omnes ex facto aliquo obligatorio oriri jam supra monuimus *libr. 3. tit. 14. §. 9.* Ibidem advertimus, factum illud obligatorium licitum esse, aut illicitum; ex illo contractus, & quasi contractus, ex hoc delicta, & quasi delicta manare. Cum igitur superiori libro contractus, & quasi contractus exequuti simus, porro de delictis, & quasi delictis sermonem instituemus. Et obligationum quidem, quæ ex contractu nascuntur, quatuor species jurisconsulti constituerunt, prout re, verbis, literis, consensu perficerentur; obligationes tamen ex delicto manantes unius generis esse pronunciarunt, cum ex ipso turpi facto, seu maleficio proficisci viderentur omnes. Hinc omnis actio ex delicto descendens

A

en

2 *Syntagm. Rom. Juris, ac Patr. Lib. IV. Tit. I.*

ex facto esse dicitur in l. 25. §. 1. ff. de oblig. & act. & obligationes omnes ex maleficio *ex re* nasci scribit Tribonianus *princ. h. r.*

II. Principio secundum jurisconsultorum philosophiam delictum generatim definiri potest *turpe factum, quo injuria nocetur alteri*. Proinde extra legum poenas delictum erit, si ab ipso malefico per illud alteri non noceatur. Si quod etiam delictum non in faciendo, sed in negligendo consistat, veluti si quis non propulset, quæ ab altero infertur, injuriam, eo nomine actio nequit institui. Fieri quidem potest, ut quis dolo malo ab altero illatam injuriam non propulset; sed & multæ, & probabiles causæ afferri queunt, cur ad propulsandam injuriam quis non prosiliat. Proinde ne litibus miscerentur omnia, ob delicta, quæ in negligendo consisterent, jus civile cuiquam calumniam fieri vetuit. Conf. Donell. *comment. 15. 24.*

III. Admitti autem quid turpe potest vel dolo, vel culpa. Ex dolo *verum delictum*, ex culpa *quasi delictum* oritur. Quatuor priores hujus libri titulos vera delicta occuparunt; quintam hujus libri rubricam quasi delictis edisserendis reservavit Tribonianus. Neque vero in quatuor prioribus hujus libri titulis de delictis agitur generatim omnibus, sed de privatis tantum, & unde ipsi tantum læso jus civile actionem accommodat. Ejusmodi sunt furtum, rapina, damnum injuria illatum, injuria ipsa denique. Verum de publicis quoque delictis, quæ *crimina* frequentius in jure dicuntur, & unde cuivis ex populo competit actio, ad ultimam hujus libri rubricam pro instituto cum Imperatore videbimus.

IV. Porro in delictis plerisque omnibus ipsa cul-

culpa a damno per culpam illato sedulo distinguenda. Nam recte quidem Grotius *vitiositatem actus* in maleficio ab ejus effectu secernendam monet *de jur. bell. & pac.* 2. 17. 22. Judicis igitur partes erunt, *vitiositatem actus*, seu culpam poena, *effectum*, seu damnum per culpam illatum ipsius reparatione emendare. Damni isthæc reparatio non uno modo potest indici. Cum tamen rerum utilium commune sit libramentum, & mensura pecunia, damnum illatum rependi per pecuniam plerumque solet. Cum vero in maleficio culpa, & damnum ut plurimum interveniat, facile rationem reddes, cur ob privata delicta duplicem actionem jus civile læsis accommodet. Altera enim actione damnum illatum reparandum erat, altera ipsa injuria vindicanda. Et actio quidem, qua reparatio damni reposcitur, *rei persecutoria* vocari solet: ejusmodi est *condictio furtiva*, *actio rerum amotarum*, & sexcentæ id genus aliæ. Actio, qua poena reposcitur, *pœnæ persecutoria* dici amat: ejusmodi est *actio furti*. Quod si & damni reparationem, & poenam ipsam actio complectatur, cujusmodi est actio ex rapina profluens, *rei, & pœnæ persecutoria* ea dicitur. Cum vero utriusque actionis diversus sit finis, eas in judicio cumulare licet, neque altera per alteram perimetur. Hinc respondet Paulus de colono, a quo aliquid de fundo subtractum erat, eum & condictione furtiva, & actione furti recte pulsari *l. 34. §. 2. de oblig. & act.* Per illam enim reparatio damni, per hanc poena repetitur. Quapropter recte advertit Petrus Follerius apud Rovit. *ad pragm. 1. de abolit. n. 41.* delictorum per Principem abolitione concessa, poenam

4 Syntagm. Rom. Juris, ac Patr. Lib. IV. Tit. I.

nam quidem, non rei furtivæ restitutionem furibus remissam videri. Recte etiam inde inferas, quæcumque pœna a furibus soluta fuerit, res ipsas furtivas a dominis perpetuo condici posse. His ita constitutis, de privatis delictis tractationem cum Imperatore coeptabimus, ac primo de furto videbimus.

V. Definitur ab Imperatore furtum §. 1. *h. r. contrectatio fraudulosa lucri faciendi causa vel ipsius rei, vel etiam usus ejus, possessionisve, quod lege naturali prohibitum est. admittere*. Primo igitur, ut furtum videatur admissum, rem furtivam contrectare fur debet. Contrectari in præsentī argumento res dicitur, quæ loco movetur, & transfertur *l. 3. §. 18. ff. de acquir. poss.* Proinde sine amotione furtum non intelligitur. Inde repetendum, cur rei immobilis furtum admitti nequeat §. 7. *insit. de usucap.* Novum tamen in jure non est, ut sine ablatione furti aliquis conveniri possit: eo jure utimur adversus eos, quorum ope, consiliove furtum admittitur §. 11. *h. r.* In furto etiam usus furtum sine rei amotione consistit. Neque vero contrectatio qualiscumque furtum constituit: ea esse fraudulosa debet, & conjuncta cum animo faciendi lucri. Si cui igitur contumeliæ causa gladius auferatur, non furtum quidem, sed injuria censetur admissa *l. 39. ff. ad l. Aquil.* Inde etiam fit, ut in extremo vitæ periculo constitutus modicum quid subripiens vitæ tuendæ causa fur videri non debeat. In dominio enim constituendo mortales extremam necessitatem præsumendi sunt excepsisse Grot. *de jur. bell. & pac.* 2. 2. 6. Hinc in poenitentiis luendis jus Pontificium cum eis benignius agi jussit, qui

ex famis necessitate furantur *c. 3. X. de furt.* Denique neque ipsa fraudulosa contrectatio furtum est, nisi & invito domino ea fiat. Proinde si quis credat invito domino re commodata se uti, id ipsum tamen domino volente fiat, is furti nomine frustra convenietur §. 8. *h. t.* Tantum adversus veterum auctoritatem Justiniano placuit, ut, qui sollicitat servum alienum, ut quid domino subripiat, si concedente domino servus sollicitatori quid deferat, non furti tantum, sed & servi corrupti sollicitator conveniri possit. Id enim si impune foret, alii servi ad malum procliviores facile corrumpi possent *l. 20. C. de furt. & serv. corrupt.*

VI. Quod addit in definitione Imperator *vel ipsius rei, vel usus ejus, possessionisve*, id quidem suggerit, furtum tripliciter fieri posse, prout vel rem ipsam, vel ejus usum, vel possessionem fur intervertat. Primo igitur furtum admittitur, si res ipsa subripiatur invito domino. Ita autem furtum censetur admissum non solum in pretiosis, sed in minimis quoque rebus. Hinc & gallinæ furtum fieri posse dicitur §. 16. *de rer. divis.* Cum tamen furti damnatum tacite sequatur infamia *l. 63. ff. de furt.* incivile crediderim, ut ob rem minimi pretii subreptam furti actio instituatur. Alias & qui pilum clepsit, & si quid minus pilo est, famam amitteret. Igitur in ea specie potius in factum, quam furti actio videtur instituenda. Vid. Bynkershoek. *observat.* 1. 3. Deinde furtum admitti potest nudum rei usum intervertendo. Proinde & creditor, & depositarius furti tenentur, si re credita, aut deposita utantur §. 6. *h. t.* Idem ibi pronunciat Imperator de omnibus generatim, qui rem

utendam accipiunt, atque alium inde usum percipiunt, quam cujus gratia eam acceperint. Ita furti damnatum hominem memorat Gellius, qui jumentum aliorum duxerat, quam quo utendum acceperat *noct. Att. 7. 15.* Denique & simplici possessione intervertenda furtum frequenter admittitur. Ita furti reus est debitor, qui rem pignori traditam creditori subripit §. 10. *h. t.* Furti etiam scribit Paulus teneri eum, qui rem speciali hypothecæ suppositam alteri vendit *l. 66. ff. de furt.* Cum tamen in ea specie nulla intercipiatur creditori possessio, rectius fortasse cum Ulpiano constitues, id agentem in stellionatum incidere *l. 3. §. 1. ff. de stellion.*

VII. Quod ad furti poenam, ea pro temporum, & furtorum diversitate diversa olim apud Romanos fuit. Principio furta divisere veteres in *nocturna*, & *diurna*. Utraque diviserunt adhuc in *manifesta*, *nec manifesta*, *concepta*, *oblata*, *prohibita*, *non exhibita*. Verum postrema quatuor diversæ potius furti actiones, quam diversa furtorum genera videri debent, ut passim docent interpretes. Et furta quidem nocturna severius coercuere Romani. Jus enim Atticum sequuti fortasse Decemviri nocturnos fures impune occidi voluerunt Macrobius *Saturn. 1. 4.* Verum emollitis Romanorum moribus atrocior illa duodecim tabularum poena videtur exolevisse. Siquidem apud Collatorem legum Mosaicarum, & Romanarum *tit. 7.* testatur Ulpianus, nocturni furis occisorem lege Aquilia pulsari potuisse; quod si, cum fur posset adprehendi, eum dominus maluisset occidere, & lege etiam Aquilia (Aquiliam pro Cornelia aliud agenti Ulpiano ibi excidisse, late probat Noodt ad *l. Aquil.*

quil.c.5.) in ipsum agi licuisse. Proinde duodecim tabularum rigor hodie tantum in agris obtinet. Cum enim major in agris sit grassandi copia, noturnum in agro furem impune occidi permisere Principes *in l. 1. C. quand. lic. unicuiq. fin. judic. se vindic.*

VIII. Ad fures diurnos quod attinet, ii vel manifesti, vel nec manifesti furti argui olim poterant. Manifestus fur est, quem Greci *ἐν αυτοφωρίᾳ* dicunt. Ejusmodi autem fur esse censebitur, non solum si in ipso loco furti deprehendatur, sed & si cum re furtiva videatur seu a domino, seu ab alio quolibet, antequam in locum destinatum rem furtivam detulerit §. 3. *h. t.* Quid sit furtum nec manifestum, facile hinc intelliges. Fures igitur manifesti, si pubertatem jam excessissent, Decemvirali jure virgis cæsi noxæ dedi jubebantur illis, quorum res subripiissent, iisque in servile ministerium addicebantur. Cum servis furti manifesti reis severius actum. Virgis enim antea & ipsi cæsi de rupe Tarpeja Decemvirali carmine dejici jubebantur Gell. *noct. Attic. 11. 18.* Sed manifesti fures occidi etiam impune poterant, si telo se defenserent, modo, qui eum occisurus esset, *quiritaret* prius, seu fidem Quiritium imploraret Cic. *pro Mil. 3.* Cum furibus non manifestis mitius actum: eos enim Decemviri duplo tantum damnarunt Gell. *loc. cit.* Et in furto nec manifesto quidem eadem poena posteritati placuit. Secus tamen de furto manifesto visum. Ex quo enim lex Porcia cives Romanos verberari vetuit; lex vero Pætilia Papiria eosdem noxæ causa adduci prohibuit, fures manifestos quadruplo tantum multari jussit edicto Prætor §. 5. *h. t.* Duplum tamen, aut quadruplum poenam tantum

pro diversitate furti complectebatur. Præter hanc poenam ad rem ipsam recipiendam, aut pretium, actori supererat adhuc vindictio, vel furtiva condictio. Et vindictio quidem adversus possessorem competit, seu tertius aliquis, seu fur ipse rem furtivam possideat. Condictio vero dabitur tantum adversus furem, ejusve heredem, licet res furtiva possideri desierit §. 19. *h. t. C. l. 9. ff. de condict. furt.*

IX. Quod ad actiones furti concepti, oblatis, prohibiti, non exhibiti, eæ quidem occasione furti non manifesti invaluerunt apud Romanos olim; pridem tamen ante Justiniani ævum eædem exoleverunt. Verum de ipsis aliquid delibemus, oportet, ne quid ignoretur antiqui juris. Actio igitur furti concepti dabatur adversus eum, apud quem, testibus præsentibus, ritu solemni res furtiva foret inventa, licet ipse furtum non admisisset, modo ex ejus scientia fur in ipsius ædibus furtum deposuisse diceretur. Id igitur si factum esset, receptus ritus concipiendi, seu inveniendi furti in alienis ædibus is fortasse fuit. Qui alienam domum ingrederetur furti concipiendi causa, eo nudus intrabat. Ne tamen is corporis habitus inventori pudori foret, lancem, ne agnosceretur, in facie præferebat; ob mulierum etiam reverentiam licio inguen præcingebatur. Atque id ipsum furtum videtur esse, quod *per lancem & licium concipi* dixere Decemviri. Vid. Fest. in *voc. lance*, & Heinecc. in *antiquit. Rom. h. t.* Si igitur in alienis ædibus ita furtum conceptum esset, Decemvirali carmine, ut ipsum furtum manifestum, puniri jubebatur. Veterum tamen rigorem mollivit edicto Prætor, tripli poena in ejusmodi furto constituta Gell. *noct. Attic.*

Attic. 11. 18. Ex furto concepto facile intelligitur, cujusmodi fuerit actio furti oblata, prohibiti, non exhibiti. Furti enim oblata actio dabatur adversus eum, qui in alienis ædibus rem furtivam deposuisset, ne apud se conciperetur: ejus poena & triplum erat, ut memoriæ proditum ibidem a Gellio. Actio furti prohibiti dabatur adversus eum, qui per lancem & licium apud se furtum concipi prohibuisset. Furti denique non exhibiti actio prodita erat adversus eum, qui rem furtivam apud se conceptam domino non exhibuisset. Hæ quoque actiones civiles erant, nec dupli poenam excessisse videntur. Sed hæc hodie frustra quærentur, cum furti concepti accessiones sint; furti autem concepti pridem ante Justiniani ævum agi desitum. Jure tamen novissimo, qui rem furtivam receptant, aut celant, actione furti non manifesti conveniri poterunt §. 4. *h. t.*

X. Si ob furtum civiliter ageretur apud Romanos olim, præsto adversus furem erat & actio furti, qua poenam dupli, vel quadrupli repetebat actor; & vindicatio, vel furtiva condictio ad rem ipsam recipiendam, aut pretium. Longe tamen intererat inter furti actionem, & rei furtivæ vindicationem, condictionemve. Nam rei vindicatione quidem, vel condictione solus dominus experiri poterat §. 19. *h. t.* Quod enim ad vindicationem, cum ea profueret ex jure domini, & actio in rem esset, absurdum fuisset, a non domino eam institui *l. 23. ff. de rei vindic.* Condictio vero juribus tantum personalibus persequendis instituta, & ad rem furtivam repetendam præter regulas juris accommodata uni domino indulgenda erat. Contra quod ad furti actionem alio jure usi sunt

sunt veteres. Eam enim generatim omnibus competere voluerunt, quorum interesset, rem salvam esse. Proinde ipsi domino non competet furti actio, si ejus non intersit, furto rem periisse §. 13. *h. r.* Furto autem rem periisse domini haud interest, si præsto sit ei ex contractu actio ad rem ipsam, pretiumve recipiendum. Cum igitur adversus commodatarium dominus salvam habeat commodati actionem, & ipsius commodatarii intersit, furtum non fieri, ob culpam levissimam in ejusmodi contractu a se præstandam, re commodata subrepta, furti actio non domino, sed commodatario competet §. 16. *h. r.* Eadem de causa si furto perierint vestes sarcinendæ sarcinatori traditæ, actione furti non dominus, sed sarcinator experietur, saltem si solvendo sit sarcinator §. 15. *h. r.* Idem juris erit, pignore creditori subrepto: qua quidem in specie ea quoque de causa dari actionem creditori placuit, quia ad pecuniam consequendam tutius creditori est, pignori incumbere, quam mox sequi lites, & in personam debitoris agere §. 14. *h. r.* Licet autem alias eis dupli, vel quadrupli poena cedat, quibus competit furti actio *l. 6. ff. locat.* singulare tamen in creditore est, quod is poenæ nomine acceptam pecuniam in debitum imputare debet *l. 22. ff. de pignor. act.* Sed desino de his ego plura, cum furtum hodie publicum sit in Regno crimen, & actio civilis in duplum, aut quadruplum actori applicandum patriis moribus sit explosa.

XI. Adversus fures non tantum civiliter, sed extra ordinem criminaliter etiam veteres agi posse voluerunt; quin adversus fures criminale judicium frequentius institui solitasse saltem ab Ulpiani ævo, testatur Ulpianus ipse *in l. 92. ff. de furt.*

furs. In criminali tamen furti iudicio nulla certa poena constituta fuit. Proinde arbitrio ejus, qui jurisdictioni criminali præerat, pro diversitate furti reum plecti oportebat. Ei cognitioni præfuisse videtur Præfectus Urbi, si fur civis esset *l. 56. ff. eod.* Nam si servus eo nomine impeteretur, potius ad Præfectum Vigilum eam quaestionem pertinuisse crediderim: eum autem adversus servos genus mortalium furacissimum extremum etiam aliquando supplicium decrevisse constat ex *l. 15. ff. de condict. caus. dat. caus. non sequunt.* Verum humanior more suo Justinianus adversus fures capitale supplicium decerni vetuit *novell. 134. c. ult.* Igitur jure civili novissimo furtum capite non luitur. Fridericus tamen Ænorbarbus adversus fures atrocius agi voluit. Si enim furtum pertingeret ad quinque solidos, fures laqueo puniri jussit; si minus, excoriari *2. feud. 27.* Sed his omis-
sis de jure patrio videamus.

XII. Quamdiu in Regno Neapolitano Romanæ leges obtinuerunt, integrum fuisse videtur a-
ctori, adversus fures seu civili, seu criminali ju-
dicio experiri. Ubi tamen pleræque hujus Regni
Regiones Longobardis cessere, ex jure Longobar-
dorum adversus fures tantum criminali iudicio vi-
detur actum. Jus autem Longobardicum fures
atrocius coerceri jussit. In Longobardicis enim
cautum comperio, ut fures ob primum furtum
oculo multarentur, ob secundum naso, ob tertium
mortem subirent *l. si quis latro. in Longobard. de
furr.* Ubi apud nos regnari coeptum, & ex diver-
sis Provinciis Regnum Neapolitanum coaluit, an-
te Carolum Primum Andegavensem nulla lex ge-
neralis in Regno de furtis videtur edita. Is au-
tem

tem primus ad furum audaciam coercendam generali lege constituit, ut fur infra augustalem fustibus cæsus, & in fronte signatus a tota Provincia exul esse juberetur. Si furtum ultra augustalem, sed infra unciam esse diceretur, furi manum detruncari jussit. Quod si quis ultra unciam furatus esse argueretur, vel de pluribus furtis licet minimis convictus esset, siquidem obscuri nominis is foret, suspendio, si nobilis, more nobilium interfici voluit *cap. ad hoc. 10.*

XIII. Jam vero præsens Caroli I. capitulum statim executioni mandatum videtur in Regno. Tantum sub Philippo II. placuit, ut fures non in fronte quidem, sed equi candenti solea signarentur in scapulis *pragm. 12. de empt. vend.* Verum haud ita multo post a pragmaticis disceptari coeptum, an lex isthæc Caroli saluberrima, ac furtorum omnium veluti everriculum, in Regno servanda foret. In eam vero sententiam a plerisque itum, illam servari oportere, ubi furtum admissum esset *cum aliqua aggravanti qualitate*, quam vocant, Tapia *jur. Regn. libr. 5. tit. 19. n. 13.* Alias iniquum censuere complusculi, ut ob unciam fortasse subreptam pensilis quis cernatur vulturum, & corvorum cibus. Ita evaluit apud criminalis juris interpretes furti divisio in *simplex*, & *qualificatum*. Simplex vocant, si aggravanti qualitate furtum destituatur; qualificatum appellant, si qualitas illa aggravans intercedat. Primum mitius, alterum severius, & ipso etiam extremo supplicio puniendum docent. Eo discrimine semel admissio, recte censuere plerique aggravantem illam in furto qualitatem ex persona, re, loco, tempore, modo etiam dimetiendam esse.

Gra-

Grave ob personam furtum videbitur, si famulus patrifamilias, viator quid cauponi subripiat. Ob rem ipsam subreptam furtum grave censebitur, si res sacra subripiatur, si pecunia publica interceptiatur, si pecudes abigantur, si liberi homines supprimantur, quæ quidem furta ipsi veteres capite plerumque lui voluerunt. Ratione loci furtum grave videri debet, si rei profanæ sit quidem illud, fiat tamen in loco sacro, cujusmodi furtum ipsum jus civile severius puniri jubet *l. 16. ff. de pæn.* Ob tempus ipsum furtum videri debet atrocius, si noctu, si in incendio, tumultu fiat. Denique modus ipse furtum exasperabit, si ritu directariorum fiat, si claustris fractis, si pariete perfosso, si vectibus, aut clavibus admittatur adulterinis. Vid. Anton. Matth. *de crimin. ad libr. 47. ff. tit. 1. c. 3.*

T I T U L U S II.

De vi bonorum raptorum.

ALtera delictorum privatorum species rapina est. Inter eam & furtum id interest, quod per furtum sine vi, & clanculum, per rapinam violenter, & propalam alienæ res auferuntur. Nemo furcifero illo Thesprione melius id discrimen explicat apud Plautum *epidic. act. 1. sc. 1.*

Thespr. *Minus furtificus sum, quam antehac.*

Epidic. *Quid ita? Thespr. Rapio propalam.*

Proinde rapinæ delictum est eo gravius, quo aperta vis est infestior, & præ clandestina rerum subreptione in publicum pejoris exempli. Et in jure Decemvirali quidem nulla usquam rapinæ mentio:
ne-

neque enim quemquam eo audaciæ progressurum credidere Decemviri, ut aperta vi civibus res suas auferre meditaretur. Verum enimvero ubi a veteri sanctitate Romæ descitum, & a pessimis mortalium grassari rapinis impune coeptum, opportune Prætor ita cavendum edicto censuit. *Si cujus dolo mala bona rapta dicentur, in eum, qui id fecisse dicatur, intra annum, quo primum de ea re experiundi potestas fuerit, in quadruplum, post annum in simplum judicium dabo l. 2. princ. ff. de vi bon. rapt.* Intra annum igitur actionem quadrupli adversus raptorem institui concessit edicto Prætor; post annum tantum in simplum. Proinde si post annum actum adversus raptorem esset, nil ultra rem raptam, ejusve pretium is restituere compellebatur. Sed licet intra annum actio isthæc adversus raptorem instituta foret, quadruplum non totum poenæ nomine præstabatur; nam triplum tantum solvebatur poenæ causa, simplum rem ipsam raptam pensabat *princ. inst. h. t.* Quapropter mirari subit, cur cum raptore Prætor tam indulgeret egerit, eumque, quem furem longe improbiorem videri oportebat, punierit præ fure manifesto mitius. Non aliud pro Prætor affertur potest, quam cum in Martia Civitate in rebus quoque judicialibus Quirites ad bellicam virtutem incendere voluisse. Minorem enim fortasse poenam præ furto manifesto in rapina Prætor constituendam censuit, ut cives potius vim vi propulsare coeptarent, quam segnes sibi res suas eripi paterentur. Eo accedebat, quod, cum rapina, omnis furtum quoque manifestum plerumque complecteretur, liberum actori erat, furti etiam manifesti adversus raptorem agere, atque ita præter rem ipsam raptam quadruplum etiam

iam poenæ nomine consequi *l. 2. §. 10. ff. de vi bon. rapt.*

II. Rapina, ut furtum ipsum, sine dolo malo consistere nequit. Quemadmodum igitur furti nemo tenetur, nisi qui dolo malo, & lucri faciendi causa rem alienam contrectet, ita, ut rapinæ nomine quis recte conveniatur, dolo malo grassari debet, & rem alienam esse non ignorare. Proinde si quis se rei dominum falso existimans possessori per vim eam eriperet per errorem putans, jus esse domino a possessore quovis modo rem suam auferre, de vi bonorum raptorum frustra conveniebatur olim *l. 2. §. 18. ff. de vi bon. rapt.* A dolo enim quævis ignorantia juris excusare videbatur, ut recte post Bartolum doctores adnotant ad *l. un. ff. si quis jus dic. non obtemp.* Cum tamen sine vi, & tumultu inter cives agi oporteret, & aliunde cum pessimi homines facile de rapinis excusare se possent regerendo, se rem raptam suam existimasse, sapienter edixere Principes, ne eo obtentu quispiam animum ad rapinas appelleret. Proinde hodie si quis rem suam existimans eam per vim possessori auferat, siquidem sit ea sua, eam raptor amittet; si vero sit possessoris, præter rem ipsam ejus quoque pretium possessori restituere compellitur *§. 1. h. t.* Licet autem in solis mobilibus rapina alias committi queat, eandem tamen poenam in invasionibus, quæ circa res soli fiunt, Principes servari voluerunt *l. 7. C. und. vi.* Sed remissior nostrorum temporum disciplina hanc poenam vix præstari patitur.

III. Civilem autem rapinæ actionem instituire possunt generatim omnes, quorum ex bonis res rapta fuerit *§. 2. h. t.* Ex bonis hic ea intelliguntur

tur esse, quorum, licet aliena sint, vel emolumentum, vel usus, vel periculum saltem ad nos pertinet *l. 2. §. 2. ff. de vi bon. rapt.* Proinde de vi bonorum raptorum non tantum dominus recte aget, sed & bonæ fidei possessor, fructuarius, commodatarius, creditor, conductor, & interdum etiam depositarius ipse, si in re deposita culpam repromississe dicatur *d. l. 2. §. 23. C. sequ. ff. cod.* Quapropter recte Tribonianus statuit, rapinæ nomine experiundi jus esse generatim omnibus, quibus, re clam subrepta, actione furti alias experiri licet *§. 2. h. t.*

IV. Jure civili adversus raptores extra ordinem criminaliter etiam licet agere. Cum enim generatim definiat Juriconsultus in *l. ult. ff. de privat. delict.* posse reum in privatis delictis vel civiliter conveniri, vel extra ordinem accusari, nil sane proferri potest, cur id ad rapinam etiam extendi non debeat. Si igitur adversus raptorem ita actor experiretur olim, pœna arbitrio judicis irrogabatur levior, aut gravior pro atrocitate facinoris. Gravissime de iis statutum comperio, qui sæpius, & ferro grassabantur; ii enim & capite puniri solebant *l. 28. §. 10. ff. de pœn.* Sed & adversus raptores jure Romano cum accusatione extraordinaria non solum concurrebat judicium publicum legis Julię de vi privata, si sine armis quid raptum fuerit *l. 3. ff. ad l. Jul. de vi privat.* sed publicum quoque judicium legis Julię, si armis quid raptum dicatur *l. penult. ff. ad l. Jul. de vi publ.* Priori casu tertia pars bonorum rei publicabatur *l. 1. ff. ad l. Jul. de vi privat.* posteriori in specie raptores capite plectebantur *d. l. penult. ff. ad l. Jul. de vi publ.* Denique adversus raptores institui quo-

quoque potest publicum iudicium legis Corneliæ de sicariis, si rapinæ sit admixta cædes, aut rapinæ faciendæ causa cum telo quis ambularit *l. 1. ff. ad l. Cornel. de sicar. C. l. 2. C. 3. C. eod.*

V. In Regno Neapolitano rapina inter publica crimina perpetuo relata videtur . Severissime apud nos cum raptoribus agi iussit Carolus I. Andegavensis *cap. 28.* Ibi enim cautum a providentissimo Principe, ut pro prima rapina vir ignobilis fustibus cæsus rei raptæ triplum fisco solveret, vim passo duplum : si id præstare non posset, in fronte raptorem signari voluit . Pro secunda vero rapina viro ignobili manum, aut pedem amputari iussit . Pro tertia denique ignobiles quidem furcis, nobiles vero capite multari cavit . Severissime omnium apud nos eos puniri placuit, qui nocturno tempore adversus ambulantes per principem Regni Urbem, ejusve suburbia rapinis grassantur . Il enim capite plecti jubentur *in pragm. 1. de furt.* Verum fluxa nostrorum temporum disciplina hanc pœnam irrogari vix patitur . At vero per criminale iudicium adversus raptorem institutum ipsius rei raptæ vindicationem, aut conditionem non amittit actor . Publico enim iudicio fiscus pœnam a raptore poscit ; vindicatione, vel conditione persequitur rem suam actor . Tralatitium autem in jure est, per actiones pœnæ persequutorias actiones rei persequutorias perimi non oportere, ut infra liquebit . Juris igitur regulis conformis est Roberti constitutio *in cap. 216.* ubi adversus raptores, aut fures non tantum infligi pœnam, sed ad rei quoque restitutionem eosdem urgeri iussit .

T I T U L U S III.

De Lege Aquilia.

Tertia delictorum privatorum species damnum respicit injuria datum, illatum scilicet facientis dolo, vel culpa. Ejusmodi damnum illatum videbitur, si rei contingat interitus, vel corruptio nullo cum lucro ejus, qui damnum intulit. Id factum censebitur, si quis alienum servum, aut pecudem occiderit, vulnerarit, & generatim si quis alienum quid ufferit, ruperit, fregeritve. Ita autem damnum illatum cum ipso Decemvirali jure, tum aliis fortasse legibus sub libera Republica latis ante ipsam legem Aquiliam vindicatum docet Ulpianus ipse *in l. 1. ff. ad l. Aquil.* Diserte enim ibi Jurisconsultus scribit, legem Aquiliam derogasse qua duodecim tabulis, qua aliis legibus, si quæ ante illam de damno injuria dato latæ fuerunt. Verum quid de damno injuria illato cautum carmine Decemvirali fuerit, vix in tanta literarum luce constat eruditis hodie. Vero haud absimile plerique putant, naturalem simplicitatem sequutos in ea re Decemviros nudam damni dati præstationem per eos fieri jussisse, qui damnum intulissent dolo, vel culpa. Quas tamen in eam sententiam conjecturas afferunt ex discriptis apud Festum verbis *in voc. rupitias, & sarcito*, leviusculæ mihi visæ sunt semper. Melioris notæ non videtur esse Jacobi Gothofredi sententia *in fragm. 12. tabular. tab. 7.* Is enim ibi nullo sat firmo argumento statuit, distinxisse Decemviros inter damnum injuria, & casu datum. Primo enim ejus discriminis apud veteres nulla vestigia; deinde vix cui-

cuiquam adprobari queat, damnum etiam casu illatum vindicatum esse Decenviros. Longe majores sunt tenebræ de aliis legibus, quas de damno injuria fortasse latas ante legem Aquiliam Ulpianus tradit. Cum tamen ipsis per legem Aquiliam derogatum Ulpianus scribat, de iis parum solliciti legem Aquiliam unice enarrabimus.

II. Principio satis constat, legem Aquiliam plebiscitum fuisse. Id diserte ab Ulpiano proditum in *l. 1. §. 1. ff. ad l. Aquil.* Falso tamen statuere quidam, ejus latorem fuisse Cajum Aquilium Gallum solertissimum illum formularum artificem. Cajo enim Aquilio Gallo legem Aquiliam vetustiore esse, facile constare queat ex *l. 31. C. 27. ff. eod.* Ibi enim Brutus, & Quintus Mucius legis Aquiliæ laudantur interpretes. Atqui Brutus quidem floruit pridem ante Aquilium Gallum; Quintus vero Mucius ipsius Aquilii Galli præceptor fuisse traditur in *l. 2. §. 39. C. sequ. ff. de orig. jur.* Stet illud igitur, de legis auctore, & ætate vix certi quidquam definiri posse. Unum id constat, eam inter antiquissimas referri oportere, ejusque tamquam sat antiquæ meminisse Ciceronem ipsum in *Brut.* 34. Ejus vero legis tria fuisse capita, ex præsentī institutionum rubrica plerique colligunt. Verum solide videtur ostendisse Noodt. *ad l. Aquil.* c. 1. ejus capita fuisse compluscula, ut proinde operam ludere videantur illi, qui magno molimine quærunt, quid illud tandem fuerit, quod secundo legis Aquiliæ capite cavebatur, & ætate sua exolevisse scribit Tribonianus §. 12. *h. t.* Harriolationibus igitur omīssis interpretum, tantum de primo, & tertio legis Aquiliæ capite sermonem instituemus, quæ duo hic Tribonianus exequitur.

III. Primo igitur legis Aquiliæ capite cavebatur, ut qui servum alienum, alienamve pecudem injuria occideret, quanti plurimi in anno proximo res fuisset, tantum æris is domino dare damnaretur. Id legis caput videtur ita posse restitui sub ductu Caii in *l. 2. ff. h. t. Qui servum, servamve, alienum, alienamve, quadrupedem, vel pecudem injuria occiderit, quanti id in eo anno plurimi fuerit, tantum æs dare domino damnas esto*. Inconsulto post Hotmanum Noodt. ad *l. Aquil. c. 2.* apud Cajum legi jubet *quadrupedemve pecudem*. Primo enim absurdum fuisset pecudi quadrupedem addere; quasi vero in præsentī argumento pecus effingi queat, quæ quadrupes non sit. Deinde latorem legis ita loquutum oportuit, ut ejus consilium recte Quirites intelligerent. Nimirum, ubi proprie loquuti sunt veteres, quadrupedes appellaverunt animalia, quæ dorso, aut collo domarentur; pecudes dixerunt, quæ pascerentur gregatim. Proinde cum non solum quadrupedum, sed & pecudum cædem Aquilius arcere vellet, in lege utraque separatim expressit. Non igitur animalium omnium cædem coercebat primum legis Aquiliæ caput, sed eorum dumtaxat, quæ dorso domarentur, aut collo, quæve pascerentur gregatim. Inde factum intelles, cur addubitarint veteres, an sues in pecudum numero habendæ forent. Id ipsum tamen affirmarunt prudentiores. Sues enim omni ævo gregatim pasci consueverunt, idque Marcianus ipsius Homeri auctoritate firmasse traditur §. 1. *h. t.*

IV. Jam vero servum, servamve, quadrupedem, vel pecudem injuria occidi vetat Aquilius. Injuria occidere intelligitur, qui nullo jure occidit §. 2. *h. t.* Proinde, qui aggressorem occidit, Aquili-

Aquilæ reus non erit. Neque dolum tantum sed & culpam Aquilius in iudicium vocari iussit §.3. *h. t.* Quapropter si medicus servum alienum imperite secuerit, eive perperam medicamentum dederit, is Aquilia lege tenebitur §. 7. *h. t.* Licet enim artis ignorantia per se culpa careat, culpæ tamen est illi, qui ejus peritiam profitetur. Verum hodie imperitia medicorum raro in iudicium vocari solet, & unis ipsis fortasse impune licet occidere. At vero ob nudum casum, a quo culpa absit, cuiquam calumniam Aquilius fieri vetuit; actionem competere iussit, si præter casum culpa quoque concurreret *d. §. 3. h. t.* Hinc si vehementius in ludendo percussa pila in tonforis manum dejecta fuerit, eoque ictu præcisa sit gula servi, quem radebat tonfor, Proculus in iudicium vocari posse tonsorem existimavit, si is ibi radebat, ubi ludi solitabat *l. 11. princ. ff. h. t.* Ex lege enim Aquilia culpa vel levissima in iudicium vocari poterat *l. 44. ff. eod.* Quod tamen diximus, occiso servo, culpam quoque levissimam in iudicium vocari potuisse, id quidem obtinebat tandem, si ex lege Aquilia civiliter ageretur. Si enim ob servi cædem criminaliter ex lege Cornelia de sicariis actum esset (id enim domino licebat, nec privatum legis Aquilæ iudicium impedimento erat, quominus criminaliter etiam occisor servi conveniri posset §. 11. *h. t.*) ne lata quidem culpa sufficiebat, ut publicum legis Corneliæ iudicium posset institui. Lex enim Cornelia tantum dolum in iudicium vocari iussit, & per eam lata etiam culpa pro dolo non habebatur *l. 7. ff. ad l. Cornel. de sicar.* Hinc facile mihi persuaferim, nudam culpam in lege Aquilia non verum delictum, sed quasi delictum censuisse

veteres . Vid. quæ latius infra differam *tit. 5. §. 1.*

V. Cum vero lex Aquilia præstari jubeat , quanti res anno proximo plurimi fuerit , qui servum occidit , non tantum damnas est solvere , quanti tempore cædis is erat , sed quanti eo anno plurimi fuit §. 9. *h. r.* Annus retrorsum computari debet , numeratis trecentis sexaginta quinque diebus a die cædis . Proinde si pollex superiori mense præcisus servo pictori fuerit , idemque hodie occidatur , damnum tanti æstimabitur , quanti is fuisse dicetur , antequam artem cum pollice amisisset *l. 23 §. 3. ff. eod.* Inde liquet , pœnalem hujus legis actionem esse . Licet enim aliquando ultra damnum illatum lis non æstimetur , idque contingat , si , retrorsum numerato anno , majoris pretii res non inveniatur ; sufficit tamen , ultra præsentem æstimationem aliquando procedi posse , ut actio pœnalis existimetur . Proinde , cum generatim heres non succedat in pœnam , nisi lis cum defuncto contestata jam fuerit , jure Romano actio ex lege Aquilia in heredem non datur *d. l. 23. §. 8. ff. eod.* Cum tamen apud nos hodie ex recepta fori sententia in ejusmodi cædibus tantum præstari soleat , quanti cædis tempore res fuerit , in Regno Neapolitano , ut passim alibi , actio isthæc non videtur pœnalis esse ; proinde in heredem etiam dari debet . Verum viget apud nos hodie , quod ex legis Aquiliæ interpretatione placuisse dicitur §. 10. *h. r.* Jurisconsulti scilicet sententiam legis sequuti non solum perempti corporis æstimationem præstari voluerunt , sed & quidquid ejus occasione domino damni foret illatum . Proinde si quis servum tuum ab alio heredem scriptum occiderit , antequam is jussu tuo adierit hereditatem , amissæ etiam hereditatis ratio

ratio in æstimationem veniet *d. l. 23. §. 6. ff. eod.* Item si quis ex quadriga equorum unum occidat, non solum occisi equi æstimatio iniri debet, sed computandum est etiam, quanti depretiati sint reliqui, qui supersunt *d. §. 10. h. t.*

VI. Lex autem Aquilia de cæde servi, non vero hominis liberi lata fuit. Cum enim damni præstationem ea complecteretur, ad cives legem extendi non oportebat, qui neque domino suberant, neque ullam æstimationem recipere posse credebantur *l. 13. C. 36. §. 1. ff. ad l. Aquil.* Id ipsum in cæde filiifamilias servatum oportuit. Licet enim is in patris dominio Quiritario videretur esse, civis tamen erat, & caput liberum aliorum intuitu. Quod tamen ad impensas medicinæ, & medicorum mercedes pertinebat, operasve, quibus pater cariturus erat, occiso filio, patri utilis actio ex mente legis data videtur. Id sane cum Ulpianus probet in filio vulnerato ex tertio legis Aquiliæ capite *in l. 5. §. ult. ff. eod.* non video, cur ad filium quoque occisum extendi non oportuerit. Verum, conjecturis omissis, sententia isthæc certi juris fuisse videtur ab ipsis Hadriani temporibus. Is enim comprobavit decretum Egnatii Proconsulis, qui eum, qui sine dolo gnatum alienum occiderat, non solum Provincia per quinquennium interdixit, sed & parenti pauperi duo millia persolvere iussit, ut constet ex *collat. leg. Mosaic. C. Rom. tit. 1.* Sed & Constantinus Porphyrogenneta *in novell.* περὶ τῶν φονευδύτων ex homicidæ bonis ad Ecclesiam confugientis trientem præstari voluit monasterio, quod ingredi homicida vellet, trientem familiæ occisi, trientem denique ipsius occisoris liberis. Recte igitur hodie homicidæ non solum

capite plectuntur, sed & suorum bonorum pars familiæ occisi addici solet. Recte enim observat Michael Ephesius *Nicomach.* 5. quæ uxor, liberi, cognati capiunt ex homicidæ bonis, ipsum occisum videri capere. Vid. Noodt. *ad l. Aquil. c. 2.*

VII. Tertium legis Aquiliæ caput conceptum erat in eos, qui non occidissent quidem servum, aut pecudem, sed eum, eamve quoquo modo læsissent, aut occidissent, vulnerassentve animal, quod quadrupedum, pecudumve numero non contineretur, aliove quo modo rem alienam deteriore fecissent urendo, frangendo, corrumpendo. Ipsa hujus capitis verba ita Ulpianus exhibet *in l. 27. §. 5. ff. ad l. Aquil. Ceterarum rerum præter hominem, & pecudem occisos, si quis alteri damnum faxit, quod usserit, fregerit, ruperit, quanti ea res erit in diebus triginta proximis, tantum æs domino dare damnas esto.* Verbum *ruperit* legislator adhibuit, ut ejus vocabuli ambitu omne genus damnum complecteretur. *Ruprum* enim dicebant veteres, quicquid quoquo modo corruptum esset. Proinde non solum fracta, aut rupta, sed & scissa, & collisa, & effusa, & quovis alio modo perempta, aut deteriora facta, eo vocabulo contineri credebantur. Quapropter hoc legis capite eum quoque teneri placuit, qui in alienum vinum, aut oleum quidquam immiscuisset, quo eorum naturalis bonitas corrupta foret §. 13. *h. t.* At inquit fortasse quispiam, si ea omnia complectatur rupti vocabulum, quid legislatorem oportuit ei præponere geminatum illud *usserit, fregerit*? Id ego quidem intelligo; verum novum in jure non est, ut, specialibus quibusdam enumeratis, generale verbum subjiciatur, ut omnes casus

casus, qui quandoque inciderint, comprehendantur. Hoc ipsum in præsentī lege factum observat Ulpianus in l. 27. §. 16. ff. ad l. Aquil. Damni autem æstimationem in tertio legis capite fieri placuit, quanti res fuisset in diebus triginta proximis. Retrorsum igitur a die corruptionis, aut vulneris numeratis triginta diebus, reus tantum præstare jubebatur, quanti plurimi intra id temporis res fuisset. Licet enim vocabulum *plurimi* legislator in tertio capite non adjecisset, Jurisconsulti tamen æstimationem perinde faciendam existimarunt, quasi id fuisset adjectum §. 15. h. t. Præsens autem legis caput servum, quadrupedem, pecudem, aut bestiam vulneratam ulciscitur: vulneratus igitur homo liber directam ex hac lege actionem habere non videbatur. Eidem tamen ex hac lege utilis actio data fuit, qua non corporis vulnerati quidem æstimatio, cui civis subesse non videbatur, sed operæ saltem amissæ, & ob vulnus impensæ factæ peterentur l. 13. ff. ad leg. Aquil.

VIII. Si ob damnum illatum civiliter ex lege Aquilia agatur, inde tres actiones competere posse docet Tribonianus vocabulo quidem diversas, ejusdem effectus tamen, *directam* scilicet, *utilem*, eamque, quam *in factum* vocari jubet §. 16. h. t. Directa hic actio est, ut generatim alias, quæ oritur ex verbis legis: ea autem in præsentī argumento competet, si quis suo corpore, & corpori damnum dederit, veluti si quis gregem alienum trucidet. Utilis actio ibidem est, ut passim alias, quæ non a verbis quidem, sed ex mente legis per interpretationem facile deducitur. Ea vero ex præsentī plebiscito competet, si quis damnum quidem corpori, non suo corpore tamen attulerit. In
eum

eum igitur ea instituetur, qui servum alienum incluserit, ut fame necaretur, jumentumve alterius ita vehementer egerit, ut rumperetur. Actionem in factum ex lege Aquilia nasci scribit Tribonianus, si ea neque a verbis, neque aperte ab ipsa legis mente descendat, sed remotiori aliqua consequentia ex ea deducatur. Id autem fieri docet, si neque corpore damnum fuerit illatum, neque corpus sit læsum, sed alio quoquo modo alicui damnum contigerit. Exemplum in eo affert, qui intempestiva misericordia ductus alienum servum compeditum solverit, ut is fugam arriperet. Per Tribonianum igitur actio isthæc in factum ab actione utili diversa est. Verum haud absurde fortasse contendit Thomasius *in dissert. de Philosoph. jur.* §. 146. discrimen inter actionem utilem, & in factum enatum ex Triboniani cerebro; nusquam autem in jure alias ab actione in factum distingui actionem utilem. Addit vero *in not. ad Strauch. pag.* 256. fraudi Triboniano fuisse male intellectum Pauli locum *in l. 33. §. 1. ff. ad l. Aquil.* Cum enim scribat ibi Jurisconsultus, *in damnis, quæ lege Aquilia non tenentur, in factum datur actio*, falso inde intulit Tribonianus, actionem in factum ab actione utili distinxisse veteres; in factum autem actionem dari oportere, si damnum ex mente legis prohibitum non aperte fuerit, sed remotiori veluti consequentia ex legis sententia prohibitum censi debeat. Thomasio favere videntur *l. 7. §. 3. l. 6.* & passim aliæ *in ff. h. t.* Inde enim sat constat, inter actionem utilem, & in factum vix ullum discrimen agnovisse veteres.

T I T U L U S IV.

De injuriis.

Quarta delictorum privatorum species injuria dicitur. Injuriz vocabulum πολυσημον est apud veteres, & in ipso jure plures notiones habet; in præsentî rubrica tamen pro contumelia accipitur. Ea admîssa videbitur, ut scribit auctor *ad Herenn.* 4. 25. *si aut pulsatione corpus, aut convicio aures, aut turpitudine vitam cujusquam quis violat.* Injuria igitur admîssa intelligetur non solum, si quis sit pugno pulsatus, aut fuste cæsus, sed & si quis ad alicujus infamiam carmen, libellumve composuerit, vulgaritve, aut cujusquam pudicitiam attentarit §. 1. *h. t.* Cuiusmodi injuria sit, eam pati quis potest non solum per semetipsum, sed per liberos etiam, aut uxorem. Maritus igitur, aut pater, uxoris, aut filiorum nomine recte injuriarum agunt. Cum vero facultas agendi ob filiorum injurias tantum ad parentes coerceatur, quorum in potestate sunt liberi §. 2. *h. t.* facile constat, ob patriam ipsam potestatem eo jure parentes usos. Vix tamen intelligi potest, cur idem juris ob uxorum injurias viris ibidem asseruerit Tribonianus, cum Justiniani ævo veteri potestate viri in uxores non uterentur. Verum salva res est. Olim scilicet, cum per usum, & conventionem in manum valescebant nuptiæ, ob uxorum injurias agebant maritali potestate viri. Ubi exolvere nuptiæ iniri solitæ ritu civili, & in virorum potestate uxores esse desierunt, idem juris maritis asseri placuit, ne injurias suas persequuturæ mulieres contra Romano-

no.

norum instituta in publicum prodire cogerentur. Ita mansit conclusio, rejecto principio, quemadmodum stat adhuc vetus prohibitio donationum inter virum, & uxorem, quæ olim ex eadem maritalis potestatis causa deducta fuit. Cum vero olim maritalis, aut patriæ potestatis intuitu parenti, ac viro injuriarum liceret agere, facile quidem intelliges, cur & domino ob servorum injuriam actio isthæc competeret, modo per servos domino injuria facta videretur. Servis enim ipsis, cum inter res Mancipi censerentur, nulla injuria fieri posse credebatur §. 3. *h. t.* Poenæ autem injuriarum pro diversitate temporum diversæ fuerunt olim. Aliud enim Decemvirali jure, aliud Prætoris edicto, aliud lege Cornelia præscriptum erat. Juvabit igitur pro diversitate temporum diversas poenas injuriarum hic sistere.

II. Quod ad primum igitur, injurias non uno modo coercuere Decemviri. Prout enim leviores, aut atrociores essent, mitius, aut severius agi jusserunt. Quod mirum autem videri queat, leviores censuerunt injurias colaphos, depalmationes, & ipsa vulnera, quæ nullius cum membri, aut ossis ruptura conjuncta forent, maledicta etiam, & dicteria, quæ acerbiora non essent. Id vero genus injurias viginti quinque assium poena multarunt. Ea enim poena, ut in tanta pecuniæ raritate, & paupertate veterum, sat ingens videri poterat. Legis carmen ita prostat apud Gellium *noct. Att. 20. 1. Si qui injuriam alteri faxit, viginti quinque aris poenæ sunt.* Contra atrociorē injuriā censuere Decemviri famosum carmen, & acerbiora convicia cum vociferatione facta, quæ *pipuli* vocabulo designarunt. Qui autem aggressi quid

quid ejusmodi forent, eos fustigatione coerceri jussurunt. Ipsa Decemvirorum verba ex Cicerone ita exhibet Augustinus. *de Civit. Dei* 2. 9. *Si qui pulpulo occentassit, carmenve condissit, quod infamiam faxit, flagitiumve alteri, fuste ferito.* Inter atrociores etiam injurias retulere Decemviri membri alicujus, aut ossis fracturam. Et eum quidem, qui membrum aliquod alteri rupisset, ni cum læso de delicto transigeret, talionis poenam subire voluerunt; eum vero, qui alteri os fregisset, tercentum æris poena multarunt. Ipsum Decemvirale carmen ita restituit Jacobus Gothofredus ad *tab. 7.* *si membrum rupit, ni cum eo pacit, talio esto. Qui os ex genituali fudit, libero tercentum, servo centum quinquaginta æris poenæ sunt.*

III. His quidem poenis pro simplicitate temporum improborum audaciam coerceri posse censuerunt veteres. Verum enimvero, pessimorum civium improbitate cum pecunia aucta, hæ quidem poenæ leviores posteritati visæ, quam ut quempiam ab inferendis injuriis detertere possent. Quem enim ab inimicis depalmandis, iisve colaphis infligendis viginti quinque assium poena in tanta pecuniæ copia cohiberet? Aliunde non deerant, qui legi palam illuderent quosque obvios depalmantes, ac statim læso numerantes Decemviralem poenam. Cui enim ignotus Lucius ille Veratius, homo egregie improbus, atque immani vecordia? Eum ita se oblectasse comperio. Obvios quosque depalmabat. Ipsum sequebatur servus crumenam plenam assium portitans. Quemcumque palma verberasset, ei statim numerari jubebat asses vigintiquinque Gell. *noct. Att.* 20. 1. Ipsa etiam talionis poena in membri ruptura ita comparata erat, ut in ea vix æqui-

quilibrium servari posset ob ea, quæ differit apud Gellium ille *loc. cit.* Sed & integrum reo erat cum læso pacisci, seque per pretium a talionis poena redimere. Denique ipsa fustigatio frustra metuebatur, postquam a verberum, ac fustium contumelia lex Porcia cives exemerat. Proinde Prætor poenas Decemvires exolescere passus atrocius edicto suo constituit adversus eos, qui per injurias liberis capitibus audacter illuderent.

IV. Prætor igitur Decemviralem multam leviozem existimans, & audaciæ cohibendæ imparem, injurias edicto suo acrius ultum ivit, æstimatoria adversus injurias actione constituta. Injuriam scilicet per læsum æstimari jussit, eique tantum præstari, quanti ab eo injuria æstimata foret. Cum tamen facile fieri posset, ut pluris injuriam æstimaret læsus, æstimationem ab actore factam ipsum judicem moderari jussit, si ingentior ea videretur §. 7. *inst. h. t.* Diverse autem Prætor injurias æstimari voluit pro ipsius injuriæ, personæ, temporis, ac loci diversitate. Nam æquitas ipsa suadere videbatur, ut aliter æstimarentur injuriæ in viro nobili, aliter in obscurioris conditionis homine; aliter si in theatro spectaculorum tempore, aliter, si semotis arbitris in angiportu ex forent illatæ l. 7. §. 8. ff. h. t. Æquissimum hoc Prætoris edictum confirmavit in Regno Neapolitano Fridericus II. Et ipse enim apud nos injurias diverse æstimari jussit pro diversitate personarum, quæ injuriam passæ forent, pro temporis etiam, & ipsius loci discrimine, ubi injuria illata diceretur *const. varietates. de consider. injur. tempor. & pers.* Id tamen interest inter Prætoris edictum, & Friderici constitutionem, quod ex Præ-

Prætoris quidem edicto tota injuriæ æstimationi reo cederet, ex Friderici constitutione tamen triens tantum æstimationis læso conceditur, bessem sibi fiscus vindicat. Idem autem Fridericus duplicari jussit æstimationem injuriarum, aut damni, si commorantibus in Curia Regis, ejusve exercitu injuria, aut damnum foret illatum *const. ut participatio. de injur. curial. illat.* Sed desino de ea re plura, cum apud nos hodie ex recepta consuetudine injuriarum nomine criminaliter agi soleat, ut infra liquebit.

V. Jam vero cum poena tantum pecuniaria ex Prætoris edicto coercerentur injuriæ, auctis Romanorum opibus, ea facile contemnebatur, præsertim ubi propter bella civilia licentia valescebat magis. Eo accedebat, quod cum annuum esset Prætoris imperium, actio injuriarum Prætoria annua & ipsa erat, neque læso post annum licebat agere. Proinde anno fortasse Urbis 672. lege Cornelia de injuriis a Lucio Sylla Dictatore lata adversus valescentem audaciam constitutum est criminale judicium. Neque tamen ad injurias omnes lex Cornelia extendebatur. Ex ea enim tantum adversus eos jus erat agere, qui alios pulsassent, verberassentve, alienamve domum vi introissent §. 8. *h. t. C. l. 5. princ. ff. eod.* Quæ vero poena propter id genus injurias per legem Corneliam constituta fuerit, nusquam in pandectis proditum: eam tamen constitutam oportuit, ut in aliis legibus de re criminali latis factitatum novimus. Complusculi ob locum Pauli 5. *sent. 4. 8.* earum injuriarum auctores vel ad metalla, vel in opus publicum, vel in exilium damnatos existimant. Recte tamen conjecisse videtur ibi Schultingius,
Pau-

Pauli locum male habitum per Anianum esse ; superiores vero poenas potius ad derectarios pertinuisse , qui non injuriæ facessendæ causa , sed furandi animo in alienas ædes clanculum introibant. Utcumque id erit , poena lege Cornelia adversus injurias constituta usu fori videtur explosa saltem Hermogeniani Jurisconsulti temporibus . Is enim aperte testatur , ætate sua injurias extra ordinem punitas esse ; humilioris autem loci homines fuste cædi , ceteros exilio temporali coerceri solitos *l. ult. ff. eod.* Lex autem Cornelia eam interpretationem accepit , ut ex ea non tantum criminaliter , sed & civiliter ad injuriæ æstimationem agi jus esset §. 10. *h. t.* Cum tamen utraque actio comparata esset ad poenam , alterutra electa , ex juris recepta regula statim perimebatur altera *l. un. C. quand. civil. act. crim.* Quaque tamen actione damnaretur reus , famosus etiam efficiebatur *l. 7. princ. ff. h. t.* verum civiliter conventus infamiam effugiebat , si per procuratorem se defendi curasset *l. 6. §. 2. ff. eod.*

VI. Jure Neapolitano civilis injuriarum actio abrogata non fuit . Ut enim supra monuimus , cautum per Fridericum est *in const. varietates* . ut ex præscripto Romani juris in Regno Neapolitano æstimatoria injuriarum actio fervaretur ; diverse etiam æstimaretur injuria pro diverso personæ , temporis , ac loci discrimine . In eo tantum recessit a jure civili Fridericus , ut vidimus , quod trientem solum æstimationis læso , reliquum fisco jussit addici . Privata etiam injuriarum actio concedi videtur *in prag. 1. de injur.* Ibi enim cavetur , ut *ciambellariam* , quam vocant , adversus mulieres secundo nubentes instituentes centum uncias solvere compell-

pellantur . Sed & ejus poenæ dimidium mulieri , dimidium fisco vindicari placuit . Verum hodie apud nos injuriarum nomine criminaliter agi plerumque solet , & ob atrociores quasdam injurias vel ipso capite reus puniri jubetur . Ita *pragm. 1. eod.* mors eis est intentata , qui injuriæ facessendæ causa *macriatas* , quas vocant , in moenia cujusquam inurunt . Morte etiam eos puniri placuit , qui vulnus aliquod infligunt in cujusquam faciem , ut ea veluti nota læsum perpetua sequatur infamia *pragm. 3. eod.* In aliis injuriis , quæ minus atrocitatis habent , apud nos poena extra ordinem arbitrio judicis irrogari solet . At vero stat adhuc in Regno hodie præscriptum Romani juris , quo per tacitam remissionem aboleri jubetur injuria . Proinde si læsus injuriam tacite remisisse censetur , veluti quia eam statim ad animum suum non revocarit , eam semel remissam ex poenitentia postea frustra persequitur §. 12. *h. t. C. l. 11. §. 1. ff. eod.*

T I T U L U S V.

De obligationibus , quæ quasi ex delicto nascuntur .

Quemadmodum obligationes quædam ob affinitatem , quam cum contractibus habent , dicuntur quasi contractus , ita & obligationes quædam ob affinitatem , quam habent cum maleficiis , dicuntur quasi delicta . Scilicet sine dolo verum delictum non intelligitur , & ex nuda culpa verum delictum non videtur oriri posse . Publice tamen expediebat , quibusdam in speciebus ob

Tom. IV.

C

nu-

nudam culpam conveniri quempiam. Si quando igitur fieret, ut actio neque ex contractu, neque ex quasi contractu deduci posset, eam quasi ex delicto deducendam censuere veteres. Proinde quasi delicta haud incommode definiri poterunt *facta inconsulta delictis affinia, unde lex ob solam culpam præstat actionem, licet doli nequeat reus argui*. Quapropter quasi delicti causa culpa est, quemadmodum veri delicti dolus. Ex nuda enim culpa ratio juris verum delictum oriri non patitur. Neque regeas, in lege Aquilia nudam culpam veri delicti causam fuisse habitam. Recte enim videtur observasse Thomasius *de philosoph. jur.* §. 142. *¶ sequ.* in ipsa lege Aquilia damnum dolo quidem illatum verum delictum censuisse veteres, culpa tamen illatum quasi delictum existimasse; omne autem damnum adversus legem Aquiliam a vero delicto tamquam potiori denominatum esse, cum præsertim in ea lege dolus, & culpa, quod ad effectum, differre non viderentur.

II. Primum autem quasi delictum ad tuendam judiciorum sanctitatem pertinet. Id enim admittit iudex, qui *litem suam male judicando facit*. Litem in ea specie suam iudex facere dicitur, quia causam ejus, secundum quem perperam judicavit, tamquam suam defendere cogitur. Proinde, nisi sententiam suam secundum jus esse probarit, actori tantum præstare compellitur, quanti ejus interest, injuste pronunciatum non esse *princ. h. t.* Verum enimvero dupliciter fieri potest, ut litem suam faciat male judicando quispiam, & caute distinguendum, dolo id factum, an culpa fuerit. Si dolose quis male judicavit, verum delictum id erit, nec litis æstimatione tantum, sed muneris quo-

quoque dispendio puniendus est iudex *l. ult. C. de pæn. jud. qui mal. jud.* Sin perperam pronunciarit iudex imperitia sua, obligatur ex quasi delicto, de quo in præsentì loco Tribonianus. Verum rarius fiebat olim, ut ob imperitiam iudices in iudicium vocarentur. Primo enim juris studiosos in consilium adhibere iudicaturi solebant Gell. *noct. Att. 12. 13.* Deinde per appellationem injusta sententia facile emendari poterat. Sed & in Regno Neapolitano eo nomine iudices in iudicium vocari vix solent. Si quid tamen apud nos damni male iudicando iudex alteri intulerit, idque appellationis beneficio non sit emendatum, in *syndicatu*, quem vocant, læsus damnum persequi non prohibetur, si iudex is sit, adversus quem potest syndicatus institui. At vero absurdum videri queat, medicum quidem imperitum ex lege Aquilia vero delicto illigari, neutiquam vero iudicem, qui imperitia sua nocuerit alteri. Vulgo eam differentiæ rationem afferunt, quod benignius cum iudice quidem agi oportuerit, qui muneri publico iudicandi invitatus obstringitur; severius vero cum medico, qui ultro, quam ignorat, profitetur artem. Verum rectius fortasse dixeris, imperitum seu iudicem, seu medicum ex quasi delicto tantum obstringi; legem autem Aquiliam non solum vera, sed quasi delicta etiam vindicasse. Id si verum fuerit, quasi delictum iudicis male iudicantis ad ipsam legem Aquiliam referri non absurde potest. Vid. Thomaf. *ad Huber. præl. princ. h. t.*

III. Alterum quasi delictum viarum securitatem respiciebat. Eo conveniri poterat ille, cujus ex ædibus quid dejectum, aut effusum esset, quod alteri nocuisset. Ut vero non tantum daninum,

sed damni quoque periculum averteretur, quasi ex delicto eum etiam teneri placuit, qui ea parte, qua publice iter fieret, quid positum, aut suspensum haberet, quod, si caderet, cuiquam nocere posset. Ita positi, vel suspensi poena decem aureorum erat: dejecti autem, aut effusi nomine duplum ejus reposci poterat, quod damni esset illatum. Ceterum si ea de causa homo liber peremptus esse diceretur, quinquaginta aureorum multam præstari oportebat; si vulneratus is viveret, quantum ob eam rem æquum judici videbatur, præstandum erat, computatis mercedibus medico præstitis, & præter alia operis etiam, quibus læsus aut caruisset, aut cariturus esset §. 1. *h. t.* Et vulnerato quidem homine libero, ipsi læso dabatur actio; ob eundem vero peremptum popularis actio cuivis ex populo competeat, & poena applicabatur actori. Pluribus tamen eo nomine desiderantibus agere, is potissimum præferabatur, qui defunctum cognatione contingeret *l. 5. §. 5. ff. de his, qui effud. vel dejec.* Vulgo autem docent, de dejectis, & effusis Prætorem primum edicto cavisse. Sane in *l. 1. ff. eod.* de eo argumento in hæc verba prostat Prætoris edictum. *Unde in eum locum, quo publice iter fit, vel in quo consistetur, dejectum, vel effusum quid erit, quantum ea re damnum datum, factumve erit, in eum, qui ibi habitaverit, in duplum judicium dabo. Si eo ictu homo liber perisse dicetur, quinquaginta aureorum judicium dabo.* Recte tamen videtur observasse Bynkershoekius, de dejectis, & effusis ante Prætorem cavisse ipsam legem Aquiliam *observat. 1. 13.* Id si verum fuerit, argumentum inde solidius desumetur adhuc, legem Aquiliam non tantum

tum vera, sed quasi delicta quoque coercuisse.

IV. Si quid ex coenaculo filii familias seorsim a patre habitantis dejectum fuerit, aut effusum, aut ibi quid positum, suspensumve sit, unde periculum cuiquam immineat, Sabino placuisse traditur, ipsum parentem frustra conveniri; ipso cum filio igitur agendum esse; idem etiam fieri oportere, si male judicando filius litem suam fecisse dicatur §. 2. *h. r.* Hoc ipsum autem admitti placuit, licet profectitium sit gnato peculium. Ejus quidem peculii nomine directe potest conveniri parens, si ex contractu, vel quasi contractu obligatus sit filius: cum tamen in præsentī argumento quasi ex maleficio obligatus sit filius, ne ob profectitium quidem peculium directe parens conveniri potest *l. 1. §. 7. ff. de his, qui effud. vel dejec.* Ceterum, eo nomine condemnato filio, actio rei judicatæ adversus patrem victori competit, ut ex gnati peculio multam solvat *l. 3. §. 11. ff. de pecul.* Cum enim per litis contestationem novatio fieri censeatur, ac proinde veluti ex contractu filius obligetur rei judicatæ causa, condemnato filio, peculio tenus recte pater ipse convenietur. Quod si filius peculio careat, extra ordinem corporali coercitione multabitur *l. 1. §. 3. ff. de pæn.*

V. Postremum quasi delictum in institutionibus memoratum commercii securitatem spectat, ac viatorum potissimum indemnitati consulit. Eo obligantur nautæ, caupones, stabularii. Per eos enim viatoribus alio intentis sæpiuscule creari damnum Prætor advertens improbitatem hoc genus hominum edicto coercuit. Nautæ autem, caupones, stabularii alias quasi ex contractu, alias quasi ex delicto tenentur. Tenentur quasi ex contra-

tractu, si ab extraneis, quorum ipsi opera non utuntur, viatoribus fuerit damnum illatum *l. 1. C. 3. ff. naut. caup. stabul. ut recept. rest.* Tenentur quasi ex delicto, si damnum factum fuerit ab eis, quorum ministerio ipsi utuntur *§. ult. instit. h. r.* Obligationis quasi ex contractu fundamentum est præsumpta promissio nautarum, aut cauponum restituendi cuique, quod cujusque salvum fore receperint *d. l. 1. §. 1. ff. eod.* Obligationis quasi ex delicto fundamentum est culpa nautæ, vel cauponis, qui ministerio utuntur malorum hominum *l. 7. princ. ff. eod.* Verum si nautæ, caupones, stabularii prædixerint, ut quisque res suas servet, eique prædictioni viatores consenserint, eis injusta lite frustra calumnia faceissetur *d. l. 1. princ. ff. eod.* Utrique obligationi definiendæ propositum edictum a Prætoribus fuit. Ex priori obligatione simplum, ex altera duplum præstari placuit. Severius enim coerendum videbatur furtum famulorum fraude, quam extraneorum admissum. Famulorum enim ingenium cito perspicias, ab extraneis diligentissimus quisque facile fallitur. Ejus edicti discerpta membra passim occurrunt *in tit. ff. naut. caup. stabul.* Videtur tamen facile posse restitui ex *l. 1. 4. C. 7. ff. eod.* Per me igitur ita restituatur. *Nautæ, caupones, stabularii, quod cujusque salvum fore receperint, nisi restituant, adversus eos in simplum judicium dabo. Si damnum ii faxint, quorum opera utuntur, in duplum judicium dabo.* Cum tamen in Regno hodie pœnales actiones ad pœnam actori applicandam comparatæ pridem exoleverint, præclare cum viatoribus actum existimarim, si simplum recipiant, quoquo nomine nautæ, caupones, stabularii conveniantur.

T I T U L U S VI.

De actionibus.

ALias advertimus, jus cujusque suum Jurisprudentiæ objectum esse; personas autem, res, actiones veluti tria objecta ideo constituisse Doctores, quia diversum jus cujusque foret pro diversitate personæ, rei, aut actionis, quæ cuique competere; reipsa personas, res, actiones potius præcipua juris capita, quam diversa ejus objecta videri oportere. Alias etiam monuimus, rei vocabulo contineri dominium, obligationem, & jura generatim omnia. Cum igitur pro instituto hætenus de personis, & rebus commentati simus, porro actionum argumentum edisseremus. Faxit Deus feliciter.

II. Principio actionis vocabulum *πολυσημον* est, & plures in jure notiones habet. Duo tamen potissimum apud Jurisconsultos eo vocabulo indigitari solent, primo scilicet jus aliquod alicui competens, deinde via, qua quis illud per judicium assequatur. Proinde priori illo respectu ad obligationum argumentum actiones pertinent; altera earum notio huic loco applicanda. Cum vero in præsentis rubrica a Triboniano exponatur actio, tamquam via, qua per judicia tribuatur jus cuique suum, inconsulto ea definitur *princ. h. t. jus persequendi in judicio, quod sibi debetur*. Iisdem quidem verbis in actione definienda usus est Celsus in l. 51. ff. de oblig. & act. ibi tamen Jurisconsultus de actione loquitur, tamquam de jure ad aliquem pertinente, non tamquam de via, qua per judicia sibi quisque jus suum asserat. At vero frustra

sibi, aliisque negotium hic facessunt interpretes, qui operose quærent, a Gentiumne, an civili jure actiones sint repetendæ. Cum enim dominia, obligationes, leges, Magistratus promanent a jure Gentium, actiones etiam, quæ coram Magistratibus ex præscripto legum instituuntur, repeti ex Gentium jure debent. Neque regeras, aliud placuisse Pomponio in *l. 2. ff. de orig. jur.* Ibi enim Jurisconsultus non de actionibus generatim loquitur, quibus inter se disceptarent cives, sed de certis, ac solemnibus actionum formulis, quibus in judiciis olim uti oportebat. In præsentem autem rubrica Tribonianus argumentum actionum edisserit diversas earum divisiones enucleando. Ab ejus methodo non recedemus, cum vix alia concinnior hactenus excogitata fuerit.

II. Primam, eamque summam actionum divisionem a diverso jure repetit Tribonianus, quod cuique potest in Civitate competere. Scilicet cum juri nostro persequendo actiones sint institutæ, tot actionum genera constituenda erant, quot sunt & jura, de quibus coram judice disceptari solet. Cum igitur jus aut *in re*, aut *ad rem* tantum in controversiam venire possit, recte scribit Tribonianus §. 1. *h. t.* generatim actiones omnes aut *in rem*, aut *in personam*, seu *ad rem* esse. Jus in re alibi cum Grotio definivimus *facultatem homini in rem competentem sine respectu ad certam personam*. Id juris tantum ex dominio, servitute, hereditate, pignore profluere posse docuimus *libr. 2. tit. 1. pag. 20.* Proinde disceptatio si qua coepsetur de dominio, servitute, hereditate, pignore, actio in rem instituetur. Ibidem jus ad rem cum eodem Grotio definitum est *facul-*

cultas personæ competens in personam, ut hac aliquid dare; vel facere teneatur. Ex eo jure obligationes manare omnes ibidem advertimus. Si cujus igitur obligationis causa cuiquam controversia moveatur, actio in personam, seu *ad rem* instituta videbitur. Stet illud igitur, actiones omnes aut reales, aut personales generatim esse secundum Tribonianum definitionem *d. §. 1. h. t.*

III. Porro actiones personales generali vocabulo *condictiones*, actiones reales *vindicationes* dicuntur *§. 15. h. t.* Apud veteres quidem actiones generatim omnes *condictiones* appellabantur, seu quia in litibus omnibus ex condicto partium certa dies præstituebatur, qua coram iudice litigatores adessent; seu a mutuis certæ pecuniæ sponsionibus, quas iidem mutuo se provocantes invicem condicebant, promittebantve. Conf. Heinecc. *ad Vinn. d. §. 15. h. t.* Cum tamen actionibus realibus indigitandis proprium vindicationis vocabulum mox esset inventum, quod alias sæpe factum, actionibus personalibus significandis relictum est condictionis generale vocabulum. Ceterum actiones omnes seu reales, seu personales descendunt vel ex jure civili, vel ex Prætoris edicto. Quæ promanant ex jure civili, *civiles* dicuntur; quæ per Prætoris jurisdictionem sunt introductæ, *Prætorie* appellantur. Utræque vel *directæ* sunt, vel *utiles*. Quæ a legis, aut edicti verbis oriuntur, *directæ* vocantur; quæ ex interpretatione descendunt, vocantur *utiles*.

IV. His ita præstitutis, civiles actiones personales sunt, quæ descendunt ex contractibus jure civili vel institutis, vel confirmatis. Ita quidem civilis personalis est actio ex stipulatu, empti, locati,

cati, & sexcentæ id genus aliæ. Contra civilis realis est actio rei vindicatio, qua a quocumque possessore dominus rem suam petit cum fructibus, & omni causa. Civilis etiam realis actio videri debet hereditatis petitio, &, quæ species petitionis hereditatis est, inofficiosi testamenti querela. Dominium enim, & hereditas, ex quibus hæ actiones manant, ex jure civili jus in re præstant. Quod si de servitutibus, & ceteris rebus incorporalibus disceptari contingat, cum jure civili ex servitute jus in re oriatur, servitutibus etiam vindicandis suæ actiones civiles reales competunt. Ita quidem si cui constituta sit servitus in alieno prædio, eaque is uti prohibeatur, præsto ei erit adversus vicinum *actio confessoria*, ne porro in servitutis usu impediatur. Proinde si vicino concesseris jus immittendi tigni in ædes tuas, eumque non sinas in eas tignum immittere, is actione confessoria sibi in judicio id juris asseret §. 2. *h. t.* Contra si servitute non constituta quis uti velit, adversus eum negatoria actio instituetur, ne summa cum injuria utatur servitute non constituta. Proinde si ex prædio meo usufructum tibi non constitutum percipere cœptes, adversus te negatoriam actionem instituam, qua nego, tibi jus esse utendi, fruendi re mea *d. §. 2. h. t.* Id si fiat, contra juris regulam possessor agit. Qua quidem in re latet casus singularis ille, in quo interveniendo defudant interpretes plerique omnes. Nimirum alias, ubi de rebus corporalibus agitur, qui possidet, non agit. Qui enim quispiam rem, quam ipse possidet, vindicare queat? Verum in rebus incorporalibus non vetatur possessor agere negando, jus esse alteri in re a se possessa servitute

tute uti. Confer Ulricum Hub. in *pral. h. t. n. 6.*

V. Præter actiones descendentes ex jure civili ex Prætoris edicto quoque plures actiones promanarunt qua reales, qua personales. Ad Prætorias actiones reales refert in præsentī rubrica Tribonianus *Publicianam, rescissoriam, Servianam, quasi Servianam, Paulianam* denique. Hæ quidem actiones, si a Serviana, vel quasi Serviana discesseris, ex vero in re jure non profluunt; eas tamen veluti ex ficto in re jure quodam Prætor accommodavit. Hanc autem fictionem in his actionibus usurpatam æquitas ipsa videbatur exposcere, ut ex accurata singularum narratione patebit.

VI. Principio Publiciana actio a Prætore Publicio primo ejus auctore nomen accepit. De ejus ætate vix quidquam certi definiri queat; id tamen constat, ætate Terentii hanc actionem in judiciis usurpatam esse, ut liquet ex *Phorm. act. 2. sc. 4.* Publicianam autem actor instituens usucepisse se dicit, quod revera non usucepit §. 3. *et 4. h. t.* Si cui scilicet a non domino res tradita fuerit ex justa causa, eaque, usucapionis tempore nondum expleto, in manum tertii non domini casu pervenerit, is eam a tertio vindicare nequit. Qui enim rem vindicando ejus dominium sibi quis asserat, quod nondum usucapione quæsierit? Juris igitur rigor contra tertium non patiebatur hic agi. Verum iniquum Prætori visum, tertium hunc possessorem nullo jure subnixum ei præferri, qui bona fide, & justo titulo rem primus possidere cœpisset. Proinde, æquitate ita suadente, solitis fictionibus usus edicto Prætor actionem veteri possessori dedit, ab eo rem usucaptam esse, fingendo, licet revera usucapta non esset. Neque vero iniqua erat hæc fictio;

fiçtio; per eam enim jus veri domini non excluderetur. Actori tantum per eam favebat Prætor ratione tertii nullo, vel infirmiori jure possidentis, vero domino usque ad tempus usucapionis impletæ vindicatione servata. Vid. Doct. ad *d. §. 4. b. t.* Ceterum si eandem rem duo emissent, siquidem ab eodem non domino, ex Juliani sententia potio- rem eum haberi placuit, cui res tradita priori foret; sin a diversis non dominis, potior censebatur causa possidentis *l. 9. §. 4. ff. de Public. in rem act.* Ipsum Prætoris edictum ita exhibet Ulpianus in *l. 1. ff. eod. Si quis, quod traditur ex justa causa, non a domino, & nondum usucaptum petet, judicium dabo.*

VII. Ex edicto etiam Prætoris est actio rescis- soria, ejusque inventor idem Prætor Publicius for- tasse fuit. Sane & ea Publiciana dicitur in *l. 35. ff. de oblig. & act.* Hæc autem actio contraria su- periori est. Ea enim æquitatem sequutus finge- bat edicto Prætor, non esse rem usucaptam, quæ, ri- gore juris inspecto, usucapta jam foret. Hinc ei vo- cabulum rescissoriæ inditum; ejus enim obtentu jam expleta usucapio a Prætoris rescindebatur. Si quis enim præsens rem absentis usucepisset, ab- sentem reversum Prætor restituebat in integrum, quasi usucapionis tempus nondum exactum esset. Eadem usus fictione Prætor præsentis tuebatur ad- versus eos, qui absentes res præsentium usucepi- sent *§. 5. b. t. & l. 1. ff. quib. ex caus. major. vig- quinq. ann. in integr. rest.* Quod de rebus usuca- ptis diximus, idem factitatum de actione constat, si qua actio per præscriptionem perempta foret *l. 1. §. 1. ff. eod.* Et olim quidem seu contra ab- sentes, seu contra præsentis actio isthæc cœptanda esset

esset, intra annum utilem instituenda erat, ex quo foret agendi copia; verum in utilis anni locum quadriennium continuum substitui iussit Justinianus *l. ult. C. de tempor. in integr. rest.* De eo autem, qui absens rem præsentis usucepisset, ita loquitur Imperator *d. §. 5. h. t.* quasi eum necessaria de causa abesse oporteret. Id tamen, ne quid gravius dicam, exempli tantum causa dictum existimo. Primo enim nullum absentiae discrimen fecit edicto Prætor, ut constat ex *d. l. 1. ff. ex quib. caus. major.* Deinde absentes omnes ea parte edicto contineri diserte scribit Ulpianus in *l. 21. §. 1. ff. eod.* Sed id hodie frustra disceptatur. Siquidem jure novo necessaria non videtur ea actio rescissoria, quæ præsentibus contra absentes dabatur olim. Hodie enim si cujus præsentis res ab absente possideatur, is, ne ab absente inchoata præscriptio absolvatur, per nudam libelli oblationem interrompere præscriptionem potest *l. 2. C. de ann. except.*

VIII. Actio Pauliana ex Prætoris jurisdictione & ipsa manat excogitata fortasse a Prætore Paulo: de eo tamen præter nomen nil hactenus mihi liquet. Quæcumque hujus actionis fuerint initia, ea rescissoria etiam vocari potest, quippe qua rescindit Prætor alienationes in fraudem creditorum factas. Per eam igitur creditores missi in possessionem bonorum debitoris sui repetunt generatim omnia, quæ in fraudem suam alienata a debitore fuerint perinde, ac si ea adhuc in bonis debitoris essent *§. 6. h. t.* Eo autem edicto Prætor non tantum alienationes rescindi jussit, sed & contractum quemlibet, quo creditoribus fraus facta diceretur *l. 1. §. 2. ff. quæ in fraud. cred. fact. sunt, ut rest.* Ita nimirum edixit Prætor. *Quæ fraudationis cau-*
sa

sa gesta erunt cum eo, qui fraudem non ignoravit, de his curatori bonorum, vel ei, cui ea de re actionem dare oportebit, intra annum, quo experiundi potestas fuit, actionem dabo; idque etiam adversus ipsum, qui fraudem fecit, servabo d. l. 1. princ. ff. eod. Cum fraudis meminerit edicto Prætor, frustra creditor actionem instituet, nisi & debitor fraudandi animum, & fraus eventum habuerit *l. 10. §. 1. ff. eod.* Edicto tamen Prætor debitorem contineri noluit, qui quid acquirere neglexisset, quod acquiri alias honeste poterat. Proinde, qui repudiat hereditatem quoquo jure sibi delatam, locum edicto non facit *l. 6. §. 2. ff. eod.* Nec in debitore tantum, sed in accipiente quoque fraudem requirebat Prætor, ut Pauliana competeret. Quapropter si accipiens fraudem ignoret, locus edicto non fiet *d. l. 6. §. 8. ff. eod.* Tantum in causis lucrativis placuit, ut licet fraudis conscius non esset accipiens, daretur in eum actio, quatenus locupletior factus esse diceretur *d. l. 6. §. 11. ff. eod.*

IX. Nondum hinc abire me sinunt interpretes. Passim enim hic scribi dicam Triboniano video, qui actionem Paulianam inter reales recensuerit *§. 6. h. t.* Vulgo autem obstrepunt, Paulianam actionem diversam a Faviana (ea quidem personalis est) videri non oportere; utramque rescissoriam, & in factum esse; per Favianam revocari, quæ in patroni fraudem, per Paulianam rescindi, quæ in creditorum fraudem gesta fuerint. Non dissentitur id quidam, ad excusandum tamen Tribonianum eo confugiunt, ideo inter actiones in rem Paulianam ab eo relatum, quia ad exemplum ceterarum actionum in rem adversus quemcumque pos-

possessorem potest institui. Ita præter alios Ulricus Huberus in *præl. ad inst. h. t. n. 9.* Id ipsum tamen perperam dici puto. Primo enim actio isthæc promiscue in possessorem non datur, nisi & fraudem resciverit creditori factam. Deinde in heredem accipientis etiam ea competit, licet non possideat rem per fraudem alienatam *l. 10. §. 25. ff. quæ in fraud. credit.* Rectius igitur constitueris, ex fictitia etiam qualitate hanc actionem realem existimandam esse. Scilicet actio isthæc creditoribus competebat, postquam ipsis per Prætorum, aut Præsidis possessio bonorum debitoris decreta foret: ideo enim in *d. §. 6. h. t.* mentio fit bonorum decreto Præsidis possessorum. Possessione bonorum ita decreta, jus pignoris Prætorii creditores sibi parabant. Ut igitur ejusmodi alienationes rite rescindi possent, fingeat edicto Prætor, res ante decretam bonorum possessionem alteri alienatas, ac traditas mansisse adhuc penes debitorem, in easque jus pignoris a creditoribus post decretum Prætoris, aut Præsidis quæsitum esse; affectas igitur jure pignoris non recte alienatas videri, easque veluti hypothecæ jure creditores actione reali persequi posse.

X. Ex Prætoris etiam edicto est in rem actio Serviana, & quasi Serviana. Et Serviana quidem a Prætoris Servio fortita vocabulum prædii rustici locatori competit ad res persequendas pro securitate mercedum ei obligatas *§. 7. h. t.* Ea igitur actio non competit generatim ob invecta, & illata omnia in prædium rusticum, verum ob ea persequenda tantum, quæ nominatim supposita hypothecæ fuerint *l. 4. §. 7. ff. in quib. caus. pign. tacit.* Quasi Serviana actio ad exemplum Servianæ per interpretationem introducta datur ob res ceteras

ras

ras hypothecæ suppositas, quæcumque earum obligandarum fuerit occasio *d. §. 7. h. t.* Quasi Serviana igitur non modo competet in conventionali pignore, sed in tacito, & legali quoque: ejusmodi pignus locatori competit in invecta & illata in prædium urbanum, uxori dotis causa in res viri, &, ne singula memorem, legatariis in res hereditarias. Utraque autem hæc actio hypothecariæ vocabulo designari solet. Ubi Jurisconsulti loquuntur ex arte juris, pignus, & hypothecam ita distinguunt, ut pignus dicant, quod ob debiti securitatem creditori traditur; rem nuda conventionne obligatam hypothecam appellent. Verum in præsentī argumento inter utrumque nihil interesse scribit Imperator *d. §. 7. h. t.* Serviana igitur, & quasi Serviana competet, seu nuda conventionne res obligatæ fuerint, seu pignoris causa fuerint creditori traditæ, isque earum possessionem amiserit. Ceterum quo modo ex re pignoris causa creditori tradita nascatur in rem actio, facile id quidem potest intelligi. Pignore enim creditori tradito, ei jus in re statim acquiritur. Vix tamen rationem reddas, cur ex simplici hypotheca Prætor jus, & actionem in rem nasci jusserit. Neque enim nuda conventio jus in re cuiquam parare posse censebatur *l. 20. C. de pact.* Quapropter ex ipsa Prætoris fictione repetenda in rem isthæc actio. Nimirum si res pignoris causa tradita fuisset, ex ipso jure civili jus, & actio in rem nascebatur. Proinde Prætor solitis fictionibus usus actione Serviana finxit, revera creditori traditas brevi manu res hypothecæ suppositas; ita pignore Prætorio velut affectas a quocumque possessore tamquam ex jure pignoris peti posse. Eo pertinere videtur Pauli illud

in l. 17. §. 2. ff. de pact. ex pignore (per pignus hypothecam intellige) jure honorario nascitur pactio actio. In rem autem actionem dedit ex hypotheca Prætor, quia res hypothecæ supposita vix usui esse creditori poterat, si eam jus non fuisset a quovis possessore reposci.

XI. Non solum in rem actiones, sed complures in personam etiam proposuit edicto Prætor. Earum quædam veluti ex contractu, quædam ex maleficio proficisci videbantur: illæ igitur rei, hæ poenæ persecutoriæ videri debent. In personam autem actiones permultas edicto complexus est Prætor. Nos tamen Imperatorem sequuti eas tantum edisseremus, quas velut exempli gratia affert in præsentī rubrica Tribonianus. Ex actionibus in personam rei persecutoriis tantum hic memoratur actio de constituta pecunia, de peculio in parentem, aut dominum, in factum denique ex jurejurando. De singulis pro instituto videndum.

XII. Primo igitur in personam actio de constituta pecunia ex Prætoris edicto manat. Ea datur ob constitutum: constitutum est pactum nudum. Alias monuimus, ex pacto nudo actionem jure civili nasci non potuisse. Verum Prætor advertens, quibusdam in rebus fidem falli publice non expedire, ex pactis nudis haud paucis, quæ ob necessitatem suam frequentissima in Civitate forent, actionem edicto dedit. Inter pacta isthæc constitutum potissimum firmavit edicto Prætor, quippe frequentissimi inter cives usus. Est autem constitutum pactum nudum, quo quis promittit, certa die se soluturum, quod revera ipse debet, aut alius §. 9. h. t. & l. 1. §. 1. ff. de const. pecun. Frustra igitur constituebatur, quod tantum civiliter

deberetur, aut si actio elidi per exceptionem posset *l. 7. §. 1. ff. eod.* Ceterum si constitutæ pecuniæ se pro alio quis obligaret olim, ad fidejussionem constitutum proxime videbatur accedere. Inde factum, ut ei, qui pro alio constitueret, non solum beneficium ordinis fidejussoris exemplo competere *novell. 4. c. 1.* sed beneficium divisionis quoque, si cum pluribus constituisset *l. ult. C. h. r.* Verum cum in Regno hodie in fidejussionibus stipulationum solemnitas exoleverit, apud nos inter constitutum pro alio interpositum, & fidejussionem vix quicquam interest. At vero constitutum priorem obligationem haud innovat, sed ei tantum accedit. Is igitur, pro quo alius constituerit, post constitutum adhuc conveniri poterit *l. 28. ff. de constit. pecun.* quemadmodum &, priore debitore solvente, liberatur statim pecuniæ constitutæ reus *l. 43. ff. de solut.*

XIII. Parum aberat a constituto olim actio receptitia. Intererat inter utrumque tamen, quod actio receptitia competere de quibuslibet quidem rebus, promissis tamen ab argentario; actio vero de constituta pecunia contra quoslibet quidem, de solis rebus tamen, quas *fungibiles* vocant, posset institui. Receptitia etiam obligatio verbis legitimis, & solemnibus, constitutum nudo pacto contrahebatur. Sed hæc hodie frustra quærentur. Justinianus enim, receptitia actione sublata, actionem de constituta pecunia institui jussit adversus omnes, qui quid se duros constituisent. Si quid autem commodius in receptitia foret, in actionem de pecunia constituta transferri jussit *§. 8. h. r. C. l. 2. C. de constit. pecun.*

XIV. Ex Prætoris jurisdictione quoque manat in personam actio de peculio. Ea competit in paren-

parentem, aut dominum ob contractum cum filiofamilias, aut servo initum §. 10. *b. t.* Nimirum ex regulis Romani juris nemo unus ex contractu alterius obligari posse videbatur. Ne servus quidem igitur, filiusve familias, dominum, aut parentem obligare poterat. Cum tamen ex contractu servi, filiiue familias, ad dominum, aut patrem rediret emolumentum, æquisimum Prætori visum, saltem peculio tenus parentem, aut dominum obligari. Eo accedebat, quod per parentem, aut dominum concessio peculio, id tacite censebatur actum, ut servis, aut filiis pro modo peculii jus etiam contrahendi concessum intelligeretur *l. 1. §. 5. ff. de acquir. poss.* Cum igitur, qui cum filiofamilias, aut servo contraheret, ipsam parentis, aut domini fidem, quod ad peculium, sequi videretur, hanc actionem recte proposuit edicto Prætor, ne quis aliena fraude impune circumveniretur. Quibusdam in negotiis tamen ne peculio quidem tenus domini conveniri poterant, ut passim doctores admonent ad *d. §. 10. b. t.* Pater etiam ob mutuam pecuniam acceptam a filiofamilias frustra peculii nomine conveniebatur. Macedoniano enim Senatusconsulto cautum Romæ fuerat, ne qua actio ob mutuum contractum a filiofamilias in parentem competeret. Sed ea de re infra pluscula sub insequenti rubrica.

XV. Inter actiones in personam a Prætorē proditas in factum etiam actio ex jurejurando recenseretur debet. Eam contra juris regulas excogitavit Prætor adversus eum, a quo delatum, aut relatum juramentum esset. Deferri dicitur jusjurandum ab eo, qui veluti de suo jure subdubitans in judicio se jurato adversario de re contro-

versa credere velle profitetur. Contra refertur jusjurandum ab eo, qui & ipse de re controversa incertus, ac proinde delatam ab adversario jurandi conditionem respuens, adversarii potius juramento litem finiri postulat. Quoquo modo ita juratum fuerit, qui delato, aut relato jurejurando juravit, vel se exempli gratia non debere, vel sibi deberi, ex jurejurando vel perpetuam exceptionem, vel actionem nanciscitur. Ubi fuerit ita juratum, porro non quæritur, an debeatur, sed an revera præstitum juramentum fuerit. De juramento si constet, quantum juratum fuerit, reus solvere compellitur, si quid se debere juraverit §. 11. *h. t.* Nec vero mirum, tantam auctoritatem juramento detulisse Prætores. Primo enim ita citius lites expediri posse videbantur *l. 1. ff. de jurejur.* Deinde veluti ex tacita pactione partium species quædam transactionis juramento inerat *l. 2. ff. eod.* Qui enim in re controversa jurandi conditionem adversario desert, tacite cum eo pacisci videtur, se probaturum, quod per juramenti religionem affirmatum ab eo fuerit. Ceterum si quis, delato, aut relato jurejurando, jurare detrectet, is, quantum petitur, solvere compellitur *l. 34. §. 6. ff. eod.* Manifestæ enim turpitudinis, & confessionis est, nolle nec jurare, nec juramentum referre *l. 38. ff. eod.*

XVI. Jam vero in rubrica pandectarum *de jurejur.* triplex juramentum exhibetur *voluntarium, necessarium, & judiciale*. Quale quodque sit, disceptarunt interpretes, neque dum lis composita. Vero magis simile videtur, jusjurandum voluntarium appellatum, quod ultro in judicio deferatur alteri. Voluntarium id dictum videtur, quia ab adver-

adversario referri potest, si, cui delatum est juramentum, ipse jurare nolit. Diversa ratione necessarium jusjurandum fortasse dictum id fuit, quod in judicio refertur ei, qui alteri fecit jurandi copiam. Id necessarium appellatum, quia, qui juramentum detulit, nisi litem velit amittere, id relatum necessario præstare debet. De juramento judiciali minus dubitari potest. Id enim est, quod in causis dubiis, & ambiguis alterutri litigantium ob inopiam probationum deferretur ab ipso judice *l. 31. ff. de jurejur.* Id necessarium etiam haud absurde dixeris, quia nec recusari, nec referri ab eo potest, cui præscriptus iudex jurandi necessitatem. Conf. Noodt. ad *d. t. ff. §. 3.* Ceterum tantum duas priores juramenti species respexisse videtur Tribonianus *d. §. 11. h. t.* Si enim, deferente juramentum iudice, quis juravit, actionem iudicati nanciscitur, neque ei Prætoriam jurisdictionem opus. Sed de juramento judiciali latius infra videbimus.

XVII. Præter actiones in personam rei persequutorias poenales in personam quoque proposuit edicto Prætor. Ejusmodi pene innumeræ in pandectis prostant, earum tamen in præsentī rubrica tria tantum exempla Tribonianus affert. Prima institui poterat adversus eos, qui ex Prætoris albo quid corrupissent *§. 12. h. t.* Ea actio popularis erat in quinquaginta aureos actori applicandos *l. 7. princ. ff. de jurisdictione.* Altera prodita in eum fuit, qui sine Prætoris venia parentem, aut patronum in jus vocasset *d. §. 12. h. t.* Ea autem actio in aureos quoque quinquaginta erat; poena tamen ipsi parenti, aut patrono cedebat, cum ipsis tantum per vocationem in jus facta videretur injuria *l. 4. C. sequ. ff. de*

jus voc. Tertia denique proposita fuit adversus eum, qui in jus vocatum vi exemisset, cujusve dolo factum esset, ut in jus vocatus eximeretur *d. §. 12. h. t.* Id vero facinus ipsius litis æstimatione multari placuit, licet vi exemptus in jus vocatus per calumniam diceretur *l. penult. ff. ne quis eum*. Hæ tamen actiones apud nos hodie vix ullius usus videntur esse. Primo enim si quod Magistratus edictum quis corrupisse arguatur, injuria isthæc publicæ potestati facta severius, & pœna corporis coercetur. Eadem quoque de causa pœna corporalis adversus eos irrogari debet, qui in jus vocatos per apparitores vi eximunt, & norunt rerum patriarum periti viri atrociam pœnarum exempla adversus eos, qui a manibus apparitorum reos exemerint. Denique quod ad parentes, aut patronos sine veniâ in jus vocatos, cum apud nos hodie cesset edicti ratio, ejus pœna quoque cessare debet. Ejus edicti ratio inde apud veteres repetebatur olim, quia in jus vocatio parenti, aut patrono injuriam videbatur inferre. Sat enim inverecundum videri debuit, libertum, aut filium, patrono, aut patri propudiosum illud carmen occinere; *ambula in jus*; renuentes autem obtorto collo ad Prætorem rapere. Cum igitur in jus vocatio apud nos hodie id periculi non complectatur, & auctoritate magistratuum expediri soleat, edicti etiam pœna isthæc ea de causa in Regno non obtinet.

XVIII. Exequuti hætenus sumus primam actionum divisionem in rem, & in personam. Ea divisio summa est. Ejus enim ambitu, ut supra prævertimus, actiones continentur omnes. De præjudicialibus tamen actionibus addubitari posse vide-

videbatur, num in personam, an in rem potius eas existimari oporteret. Videri quidem poterat, eas in personam existimandas esse, cum, iis institutis, nullam rei suæ urgeat restitutionem actor. Atqui in rem actionibus id potissimum agitur, ut actori res sua restituatur. Verum has actiones in rem potius videri non absurde scribit Tribonianus §. 13. *h. r.* Qui enim eas instituit, aliquid sibi vindicat, dominus servum, servus libertatem, ingenuitatem libertus, filius denique jus filii. Per ejusmodi quidem petitiones nullius rei aperte petitur restitutio; statu tamen adversarii sententia judicis semel constituto, statim eum sequuntur emolumenta, quæ ex ejus statu, seu ex libertate, ingenuitate, & jure filii nasci solent. Ideo enim hæ actiones præjudiciales sunt appellatæ, quia præjudicii aliis rebus faciendi causa instituuntur. Ita quidem, ubi victor discesserit in præjudiciali actione filius, eumque ab aliquo videri genitum pronunciarit judex, ea sententia judicio hereditatis præjudicat. Ubi enim per sententiam constiterit, Sempronii exempli gratia quem esse filium, mox ei patris hereditas addici debet. Licet autem alias res inter alios judicata aliis nocere non debeat, secus est tamen in præjudiciali causa. Ita quidem, ubi quis Sempronii filius pronunciatus fuerit, de jure agnationis a fratribus suis ab eodem Sempronio genitis ei controversia moveri nequit *l. 2. ff. de agnosc. & alend. lib.* Hinc in causis præjudicialibus judex jus facere dicitur *l. 3. princ. ff. eod.*

XIX. Jam vero præjudiciales actiones tres memorat Tribonianus *in* §. 13. *h. r.* Iis enim quæritur primo scribit, liber quis sit, an servus; deinde li-

bertus quis sit, an ingenuus; denique filius quis sit, & ad familiam pertineat, an extraneus. Tria præjudicia complectitur scita brevitate sua Terentius *Eun. act. 4. sc. 7.*

Chr. Principio eam esse dico liberam. Thr. hem.

Chr. Civem Atticam. Thr. hui.

Chr. Meam sororem. Thr. os durum.

Ibi enim prima quidem actio de statu libertatis, altera de statu Civitatis, tertia intenditur de statu familiæ. Præjudicio libertatis id olim singulare erat, quod vindiciæ, seu possessio ad finem usque judicii pro libertate daretur, licet generatim alias, qui tempore instituti judicii neque vi, neque clam, neque precario possideret, ad finem usque litis possidere pergeret Livius 3. 44. In causis autem præjudicialibus actor, & reus vix distingui potest; actoris tamen partes sustinet, qui primus ad judicium provocavit *l. 12. ff. de except.* Ceterum, antiquata pene apud nos servitute, duo priora præjudicia vix usui esse in Regno possunt. Suus tamen est usus præjudicio de jure filii, seu quem pater filium sibi asserat, seu ex se prognatum neget, idque latius differitur in pandectis sub rubrica *de agnosc. & alend. lib.*

XX. Præjudicium autem de jure filii dupliciter institui posse videbatur apud Romanos olim. Primo enim disceptari post divortium poterat, num ex viro mulier gestaret uterum. Deinde in controversiam venire poterat, num constante matrimonio quispiam genitus cum adultero, an marito susceptus esset. De partu post divortium agnoscendo latum Senatusconsultum Plancianum fuit, eoque cautum, quid servari oporteret, si uxor marito denunciaret, se uterum ex eo gerere *l. 3. §. 1. ff. de*

de liber. agnosc. & alend. Si id ageretur, mulier intra triginta dies a divortio numerandos marito denunciare debebat, se putare utrum gerere. Si mulier tamen denunciationem omitteret, negligentia matris in principali causa partui non præjudicabat, & quoquo tempore de jure suo poterat experiri filius *l. 1. §. 8. ff. eod.* Facta denunciatione, maritus custodes mittere ad uxorem debebat, si ei metus de suppositione foret *d. l. 1. §. 3. ff. eod.* Cum suppositione partus nihil esset indignius, de inspectione ventris, & custodiendo partu mira Prætoris sollicitudo fuit, & lectu dignum edictum est *in l. 1. ff. de inspiciend. ventr.* Ceterum si maritus neque custodes mitteret, neque uxori obnunciaret, ex se partum esse, agnoscere quidem gnatum debebat, & alere; id ipsum tamen quæstioni principali non præjudicabat. Neque enim, quod quis partum agnosceret, suum heredem eum statim habebat; ei enim perpetuo status controversiam moveri poterat *d. l. 1. §. 12. ff. de agnosc. & alend. liber.*

XXI. Ita quidem jus erat, si post divortium de partu præjudicium instituendum esset. Si de filio constante matrimonio edito ageretur, ex alio Senatusconsulto res transigebatur ætate Hadriani lato *l. 3. §. 1. ff. de agnosc. & alend. liber.* Filio constante matrimonio edito per præjudicialem causam controversia moveri potest, si dicatur, matrem uxorem legitimam non fuisse. Quo quidem casu cum præjudicio locus dicatur esse *in d. l. 3. §. 4. ff. eod.* non video, cur in mentem Wissembachio venerit ad *d. tit. ff. th. 11.* alia præjudicia admitti non oportere præter illa tria, quæ Tribonianum memorasse diximus *d. §. 13. h. r.*
Quid

Quid si legitima non negetur uxor, potestne filio moveri controversia, si is editus constante matrimonio fuerit? Ea quidem in specie præsumptio juris est, patrem esse, quem nuptiæ demonstrant *l. 5. ff. de in jus voc.* Ea tamen juris præsumptio veritati cedere debet, & contrariam probationem haud excludit. Præter quam quod enim de suppositione controversia potest institui, fieri etiam potest, ut tamdiu ab uxore maritus absuerit, ut filius ab alio genitus necessario videri debeat. Ita quidem, si quis per decennium absens anniculum domi filium reclusus offendat, certissimum adulterii argumentum id erit *l. 6. ff. de his, qui sui, vel alien. iur. sunt.* Sed & si cui ante septimum mensem post initum matrimonium perfectus filius enascatur, eum parenti filium adjudicari jus vetat. Neque enim partus perfectus ante septimum mensem ex ordinariis naturæ regulis nasci potest *l. 12. ff. de stat. hom.* Eam tamen juris civilis regulam in Anglia negligi testatur Chamberlanus in *nov. stat. Angl. c. 18.* Ibi enim si quis viduam ducat ignorans uterum gerere ex priori viro, ei partus adjudicatur. Vid. Huber. in *præl. ad pand. sub tit. de agnosc. & alend. lib. n. 4.* Ceterum si, nondum deducta domum uxore, præcoci nuptiarum usu partus maturius enascatur, ob insequentum matrimonium ita nati liberi legitimi apud nos hodie videri debent.

XXII. Ita comparatum olim jus Romanum erat, ut causa is caderet, qui in formula actionis erraret, nisi Prætoris auxilio in integrum restitutus esset Cicer. *de invent. 2. 19.* Proinde Justinianus, actionibus ita discretis, actorem instruit, qua formula uti in libello eum oporteat, ne perperam agere videatur in §. 14. *h. t.* Olim igitur si domi-

RUS

nus actionem in rem institueret, rem ipsam cum petere oportebat. Ita quidem fundum suum petiturus aliquis ita edebat actionem adversario suo: *ajo, fundum Tusculanum esse meum*. Contra si creditor actionem in personam institueret, ac centum exempli gratia a debitore peteret, hæc ei formula præscripta erat: *ajo, te mihi centum dare oportere*. Diversas has formulas ex ipso Prætoris edicto exsculperunt Jurisconsulti: ipse etiam Prætor in dandis iudiciis, si in rem ageretur, ita eos alloquebatur, *si paret, rem Sempronii esse*. Contra si in personam institueretur actio, iudices dabat hac formula: *si paret, reum dare oportere*, ut passim ex Cicerone constat præsertim pro Mur. & in Verr. Perperam igitur rem suam dominus petiturus egisset ex formula, *sibi dari oportere*: ita enim in se transferri postulasset rei suæ dominium, quod penes se jam esset. Cum igitur in rem actio dicatur *vindicatio*, actio in personam *condictio*, qui aliquid ex contractu petit, condictionem, qui rem suam petit, vindicationem instituere debet §. 15. *h. t.* Tantum odio furum, & ipsorum dominorum commodo obtinuit, ut adversus eos a domino non solum vindicatio, sed & condictio, quam *furtivam* dixere veteres, posset institui §. 14. *h. t.* Furum odium in eo constabat, quod ita fures pluribus actionibus conveniri possent. Dominorum commodum erat in eo positum, quod, qui rem suam a fure condiceret, eum rei suæ dominium, quod in vindicatione requirebatur, probare non oportebat. Eo accedebat, quod vindicatio competeat tantum adversus possessorem, eumve, qui dolo malo possidere desiisset; verum adversus suam rem

rem institui conditio poterat, licet nec possideret, nec dolo malo possidere desisset *l. 8. ff. de condict. furt.* Sed desino ea de re plura, cum in libellis apud nos hodie formularum subtilitas impune negligatur, earumque usum pridem ante Justinianum ipsa vetustas exploserit.

XXIII. Altera & ipsa summa actionum divisio a Triboniano proponitur §. 16. *h. t.* Objecti enim ratione generatim actiones inspectas quasdam comparatas scribit *rei persequendæ*, quasdam *pœnæ persequendæ* gratia, quasdam denique *mixtas* esse, & cum rei, tum pœnæ persequutionem complecti. Quod ad actiones rei persequutorias, ejusmodi censentur omnes, *quibus persequimur, quod ex patrimonio nobis abest*, prout definiuntur a Paulo in *l. 35. ff. de oblig. & act.* Ex patrimonio tria isthæc nobis videntur abesse: primo scilicet, quod in nostro patrimonio actu est, sed ab alio detinetur; deinde, quod nobis ex contractu debetur; quodcumque denique ejus, quod nobis abest, æstimationem continet: ejusmodi pœna est, quæ ratione ejus, quod interest, in contractu promittitur. Brevius; in præsentī argumento rei vocabulo continetur, quicquid pœna non est; pœnæ vocabulo designatur, quæ certa lege definita fuerit.

XXIV. His ita constitutis, rei persequutoriaræ videri debent non solum actiones in rem generatim omnes, sed in personam etiam, si ex contractu descendant. Ita quidem rei persequutionem continet actio ex stipulatu, mandati, locati, conducti, depositi §. 17. *h. t.* Tantum si depositi miserabilis causa agatur in duplum adversus depositarium, ejusve heredes dolose agentes,

tes, ea quidem in specie depositi actio mixta potius censeretur debet *d. §. 17. h. t.* Contra poenæ persequutoria est furti actio. Seu enim furti manifesti, seu non manifesti agatur, quod petitur quadruplum, aut duplum, solidum poena est. Res enim ipsa subrepta aut vindicatione, aut conditione furtiva reposcitur *§. 18. h. t.* Denique mixta censeretur debet actio de vi bonorum raptorum. In quadruplo enim, quod ea reposcitur, triplum quidem poena est, simplum reliquum ipsam rei raptæ persequutionem spectat *§. 19. h. t.* Actio etiam legis Aquilæ mixta est. Primo enim ex lege Aquilia adversus inficiantem lis crescit in duplum *l. 23. ff. ad leg. Aquil.* Deinde si adversus consentientem agatur, res æstimatur non ex tempore illati damni, sed quanti plurimi aut eo anno, aut saltem diebus triginta proximis fuisse dicetur *§. 9. & 14. de leg. Aquil.* Denique mixta etiam actio competere jure civili potest ob legata, vel fideicommissa, quæ Ecclesiis, aliisve locis venerabilibus relicta fuerint. Ea enim actio instituetur in duplum, si aut heres legatum inficietur, aut illud tamdiu solvere distulerit, donec in jus fuerit ea de causa vocatus *§. 19. & 26. h. t.* Verum eo jure vix usi umquam in Regno sumus, & hodie ne uti quidem licet, cum ex novissimis Regni legibus Ecclesiis, aliisque piis locis frustra legetur.

XXV. Præter actiones revera mixtas, quæ rei simul, & poenæ persequutionem continent, alias adhuc actiones *mixtam causam continere videri* scribit Tribonianus *§. 20. h. t.* Ejusmodi est actio familiæ erciscundæ, quæ coheredibus de dividenda hereditate competit; actio communi dividundo, qua ii experiuntur, inter quos aliquid præter

ter causam hereditatis commune est; finium etiam regundorum, quam instituunt, qui agros conterminos habent, ut, finibus ad suam normam redactis, si quid amplius quis occuparit, restituatur actori *l. 14. ff. fin. regund.* Hæ autem actiones mixtæ a Triboniano dicuntur, non quia & ipsæ rei, pœnæque persequutionem complectantur, sed quia partim in rem, partim in personam videantur institui. Neque tamen sub ea notione has actiones revera mixtas appellat Tribonianus, sed *mixtas* tantum videri scribit. Prima enim fronte in rem ideo videri poterant, quia in his quisque de re sua agit, eamque vindicare videtur. Contra in personam etiam videbantur existimari posse, quia ipsis agitur adversus eos, qui propter rerum communionem, confusionemve nobis sunt obligati. Ceterum si accuratius loqui velis, rectius dixeris, eas actiones potius in personam esse. Iis enim nulla dominii, aut proprietatis quæstio instituitur, neque aliquid restitui postulatur, sed potissimum id agitur, ut discedatur a communione. Hinc actio familiæ erciscundæ dari etiam possidenti dicitur *in l. 1. §. 1. ff. famil. ercisc.*

XXVI. Tertia actionum divisio a Triboniano suscepta §. 21. *h. r.* eo pertinet, ut intelligatur, quantum in judicio peti oporteat, & quousque in pœnis progredi petendo liceat ultra id, quod nobis abest. Id autem maximi olim intererat, cum plus petendo causa cadebat actor §. 33. *h. r.* Ita igitur inspectis actionibus, concipi eæ possunt aut in simplum, aut in duplum, aut in triplum, aut in quadruplum; nulla autem actio ultra quadruplum potest excurrere *d. §. 21. h. r.* In simplum dicuntur actiones omnes, quæ simplicem rei persequutio-

tionem continent. Ejusmodi erunt non tantum actiones ex contractu, veluti ex stipulatu, ex empto vendito, locato conducto, sed ex delicto quoque, si ultra rei persecutionem nil completantur, veluti condictio furtiva, & rerum amotarum actio §. 22. *h. t.* In duplum vero sunt actiones non solum furti nec manifesti, sed aliquando etiam depositi, damni injuria illati adversus legem Aquiliam, ut supra vidimus, & servi quoque corrupti §. 23. *h. t.* At in triplum est actio adversus eos, qui majorem quantitatem in libello conventionis inferunt, ut ita exequutores litium ampliorem summam sportularum exigant §. 24. *h. t.* In quadruplum denique sunt actiones furti manifesti, & de eo, quod metus causa. Si cui enim metus causa quid absit, in quadruplum actionem ei pollicetur edicto Prætor §. 25. *h. t.* *U. l. 10. ff. quod met. caus.* Actio tamen metus causa ab aliis in quadruplum actionibus in eo differt, quod simpli restitutione reus absolvitur, si arbitrio judicis rem actori restituat §. 27. *h. t.* Sed desino de his ego plura, cum apud nos privatæ actiones non ultra simplum instituantur. Si enim ab injuria discesseris, pœnæ pecuniariæ, quæ privatis olim applicabantur, aut numquam obtinebunt, aut pridem exoleverunt in Regno.

XXVII. Quartam actionum divisionem cœptat Tribonianus §. 28. *U. l. 31. h. t.* Quasdam enim actiones *bonæ fidei*, quasdam *stricti juris*, quasdam *arbitrarias* esse scribit. Ea autem divisio ut intelligatur, advertendum in primis, apud Prætorē expediri solitasse olim ea tantum, quæ litis contestationem præcedebant, quæque *in jure fieri* dicebantur; reliqua ad sententiam usque ab ipso Præ-

Prætorë judicibus, vel arbitris delegari solita *l. 15. ff. de re judic.* Prætor igitur de jure, & an actio competeret, cognoscebat; judices de facto cognoscere, & ex formula a Prætorë præscripta sententiam ferre jubebantur. Rem omnem optime executus est Noodt. *de jurisdict. & imper.* 1. 8. Pro negotiorum autem diversitate Prætor diversas formulas judicibus præscribebat, ex quibus eos judicare oporteret. Æquitas enim ipsa suasit, ut quibusdam in negotiis judicis facultas liberior esset, ejusque religio nullis vinculis astringeretur: ejusmodi erant controversiæ fere omnes occasione contractuum utrumque contrahentem obligantium excitatæ. Eas igitur ob causas in judice dando Prætor liberiores formulas præscribebat, nec certam summam ea complectebatur. Ita quidem in contractibus consensu initis eatenus judex reum damnare jubebatur, quantum *ex bona fide* is videretur adversario suo dare oportere. Sub ea autem formula datus judex non solum in summam ab initio promissam reum damnare poterat, sed ad usuras, & fructus etiam, & si quid aliud æquum ejus religioni videretur. Optime isthæc illustrat Huberus ex Cicerone, & Seneca in *prælect. h. r. n.* 25. Ejusmodi igitur actiones, quia in Prætoris formula adjiciebatur *ex bona fide*, vel quantum *æquius melius*, dictæ sunt bonæ fidei.

XXVIII. Contra cum quibusdam in negotiis, prout lingua nuncupatum esset, ita jus dici oporteret (ejusmodi fuerunt obligationes unilaterales pleræque omnes) in controversiis inde subortis severiorem formulam judicibus præscribebat Prætor, ad quam veluti *ad libellam*, ut scribit Cicero pro *Rosc. 4.* judicare judex adigebatur. In sententia

tia dicenda igitur de controversia iudex formulæ nihil addere, aut detrahere poterat, eamque ex lege, & nuncupatione verborum, quæ nuncupata in contractu essent, regi oportebat. Proinde iudicis ea sub formula dati angustior facultas erat: inde vero fiebat, ut per sententiam actor totam litem aut obtineret, aut amitteret. Cicer. *loc. cit.* Ita quidem si quis in centum mutui nomine conventus esset, sub hac formula dabatur a Prætorē iudex: *Semproni iudex esto, & si paret, Titium centum ex mutuo debere, in centum illum condemnare.* Huic igitur formulæ iudex astringebatur, neque quicquam ei supererat, quam, causa cognita, in petitam summam reum damnare, aut absolvere, neque ei licebat usurarum, aut alterius rei nomine præter formulæ leges sententiæ quicquam addere. Quia igitur in ejusmodi controversiis arctius formulæ astringebatur iudex, ejusque liberius ex præscripto Prætoris coerceretur arbitrium, hæ actiones *stricti juris* appellabantur, quasi in iis jus, seu facultas iudicis esset astricta. Denique si daretur iudex ea sub formula, ut ipse religione sua æstimare juberetur, quantum a reo oporteret actori dari, lege addita, ut, si non pareret reus, eum aut in majus aliquid condemnare posset, vel quatenus ab adversario juratum esset, actio *arbitraria* dicebatur Sigon. *de jud. Roman.* 1. 24. Ejusmodi autem actiones arbitrariæ dicebantur, quia, nisi arbitrio iudicis paritum a reo foret, ampliori summa per iudicem multari poterat.

XXIX. Cur autem triplex hoc formularum, & actionum genus prodiderit edicto Prætor, non aliunde repetendum, quam ex ipsa ratione contractuum, & negotiorum, unde actiones ipsæ ma-

nabant. Primo enim contractus quosdam ita comparatos esse oportebat, ut in iis interpretandis laxiorem iudicibus facultatem concedi ipsorum contrahentium interesset. Ubi enim uterque contrahens obligatur, ex re utriusque contrahentis est, in jure dicundo spectari non tam, quod lingua nuncupatum est, quam contrahentium commune votum, & quod æqui bonique ratio ipsa suaferit. Recte igitur Prætor ex contractibus utrimque obligatoriis bonæ fidei actiones instituit, ut in iis definiendis iudices sequerentur, quod ipsorum religioni æquius melius videretur. Contra quorundam contractuum ejusmodi erat ingenium, ut eorum interpretatio intra certos terminos necessario coercenda foret. Neque enim æquitas pati videbatur, ut quispiam effræni iudicis arbitrio solvere compelleretur ultra, quam verbis nuncupatum in contractu esset, ubi alteruter tantum contrahens obligaretur. Extensio enim per iudicis interpretationem elicitam unum, non item alterum contrahentem perpetuo prægravasset. Proinde ex contractibus alterutrum tantum contrahentem obligantibus actiones stricti juris Prætor oriri voluit, atque ætiori formula iudicis arbitrium coerceri. Ut enim infra liquebit, quemadmodum ex contractibus utrimque obligatoriis actiones bonæ fidei, ita ex contractibus alterutrum tantum obligantibus stricti juris actiones accommodabantur. Denique cum publice inter sit, reorum contumaciam severius coerceri, actiones etiam arbitrarias instituit. edicto Prætor, ut, si jussu iudicis rem non restituisset reus, lueret contumaciæ pœnam, & majorem etiam summam solvere adigeretur. In arbitrariis enim actionibus primo iudex quodammodo interloque-

batur, tamquam arbiter honorarius jubens exempli gratia, rem metu extortam restituere reum; si is non pareret, iusto veluti decreto tandem condemnabatur in quadruplum *l. 14. §. 1. C. sequ. ff. quod met. caus.* Proinde in ejusmodi actionibus duplex sententia ferri solebat, altera veluti interlocutoria, qua quid restituere jubebatur reus; definitiva altera, qua reus, nisi arbitrio judicis paruisset, condemnabatur in quadruplum. Verum in actionibus arbitrariis hodie apud nos una solet proferri sententia, quæ, nisi appellatio obstet, executioni mandatur.

XXX. Jam vero actiones arbitrariæ ab actionibus bonæ fidei effectu juris vix differebant olim. Si quod inter utrasque discrimen interfuit, potissimum illud erat, quod in actionibus bonæ fidei una definitiva sententia damnabatur, aut absolvebatur reus; verum in actionibus arbitrariis sæpe duplex sententia interpungi solebat, ut vidimus. At vero plures, & insignes differentię olim intercedebant inter actiones bonæ fidei, & stricti juris, & plurimi apud Romanos intererat, utra actio foret propter diversos juris effectus ex utraque proficiscentes. Inter utrasque actiones differentias operose recenset Vinnius ad §. 28. *h. r. n. 4.* Potiora earum capita videntur fuisse isthæc. Primo scilicet in actionibus bonæ fidei ipso jure compensatio locum habebat, in actionibus stricti juris, opposita tandem exceptione doli, compensatio admittebatur; licet beneficio Justiniani hodie in actionibus generatim omnibus ipso jure locus compensationi pateat, neque in judiciis stricti juris compensationis exceptio sit opus, ut actio minuatur §. 30. *h. r. C. l. ult. C. de compens.* Præterea in actionibus

bonæ fidei usuræ etiam non promissæ debebantur ob moram *l. 32. §. 2. ff. de usur.* in actionibus stricti juris peti tandem usuræ poterant, si promissæ per stipulationem essent *l. 24. ff. de præscript. verb.* Denique, ne singula persequar, in actionibus bonæ fidei exceptionem sub initia litis contestari non oportebat: satis igitur erat, quandocumque ante sententiam eam opponi; verum in actionibus stricti juris sub initia litis exceptio opponenda erat *l. 8. C. de except.* Sed desino de his ego plura. Moribus enim hodiernis actiones omnes bonæ fidei vulgo existimantur. Id ita passim in Europa receptum ob æquitatem juris Pontificii, ex cujus regulis actiones bonæ fidei censentur omnes. Vid. Gudel. *de jur. noviss. libr. 3. c. 14.* & Bald. ad *c. 1. X. de plus pet.*

XXXI. Ceterum ex dictis hactenus facile definire fuerit, quæ actiones sint bonæ fidei, quæ stricti juris, quæ denique arbitrariæ. Primo enim bonæ fidei sunt generatim actiones omnes ex contractibus consensu initis, empti venditi scilicet, locati conducti, mandati, pro socio *§. 28. h. t.* Eundem in numerum ibidem refert Tribonianus actiones quasdam ex contractibus re initis promanantes, commodati scilicet, depositi, & pignoratitiam. Eiusdem qualitatis ibi pronunciantur actiones duæ præscriptis verbis, actio scilicet, quæ ex permutatione oritur, & ea, quæ æstimatoria dicitur ei competens, qui rem vendendam æstimatam, & pretio præstituto dedit. Eodem pertinent actiones ex quasi contractu negotiorum gestorum, tutelæ, familiæ erciscundæ, communi dividundo. Denique ex actionibus in rem quoque hereditatis petitio bonæ fidei de-

cla-

claratur esse in d. §. 28. h. t. Cum vero *ὁριστικῶς* (*definitivè*) loquatur ibi Tribonianus , nullæ præter enumeratas actiones bonæ fidei censerī debent. Vide Vinn. ad d. §. 28. n. 5. Contra stricti sunt juris actio ex stipulatu , condictio certi ex mutuo , condictio indebiti , & reliquæ generatim omnes , quæ nec bonæ fidei , nec arbitrarie sunt. Arbitrarie sunt denique in rem actiones omnes præter hereditatis petitionem , actio quod metus causa , de dolo , ad exhibendum , redhibitoria , quod certo loco , & , ne singula persequar , finium etiam regundorum §. 31. h. t. Verum enimvero , quod diximus , actionem ex stipulatu stricti juris esse , secus id quidem erit , si eam mulier ad dotem repetendam instituat . Ante Justinianum scilicet dotem repetenti mulieri rei uxoriæ compete-
bat actio ; Justinianus , ea exolescere iussa , actionem ex stipulatu ad dotem repetendam mulieri dedit , licet de dote restituenda mulier stipulationem non interposuisset . Hanc tamen ex stipulatu actionem bonæ fidei censerī voluit , quæ qualitas olim rei uxoriæ actioni fuerat §. 29. h. t. Sed conser , quæ ea de re congesti supra *rom. 1. pag. 184. & sequ.* Actum hic agere nolim.

XXXII. Porro trimembris isthæc actionum divisio eo etiam pertinebat , ut ex ipsa formula præsto judici foret , quid in dicenda sententia eum sequi oporteret. Inde §. 32. h. t. occasionem arripit Justinianus admonendi iudicis , ut , quoad fieri queat , reum certæ pecuniæ , vel rei damnet , ne alias controversiis dirimendis comparatæ sententiæ litem ex lite creent. Aliquando tamen ipsa actionis institutæ natura non patitur , ut certa sententia ferri possit . Ita quidem cum , pluribus

rebus disjunctim promissis, electio debitoris sit, utram præstare malit, id quidem arbitrium nequit reo judex adimere, sententia ita lata, ut necessario is præstet exempli gratia bovem, cum bovem, aut equum promiserit. Si hinc discefferis, ut litium seges amputetur, certam ferre sententiam judex debet, licet incerta petita sit quantitas. Ita quidem si factum promissum non fuerit a reo præstitum, eoque nomine petat reus, quanti interest, id factum esse, ea quoque in specie certam quantitatem oportet sententia sua complecti judicem. Id autem facile decernet judex, si prius accurate perpenderit, quanti actoris inter sit, aliquid fuisse factum *l. un. C. de sent. quæ pr. eo, quod inter. prof.* Vide Cujac. *observat.* 16. 34.

XXXIII. Jam vero cum ipsos petitionis fines non liceat egredi *l. 18. ff. commun. divid.* officio judicis ipse actor libello suo subservire debet. Proinde inter alia curare cum oportet, ne plus petat, quam sibi debetur. Et olim quidem si vel uno nummo plus petatum ab actore foret, causa prorsus cadebat, neque libellum ei mutare, aut emendare licebat, ut, quod debitum revera foret, nancisci posset. Tantum per restitutionem in integrum ei succurri poterat. Eam tamen non facile indulgebat Prætor, nisi aut actor lapsus juventute foret, aut alia qua causa subesset, ob quam majoribus etiam viginti quinque annis restitutio indulgenda videretur §. 33. *h. t.* Recte autem ibi Tribonianus admonet, quadruplici modo plus peti posse, *re scilicet, tempore, loco, causa.* Re plus petitur, si quis exempli gratia triginta pro viginti petat. Tempore plus peti dicitur,

tur, si quis kalendis petat, cum idibus ei debeatur. Loco plus peti videbitur, si exempli gratia Romæ petas, quod Ephesi quis promiserit, se soluturum. Causa denique plus petatum intelligetur, si quoquo modo deterior adversarii conditio per petitionem fiat. Ita quidem causa plus petatum censi debet, si ex pluribus rebus disjunctim promissis certa aliqua petatur, aut, promisso genere, certam sibi speciem quis dari petat. Utroque enim casu electio debitori præripitur, quam ei leges relinqui jubent.

XXXIV. Quoquo igitur modo plus olim petatum esset, causa cadebat actor, neque præter restitutionem in integrum ullum ei præsidium. Id tamen asperius posteritati visum, & veteris juris rigorem in ea re molliendum censuere Principes. Primo igitur a Zenone cautum, ut, qui tempore plus peteret, causa quidem haud caderet, sed reo tantum præstituti temporis duplarentur induciæ; iis adhuc exactis, in reum agere jus non esset, nisi prioris litis impensæ ei antea solutæ forent §. 10. *de except.* Adversus eos, qui re, loco, causa plus petiissent, eam poenam indixit Justinianus, ut, si ex pluris petitione reus quid damni sensisset, triplum ejus solvere adversarius damnas esset *d. §. 33. b. f.* Verum apud nos hodie in pluris petitione præter impensas injustæ litis vix aliud præstari solet. Quod autem diximus, plus ab iis etiam peti videri, qui alibi, quam ubi promiserint, conveniuntur, id quidem intellige, si actoris vel fraude, vel imprudentia petatum alibi fuerit. Quid enim si quis Ephesi se soluturum promiserit, eoque numquam accesserit? Id igitur si factum esset, arbitrariam actionem

nem adversus reum accommodavit edicto Prætor de eo, quod certo loco l. 1. ff. de eo, quod cert. loc. Ea autem actio sententia longe alia arbitraria dicta fuit, quia scilicet arbitrio judicis dijudicandum relinquebatur, quanti alterutrius interesset, in loco convento factam fuisse solutionem. Pro locorum enim diversitate diversa rerum pretia esse solent, & frumentum, quod exempli gratia decem in Apulia venit, supra viginti Neapoli plerumque venditur.

XXXV. Atque ita quidem comparatum jus civile fuit, si in pluris petitione peccatum esset. Qui tamen minus, quam ei deberetur, libello complexus foret, veluti qui, cum ei decem deberentur, quinque fortasse petisset, is quidem sine periculo agere videbatur. Qui enim minus petit, quam sibi debetur, is adhuc petit, quod sibi debetur. Proinde eodem in judicio facultas est judici, reum damnare in summam revera debitam l. 1. C. de plus pet. & §. 34. h. t. Quid si quis aliud pro alio petat? Eum etiam sine periculo agere docet Tribonianus, eique permittendum in eodem judicio errorem suum corrigere §. 35. h. t. Jure veteri quidem, quo diversus erat a Prætoris judex, ubi aliud pro alio petatum esset, errore per actorem agnito, Prætor rursus erat interpellandus, qui, dato rursus judice, novum judicium inchoari jubebat l. 23. ff. de judic. Verum jure novo, quo idem est Prætor, & judex, in eodem judicio corrigere licet errorem. Quod tamen in d. §. 35. scribitur, in eodem judicio corrigi errorem jus esse, id eo pertinere videtur, ut sine nova in jus vocatione coram eodem judice susceptum negotium expediri queat. Alioquin accurate loquendo idem

idem iudicium dici nequit, ubi contestatio litis nova requiritur. Atqui in præsentī specie, errore agnito, iterum contestanda lis est. Communis est enim sententia, & in foro recepta, usque ad sententiam definitivam quidem emendari libellum posse, mutari autem jus non esse, nisi ad litis contestationem usque; si, lite jam contestata, libellus sit immutandus, novam litis contestationem instituendam, novum iudicium inchoandum. Vid. Doctores ad *l. 3. C. de edend. & Bachovium disput. 1. de action. rh. 44.*

XXXVI. Quinta, & ultima actionum divisio est, quod quibusdam actionibus semper solidum consequimur, quibusdam aliquando solidum, aliquando minus §. 36. *h. t.* Quominus solidum consequatur actor, facit aut peculii ratio, aut beneficium competentiae reo tributum, aut mutua agentis obligatio, propter quam fieri compensationem oporteat.

XXXVII. Primo igitur si ob contractum servorum, filiorumve familias in patrem agatur, aut dominum, actione de peculio quidem pater, aut dominus recte convenientur, si minus tamen in peculio sit, pater, aut dominus in solidum condemnari nequeunt, sed eatenus tantum, quatenus in peculio fuerit *d. §. 36. h. t.* Sed hæc infra latius insequenti titulo. Rursus propter beneficium competentiae reo tributum potest fieri etiam, ut minus solido quis consequatur. Sub præsentī institutionum rubrica asseritur id beneficium marito dotis causa convento, parentibus, patronis, sociis, ac donatoribus, si donationis causa a donatoriis conveniantur §. 37. *et sequ. h. t.* Eodem quoque beneficio tueri se posse decernitur, qui bonis cessit, si post cessio.

sionem aliquid adquisierit §. 40. *b. r.* Hactenus quidem in institutionibus excurrit competentias beneficium. Ex latioribus tamen pandectarum libris sat liquet, eodem beneficio uti oportere milites *l. 6. C. 18. ff. de re judic.* filios quoque familias post emancipationem, quos exheredes scripserit testamento parens, quive paterna hereditate se ultro abstinuerint, *l. 2. ff. quod cum eo, qui in alien. potest. est negot. gest. off. dic.* Sed & ipsi fratres eo beneficio non sunt excludendi. Si enim sociis hoc beneficium ideo Jurisconsultus asserit *in l. 63. ff. pro soc.* quia fraternitatis imago inter socios intercedere videatur, potiori jure idem tribuendum videtur illis, qui vero fraternitatis vinculo devinciuntur. Denique idem etiam beneficium asseruere veteres socero dotis seu solvendæ, seu restituendæ causa convento *l. 20. C. sequ. ff. de re judic. C. l. 17. ff. solus. marit.* Marito autem id singulare concessum, ut hoc beneficium opponere uxori possit non solum, si dotis causa, sed quocumque etiam ex contractu conveniatur, idque ad servandam æqualitatem ad uxorem etiam extendi placuit *d. l. 20. ff. de re judic.*

XXXVIII. Jam vero, beneficio competentiz opposito, id reus commodi sibi parat, ut condemnatur non in solidum quidem, sed quatenus facere potest. Id eo pertinet, ut reo relinquatur, quod ipsi ad alimenta sufficiat, ne turpi cum inopia confluetur *l. 19. C. 30. ff. de re judic.* Proinde, quibus hoc beneficio uti concessum, non solum in carcerem detrudi nequeunt, sed ne totum quidem, quod habent, ipsis extorqueri debet. Ita quidem si quis post cessionem bonorum centum sester-

tio-

tiorum millia amico Mercurio sibi quæsierit, si cum rursus conveniant veteres creditores, quorum causa bonis cessisse dicetur, relinquere ei debent, quod, dignitatis ratione habita, sit ad vitam honeste tolerandam satis. Hoc beneficio donatorem etiam uti posse monuimus, si a donatario conveniatur. Ea tamen in specie competentis beneficium latius extendi placuit. Æquum enim est visum, alimenta donatori decerni, deducto prius ære alieno, ne, si quando ceteri creditores agant, egere cogatur *l. 12. ff. de donat.* In aliis speciebus melior inter creditores conditio occupantis est, nec reo prodest opponere, habere se alios creditores, iisque adhuc agentibus, ad egestatem se perductum iri *d. l. 19. ff. eod.*

XXXIX. Denique mutua obligatio, & opposita compensatio facit, ut minus solido consequatur actor §. 39. *h. t.* Cum enim mutuam debiti, & crediti contributionem fieri per compensationem oporteat *l. 1. ff. de compens.* si quid reus vicissim a creditore sibi deberi ostenderit, petitionem actoris id necessario minuet. Neque tamen promiscue in iudicio compensationem licet opponere. Ea enim recte tandem opponi censebitur, si, quæ utrimque debentur, mutuam contributionem admittant. Ejusmodi tantummodo esse placuit, quæ functionem in genere recipiunt, quæque numero, pondere, aut mensura constant. Si enim præter isthæc alia quoque in compensationem venire possent, res eo sane rediret, ut aliud pro alio compensari jus esset. Id vero non magis licere debet, quam aliud pro alio invito creditori solvere. Neque enim alia de causa compensatio debitorem liberat, quam quia locum solutionis obtinet *l. 4.*

C. de

C. de compens. l. 2. §. 1. ff. de reb. cred. Cum igitur quantitatis tantum cum quantitate compensationem jus fieri patiatur, neque species cum specie compensari poterit, neque species cum pecunia, si qua debeatur. Sanctitas etiam depositi suavit, ne depositori rem depositam repetenti compensationem liceret opponere §. 30. *inst. h. r.* Sed Republica etiam, vel fisco agentibus, compensatio frustra opponitur in speciebus, quæ recensentur in *l. 3. C. de compens. l. 20. ff. eod. l. 46. ff. de jur. fisc.* Denique ob publicam quoque severitatem delicti cum delicto compensatio frustra petitur *l. 2. l. 13. ff. ad leg. Jul. de adult.*

XL. Hactenus Triboniano satisfactum. Super sunt, quæ addam tamen. Cum enim sæpiusculæ addubitari contingat, an, si plures actiones ex eodem negotio profluant, altera per alteram perimatur, de concursu actionum mantissam quotamcumque hic addamus, oportet. Tota autem disceptatio eo redit, quibus in negotiis uti liceat actionum concursu, quem *cumulativum* vocant; quibus in controversiis concursus tantum actionum competat, quem *electivum* appellant. Hoc postremum si fiat, plures actiones alteram post alteram instituere non licet, sed, alterutra electa, altera evanescet statim. Orationem coercere placet intra species, in quibus actiones cumulari jus patitur. Inde enim facile intelligetur, quibus in speciebus, si plures competant actiones, eas cumulare non liceat. Ut autem præsentī sit quæstioni locus, non solum idem negotium, sed eadem quoque actionum causa fingi debet. Si enim negotium sit quidem idem, causæ tamen diversæ, ex diversis causis in eodem negotio actiones sine discrimine

cu-

cumulari poterunt. Ita sane, si quis servo primum quid furripuerit, deinde eundem occiderit, locus cum furti, tum legis Aquiliæ actioni patebit. Sed & inter easdem personas controversia fingatur, oportet. Diversis enim personis ex eodem facto plures actiones instituendi jus esse constat. Ita quidem si qua uxori filiæfamilias injuria illata fuerit, qua maritus, qua parens, qua uxor etiam poterunt injuriarum agere, nec propter actionem a parente institutam maritus, aut uxor agere prohibentur *l. 1. §. ult. ff. de injur.*

XLI. His ita præstitutis, duabus regulis ex media jurisprudentia petitis, & æquitati naturali consonis ea de re controversiæ generatim omnes facile transigentur. Prima regula eo pertinet, *ne bis idem petatur l. 57. ff. de reg. jur.* Alteram ita concipito. *Si ob idem negotium plures competant actiones, alterutra instituta, perimitur statim altera, nisi in altera omissa sit pluris aliquid l. 41. §. 1. ff. de oblig. & action.* Igitur ex regula prima si quo ex negotio duæ actiones manent rei persecutoriæ ambæ, altera per alteram perimitur, neque utramque cumulari jus erit: alias idem bis peti videretur. Hinc cum ex furto condictio furtiva, & rei vindicatio oriatur, si, rei vindicatio fuerit electa, condictio furtiva statim expirat. Eadem regula reguntur & poenæ, ne alias contra Jurisconsulti monitum *idem delictum variis æstimationibus coerceatur in l. 41. ff. de pæn.* Inde fit, ut, si quis privato judicio dupli, vel quadrupli poenam sit consequutus, eadem de causa criminaliter experiri nequeat. Indidem fit, ut, si quis æstimatoria injuriarum actione egerit, frustra ex lege Cornelia calumniam reo facessat,

cessat. Per alteram vero regulam facile respondere est de concursu actionis mixtæ, & simplicis rei persecutoriæ. Si enim simplex rei persecutoria fuerit electa, mixta non perimetur, quod ad pœnam, sed quod ad simplum tantum. Contra si mixta sit instituta, per eam rei persecutoria penitus extinguetur; alias idem bis peti videretur l. 35. §. ult. ff. de oblig. & act. Denique cum actio pœnalis, & rei persecutoria fines diversos habeant, si actum pœnali fuerit, adhuc rei persecutoriam jus erit institui; neque enim in ea specie dici potest, idem bis peti. Proinde si a furo pœna quadrupli exacta fuerit, is rei vindicationem declinare nequit. Sed nos latius isthæc, quam pro instituto. Vide Huber. in *pral. b. r.* n. 40. & sequ.

A D T I T U L U M VI.

Excursus singularis.

De jure retractus, & judicio assistentie.

PRÆter regulas Romani juris duæ actiones apud Neapolitanos evaluerunt altera ex *retractu*, altera ex *assistencia*, quam pragmatici vocant. Juvabit igitur, utriusque jus ediscere, ne quid in patrocinio causarum desiderent olim adolescentes. Sit igitur

C A P U T I.

De jure retractus.

Sæpiusculæ apud nostrates usuvenit, ut, prædio seu rustico, seu urbano vendito, præter domini voluntatem præferri alter in emptione debeat. Id jus *congrui* vulgo appellatur, quia jure potissimum vicinitatis competit. Jus etiam *retractus* frequentius a pragmaticis dici solet, quia per illud alter ad se veluti retrahit, quod dominus aut vendidit, aut venditurus est alteri. Postremum hoc vocabulum commodius, & opportunius ego censuerim: ejus ambitus enim est latior, & casus complectitur generatim omnes, in quibus prælatio peti aut in emptione, aut alio contractu potest, quoquo jure quis præferri jubeatur seu necessitudinis, seu consortii, seu vicinitatis, aliove quo titulo. Retractus autem generatim in *conventionalem*, & *legitimum* dividi vulgo solet. Conventionalis est, qui ex pacto contractui adjecto descendit. Ita quidem si in venditione placuerit, ut, quandocumque restituto pretio, res ad venditorem redeat, ex pacto convento venditor, restituto pretio, rem suam pro lubitu recipere poterit. Contra legitimus retractus erit, si quis in emptione, aliove contractu ab ipsa lege præferri jubeatur. Prælatio isthæc jus *πρωτοπραξίας*, vel *πρωτὴν πρᾶξιν* a Græcis opportune dicitur. In præsentī autem argumento de retractu legitimo unice sollicitos nos oportet esse. Cum enim retractus conventionalis ab ipsis contrahentibus legem accipiat, de eo secundum pacta conventa pronunciandum erit, neque in definiendis contro-

ver-

versis inde subortis opera Jurisconsulti est opus.

II. Principio Romani veteres pro arbitrio cives res suas distrahere liberrime voluerunt, nec præter venditoris voluntatem in emptione quempiam præferri sunt passi. Retractum igitur legitimum non solum apud Decemviros frustra quæres, sed & in ipsis pandectarum libris nusquam invenies, ut recte colligit Jacobus Gothofredus ad *l. 6. C. Theod. de contrah. empt.* Cum tamen ex instituto Judaico agnati, vel gentiles in emptionibus præferri juberentur, Judæorum exemplo fortasse Constantinus usus jus retractus in orbem Romanum invexit, ut non absurde conjicit idem Gothofredus *loc. cit.* Quisquis tamen hujus retractus primus auctor in Imperio Romano fuerit, id juris tantum ad sanguine proximos, aut consortes pertinere is jussit. Proximitatis, & consortii rationem haberi placuit, cum venditori nil deperiret, eique a proximis, vel consortibus, si præferri vellent, justum pretium offerri oporteret. Id in proximis quidem suasisse videtur communis quædam affectio, qua res vulgo prosequi solent homines ab ipsa cognatione, & remotis majoribus fortasse profectas; in consortibus vero ipsa communionis ratio idem admitti jussit. Humanum enim videri debuit, in rei communis emptione præferri eos, quibus illa communis esset. Nam, ut recte advertit Gothofredus ad *d. l. 6. C. Theod. de contrah. empt.* in præsentī argumento consortes συγγληροι sunt, quibus scilicet patrimonium, vel res alia communis est.

III. Ita de retractu fortasse Constantinus. Injuriū tamen Gratiano, Valentiniano, & Theodosio visum, invito venditore, in emptione præferri quempiam, ne quando invisus homi-
nibus

nibus res suas aliquis vendere compelleretur. Proinde, abrogata Constantini lege, jus Romanorum vetus restituendum ii curarunt in d. l. 6. C. Theod. de contrah. empr. Ipsa verba legis in re celeberrima lubet exscribere. *Dudum proximis, consortibusque concessum erat, ut extraneos ab emptione removerent, neque homines suo arbitratu vendenda distraherent. Sed quia gravis hæc videtur injuria, quæ inani honestatis colore velatur, ut homines de rebus suis facere aliquid cogantur inviti, superiori lege cassata, unusquisque suo arbitratu quærere, vel probare possit emptorem.* Eandem legem in Codice Justiniano Tribonianus exhibet l. 14. C. de contrah. empr. verum emblemate suo hoc ei syrma affuit, nisi lex specialiter quasdam personas hoc facere prohibuerit. Id ipsum tamen recte per Tribonianum videtur additum. Ideo enim id factum, ne ea lege derogatum censeretur juri prælationis in aliis casibus competentis, veluti in emphyteusi, aut in specie leg. un. C. non licer. habitat. metrocom.

IV. Jam vero licet jus retractus Gratiano, Valentiniano, & Theodosio visum fuerit iniquius, sequiori tamen ætate Constantini lex jure veluti postliminii apud plerosque populos recepta fuit. Primo enim, feudorum instituto valescente, generatim placuit, ut in venditione feudi non solum directo domino, sed proximo agnato quoque jus prælationis esset 2. consuet. feud. tit. 9. Deinde serius, ocyus alibi retractus gentilitius publica lege firmatus, alibi consortibus vetus jus restitutum, alibi ratio quoque vicinitatis habita, vicinis prælationis jure concessa. Et in Oriente quidem celeberrimis

ma in eo argumento fuit novella constitutio Romani Senioris Lecapeni, quam suis commentariis auctam Cujacius exhibet *libr. 5. de feud. tom. 2. pag. 1343. edit. Neap. 2.* In ea jus *πρωτογενεως* primo conceditur cognatis consortibus, deinde sociis nulla cognatione devinctis, tertio sine societate rem communem habentibus, quarto confinibus communem censum exolventibus, postremo vicinis. Eam vero constitutionem servatam ego crediderim non solum in Oriente, sed in Regni quoque Neapolitani Provinciis, quibus ante Nortmannorum adventum Bizantini Principes imperitabant. Vetus autem fabula doctorum est, Fridericum Ænobarbum iisdem fere de causis jus retractus in solido Occidente obtinere jussisse Imperiali constitutione *sancimus*, quæ prostat apud Goldastum, & in volumine constitutionum Regni inter Roberti capitula *pag. mihi 371.* Addunt, eam observari in Regni Neapolitani Provinciis non tamquam legem scriptam (sane nullum jus in alienis Provinciis ferendæ legis Ænobarbus sibi vindicare poterat) sed veluti æquissimam consuetudinem sua sponte receptam. Ita præter alios Historicus Urbis *libr. 13. c. 3. §. 2.* Verum accuratius conferenti mihi Lecapeni novellam cum constitutione *sancimus* verisimile visum est semper, eam Friderici constitutionem ipsissimam esse Lecapeni novellam; eandem incertum auctorem Latine vertisse, utque facilius recipere-tur, eam venditasse tamquam a Friderico latam. Sane in constitutione *sancimus* fidum agnoscas interpretem, ac maxime sollicitum Latine reddere Græcam Lecapeni novellam; dormitasse quandoque tamen facile revincere possem, si id ageretur. Utcumque id erit, in hujus Regni Provinciis ea

con-

constitutione controversiæ de retractu ex recepta consuetudine dirimuntur ; in Regni Provinciis inquam . Nam in hac principe Regni Urbe locus est consuetudinibus sub titulo *de jur.congr.* Cum igitur constitutio isthæ frequentissimi sit in Regno usus, operæ pretium facturi videbimur, si ejus sententiam per summa capita hic exhibeamus .

V. Principio in vulgatis constitutionis codicibus jus prælationis asseritur primo cognatis, si confines fuerint ; deinde fociis, & ipsis tamen conterminum prædium habentibus ; tertio vicinis licet extraneis ; denique iis, qui sub uno servitio, seu censu fuerint, & ipsis tamen, si confine sit prædium (1).

F 2

In

(1) Græcæ constitutionis interpres *ὁμοτελεις* vertit sub uno servitio manentes ; rectius simul censitos eos appellat Jacobus Gothofredus ad l. 6. C. Theod. de contrah. empt. Interpres igitur post Lecapenum jus prælationis decernit vicinis, qui eidem domino censum præstant. Cum tamen census solvi soleat non minus fisco, quam ob emphyteuticum agrum privatis etiam, addubitari queat, an jus prælationis obtineat non tantum inter eos, qui sub eodem censu sint respectu fisci, sed inter eos etiam, qui ob emphyteuticos agros sub eodem sint censu quoque respectu domini directi, qui privatus sit tamen. Ab initio eo inclinabam, ut id juris assererem non minus simul censitis ratione fisci, quam illis etiam, qui eidem domino directo privato canonem ob emphyteusin solverent. Re tamen delata Nicolao Ignarræ penitioris Jurisprudentiæ peritissimo, is humanitate, qua solet, me monuit, vocem *τελος* publico tantum censui indigitando perpetuo accommodasse veteres. Sequutus igitur tanti viri vestigia eos tantum *ὁμοτελεις* ad prælationem adniserim, qui simul censiti sunt ratione fisci, & una *τελος* fisco persolvunt, cum præsertim is census in Græca Lecapeni constitutione *ὑποτεταγµενον* appelleretur. Atqui hoc

vo-

In præsentī constitutione igitur prælatio non competit, nisi jure viciniae. Proinde retractui, quem *gentilitium* vocant, in rebus allodialibus nusquam in Regno locus. Nam neque cognati, neque socii, neque una censum exolventes præferri jubentur, nisi & vicini fuerint (1). Prædium autem venditurum quoniampiam jus prælationis habentibus denunciare venditionem oportet. Hi, si præferri velint, intra triginta dies aut justum pretium, aut quanti empti sine fraude prædium ab extraneo emptore fuerit, venditori præstare debent. Exactis a denunciatione triginta diebus, si id factum non fuerit, jus prælationis cessat.

lis

vocabulum apud medii ævi scriptores censum tantum indigitare solet, qui fisco persolvitur.

(1) Quisquis hanc Lecapeni constitutionem Latine vertit, ejus sententiam omnino corrumpit. Ut enim alia præteream, præter Lecapeni mentem, & ipsam rationem juris nudos vicinos præferri jussit simul censitis, & idem servitium præstantibus, si & ipsi vicini forent. Hos enim, cum duplici vinculo venditorem contingant, servitio communi scilicet, & vicinitate, nudis vicinis præferri oportuisset, quemadmodum a Lecapeno factum. Ipsa Lecapeni verba lubet hic sistere. *Επὶ ταῖς συμπαρακειμένοις ὁμοτείαις, μετεπιτετα οἱ πάλως ἐν τινὶ μέρος συνάπτως ἡνωμένοι.* (Deinde vicinis simul censitis, postremo simpliciter in aliqua parte simul conterminis.) Perperam igitur, & contra rationem juris Latinus interpret hæc ita vertit. *Post hos illi, qui sunt conjuncti tantum, post omnes istos vocentur illi, qui sunt sub uno servitio, & sunt conjuncti ex aliqua parte.* Miror, absurdum istud inter nostrates Jurisconsultos hætenus advertisse neminem, cum ita expressa constitutionis sententia jus ipsum afficiat, & duplici vinculo conjunctos nudis vicinis præferri jubeat.

Iis tamen, quibus uti prælatione licet, absentibus ex justa causa, vel in pupillari, aut minori ætate constitutis, ipsorum defensoribus, tutoribus, curatoribus quadrimestre præstituitur a denunciatione spatium, intra quod, oblato pretio, prædium adipiscendum curent. Si id facere negligant, damnum illatum sarcietur tutelæ judicio. Verum jus prælationis denegatur ob causas generatim omnes, ex quibus inter vivos rite facta donatio rescindi solet. Ita quidem si vicino quispiam impias manus intulerit, is prælationem frustra postulat, si suum vendatur a læso vicino prædium. Neque vero prælationem constitutio indulget in contractu quolibet, sed tantum in venditione, emphyteusi, locatione. Proinde, ne sub alterius contractus obtentu fraus legi fiat, præferri jussi juramentum contrahentibus deferre possunt; rite juramento delato, jurato declarare contrahentes debent, alterius contractus causa prædium non transferri. Si, eo juramento præstito, de perjurio constet, pretium, & prædium dolose venditum fisco vindicatur: fiscus tamen prædium commissum vendere cogitur jus prælationis habenti. Ceterum, si omnia denunciatio fuerit, jus prælationis habenti intra decennium experiri licet: decennio exacto, neque ab iis, qui præferri jubentur, neque a fisco possessori calumnia fieri potest. At vero quod in constitutione sequitur, neque addici Friderico potest, neque illud habet in editione sua Cujacius. Sane quod ibi additur, ex aliis Græcorum capitulis desumptum in ipsa rapsodia dicitur, & summa confusione laborat. Sed & vix ibi quicquam memoratu dignum. Potissimum illud est, quod, si qui a tribus partibus sint contermini, ceteros

vicinos a jure prælationis excludant ; si quis a duplici tantum latere sit confinis , ceteri vicini non excludantur . Denique additur , ut neque viæ publicæ , neque Ecclesiæ , neque fisco vicinitatis causa prælatio competat . Quod viæ publicæ prælatio denegatur , id eo pertinere videtur , ut , si quis ab alterius fundo via publica intermedia dividatur , is frustra præferri postulet .

VI. His quidem legibus in Regni Neapolitani Provinciis jus retractus exerceri debet . In hac tamen principe Regni Urbe , ejusque territorio ejusmodi controversiæ secundum consuetudines dirimuntur sub rubrica *de jur. congr.* In iis nulla cognationis ratio , & in prædiis qua rusticis , qua urbanis vicini tantum præferri jussi : in urbanis præter vicinos focii in communi domo prælati quoque , ut infra liquebit . In consuetudinibus autem in venditione cujuscumque prædii vicini e latere præferri jubentur , si intra annum a die scientiæ prælationem postulent . Solvi vero pretium ab eis oportet , non quantum ab extraneis oblatum fortasse fuerit , sed quanti per tabularios Neapolitanos prædium sit æstimatum . Quod si duo e diversis lateribus confines adsint , jure prælationis uti uterque poterunt sine discrimine , quotum sit cujuscumque prædium . Proinde si centum jugera prædium alterutrius pateat , alterius lateris vicinus prædioli dominus , quod ultra bina jugera non extenditur , æque ad retractum admittitur *consuet. 1. de jur. congr.*

VII. Jam vero per consuetudines confines e latere vicinis a capite præferri jubentur . Proinde si alter e latere , alter contingat e fundi capitibus , hic inani sumptu frustra se vexat *consuet. 2. eod.* Ope-
rosc

rose ibi quærit Napodanus *n. 66.* quæ per consuetudinem prædii sint latera, quæ capita. Multis erroribus actus in eo tandem subsistit, ut latera longitudine metiatur, latitudine capita. Si autem æque longum, ac latum sit prædium, capita ibi constituenda monet, qua est ingressus in prædium. Glossatoris conjectura se mihi sat probat; nam & prædii latitudinem *frontem* dixere veteres. Vulgatum est nostri Venusini illud *sat. 1.8.*

Mille pedes in fronte, trecentos cippus in agrum

Hic dabat, heredes monumentum ne sequeretur.

Ibi prædii latitudinem *frontem* appellat Horatius. Facile igitur fieri potuit, ut consuetudinum Neapolitanarum scriptores agri latitudinem *caput* dixerint. Utcumque id erit, Napodani sententia est in foro receptior, ut rerum periti norunt. Aliquando tamen &, qui contingunt e capite, recte præferri possulant. Si enim fundi latera sapiat aut via publica, aut terra Ecclesiæ, confines e capitibus præferentur *d. consuet. 2. eod.* Id multo magis hodie admitti debet, cum novissimis Regni legibus res soli Ecclesiæ vetentur acquirere. At vero per consuetudines vicinis eatenus fuit concessa prælatio, quatenus ii e latere confines forent. Proinde si ab altero latere unus vicinus adsit, ab altero plures, dimidium prædii illi addicetur, qui ex altero latere contingit, alterum dimidium aliis confinibus adjudicabitur, cuique pro ea parte, quæ adversa est suo prædio *consuet. 4. eod.* Verum si e vicinis pluribus unus tantum uti retractu velit, prædium inter se, & extraneum emptorem dividi frustra postulabit. Superest igitur, ut aut totum prædium sibi coemat, aut ab injusta vexatione cesset *d. consuet. 4. eod.*

VIII. Quæ hactenus differuimus, in prædiis omnibus qua rusticis, qua urbanis generatim obtinent. In prædiis tamen urbanis singularia quædam per consuetudines invaluerunt. Primo enim si ejusdem domus pars inferna quidem ad unum, pars superna ad alterum pertineat, alterutra parte vendita, is præferri jubetur, qui alterius partis est dominus. Multo magis id obtinere placuit, si eadem domus ad plures pro indiviso pertineat, si partem suam vendat alteruter *consuet. 5. eod.* Quod sane favore societatis receptum oportuit. Præterea in prædiis urbanis æquitas ipsa suavit, ut, si ejusdem domus plures contignationes, seu solaria forent, præferretur ille, qui proximam contignationem subtus haberet. Æquissimum enim videri debuit, in emptione præferri eum, qui contignatione sua superioris incommodum sustineret. Igitur si vendatur secundum solarium, primi dominus præferri debet: si tertium, secundi dominus præferetur *consuet. 6. eod.* His præstitutis, edifferamus, oportet, quæ intercedant potiora discrimina in præsentī argumento inter consuetudines Neapolitanas, & constitutionem Friderico tributam, seu ex ipsis legum enarratarum verbis, seu ex recepta fori sententia ea profiscantur.

IX. Principio, ut vidimus, in constitutione *fancimus* vicinis venditio denunciari debet: vicinis rite denunciatis triginta dies præstituuntur, intra quos decernere eos oportet, num in emptione præferri velint: exacto eo spatio, præferri frustra desiderabunt. Verum in consuetudinibus Neapolitanis nulla vicinorum denunciandorum necessitas. Per eas, si uti vicinus prælatione velit, experiri
de

de jure suo is quidem debet intra annum a die scientiæ : post annum frustra præferri postulabit. Scientia vero qualisqualis per consuetudines indigari videtur, neque denunciari vicinos oportet, ut rei scientiam habuisse dicantur. Ut lites tamen præcaveantur, tutius ego crediderim, in territorio quoque Neapolitano denunciari vicinos. Ita enim omnis vitilitigandi causa vicino litigioso præciditur, idque admonet Napodanus ipse ad *consuet. de jur. congr. n. 39*. At vero cum in jure scientia in eo tantum intelligatur esse, qui scit, & agere non prohibetur *l. 1. §. 1. ff. si famil. furt. feciss. dicet.* si cui intra annum, a die scientiæ agere fortasse non licuit, seu quia in ætate constitutus minori fuerit, seu quia. iusta absentia sit distentus, adversus eum licet scientem frustra opponetur anni præscriptio. Atque ea quidem in re discrimen juvabit advertere inter consuetudinem, & jus in Regni Provincias per Pseudofriderici constitutionem inductum. Siquidem in constitutione cautum, ut adversus ipsos pupillos, minores, absentes tempus utiliter cedat; intra quadrimestre a denunciatione spatium tutores, curatores, defensores prælationem petant; si id neglexerint, extraneis emptoribus molestia porro non fiat: tutores autem, curatores, defensores ob neglectam prædii emendi opportunitatem damnum sarcire teneantur: quæ quidem omnia per consuetudines secus obtinent. Ceterum si in Regni Provinciis sine denunciatione venditio facta dicatur, ad decennium exactum usque prælationem petere vicino licet. Elapso tandem decennio, veluti longi temporis præscriptione is excludetur a jure prælationis.

X. Rursus illud etiam consuetudines inter, & con-

constitutionem interest, quod in constitutione solvi jubetur, quanti res empta sine fraude ab extraneo fuerit. Id autem eo pertinet, ut non solum iisdem legibus cum extraneo initis, & iisdem temporis induciis solutio fieri debeat, sed, si quid pluris sine fraude oblatum ab extraneo fuerit, id solvi etiam a vicino oporteat de Luc. ad *decis. de Franch. 390. n. 2.* & *Rovit. decis. 24. n. 43.* Secus per consuetudines in territorio Neapolitano obtinuit. Cum enim in *consuet. 1. de jur. congr.* pretium per vicinum solvi jubeatur, quanti per tabularios res æstimata fuerit, secundum tabulariorum æstimationem solvi pretium a vicino debet sine discrimine, plus, minus pretii oblatum ab extraneo fortasse fuerit. In æstimatione autem ineunda pretium inspicere tabularii debent, quanti res videatur, quo tempore jus prælationis exequutioni mandatur. Proinde si prædium pretiosius fortasse fuerit, cum primum venibat extraneo, mox inter judicii moras, cædis arboribus detruncatis, ejus pretium sit imminutum, in æstimatione postremi temporis haberi ratio debet, in eamque sententiam judicatum refert a Sacro Consilio Præses de *Franch. d. decis. 390. n. 1.* & *Sansel. decis. 102.* Verum enimvero procedunt hæc quidem, si privatim expediatur emptio. Si enim auctoritate publica res sub hasta vendatur, vicinus, cui auctio denunciata non fuerit, adhuc præferetur, verum pretium in subhastatione oblatum persolvere cum oportet, seu in Urbe, seu in Regni Provinciis res ita vendantur; in eamque sententiam sæpius memoria nostra Sacrum Consilium pronunciasse meminimus. Id fortasse suasit eorum commiseratio, quorum res publice veneunt.

Res

Res ita judicatas exhibet Joseph. Sorg. *Jurisprud. for. tom. 2. c. 39.*

XI. Insigne etiam inter constitutionem, & consuetudines discrimen est illud, quod per constitutionem in Regni Provinciis uti prælatione licet non solum in emptione, sed in emphyteusi etiam, & ipsa locatione. Verum per consuetudines in territorio Neapolitano in venditione tantum locus prælationi patet. In ipsa tamen venditione intra Urbis terminos non promiscue prælatio competit. Ex recepta enim fori sententia duo requiruntur, ut, re vendita, retractu possit vicinus uti. Primo enim oportet, ut res empta re vera fuerit; deinde ut emptor ipse, ejusve heres in possessione sit. Proinde si quis rem hodie emptam postridie donet, contra donatarium quidem frustra agitur, cum in donatione vicinus præferri non debeat; contra donatorem vero eo nomine agi non potest, quia, donatione sequuta, possidere jam desiit. Hinc in præsentis argumento vulgatum pragmaticorum illud; *intra territorium Neapolitanum hodie emo, cras dono.* Conf. Napod. ad consuet. de jur. contr. n. 41. & sequ. Verum cum in jure alias, qui dolo malo possidere jam desiit, pro possessore habeatur, si quis non liberalitatis exercendæ gratia, sed ut fraudem vicino faciat, rem emptam dolose donet, a prælatione vicinus excludi non poterit. Recte igitur pronunciatum a Sacro Consilio, præferendum vicinum esse in emptione domus, quam, ut a prælatione vicinum arceret, statim filio donavit emptor Rovit. *decis. 3.* At vero, quod diximus, frustra per vicinum donatarium conveniri, ubi res donata ab emptore
sine

sine fraude fuerit, ex præscripto consuetudinis intra territorium Neapolitanum coerceri debet. Cum enim ex constitutione in Regni Provinciis fieri denunciationem oporteat, ut jus prælationis intercidat, ante vicini denunciati deliberationem donatio etiam sine fraude frustra facta videbitur.

XII. Cum in territorio Neapolitano, si a venditione discedas, in aliis contractibus nusquam pateat prælationi locus, addubitari queat, an præferri vicini oporteat in iis saltem contractibus, qui propius a venditione absunt, veluti in emphyteusi cum pacto redimendi inita vel certo post tempore, vel quodcumque pro debitoris libitu. Eadem dubitatio suboriri queat in permutatione prædii cum annuo censu redimibili, & in ipsa venditione quoque cum pacto *de retrovendendo*, quod vocant. Quod ad emphyteusin cum pacto redimendi initam, ea quidem proxime ad emptionem accedit. Quid enim interest, utrum solvatur statim ab initio pretium, ut usu in emptione venit, an pecunia numeretur, ubi emphyteusis redempta fuerit? Neque regeas, in contractus tabulis contrahentes emphyteusin, non emptionem testari se facere. Ut enim advertit Bartolus ad l. i. C. de jur. emphyteut. spectanda potius est rei veritas, quam quo nomine negotium contrahentes appellent. Cum igitur ejusmodi emphyteusis serius, ocyus venditionis exitum sit habitura, venditionis regulis regi debet. Proinde recte videntur statuisse pragmatici, in ea etiam locum prælationi patere; alias sub ejus obtentu facile quidem eludi vicini possent. In eam vero sententiam a Sacro Consilio ætate sua pronunciari solitum, testatur Præses de Franch. *decis. 392.* Adde Afflict. *decis. 72.*

XIII. Quod

XIII. Quod ad permutationem cum annuo censu redimibili, in dicenda sententia interpretes incertiores video, an in ea quoque locus prælationi pateat. Quidam, ab aliis permutationibus argumento desumpto, & permutatione cum annuo censu redimibili prælationem arcent. Ajunt, annum censum redimibilem jure rei immobilis censerì oportere; perperam igitur in permutatione cum annuo censu redimibili prælationem admitti, quæ, aliis rebus immobilibus permutatis, omnino rejiciatur. Id potissimum Gratianum movit, ut ab ejusmodi permutatione prælationem excluderet *discep.* 885. n. 28. Contra censuerunt alii, veram venditionem ejusmodi permutatione contrahi; censu enim aliquando redempto, pecuniam restitutam locum pretii nancisci. Verum, ut cum plausu differi videantur isthæc, negari tamen haud potest, præsentem permutationem ab emptione longius quidem abesse. In emptione enim pretium pro lubitu repeti a venditore potest; in censu redimibili fors censetur omnino creditori demortua, eamque pro lubitu repetere nequit. Proinde, nisi ejusmodi permutatio dolose inita revincatur, in ea non videtur admittenda prælatio. Vide de Luc. ad d. *decis. de Franch. n. 6.* & Napod. ad *consuet. de jur. congr. n. 5.* Quod ad venditionem cum pacto de retrovendendo initam, de ea minor est dubitatio, an prælationem admittat. Ea enim pura puta venditio est, licet aliquando resolvi possit, pretio restituto, ut recte advertit Napod. *loc. cit. n. 9.* & Afflict. *decis. 338. n. 9.* Quid de datione in solutum? Ad eam, vulgo docent interpretes, prælationem extendi non oportere. In ea sententia prævit Napodanus ipse
ad

ad *d. consuet. n. 7.* eo potissimum argumento, quod titulus pro soluto a titulo pro emptore sit omnino diversus: consuetudines igitur per se odiosas a casu venditionis expresso ad casum dationis in solutum omissum perperam extendi videri. Verum in presenti argumento consuetudines odiosæ videri non debent, cum totius Regni jure admittatur in venditione prælatio. Rectius distinxisse crediderim Cajetam ad *Napod. loc. cit. gloss. hoc habet.* ut procedat quidem Napodani sententia, si datio in solutum necessaria fuerit, & jussu judicis expedita; non vero, si ultro sit facta, & consensu contrahentium extra judicii necessitatem inita. Ea enim in specie justius timeri queat, dationem in solutum factam, ut fraus vicino fiat.

XIV. Nondum hinc abire me sinuat interpretes. Passim enim quæsitum in presenti argumento video, an prælationem in judicio vicinus petens ultro possit ab instituta petitione recedere. Complusculi negarunt id quidem, quia per litis contestationem quasi contractus inter contrahentes initur, a quo, alterutro invito, exemplo verorum contractuum recedi nequeat. Ita præter alios Boerius *decis. 48.* Contra affirmarunt complures. Potissimum eorum argumentum est, quod unicuique beneficio pro se introducto renunciare liceat. Sane a petita cessione bonorum debitorem impune resilire jus patitur *l. quem pœnitet. ff. de cess. bon. & l. quantitatem. C. qui bon. ced. poss.* Minori etiam licet obtenta in integrum restitutione non uti *l. si judex. ff. de minor.* Proinde haud absurde a petita prælatione vicinum recedere posse pronuntiavit Sacrum Consilium de Franch. *decis. 346.* Recte tamen advertit de Luca, vicinum post sententiam pœnitent-

tentem in litis temere susceptæ impensas condemnari oportere ad *d. decis. de Franch. n. 6.* Quid si, duobus prædiis ab eodem simul venditis, in alterutro tantum prælationem vicinus petat? Id etiam juris vicino asserit. Afflictus ad *constit. sancimus.* quia utrumque prædium & pretium separatum habet, & separatim æstimari potest. Decisum etiam per Sacrum Consilium refert de Franchis, duobus feudis eidem uno contractu venditis, alterius cives in sui feudi emptione prælatos; extraneum autem emptorem petentem, ut iidem alterum quoque feudum jure prælationis emerent, non auditum. Id ipsum tamen de Marinis admittendum negat in feudis, quæ eandem baroniam constituunt ad *decis. Revers. 274.* Cum tamen ita comparata esse prædia possint, ut utrumque simul facile emptorem inveniatur, non vero alterutrum separatim, rem ego totam religioni judicantis potius remittendam existimarim. Illud prope exciderat, cautum novissimis Regni legibus, cum in consuetudinibus de jure congrui, tum in ceteris generatim omnibus clericos eodem jure cum laicis uti oportere; in causis etiam de jure congrui seu in Regni Provinciis, seu in territorio Neapolitano Regios Magistratus clericorum judices competentes esse, seu agant, seu cum ipsis agatur.



C A P U T II.

De iudicio assistentiæ.

JUDICIUM assistentiæ singularis est actio jure municipali prodita, quæ præter regulas Romani juris apud Neapolitanos evaluit, neque usquam alibi, quod sciam, in Europa recepta. Id monet ipse Tapia *libr. 3. jur. Regn. rubr. 40.* Hæc autem actio *iudicium assistentiæ* dicitur, quia per ipsam iudicis auctoritas imploratur pro tuenda creditori possessione rei, quæ ei supposita hypothecæ fuerit, iis pactis in tabulis obligationis adjectis, quæ memorantur in *pragmat.unic.de assistent.* Hæc autem actio haud absurde definiri poterit *remedium retinendæ possessionis vel contra ipsum debitorem, ejusve heredes, vel tertios etiam possessores, penes quos rei hypothecæ suppositæ tantum possessio naturalis est.* Male igitur Tapia *loc. cit.* eam remedium recuperandæ possessionis appellat. Pactum enim *constituti*, & *precaris* instrumento obligationis appositum civilem rei hypothecæ subjectæ possessionem potestate juris Neapolitani transfert in creditorem. Cum igitur rem ita hypothecæ suppositam per hujusmodi pactum in civilem creditoris possessionem veluti brevi manu transferri jus fingat, profecto actio isthæc potius retinendæ, quam acquirendæ possessionis remedium videri debet. Id ipsum tamen rectius intelligetur, si ipsi fontes hujus actionis recludantur, ac pacta, quibus innititur, accuratius enucleentur.

II. Præsentis actionis initia repetenda videntur ex *pragm.unic.de assist.* Ejus verba hic lubet ascribere.

Ass-

Assistentiam, & appretium contra tertium possessorem pro executione instrumenti continentis obligationem bonorum, pactum de capiendo cum constitutione precarii peti posse, & per iudicem concedi absque aliqua bonorum discussione contra principalem facta, aliis concurrentibus, quæ de jure necessaria sunt, in assistentiæ, vel hypothecariæ causa declaramus. Si igitur accurate rationes ineas, primum actio isthæc manat ex pacto precarii. Precarium in jure civili veluti contractus est, quo quis declarat, se rem alienam precario possidere, quæ proinde ita tradita pro domini lubitu repeti quandocumque possit. Quapropter si instrumento hypothecæ precarii pactum fuerit appositum, primum rei hypothecæ subjæctæ possessio potestate juris in creditorem transferri fingitur, deinde redire rursus ad debitorem veluti precarii titulo pro creditoris arbitrio repetenda. Ea de causa pactum *de capiendo* etiam privata creditoris auctoritate instrumento additur. Si igitur contrahentium verbis inhærendum esset, rei ita affectæ possessionem a quovis possessore repetere privata auctoritate creditori jus esset. Cum tamen nemo sibi jus dicere in Civitate debeat, neque sine Magistratus auctoritate controversam oporteat possessionem ingredi *l. 3. C. de credit. judicis officio*, seu assistentiâ implorata, possessionem sibi servari poscit hoc iudicio creditor, ad quemcumque redierit naturalis rei detentio.

III. Jam vero ut assistentiæ iudicium possit institui, pragmatica nil ultra requirit, quam ut *de precario*, & *de capiendo* pactum instrumento fuerit appositum. Impune igitur, & sine creditoris fraude omitti in instrumento potest pactum

constituti : id tamen cum pacto de precario cumulare tabelliones solent, ne minus & ipsi solertes videantur. Constituti pactum ideo apponitur, ut tacite debitor promittere videatur, se rem hypothecæ suppositam veluti creditoris nomine possidere. Verum cum precarii pactum pragmatica diserte requirat, id si fuerit omissum, assistentiæ judicium frustra instituetur. Quidam post Oltradum *consil.* 139. huic actioni locum adhuc esse censuerunt, si scriptum in instrumento fuerit, ut omnia *ad sapientis consilium* gesta intelligantur. Id tamen aperte adversari videtur *l. 32. C. de appell.* Ibi enim, quicquid nova lege specialiter non fuerit expressum, veterum legum regulis judicari jubetur. Tantum igitur favore dotis admitti potest, ut apposita *ad sapientis consilium* instrumento clausula hanc actionem mulieri tribuat. Vide Laganarium *in addit. ad Rovit. ad dict. pragm. unic. de assistent.* Ceterum actio isthæc excogitata in Regno Neapolitano fuit, ut cautius creditori foret, neque duplicem aliquando litem cœptare compelleretur. Nimirum contra jus vetus cautum a Justiniano fuit *novell. 4. c. 2.* ut, abalienata per debitorem re hypothecæ supposita, adversus tertium possessorem hypothecariam jus non esset institui, nisi actione personali prius ipse debitor, ejusque fidejussores excussi forent. Proinde qui præter hypothecam de capiendo, & precarii pactum instrumento apponi curarit, prædictam Justiniani novellam effugiet. Statim igitur ab initio quemcumque rei possessorem hypothecæ suppositæ convenire poterit, eique primi debitoris excutiendi necessitas remittetur.

IV. Ita autem exposita assistentia, fat, puto,
li-

liquet , eam alterius obligationis accessionem esse . Proinde si principalis obligatio non consistat , assistentiæ iudicium frustra cœptabitur . Ejusmodi vero iudicium ut possit institui , duo quidem ab actore probari debent ; primo scilicet initi contractus tempore res , propter quas petitur assistentia , *in bonis* , & *de bonis* debitoris fuisse ; deinde iudicii instituti tempore reum in eorundem possessione esse Theaur. *decis.* 38. Ea *assistentiæ extrema* pragmatici vocant . Assistentiæ autem peti potest aut contra principalem debitorem , ejusve heredem , aut contra tertium possessorem ab his tamen causam habentem , aut contra tertium etiam , qui aliunde nactus possessionem fuerit , & a debitore , aut herede causam non habeat . Et in priori quidem specie , si adversus debitorem , aut heredem agatur , nil ultra creditor probare debet , quam ipsius debitoris , aut heredis possessionem . Frustra enim debitor dominii quæstionem refricari postulat *l. si inter colonum.* §. 1. ff. *de pignor.* Instituta igitur assistentiæ statim possessionem creditor Salviano interdicto nanciscitur §. 3. *inst. de interdict.* Altera etiam species , si adversus eum agatur , qui a debitore , aut herede rem acceperit , nil quicquam difficultatis habet . Cum enim principalis debitor rem obligatam alteri tradendo civilem creditori possessionem intervertere videatur , facile creditor eam reciperebit conditione ex lege *fin. C. de acquir. possess.* Verum in tertia specie , ubi agitur adversus eum , qui causam a debitore non habeat , maximæ difficultates urgent . Cum enim nulla debitoris fraude civilis possessio hic intercepta creditori fingatur , non potest ei prodesse benefi-

cium *d. l. fin. C. de acquir. possess.* Per pragmaticos igitur dubitatum video, utrum creditor probare cogatur, rei hypothecæ suppositæ dominium penes debitorem fuisse, quo tempore ea obligabatur, an probare sufficiat, contractus tempore in bonis debitoris eam fuisse. Sane ex regulis juris contra tertium a principali debitore causam non habentem sola actio hypothecaria potest institui. Qui autem dominium ipse non habet, hypothecæ rem frustra subjicit. Proinde conformius juri censuerim, in tertia hac specie dominium in debitore probari oportere, ut assistentiæ judicium coëptari possit. Vide Rovit. ad *pragmat. unic. de assist.* Verum, cum negotium sit molestiæ plenum vetustius probare dominium, usu fori receptum docet de Rosa, ut in hac etiam specie creditor nil ultra probare teneatur, quam contractus tempore rem hypothecæ suppositam in bonis debitoris fuisse *civil. decret. prax. c. 12. n. 111.* Confer Afflict. *decis.* 383.

V. Jam vero præstitæ per judicem assistentiæ is erit effectus, ut pro arbitrio creditor vel rem ipsam hypothecæ suppositam detinere possit, donec sibi satisfiat fructibus inde perceptis, aut eam vendi sub hasta curet, aut sibi adjudicari etiam pro quantitate debiti. Proinde in ejusmodi judiciis ita passim decerni solet: *præstetur assistentia cum adjudicatione in forma, et facultate vendendi ad sui electionem.* Vid. Rovit. ad *d. pragmat. un. de assist. n. 33.* Illud tamen quæsitum hic video, an, adjudicatione sequuta, a debitore offerri pecunia creditori possit, atque ita rem suam adjudicatam recipere. Affirmat quidem id Bartolus ad *l. 15. ff. de damn. infect.*
mo-

modo tamen infra biennium post adjudicationem id fiat. Secus Baldo placuit, aliisque quamplurimis ad *d.l. 15. ff. de damn. infect.* Aperte ibi Jurisconsultus Baldo favere videtur §. 33. Proinde secundum Baldi sententiam Sacrum Consilium non semel pronunciaſſe teſtatur idem Rovitus *loc. cit. n. 41.* Licet tamen Baldi ſententia, jure pandectarum inſpecto, verosimilior videri queat, Bartoli tamen opinionem juri Juſtiniani noviſſimo conformiorem exiſtimarim in *l. 3. C. de jur. domin. impetr.* Vid. *tom. 2. pag. 147.* Ceterum in præſenti argumento a venditione longe diſtat adjudicatio. Primo enim per adjudicationem res ipſi creditori addicitur juſto pretio per tabularium æſtimando; venditio fieri ſub haſta debet: proinde in venditione res ei cedet, qui plus in auſtione obtulerit. Deinde, ſi in iudicio appellationis judicatum pro debitore fuerit, rem quidem adjudicatam is recipere poteſt, neutiquam vero rem venditam, ejuſque pretio contentus eſſe debet: quod cautum quidem oportuit ob haſtæ fidem, neu licitatores deterrentur, ſi quando res in auſtione empta veteri domino reſtituenda foret. Hinc pragmatica *2. de appell.* executionem non impediri jubens, appellatione interpoſita adverſus decretum Magnæ Curiz aſſiſtentiam concedentis, de adjudicatione tantum, non æque de venditione ſub haſta debet intelligi, ut recte monet de Franch. *decif. 120.* Inde fit, ut in præſtanda judex aſſiſtentia eam clauſulam adjicere decreto ſoleat *ad finem adjudicandi tantum*, ut, ſi in appellationis iudicio victor reus extiterit, rem ipſam recipere poſſit. Æquitas autem ipſa ſuadet, ut ea decreto clauſula adjiciatur, ſi in rebus ſingularis affe-

tionis assistentia concessa fuerit. Vide de Ros. in civil. decret. prax. c. 12. n. 122.

T I T U L U S VII.

Quod cum eo, qui in aliena potestate est, negotium gestum esse dicitur.

SUB hac rubrica in pandectis Tribonianus Jurisconsultorum loca corradit, quæ beneficium competentiae complectuntur filiisfamilias post emancipationem, aut patris obitum per Prætores indultum. Nimirum cum civium aliorum intuitu caput liberum filiusfamilias censeretur, ex omnibus causis, ut ceteri cives, recte quidem obligatus intelligebatur, eoque nomine contrahenti adversus eum in solidum competeabat actio *l. 39. ff. de oblig. et act.* Si tamen adversus filiosfamilias in solidum actum esset, actio judicati adversus eos locum tandem habebat, ubi per emancipationem, aut patris obitum soluti patria potestate forent *l. 5. princ. ff. h. r.* Verum enimvero adversus emancipatos res judicata exitu erat inutilis. Cum enim ob capitis deminutionem, quam propter imaginarias illas venditiones subibant emancipati liberi, novi homines facti viderentur, rigore juris veteris exequutio rei judicatæ adversus eos frustra petebatur. Id ipsum tamen injurium Prætori visum. Proinde solitis fictionibus edicto usus, tanquam si emancipatio non intercessisset, adversus eos veterem actionem restituebat *l. 2. §. 1. de capit. min.* Cum tamen experiundo didicisset Prætor, eam edicti partem novo patrifamilias in re fortasse non lauta infestiorē esse

esse, alio mox edicto competentiae beneficium emancipatis indulgit, si post emancipationem convenirentur ob contractum initum, quo tempore patriae potestati suberant. Idem beneficium novis patribusfamilias accommodari iussit, qui a patre aut exheredati forent, aut scripti quidem heredes paterna hereditate se abstinuissent. Ipsum Prætoris edictum ita Ulpianus exhibet in l. 2. ff. h. t. in eum, qui emancipatus, aut exheredatus erit, qui se abstinuit se hereditate ejus, cujus in potestate, cum moritur, fuerit, ejus rei nomine, quæ cum eo contracta erit, cum is in potestate esset, siue sua voluntate, siue jussu ejus, in cujus potestate erit, contraxerit, actionem, causa cognita, dabo, in quod facere potest.

II. Isthæc quidem complectitur præsens in pandectis titulus. Verum in præsentī institutionum loco diversum argumentum Tribonianus exequitur. Scilicet ex regulis Romani juris ne dominus quidem, aut pater ex contractu servi, filiive familias obligari posse videbatur. Prætor tamen, non minus æquitate, quam ipsa commercii ratione ita flagitante, quibusdam in speciebus hunc juris rigorem molliendum edicto censuit, actionibus institutis, quas utiliter in parentem, aut dominum jus esset institui. Ne tamen edicto suo obrogasse juri publico videretur, novas actiones adversus parentes, aut dominos edicto proditas veteri juri non subesse finxit, quia novis quibusdam qualitatibus indutæ forent. Ita nova quædam qualitas Prætori visa, si jussu parentis se filius obligasset, aut filio, qui contraxisset, peculium fortasse foret. Parentis enim jussus, filiive peculium tanti Prætori visa, ut eorum ob-

tentu in parentem , aut dominum recte agi posse censeret . Proinde ejusmodi actiones *adjectitias* vocare amant interpretes , quia non per se quidem , sed ob ascitam aliunde qualitatem eas Prætor fingeat institui . Ejusmodi sex actiones in præsentî rubrica Tribonianus enarrat, *quod jussu* scilicet, *exercitoriam* , *institoriam* , *tributoriam* , *de peculio* , *de in rem verso* . Hæ autem actiones generatim instituuntur ob negotium cum illis gestum , qui in aliena potestate sunt, & singularibus quæque titulis in pandectis enunciantur.

III. Prima igitur adjectitiæ qualitatis est actio *quod jussu* : eam instituit adversus parentem , aut dominum , qui cum servo , filiove familias contraxit jussu ipsius parentis , aut domini §. 1. *h. r.* Id æquum Prætori visum ; qui enim , prævio jussu parentis , aut domini , contraheret , ipsius parentis , aut domini fidem sequi videbatur . Prætoris edictum ita restituendum edixit Noodt. ad *pandect. sub rubric. quod jussu*. *Quod jussu ejus , in cujus potestate quis esse dicetur , gestum erit , de eo judicium dabo* . Cum simpliciter eo nomine actionem promiserit edicto Prætor , eam in solidum dari oportebat , quatenus tamen jussisset pater , aut dominus , non ultra *l. 3. ff. quod jussu*. Jubet pater , aut dominus , auctorat tutor , mandat extraneus . Verum jubendi vocabulum in hac edicti parte latius accepere Jurisconsulti . Parentem enim , aut dominum hac actione pulsari posse censuerunt , quoquo modo ab ipsis animi sui sententia declarata foret . Pater igitur jussisse videbatur , seu testato , seu per epistolam , seu per nuncium filio quid demandasset . Sed & si in ju-
ben-

bendo pater usus simplici mandato foret, vel chirographo subscripsisset, ratumve habiturum se declarasset, quod a filio gestum esset, adversus patrem recte instituebatur actio *l. 1. ff. eod.* At vero hanc actionem accommodavit edicto Prætor, si jussu ejus se quis obligasset, in cujus potestate foret, quo tempore negotium gerebatur. Proinde si quis jussu suum interposuisset ob gestum cum alieno servo negotium, hæc actio adversus eum non competeat. Sed & qui ita jussisset, hac actione negat teneri Paulus, licet servum alienum fortasse redemerit, ne actio ab initio nulla fortuito eventu mox confirmari videatur *l. 2. §. ult. ff. eod.* Ceterum advertentes Jurisconsulti, jussu patris cum filio contrahentem cum ipso parente videri contrahere, exemplo Prætoris usi directâ etiam actione patrem eo nomine conveniri posse censuerunt: id ipsum intelligendum quoque de actione exercitoria, institoria, & de in rem verso *§. 8. h. t. & l. 29. ff. de reb. cred.*

IV. Natales quoque suos Prætori debet adjektivæ etiam qualitatis actio *exercitoria*, quæ competit adversus exercitorem ob contractum cum navis magistro initum. Exercitor in jure ille dicitur, ad quem pertinent navis quotidiani quæstus, sive dominus navis is sit, sive conductor *l. 1. ff. de exercit. action.* Contra navis magister appellatur, qui navi præst exercitoris jussu, & cui totius navis cura demandata fuerit *d. l. 1. ff. eod.* Æquum Prætori visum, per contractum a navis magistro initum exercitorem in solidum conveniri, cum ipsius exercitoris fidem contrahentes sequuti viderentur, seu liber homo, seu servus proprius, aut alienus præpositus navi foret.

Pro-

Proinde ne minor quidem magistri ætas actori oberat : sibi enim exercitorem imputare oportebat , qui ejus ætatis homine uteretur *d. l. 1. §. 4. ff. eod.* Verum si quid cum nautis gestum esset , actionem denegabat edicto Prætor : neque enim nautæ negotiandi causa navi præponuntur *d. l. 1. §. 1. ff. eod.* Æquitate etiam suadente placuit , ut magister intelligeretur non is tantum , quem exercitor ipse navi præposuit , sed ille etiam , quem magister sibi substituit *d. l. 1. §. 5. ff. eod.* At vero non quacumque ex causa ob magistri negotium actionem in exercitorem dedit edicto Prætor , sed dumtaxat ejus rei nomine , cujus causa magister præpositus navi foret . Proinde si mutua a magistro pecunia accepta esset , non aliter exercitorem conveniri voluit , quam si præpositionis causa pecunia esset accepta *d. l. 1. §. 8. ff. eod.* Quapropter si quis præpositus navi fuerit tantum vecturas exigendi causa , ob pecuniam navis locandæ causa creditam perperam creditor adversus exercitorem aget : ipsam enim præpositionem certam legem contrahentibus dare scribit Ulpianus *in d. l. 1. §. 12. ff. eod.* Verum si navis reficiendæ causa pecunia fuerit accepta , ut agi adversus exercitorem a creditore possit , satis est ea concurrere , quæ recenset Africanus *in l. 7. ff. eod.* Eorum summa eo redit , ut navis in ea causa fuerit , ut refici oporteret ; ut sub lege reficiendæ navis pecunia numerata fuerit ; ut ea magistro sit numerata ; ut major summa non sit credita , quam navi reficiendæ sufficeret ; denique ut in eo loco sit credita , ubi comparari facile posset , quod navi usui futurum esset . Licet autem tantum adversus exercitorem actionem promiserit edicto Prætor,

tor, liberum tamen contrahenti erit, ipsum magistrum etiam convenire *d. l. 1. §. 17. ff. eod.* Sed licetne exercitori eos convenire, qui cum navis magistro contraxerunt? Negat id Ulpianus *d. l. 1. §. 18.* Præsto enim actio exercitori est adversus magistrum ipsum vel locati, si mercede conductus hanc operam ei præstiterit, aut, si gratuitam, mandati saltem. Ceterum, si aliter rem suam adversus magistrum servare non posset exercitor, ei extra ordinem accommodari solebat actio adversus eos, qui negotium aliquod cum magistro gessisse dicebantur *d. l. 1. §. 18. ff. de exercit. act.*

V. Exemplo actionis exercitoriae in negotiatione maritima in terrestri negotiatione quoque actionem *institoriam* proposuit edicto Prætor adversus eum, cujus nomine negotiaretur institor *§. 2. h. t.* Institor in jure dicitur, qui alieno nomine tabernæ, aut certo loco ad vendendum, emendumve præponitur, quive sine certo loco ejusmodi negotiationi præficitur *l. 18. ff. de instit. action.* Nullo autem discrimine pollicitus est actionem Prætor, cuicunque foret institor. Neque enim interesse jussit, masculus is esset, an foemina, liber, an servus, isque seu proprius, seu alienus *l. 7. §. 1. ff. eod.* Proinde si mulier tabernam exerceret, institorum quorumcumque contractibus obligabatur, neque exceptione Senatusconsulti Vellejani tueri se poterat. In obligationibus enim principalibus mulieres viris comparari placuit *d. l. 7. §. 1. ff. eod.* Quod autem de exercitoria actione diximus, qui institorem tabernæ præposuit, obligatur tantum eorum nomine, quorum gratia institorem tabernæ præfecit, idque pluribus exemplis explicat Ulpianus *in l. 5. §. 11. & sequ. ff. eod.* Hinc si

si palam proscriptum in taberna fuerit, ne cum infilitore de quibusdam negotiis contrahatur, lex præpositionis negligi impune non potest *d. l. 11. §. 2. ff. eod.* Hanc autem actionem in solidum promissit edicto Prætor *d. §. 2. b. 1.* Quod si plures tabernam exerceant, dubitari possit, num pro virilibus, pro portione mercium; an in solidum in eos actio sit accommodanda. Exemplo exercitorum unumquemque in solidum conveniri posse scribit Ulpianus; quicquid tamen conventus præstiterit, societatis, vel communi dividendo iudicio eundem consequuturum *l. 13. §. 2. ff. de instit. action.*

VI. Et adjectitiæ qualitatis est etiam, & originem quoque suam Prætori refert acceptam actio *tributoria*. Ea a tribuendo, seu distribuendo dicta. Creditoribus autem accommodata fuit adversus parentem, aut dominum, in quorum potestate filii, vel servi constituti, sciente patre, vel domino, mercem peculiarem negotiati forent. Eo nomine igitur creditoribus satisfactionem urgentibus, parentem, aut dominum oportebat peculiares merces distribuere pro rata singulis. Si dolo malo inæqualis tributio facta diceretur, tributoria actione creditores persequerentur, quod minus ob iniquamtributionem consequuti forent *§. 3. b. 1.* Duo igitur concurrere debent, ut adversus parentem, aut dominum actio isthæc possit institui. Primo oportet scilicet, ut sciente parente, vel domino, filiusfamilias, aut servus negotietur *l. 1. §. 3. ff. de tribut. action.* Deinde, ut de merce peculiari tantum instituaturs actio. Neque enim totum filii, vel servi peculium in tributum venit, sed dumtaxat illud, quod in merce

ce

ce peculiari est *l. 5. §. 11. ff. eod.* Id autem eo pertinet, ut si exempli gratia in peculio filii sint decem sestertiorum millia, ejusque dimidium tantum peculiari merci comparandæ fuerit expensum, alterum dimidium in tributionem haud veniat. Atque hic opportunum fuerit advertere binas differentias, quæ inter actionem de peculio, & tributariam intercedunt. Primo enim si instituta actio de peculio fuerit, id domino, vel parenti conceditur, ut deducere inde possint, quod ipsis a filio, vel servo debetur. Verum in actione tributaria nullo privilegio censetur parens, aut dominus, sed æque cum ceteris creditoribus in tributionem veniunt *l. 1. princ. ff. de tribut. action.* Deinde in actione de peculio melior conditio occupantis est. Verum in actione tributaria æqua conditio est creditorum omnium, quando-cumque agant *l. 6. ff. h. t.* Proinde si quis creditorum totam portionem suam petere occupet, eam quidem solidam consequetur. Quoniam tamen fieri potest, ut alii quoque creditores superveniant, cavere is quidem debet, pro rata se refuturum, si qui alii creditores emerferint *l. 5. §. 19. ff. eod.* Eadem quoque cautio præstari debet, si quid a filio, vel servo promissum sub conditione fuerit *l. 7. princ. ff. eod.* Merces autem peculiares ipsum parentem, aut dominum distribuere iussit edicto Prætor. Verum si eam tribuendi molestiam suscipere ii nolint, integrum eis esse voluit mercibus cedere: quo quidem casu datur a Prætorē arbitri, cujus interventu merces peculiares æque distribuuntur *d. l. 7. §. 1. ff. eod.*

VII. A Prætoria etiam jurisdictione manat adjectitiæ qualitatis actio *de peculio* adversus paren-

ren-

rentem, aut dominum ob filiifamilias, aut servi contractum. Quid, & quotuplex sit peculium, latius enarratum est alias. Servi scilicet peculium uniusmodi perpetuo est; semper enim ex re domini profectum censi debet. Verum in filiofamilias præter castrense, & quasi castrense, adventitium etiam, & profectitium peculium distinxit posterior ætas. In præsentī tamen argumento quæ differemus, de peculio tantum profectitio intelligi oportet: ob alia enim peculia agi cum ipso filio directo potest, cum in eis jure patrisfamilias censeatur. Actionem igitur de peculio illis accommodavit edicto Prætor, qui cum alieno servo, filiove familias contraxissent. Ea vero actione a domino, vel parente repetebatur ob contractum servi, vel filii, saltem quatenus in peculio foret §. 4. *inst. h. t.* Hæc autem actio in eo a tributoria recedebat, quod ea adhuc competeret, si ignorante parente, vel domino, quis negotiatus esse diceretur. Cum tamen parens, aut dominus cum servo, vel filio quodammodo prius egisse viderentur, parenti, ac domino dari placuit, ut ex peculio prius deduci oporteret, quod per servum, aut filium ipsi parenti, vel domino, ceterisque sub eorum potestate positis deberetur l. 9. §. 2. *et sequ. ff. de pecul.* Eo deducto igitur, reliquum per hanc actionem creditoribus addicebatur, qui cum servo, filiove familias contraxissent. Hac autem de peculio actione parentem, aut dominum impeti concessit edicto Prætor, si ob contractum, non vero si ob delictum servorum, filiorumve familias conventi forent. Cum enim peculii constitutio tota dimittenda videretur ex voluntate parentis, aut domini

mini *l. 1. §. 5. ff. de acquir. poss.* præsumi quidem facile poterat, a parente, vel domino concessum videri peculium, ut ob contractus, aut quasi contractus, nequiquam vero, ut ob delicta, vel quasi delicta obligari posset. Ita factum, ut ob causas poenales adversus parentem, aut dominum frustra de peculio institueretur actio *l. 58. ff. de reg. jur.* Actionem autem de peculio non aliter effectum sortiri placuit, quam si revera peculium esset servo, vel filio; non ultra etiam parentem, aut dominum condemnari, quam in peculio foret rei judicatæ tempore *l. 5. §. 2. ff. de liberat. legat.* Illud in actione de peculio singulare fuit, quod inter creditores privilegii ratio habenda foret. Ita quidem inter ceteros creditores pupilli, vel dotis causa potior habebatur *l. 52. ff. de pecul.* Si nullum inter creditores privilegium proferretur, secus, ac in tributoria, potior conditio occupantis erat. Occupasse autem videbatur, non qui prior litem contestatus esset, sed qui prior sententiam pro se tulisset *l. 10. ff. eod.* Ceterum, quo usque patria, vel dominica potestas non solveretur, perpetua erat actio de peculio: ubi tamen servus, aut filius potestate soluti forent, actio isthæc ultra annum utilem non extendebatur *l. 1. ff. quand. de pecul. act. annal. est.* Cur autem, patria, vel dominica potestate soluta, actionem temporariam fecerit edicto Prætor, explicat Ulpianus. Scilicet cum, patris, aut domini potestate soluta, peculium extingueretur, ultra annum de peculio actionem produci non oportebat *d. l. 1. §. 3. ff. eod.*

VIII. Postrema adjectitiæ qualitatis actio a Prætorē etiam edicto proposita *de in rem verso* dicitur. Falsi sunt enim qui ob male intellectum

Etum Triboniani locum §. 4. *h. t.* docuerunt, de in rem verso actionem non singularem, & per se constantem actionem esse, sed eam veluti accessionem quamdam actionis de peculio censerì oportere. Primo enim ea singularem titulum in pandectis occupavit; deinde, quod caput est, separatim ea potest institui, si filiusfamilias peculio careat, isque alienam pecuniam in rem patris vertisse dicatur. Nulla etiam ex jure ratio proferri potest, cur seorsim de in rem verso creditor experiri nequeat, quamvis de peculio quoque ei præsto sit actio. Hac autem actione Prætor parentem, aut dominum conveniri voluit, si servus, filiusve familias alienam pecuniam in parentis, aut domini utilitatem expendisse diceretur *l. 1. ff. de in rem vers.* Est enim in rem vertere in utilitatem vertere. In utilitatem vero parentis, aut domini conversum videtur, quicquid vel necessario, vel utiliter pro ipsis fuerit expensum *l. 3. C. 5. ff. eod.* Quod si pecunia in ea fuerit expensa, quæ ad voluptatem potius, quam ad utilitatem pertinent, eam in rem patris conversam videri negat Ulpianus *in d. l. 3. §. 4. ff. eod.* At vero si bono consilio pecunia fuerit expensa, licet felix exitus non sit sequutus, hanc actionem non denegat edicto Prætor. Ita quidem recte de in rem verso agitur, si frumentum necessarium alendæ familiæ aliena pecunia coemptum a filio in horreo sit corruptum, aut pecunia mutuo accepta sulta sit insula, quæ mox corruerit *d. l. 3. §. 7. C. sequ. ff. eod.* At vero hanc actionem edicto Prætor tantum adversus parentem, aut dominum, qui servos, aut filios in potestate haberent, accommodari jussit. Proinde si alienorum ne-

negotiorum gestor sulturus alterius ruinofam infulam mutuam pecuniam acceperit, ipfe quidem creditori obligatur ex mutuo, infulæ tamen dominus creditori non obligatur; neque enim negotiorum gestor in ejus potestate eft. Eo fpectare videtur Senecz illud 5. *de benef.* 19. *pecunia ab eo petitur, cui credita eft, quamvis illa ad me aliquo modo pervenit.* Vide Noodt. ad *pandect. sub tit. de in rem verf.*

IX. Szpiuscule fieri folet, ut ob unum contractum a filiofamilias, aut fervo initum plures actiones adjectitiæ qualitatibus competant. Ita quidem fi filiofamilias peculium habens tabernæ præpofitus a patre fuerit, & acceptam a creditore pecuniam in patris utilitatem verterit, inflitoria, de peculio, & de in rem verfo locus actioni patebit. Cum enim ejusmodi actiones per fe quidem haud conflent, fed alterius contractus accelfiones fint, ob eundem contractum parens recte convenietur adjectitia inflitoria, adjectitia de peculio, adjectitia denique de in rem verfo. Cum tamen ex uno, eodemque contractu hæ actiones descendant omnes, alterutra in judicium deducta, aliæ perimuntur statim *l. 4. §. ult. ff. quod cum eo, qui in alien. potest. eft, negot. gest. eff. dic.* Cum igitur per unius electionem ceteræ perimantur; inter omnes autem, quæ competere queant, quædam longe commodiores fint, actorem Tribonianus inftituit §. 5. *h. t.* quænam in concurfu plurium eligenda fit actio. Si quis igitur actionem quod juffu inflituere poffit, qua fane folidum confequi licet, ftultiffimus is quidem erit, fi probare cœptet, in rem patris pecuniam converfam effe, vel effe filio peculium, unde fatifheri credi-

tori possit. Fieri enim facile potest, ut vel tota in rem parentis pecunia conversa non fuerit, vel ut tantum in peculio non sit, ut inde solidum solvi creditori queat. Ita etiam, si cui tributoria competat actio, is & actione de peculio recte quidem experietur. Cautione tamen est opus, utram is actionem instituat: modo enim tributoria, modo actione de peculio experiri præstat. Aliquando enim tributoria præstat agere, quia in ea parentis potior non est conditio, neque ex peculiari merce deducitur, quod ipsi parenti debetur a filio. In ea enim, ut supra monuimus, parentes cum ceteris creditoribus æquo jure censentur. Præstat & aliquando tamen de peculio potius actionem intendere. In actione enim de peculio totius peculii ratio habetur, & fieri fortasse potest, ut minimam peculii partem filiusfamilias in merces peculiares infumserit. Sed desino hic ego plura, cum pro diversis rerum adjunctis de his sit diverse respondendum.

X. Quæ hactenus exequuti sumus, cum in servis, tum in filiisfamilias perinde obtinent jure civili. Illud tamen inter servos, filiosque familias apud Romanos olim intererat, quod servi quidem, quippe civili persona destituti, frustra se obligabant; ob contractus vero per eos initos adjectitiis tantum actionibus contra dominos experiri licebat: verum de filiisfamilias secus obtinuit. Cum enim filiisfamilias personam haberent in Civitate, & aliorum civium intuitu liberi censerentur, non solum prædictis ex causis ob ipsorum contractus parentes obligabantur, sed & ipsi filiifamilias per contractus generatim omnes obligare se poterant. Inde igitur adversus ipsos filiosfamilias

lias

lias efficax actio nascebatur *l. 39. ff. de oblig. C. action.* Verum longa inde incommodorum seges. Primo enim inconsulti adolescentes scœnebri pecunia, tamquam instrumento scelerum, abutebantur: deinde festinam mortem parentum perditę optabant, ut æs alienum possent expungere. Improbi quoque scœneratores haud deerant, qui sub sanguinolentis usuris pecuniam credebant adolescentibus spem certam foventes, parente mortuo, sibi fortem cum usuris illis ingentioribus restitutum iri. Proinde Senatusconsulto Macedoniano seu sub Claudio, seu, quod malunt alii, sub Vespasiano cautum Romę est, *ne cui, qui filiosfamilias mutuam pecuniam dedisset, actio, petitioque daretur l. 1. ff. de Senatusconsult. Macedon.* In hoc autem Senatusconsulto pene singulare illud est, quod non ex Principe, aut Consule, quod alias factitatum novimus, sed a perditissimo quodam adolescente cognomento Macedone nomen inditum ei fuerit. Falluntur enim, qui Macedonem istum deterrimum quemdam scœneratorem fuisse garriunt. Id facile refellit Ulpianus ipse *in d. l. 1. ff. eod.* Ibi enim Macedo inter ceteras scelerum causas æs etiam alienum adhibuisse scribitur. Norunt autem Grammaticorum filii, æs alienum dictitari non creditoris quidem, sed debitoris intuitu. Ceterum sine exemplo non est, Senatusconsultum Macedonianum a perditissimo hoc adolescente nomen accepisse. Nam & legem Scantiniam adversus impudicitiam latam a Scantinio quodam homine egregie impudico nomen accepisse constat.

XI. Jam vero Senatusconsulto Macedoniano tantum ob mutuam pecuniam adversus filiosfamilias denegabatur actio; iidem enim ex ceteris causis

recte conveniebantur. Tantum ex Senatusconsulto nil quicquam intererat, utrum pecunia gratuiti mutui causa, & sine usuris, an cum usuris esset accepta *l. 7. §. 9. ff. eod.* At vero licet alias mutuum contrahi generatim queat in rebus omnibus, quæ functionem in genere recipiunt, & quæ *fungibiles* vulgo appellantur, Senatusconsultum tamen strictius interpretandum Jurisconsulti censuerunt. Cum enim Senatus non mutuum qualecunque cum filiisfamilias fieri prohibuisset, sed tantum mutuam pecuniam per eos vetuisset accipi, Senatusconsultum antiquissimo juri Romanorum obrogans ad solam pecuniam Jurisconsulti coercuerunt. Proinde si aliis quantitibus in creditum itum esset, filiumfamilias conveniri posse voluerunt. Id tamen intelligendum Ulpianus monet, modo ne fraus Senatusconsulto fiat. Ita quidem adversus filiumfamilias actio denegari debet, si is vinum, aut oleum mutuum acceperit, ut, iis distractis, pecunia utatur inde redacta *d. l. 7. §. 3. ff. eod.* Neque vero solum favorem parentum, sed odium quoque foeneratorum Senatusconsultum respexit. Hinc facile intelliges, cur foeneratoribus actio denegata fuerit non tantum, si a filiofamilias pecunia per luxuriam consumpta foret, sed si adhuc in peculio extaret etiam *l. 9. §. 2. ff. eod.* Disertis autem verbis Senatus cavit, nullius posse filiumfamilias bonum nomen, expectata morte patris, fieri *d. l. 1. ff. eod.* Id eo pertinet, ut non solum frustra conveniatur filiusfamilias, si adhuc sub patris imperio sit constitutus, sed licet etiam perempta patris potestas fuerit emancipatione, vel morte *§. 7. inst. h. t.* Quamvis vero Senatus actionem adversus filiumfamilias dari prohibuerit, aliquando tamen

eo

eo nomine cum exceptione quidem a Prætorē concedebatur actio. Scilicet si aperte constaret, adversus Senatus voluntatem cuiquam creditam esse pecuniam, ea quidem in specie actionem omnino denegabat Prætor. Si non liqueret, an contra voluntatem Senatus pecunia accepta foret, dabat quidem actionem Prætor, ei tamen exceptionem addebat, *extra quam si contra voluntatem Senatus in creditum itum fuerit*. Id monitum quidem oportuit, ne quam antinomiam expaveas, si quando Jurisconsulti scribunt, ex Senatusconsulto Macedoniano actionem creditori non denegari; exceptione tantum filiumfamilias uti posse.

XII. At vero complures sunt species jure civili proditæ, in quibus adversus filiumfamilias ob pecuniam seu sine usuris, seu cum usuris acceptam actio denegari non debet. Primo enim eo nomine recte agitur, si alibi agenti filio seu studiorum, seu legationis causa pecunia soluta fuerit, modo sit intra summam, quam non denegaret paterna pietas *l. 7. §. 13. ff. de Senatuscons. Maced.* Deinde recte etiam filiusfamilias convenitur, si ei sit castrense, vel quasi castrense peculium. Cum enim in ejusmodi pecuniis pro patrefamilias filius censeatur, ad peculii quantitatem usque Senatusconsultum cessare debet *l. 1. §. ult. ff. eod.* Præterea Senatusconsultum cessare placuit, si pecunia aut jussu patris credita, aut in rem patris conversa fuerit *d. l. 7. §. 11. & sequ. ff. eod.* Rursus recte etiam filiusfamilias convenitur, si in accipienda pecunia patrefamilias se mentiatur, aut publice pro patrefamilias habeatur *l. 3. ff. de Senatuscons. Maced. & l. 1. C. eod.*

Cessat etiam Senatusconsultum, si mutuum necessario fuerit acceptum, veluti ut, patre absente, vel relegato, dotem forori quis daret *d. l. 7. §. 2. ff. eod.* Denique cum potius censeretur debet privilegium ætati concessum, quam filiisfamilias per Senatum indultum, recte quoque convenietur filiusfamilias ætate major, si ei credita pecunia a minori fuerit *l. 11. ff. de minor.*

XIII. In Regno Neapolitano ad annum usque 1525. quod ad filiorumfamilias contractus, non recessum a jure civili. Igitur præter causam mutui per alios contractus filiifamilias secundum regulas Romani juris recte se obligabant. Verum enimvero cum ea in filiisfamilias contrahendi libertas qua filiis ipsis, qua parentibus etiam ipso rerum usu damnosior comperta foret, prædicto anno 1525. promiscuam contrahendi licentiam in filiisfamilias apud nos coerceri placuit. Proinde *pragm. unic. de Senatusc. Macedon.* non minus in Regni Provinciis, quam in principe Regni urbe generatim cautum, ne filiifamilias obligare se possent, nisi in præsentia, & expresso consensu ipsorum patrum, vel fuerint emancipati, seu habitent, & vivant seorsum ab eorum patribus cum ipsorum uxoribus, & familia. Si qui vero notarii, actorumve magistri sine prædicto ritu filiorumfamilias obligationes auderent scribere, ii præter alias poenas arbitrio Magnæ Curiae irrogandas & privatione muneris, & centum auri unciiis multari jussi. Ne tamen per filiosfamilias decepti notarii, actorumve magistri nullo merito suo ejusmodi poenis subicerentur, mox declarari curatum est, ne qua ipsis calumnia fieret, si per eos rogati filiifamilias se patresfamilias men-

mentirentur. Hinc igitur aperte constat, sine presentia, & consensu parentum quibuscumque de causis in Regno filiosfamilias se frustra obligare. Cum tamen pragmatica non mentinerit casus Senatusconsulto Macedoniano non comprehensos, tuto inde potest inferri, sine prædicto ritu filiosfamilias in Regno hodie recte se obligare ob causas generatim omnes, quas Senatusconsulto Macedoniano non contineri docuimus. Ita quidem adversus creditorem frustra se tuebitur filiusfamilias causa studiorum hic agens ob eam pecuniæ quantitatem conventus, quam non denegasset paterna pietas.

XIV. Hujus autem pragmaticæ occasione doctores addubitarunt, an ratum haberi contractum oporteat in favorem ipsius patris a filiosfamilias initum, cui tamen presentiam, & consensum suum parens præstiterit. Passim post Socinum Seniores *conf. 23. n. 6.* docuere pragmatici, quod, sicubi statutum prohibet, ne sine consensu patris filiusfamilias obligare se possit, contractui parens frustra consensum accommodet, si in ipsius utilitatem is vergat. Recte igitur scribit Rovitus, ratum haberi in Regno non oportere contractum a filiosfamilias in parentis utilitatem initum, licet ei presentiam, & consensum suum parens accommodarit ad *pragm. un. de Senatusc. Macedon. n. 47. & sequ.* Prædicta enim pragmatica non ipsorum tantum parentum indemnitati consultum ivit, sed ab ipsis etiam filiisfamilias damnum arcerere voluit. Quale autem filiorumfamilias ingenium esse solet, hi cum summa jactura sua parentibus obsequuturi temere obligare se possent. Novi ego complures, qui contra parentum offi-

cium pro se filiorum obligationes extorserunt; inde autem sæpiusculum factum memini, ut qua parentes, qua liberi ad egestatem perducerentur. His accedit, quod in contractu a filio in utilitatem parentis inito intercedit saltem metus, quem *reverentialem* vocant; præter metum adesse solet & læsio. Passim autem docent doctores, metum *reverentialem* cum læsione conjunctum infirmare contractus. Vid. Decium ad c. 29. de offic. & potest. jud. deleg. n. 22.

T I T U L U S VIII.

De noxalibus actionibus.

Quemadmodum ex contractibus fervorum, filiorumve familias adjectitiis actionibus parentes, aut domini conveniri poterant, ita ob eorumdem delicta noxalibus actionibus adjectitiæ etiam qualitatis parentes ipsos, aut dominos conveniri placuit. In præsentī enim argumento noxalis actio non actionem per se constantem indigat, sed adjectitiam qualitatem, quæ actioni ex alio delicto profluente accedit. Neque enim umquam simpliciter noxalis actio apud Jurisconsultos occurrit, sed ea veluti accessoria perpetuo additur actioni ex alio delicto proficiscenti. Ita quidem sexcenties in jure legitur actio noxalis furti, injuriarum, vi bonorum raptorum: quæ sane loquendi formulæ sat evincunt, nullam noxalem actionem per se constare, easque generatim omnes veluti adjectitias qualitates accedere actionibus, quæ ex alio delicto manant. Noxales autem actiones a noxa vocabulum mutuatae sunt suum. Ubi proprietatis

tatis tenaciores fuere veteres, inter noxam, & noxiam ita distinxerunt, ut noxa ipsum corpus, quod nocuisset, noxia vero facinus ipsum admissum indigiteret. Ea tamen differentia perpetuo servata non fuit. Nam & locupletes inter veteres auctores, & ipsi Jurisconsulti proprietatum in verbis retinentissimi noxæ vocabulum pro ipso maleficio sæpiusculè usurparunt. In noxalibus autem actionibus instituendis ipsi Decemviri præverunt. Eos enim noxalem actionem ob furtum instituisse, auctor est Ulpianus in *l. 2. ff. de noxal. act.* Ab his primum initiis numerus noxalium actionum in immensum excrevit præsertim Prætoris opera, qui ob servorum, filiorumve delicta quælibet noxales actiones edicto proposuit. Neque absurde Noodt. ad *pandect. h. t.* ea de re Prætoris edictum hujusmodi fuisse conjicit. *Si servus, insciente domino, noxiam commisisse dicetur, eum, in cujus potestate erit, quantum æquum bonum judici videbitur, tantum æs dare, noxamve dedere jubebo. Si servus, sciente domino, fecisse dicetur, detracta noxæ deditione, judicium dabo.*

II. Porro ob privata delicta tantum, & quæ pecunia apud veteres æstimari solebant, a filiisfamilias, aut servis admissa, noxales actiones sunt institutæ. Ob publica enim delicta non parentes quidem, aut domini, sed ipsi servi, filiiive familias in judicium vocabantur. Per noxalem autem actionem id consequebatur actor, ut parens, aut dominus vel delicti æstimationem præstarent, vel ut servum, filiumve familias noxæ illi dederent, cui per delictum damnum fuerat illatum. Humanum enim est visum, servorum, filiorumve nequitiam supra modum dominis, aut parentibus non nocere

re, eorumque deditione ingentio rem litis æstimationem effugi *princ. inst. h. t.* Si noxam dedere domini, aut parentes mallent, diverso jure censebantur servi, ac liberi noxæ dediti. Nam liberi noxæ dediti in servitute quidem erant, servi tamen non censebantur. Proinde si manumissi forent, libertinæ conditionis haud erant, sed non secus, ac liberi a parente venumdati, ingenui censebantur *Quintil. inst. 5. 10.* Si ita dediti quoque pecunia aliunde corrasa damnum illatum sarcire possent, necessario manumittendi erant, ut auctor Papinianus est apud *collat. leg. Mosaic. & Rom. tit. 2. §. 3.* Verum servi noxæ dediti servi esse pergebant, iisque acquirebant omnia, quibus dediti noxæ forent. Si tamen & ipsi tantum pecuniæ corrasissent, quantum damni æstimationi sufficeret, implorato Prætoris auxilio, invito etiam domino, manumittendi erant *§. 3. inst. h. t.* Licet autem ad Pauli ætatem usque liberi noxæ dediti videantur, idque suadere queat Paulus ipse *recept. sent. 2. 31. 9.* asperius tamen posteritati visum, parentes filios noxæ dedere, præsertim si de sceminis ageretur ob pudicitia amittendæ periculum. Proinde pridem ante Justinianum noxæ deditionem in liberis explosit posterior ætas *§. 7. inst. h. t.* Ne autem recentius hoc institutum illis damno cederet, quibus nocitum esse diceretur, ab eis ipsos filiosfamilias conveniri placuit. Quod si damnati iudicio liberi damni æstimationem solvere pecunia sua non possent, iudicati actio compete bat adversus parentes, quatenus in peculio liberorum esset *l. 3. §. 11. ff. de pecul.* Neque rege ras, peculium liberis censer i traditum, ut illud per contractus quidem, neutiquam vero, ut obli-

obligari per delicta posset. Cum enim per litis contestationem inter litigantes quasi contrahi censeretur, in ea specie actio de peculio non ob delictum, sed quasi ob contractum videbatur institui. Vid. doct. ad d. §. 7. h. s.

III. Supervacuum autem admonere fuerit, vinculo dominicæ potestatis fieri, ut dominus servum noxæ nomine convenire nequeat, & facete sane rescribunt Principes in l. ult. C. an serv. pro suo fact. maleficos servos domi per dominos conveniri, idest verberibus castigari. Hinc ex vinculo potestatis recte Tribonianus insert §. 6. h. s. si servus, qui adversus te noxam admisit, in potestatem tuam pervenerit, noxæ nomine frustra te agere: ita enim in eum locum res deducitur, ut consistere non possit actio. At vero alias noxalis actio caput sequitur §. 5. h. s. Id eo pertinet, noxalem actionem cum capite nocentis servi ambulare, ad quemcumque perveniat servus, qui noxam admisit. Quapropter si servus tuus post noxam admissam in alterius potestatem pervenerit, cum novo domino noxalis actio debet institui. Proinde in servis vendundis præter alia promittere mangones solebant olim, servos venales noxis solutos esse l. 1. ff. de edil. edict. Ita enim facilius emptores inveniri posse videbantur. Quod si servus maleficus manumissus esset, statim post manumissionem cessabat noxalis actio, & ob damnum illatum ipse directo conveniri poterat d. §. 5. h. s.

T I T U L U S IX.

Si quadrupes pauperiem fecisse dicatur.

INter noxales etiam actiones a veteribus relata fuit actio *de pauperie*. Ea quoque adjectitiæ qualitatis censeretur debet. Nam pauperies qualitas est adjectitia promanans ex damno, quod per quadrupedem fuerit illatum. Veteres enim pauperiem damnum appellarunt, quod factum a quadrupede foret, auctore Festo. In præsentem autem argumentum quadrupedis vocabulum non tantum ea complectitur animalia, quæ gregatim pascuntur, quæve dorso, aut collo domantur, sed & ea generatim omnia, quæ quoquo modo damnum intulerint, modo illud intulerint contra generis sui naturam. Exempla habes in *l. 1. ff. h. t.* in equo calcitroso, aut bove cornupeta: neque enim aut calce equus, aut cornu bos petit ex naturæ suæ incitamento, sed præter naturalem mansuetudinem, & contractum ob vitium. Proinde si ex naturali sua feritate animalia damnum dedisse dicantur, actioni de pauperie locus patere nequit *d. l. 1. §. 7. ff. eod.* Ceterum actio de pauperie antiquissima Romæ fuit, & in ipso jure Decemvirali prodita. Quemadmodum enim, nisi noxia sarciretur, ipsos servos, filiosve familias noxæ dedi jussere Decemviri, ita si per animalia damnum foret illatum, aut æstimationem damni præstari, aut animal ipsum damnum passo dedi voluerunt. Decemvirale carmen, Ulpiano duce in *l. 1. ff. eod.* non absurde ita restitues. *Si quadrupes pauperiem faxit, dominus noxiæ æstimationem offerro; si nolit, quod noxit, dato.*

II. Ut

II. Ut supra monuimus, si non contra naturam ab animalibus fuisset damnum illatum, de pauperie cessabat actio. Cum igitur contra naturam animalis haud sit, ut alienas segetes depascatur, ob depastas alienas segetes ex prædicto Decemvirali carmine agi non potuisset. Verum, ne quoquo modo per aliena animalia alteri injuria impune fieret, alia lege coercuere Decemviri damnum, quod in alieno depascendo animalia intulissent. Ea de causa noxalem etiam actionem, & ipsam adjectitiæ qualitatis *de pastu pecoris* instituerunt, ut recte videtur observasse Cujacius ad Pauli *recep. sent.* 1. 15. 1. Inde igitur adversus animalis dominum nascebatur de pastu noxalis actio, eaque aut sarcire damnum depascendo illatum, aut ipsum animal dedere compellebatur. Ea autem actio obtinebat, si sponte sua animal in alienum depastum isset. Si enim ipse Dominus immisisset animalia in alienas segetes, ex lege Aquilia id damnum tamquam injuria datum coerceretur *l. ult. C. de leg. Aquil.* Verum hoc discrimine in Regno non utimur. Apud nos enim si quod depascendo animalia damnum intulerint, illud omnino dominus sarcire debet, neque per animalis deditioem damni æstimationem potest effugere. Licet autem ex regulis Romani juris res alienas capere non liceat auctoritate propria, tamen ob favorem agriculturæ fortasse concessit in Regno Fredericus II. ut fundi dominus deprehensa in pauperie animalia per se capere ipse posset. Ita tamen capta locorum bajulis deferri jussit, ut secundum ipsorum æstimationem damnum illatum sarciri posset *constr. animalia. de anim. invent. in damn.* Ceterum ex ipso jure Romano animal in da-

damno deprehensum includi potest, si, cujus sit, ignoretur *l. 39. §. 1. ff. de leg. Aquil.* & in pascua Principis immissum animal ipsi fisco nomine noxæ cedit *l. 1. C. de fund. & salt. dominic.*

III. Si animalia ex genitrali sua feritate damnum intulissent olim, actione directa de pauperie dominos conveniri non potuisse vidimus. Ne tamen per naturalem alienorum animalium feritatem aliis impune noceretur, damnum per ejusmodi animalia inferri solitum Ædilis edicto coercuit. Ædilitio enim edicto cautum, ne quis canem, verrem, aprum, ursum, leonem in eo loco haberet, qua publice inter fieret. Si secus factum a quoquam esset, eaque de causa homo liber periisset, ducentorum solidorum multa constituta; si homini libero nocitum esse diceretur, tanti dominum damnari placuit, quantum religioni judicis videretur; damnum aliud quodcumque duplo sarciri *§. 1. inst. h. t. & l. 40. & sequ. ff. de ædil. edict.* Sed & ob damna ab ejusmodi animalibus illata utili actione de pauperie experiri licuisse docet Tribonianus *d. §. 1. h. t.* Idem docuerunt Jurisconsulti veteres: Id ipsum procedebat tamen, si animal aufugiendo in naturalem libertatem se non recepisset. Ubi enim ferox animal custodiam evasisset, dominium ejus statim amittebatur, ut proinde deesset, qui jure domini actione de pauperie conveniri posset *l. 1. §. 10. ff. h. t.* Illud mirum videri queat, quod docet *loc. cit.* Tribonianus, actionem ædilitiam cum utili actione de pauperie cumulare jus fuisse olim. Id quidem absurdum videri queat. Hoc enim semel admissio, res eo redibit, ut idem bis peti possit. Verum salva res est. Si enim minus in instituta actio-

actione foret, plus autem in omiſſa, licebat actori, quod minus per leniorem actionem conſequutus eſſet, altera adhuc graviore petere. Si tamen nil pluris in alterutra foret, actio ædilitia cum actione de pauperie cumulari non poterat, ne his idem peti videretur. Ita coercenda Triboniani regula, *actiones præſertim pœnales alteram alteram non conſumere in d. §. 1. h. t.* Conſer, quæ diſſerui ſupra de action. §. ult.

T I T U L U S X,

De iis, per quos agere possumus.

Qui alterius negotia ſuſciperent, & alieno nomine in judiciis agerent, *procuratores* dixeret veteres. Procuratorum autem inſtitutum antiquiores reſpuere Romani: lites enim ſuas per ſe quemque perſequi voluerunt, ſeu quis ageret, ſeu cum eo ageretur. Hinc ne reo quidem, qui morbo cubaret, procuratorem conſtituendi ius fuit. Notum in vulgus eſt incivile illud Decemvirorum carmen, quo morbum excuſans reus, aut ob ſenium ingrediendo impar per procuratorem ſe tueri non poterat, ſed ipſe in ius rapi jubebatur. Eum igitur jumento impoſitum e domo ſua ad Prætorē nova funeris ſpecie efferri volvere Decemviri. Verba Decemvirorum ipſa ſervavit Gellius *noct. Attic. 20. 1. Si morbus, æviſque vitium faxit, qui in ius vocabit, jumentum dato. Si nolet, arceram ne ſternito.* Ne cui autem mirum id videatur, hic advertamus, oportet, ita apud veteres Romanos ius comparatum fuiſſe olim, ut omnino repudiandi procuratores eſſent.

Pri-

Primo enim recepta regula juris erat, aliena opera nil quicquam acquiri posse. Cum igitur sententia judicis actionem judicati pareret, eaque aliquid victor acquireret, necessitate juris in judiciis non admittenda videbatur procuratorum opera. Deinde ea quidem forma judiciorum apud Romanos fuit, ut actiones, & exceptiones in stipulationem plerumque deducerentur. Cum vero aliis stipulari jus Romanum quemquam haud pateretur, ea quoque de causa explodendi in judiciis procuratores erant. Eo accedebat, quod ita quidem proditæ formulæ judiciorum erant, ut per se quemque agere oporteret: hæ namque formulæ erant legis actiones: legis autem actiones procuratorem admittere non potuisse constat ex *l. 123. ff. de reg. jur.*

II. Verum enimvero paulatim ab his principiis descivere veteres. Primo enim cum ob imbecillitatem ætatis in judicio consistere pupillus haud posset, ipse favor pupillorum extorsit, ut recte agere videretur pro pupillo tutor. Rursus cum nec totus populus posset adesse judicio, nec, qui assertus in libertatem foret, ob status sui incertitudinem causam suam agere in jure posset, benigne receptum, ut pro populo, aut cujusquam libertate acturi procuratores admitterentur *princ. h. t.* Lege etiam Hostilia permissum fuit, furti agere eorum nomine, qui apud hostes essent, aut abessent Reipublicæ causa, eorumque, qui in horum cujusvis potestate forent *d. princ. h. t.* Sed ne ita quidem obviam itum veteris juris incommodis. Nam & morbus, & ætas, & necessaria peregrinatio, aliæque causæ permultæ sæpiusculum litigantibus impedimento erant, quominus

nus ipsi judiciis adesse possent. Ita generatim receptus procuratorum usus. Hodie igitur, cuicumque permiseris tuo nomine agere, legitimus procurator tuus intelligetur §. 1. *h. t.*

III. Jam vero cum recens procuratorum institutum principiis Romani juris videretur adversum, aliquid per Jurisconsultorum eureka excogitatum oportuit, quo salva ratione juris procuratores recepti viderentur in Civitatem. Ea de causa litis dominium in procuratorem Jurisconsulti transferri docuerunt. In procuratorem enim litis translato dominio, actio ejus propria facta videbatur; ut proinde suo potius, quam alieno nomine videretur is agere *l. 4. ff. de alien. judic. mus. caus. fact.* Hoc autem litis dominium, prævio mandato domini, ipsa litis contestatione fingebatur acquiri *l. 4. §. ult. ff. de appell.* Domini mandatum igitur acquirendi domini veluti remota causa videbatur; litis vero contestatio veluti causa proxima, per quam tamquam per occupationem dominium illud procurator nancisceretur. Ex dominio autem per contestationem in procuratorem translato plura juris capita facile intelligentur. Primo enim inde ratio reddi potest, cur sententia in ipsum procuratorem proferretur olim, neque ratum haberi oporteret, quod, invito procuratore, per dominum ipsum in judicio gestum esset *l. un. C. de satisfd.* Deinde facile etiam intelligitur, cur sibi met procurator rei judicatæ actionem acquireret, &, rigore juris inspecto, in ipsum quoque procuratorem actio rei judicatæ competeret. Ceterum ne ea juris subtilitas damno cuiquam foret, neutro casu ejusmodi actiones placuit efficaces esse. Hinc, seu

ageret , seu conventus procurator esset , præsto erat exceptio doli mali *l. 28. ff. de procur.* Indidem denique facile constat , cur procuratorem ipsum appellationem interponere , eamque prosequi oporteret ; cur etiam , principali mortuo , litem adhuc is prosequi cogeretur *l. 2. C. 23. C. de procur.* Conf. Boehmerum *de domin. lit. 1. C. 2.* At vero facultatem per procuratorem agendi tantum in causis privatis permitti placuit : in causis enim publicis propter subscriptionem in crimen ea facultas denegata fuit *l. penult. §. 1. ff. de public. jud.* Falluntur autem , qui vulgo docent , in judiciis publicis locum procuratori fieri , si poena non pertingat ad relegationem usque , aut si crimen pecunia sit expiandum. Cum enim in omnibus publicis judiciis in crimen subscriptio fieri debeat ; nusquam vero sit in jure proditum , in crimen procuratorio nomine subscribi posse , facile inde constat , in quovis judicio publico præcludi procuratori locum . Vide Strykium *in jur. modern. pandect. libr. 3. tit. 3. §. 3.*

IV. Litis dominium in procuratorem transferri solitum faciebat apud Romanos olim , ut post litis contestationem non temere procurator mutari posset . Id enim tandem permitti placuit , si prævia cognitione causæ constaret , novum procuratorem justa de causa constitui . Justæ procuratoris immutandi causæ inter ceteras videbantur , si suspectus procurator evaderet , si valetudine distringeretur , si junctus affinitate cum adversario foret , idque non solum ex parte rei , sed ex parte actoris etiam observabatur *l. 17. usque ad 25. ff. de procur.* Ceterum post renatam apud nos Romanam Jurisprudentiam sollicitè dubitarunt interpretes,

tes, an post litem contestatam in Regno Neapolitano temere procurator mutari posset. Id autem impendio magis addubitari coeptum, postquam exemplis compertum, complures causæ suæ diffisos adversarii defatigandi causa procuratorem revocare, alio non constituto, quicum ulterius in iudicio procedi posset. Proinde saniores pragmatici censuerunt, invito adversario, mandatum procurationis revocari non posse. Vide de Marin. *resolut. jur.* 2.174. Verum ea de re apud nos hodie nullus superest dubitationi locus post pragmaticam 11. *de dilat.* sub auspiciis Caroli VI. per Cardinalem de Althann latam. Ea autem omnis veluti fraudis everriculum in præsentī negotio videri debet. Ibi enim §.4. ad coercendas procuratorum fraudes, qui injustæ causæ metuentes procuratori dolose renunciabant, primo cautum, non promiscue quoslibet procurationis munus obire posse, sed tantum eos, de quibus inquisitione prævia constitisset, idoneos, & probos esse: idem cautum pridem fuerat *pragm.22.de offic.Sacr.Reg. Consil.* Ibidem deinde placuit, publico actu procuratores constitui oportere; procurationis etiam mandato per ipsum procuratorem in acta insinuato, procurationem acceptatam videri. Id ita cautum oportuit, ne quando obtenderet procurator, a se procurationem acceptatam non esse. Præterea ibi præscriptum, procurationis rite constitutæ mandato frustra per procuratorem renunciari, nisi eam veniam ipse causæ *commissarius* concederet: si secus factum per procuratorem esset, muneris suspensione, & ducatis viginti quinque fisco solvendis eum multari; in iudicio etiam ulterius recte procedi, nulla ratione renunciationis habita.

Ad fraudes autem præcavendas ipsi quoque litigantes procuratores immutare vetiti, nisi & justa mutationis causa superveniret, eamque justam videri ipse causæ commissarius declararet. In Judiciis vero *secundæ instantiæ* cum eodem procuratore procedi placuit, nullo ei concessio spatio ad rem domino denunciandam. Ibidem §. 5. aliis procuratorum fraudibus obviam itum, a quibus enarrandis sciens abstineo, ne vos præcoci malitia instruere videar.

V. At vero; ut quis procuratorio nomine litem excipere, aut experiri queat, omnino mandato domini instruatur, oportet. Nonnulli sunt tamen, quibus ob conjunctionem sine mandato experiri licet, veluti pater, filius, frater, affinis *l. sed & hæ. C. l. Pomponius ff. de procur.* Tutores quoque, curatoresque nullo quidem mandato ad agendum egent; ratione enim officii id juris habere censentur *l. 30. ff. de peric. & admin. tut.* Præterea humanitas ipsa suasit, ut posset quilibet ad defendendum absentem adesse judicio, licet mandato careret *l. qui proprio. ff. de procur.* Denique consortem etiam litis ad litigandum sine mandato veteres admitti voluerunt *l. ult. C. de consort. ejusd. lit.* Ceterum quæ potestas procuratori competat, cum ex diversa mandati formula, tum ex mente domini æstimari debet. Aliquando enim ultra verba mandatum excurrit, & benigna interpretatione demandatum aliquid censi debet, licet id expressum diferte non fuerit. Ita quidem rei mobilis vindicatione mandata, procuratori agere ad exhibendum licet. Recepta enim regula juris est, re aliqua mandata, simul alia demandata videri, sine quibus

bus res demandata expediri non potest *l. ad rem. ff. de procur.* Contra in quovis generali mandato ea non continentur, quæ verosimile non videtur, quempiam mandaturum. Ejusmodi sunt causa famæ, transactio, delatio jurisjurandi, & id genus alia, quæ proinde speciale mandatum dicuntur exigere *l. non solum. & l. mandata. ff. cod.* Sed et si ejusmodi facultates in procurationis mandato diserte exprimantur, eas non temere procurator usurpare debet, cum frequentius ex notariorum cerebro, quam ex domini voluntate eæ demandatæ præsumi debeant. Conf. Gudelin. *de jür. noviss.* 4.4. Illud apud nos singulare obtinet, quod universitatum Regni procuratores sine speciali universitatis mandato libellos accusatorios adversus quemlibet in quovis tribunali universitatis nomine offerre nequeant. Si secus faxint, præter alias pœnas centum auri uncias fisco procuratores solvere compellentur. Id cautum *pragm. 3. de procurat.* ne cui sub universitatis obtentu, ea insciente, calumnia falso fieret.

T I T U L U S XI.

De satisfationibus .

NE judicia elusoria forent, sæpiusculæ actor, reus, procuratores olim adversario cavere debebant, *judicatum solvi, rem ratam dominum habiturum.* Opportunum igitur Triboniano visum, rubricam de satisfationibus hic appingere, quibus ejusmodi cautiones præstari solebant. Satisfatio autem vocabulum generis in jure est, & cautionem qualemcumque indigitat alteri ab altero præstari solitam.

Hinc simplicem quoque repromissionem satisfationis vocabulo contineri scribit Paulus in *l. 61. ff. de verb. signif.* Quadruplices autem cautiones sunt in jure proditæ. Caveri enim cuiquam potest vel simplici repromissione, vel juramento, vel datis pignoribus, vel fidejussoribus denique. Cujusque cautionis exempla passim in jure prostant. Cautio, quæ datis fidejussoribus præstari solet, satisfatio frequentius appellatur *l. 1. ff. qui satisfac. cogant.* Hinc ubi, nil addito, quis satisfacere jubetur, datis fidejussoribus cautionem præstare debet. Quin præter fidejussiones ignotæ fortasse veteribus cautiones aliæ. Cautiones enim, quæ nulla repromissione, aut juramento fiebant, facile eludi poterant. Cautiones vero, quæ datis pignoribus præstari potuissent, vel eo nomine rejiciendæ erant, quia pignorum custodia sollicitior videbatur. Verum pluribus de causis præter fidejussiones alias etiam cautiones admisit posterior ætas, ut infra liquebit.

II. Quod ad cautionem vero per fidejussores in judiciis præstari solitam, discrimen esse voluere veteres, utrum in rem actum, an in personam esset. Si enim actione in rem actum foret, satisfacere debebat possessor, *judicatum solvi*. Si igitur victus possessor esset, & rem ipsam non restituisset, aut litis æstimationem, ob prælitam cautionem *judicatum solvi*, fidejussores conveniri poterant *princ. h. t.* Ea autem cautio tria capita complectebatur, de re judicata restituenda scilicet, de re defendenda, de dolo malo; ex singulis prædictorum capitum fidejussores conveniri poterant *l. 3. & 5. ff. de fidejuss.* Primum autem caput de judicato solvendo potissimum videbatur: inde igitur cautio

tio isthæc nomen accepit . Quod si litigatorum opera actor , & reus in iudicio uti mallent , possessorum quidem procuratores datis quoque fidejussoribus cavebant , iudicatum solutum iri : actorum vero procuratores datis quoque fidejussoribus cavere debebant , rem ratam dominum habiturum . Si enim ea cautio omissa foret , periculum quidem erat , ne , procuratore victo , eadem de re dominus rursus experiretur *d. princ. h. t.* Cum autem quod cum procuratore geritur , veluti cum ipso domino gestum jus fingi jubeat *l. 1. C. de procur.* scrupulum videtur Tribonianus injicere *d. princ. h. t.* Ibi enim scribit , actorem eadem de re rursus experiri posse , si exacta non fuerit a procuratore cautio , rem ratam dominum habiturum . Defendi tamen Tribonianus facile potest , si de iis procuratoribus intelligatur , qui de mandato domini non satis liquide docere possunt . Inde autem fit , ut personæ conjunctæ procurationis munus habentes ab ipsa lege sine cautione de rato ad agendum alieno nomine admitti non debeant *l. 40. §. ult. ff. de procur.* Ita autem facile intelligetur , cur addat *loc. cit.* Tribonianus , tutores , & curatores de rato cavere oportere , si nomine pupillorum , aut minorum agant . De rato scilicet tutor , aut curator cavere non cogitur *l. 23. ff. de admin. tut.* Verum si non liquido de tutela , aut curatione constet , ipse tutor , aut curator sine cautione de rato ad agendum admitti non debent . Conf. Vinn. ad *d. princ. h. t. n. 1. & 2.*

III. Ita quidem de satisfactionibus antiquitati placuit , si in rem actio instituta foret . Si vero in personam institueretur actio , actor quidem , si per se ipse ageret , satisfacere non cogeatur ; sin

ejus nomine procurator, is, nisi liquido de mandato constaret, cavere debebat, rem ratam dominum habiturum *l. 33. ff. de procur. C. §. 1. h. t.* At vero reo, si per se ipse litem exciperet, in personali judicio remittebatur cautio, judicatum solvi, licet secus jus esset, ut vidimus, si instituta actio in rem esset. Discriminis ratio inde profluxisse videtur, quod in actione in personam non poterat reus condemnationem effugere; secus erat, actione in rem instituta. In ea enim, omissa cautione judicatum solvi, condemnationem effugiebat reus, si sine dolo, aut culpa rem controversam possidere desuisset *l. 27. §. 1. ff. de rei vindic.* Si vero reus per procuratorem litem personalem exciperet, omnino procuratorem cavere oportebat, rem ratam dominum habiturum, licet de ejus mandato plane constaret *d. §. 1. h. t. C. l. 1. C. de satisfat.* Ejus cautionis necessitatem vulgo inde repetunt, quod litis per procuratorem susceptio delegatio quædam videbatur. Ne igitur invito veluti actori novus reus videretur objici, ea cautione rei procuratorem onerari oportebat. Ita enim veluti sponte actoris novus reus fingi poterat substitutus.

IV. At vero juniorum Principum constitutionibus hæc fere omnia sunt immutata. Quod enim ad reum, seu in rem, seu in personam adversus eum agatur, si proprio nomine litem excipiat, jure novo cautionem judicatum solvi præstare non cogitur; sed pro sua tantum persona cavere debet, se ad finem usque litis in judicio permanfurum *§. 2. h. t.* Ejusmodi vero cautio pro reorum diversitate diverse præstari solet. Pauperes enim, qui jurato affirmant, se fidejussores

fores invenire non potuisse, eam cautionem juramento præstant *auth. generaliter. C. de Episc. & Cleric.* Illustres quoque personæ id simplici juramento cavent *l. 17. C. de dign.* Qui res soli possident, simplici repromissione eam cautionem præstant *l. 15. C. qui satisfacere cogant.* Reliqui datis fidejussoribus eam cautionem præstare debent *d. §. 2. h. t.* Quod ad actorem, jure novo is nil quicquam cavere debet, si in judicio aliena opera non utatur. Ceterum si per procuratores res geratur, diversæ cautiones cum ab actoris, tum a rei procuratore præstari debent. Et actoris quidem procurator datis fidejussoribus cavere debet, rem ratam dominum habiturum, modo ne de mandato liquido constet *§. 3. inst. h. t.* Rei vero procurator datis fidejussoribus omnino cavere debet, judicatum solvi. Quod si reus procuratorem suum ab hoc onere liberare velit, vel in judicio, vel extra judicium poterit pro procuratore suo eo nomine fidejussor existere. Quo autem certius actori sit cautum, causa judicati reus res suas hypothecæ subjicere cogitur. Præterea idem reus datis fidejussoribus promittere debet, se tempore recitandæ sententiæ judicio adfuturum *§. 4. h. t.* Quod si quaquā de causa reus absit, & sine mandato quispiam absentem paratus sit ultro defendere (id jus quidem haud prohibet, & publice visum est expedire, absentes a quibuscumque defendi posse) is datis fidejussoribus cavere debet, judicatum solvi *§. 5. h. t.* Quo quidem casu, si condemnatur absens, adversus ipsum defensorem actionem efficacem competere placuit *l. 4. ff. de re judic.* Ceterum vetustissimis Regni Neapolitani moribus superiores cautiones actoris, & rei, eorumque pro-

procuratorum apud nos in judiciis exoleverunt. Moribus igitur ita receptis, tantum de injustæ litis expensis procuratores simplici repromissione cavent. Inde tamen tantum adversus dominos ipsos, non adversus procuratores efficax actio apud nos hodie accommodari solet. Verum longe opportunius foret, si ea de causa adversus ipsos procuratores agi jus esset. Ita enim facilius coerceri possent tot in foro nebulones, qui unice de pecunia corradenda solliciti lites quamvis injustas cœptant audacius aliis calumniam faceffentes, cum nil periculi ab injusta lite sibi imminere sentiant. Qua quidem in re laudare non destiti institutum viri clarissimi Josephi Cresconii, qui, cum in Magna Curia sedebat judex, procuratores ipsos ob lites temere susceptas in expensas damnare solitabat.

T I T U L U S X I I .¹

De perpetuis, & temporalibus actionibus, & quæ ad heredes, & in heredes transeunt.

Actionum argumentum superioribus titulis expletum quidem videri poterat. At nondum per Tribonianum hic finis. Cum enim, inspecto jure civili, certi temporis lapsu perimi actiones soleant, neque promiscue ad heredes, & in heredes transeant actiones omnes, in præsentī rubrica de perpetuis, & temporalibus actionibus actum oportuit; accurate etiam enarrari, quænam actiones ad heredes, & in heredes transirent, quæ cum defuncto ipso perimerentur, quas denique adversus heredes non liceret institui. Duplex igitur argumentum præsens rubrica complectitur.

Pri-

Primo enim exequitur, quænam actiones perpetuæ sint, quænam temporales: deinde quænam actiones ad heredes, & in heredes transeant, quænam neque adversus heredes, neque heredibus competant, & cum ipso defuncto statim exspirent. Utrumque separatim enucleabimus.

II. Quod ad primum igitur, nullæ apud Romanos olim actiones prodiæ erant, quæ certo post tempore perimerentur. Quemadmodum enim leges civium pactum perpetuum erant, iisque perpetuo cives obstringebantur, ita actiones inde manantes nullius temporis lapsu perimi oportebat. Inde factum, ut veteri Romanorum jure actiones semel quæsitæ perpetuo competere censerentur, iisque nulla temporis præscriptio posset officere, seu eæ ex legibus, Senatufve consultis, seu ex sacris constitutionibus promanarent *princ. h. t.* Verum enimvero cum publice interesse videretur, lites immortales haud fieri, & aliquem tandem sollicitudinis, & periculi finem esse, sapienter cavere Principes, ut actiones omnes certo tandem post tempore perimerentur. Ne tamen veterum legum reverentia palam neglecta videretur, aliquid excogitandum erat, quo & litium immortalitati obviam itum, & veteris juris rigor servatus videri posset. Præsto statim id fuit. Perpetuum dixere veteres, quod triginta annis mansurum esset. Ita quidem glossæ nomicæ *perpetuum* definiunt annorum triginta spatium. Eo tempore hominis quoque vitam veteres Jurisconsulti concluderant, ut ostendi alias ex *l. 61. ff. ad leg. Falcid.* Ita veteris juris rigor subtilitate verborum elusus. Actiones enim vere perpetuas adhuc perpetuas esse placuit, sententia tamen longe diversa, quippe

ultra triginta annorum ævum non permanfuras. Aliunde cum triginta tantum annorum ætatem vulgo mortalibus præfcripſſent Jurifconfulti, fruſtra de actione tanti temporis intercapedine perempta conqueſtus is foret, qui poſt ipſos triginta annos negotium cuiquam importunus faceſſeret. Ita igitur adhuc perpetuæ appellatæ actiones, quæ lapſu triginta, aut quadraginta annorum perimerentur, eaque in præſenti rubrica perpetuarum actionum eſt notio.

III. His igitur initiis actiones olim vere perpetuas, & ex jure civili manantes, ſeu illæ in rem, ſeu in perſonam eſſent, Honorius, & Theodoſius triginta annorum præſcriptione perimi voluerunt *l. 3. C. de præſcript. trigint. vel quadrag. ann.* Cum tamen ea lege lata vitilitigatores quidam poſt triginta etiam annos quaſdam actiones inſtituere eo ſub obtentu pergerent, quia prædicta conſtitutione comprehenſæ non viderentur, ei adhuc incommodo haud multo poſt obviam ivit Anaſtaſius. Is enim quadraginta ſaltem annorum præſcriptione perimi juſſit actiones, quæ triginta annorum præſcriptionem dicebantur effugere *l. 4. C. eod.* Ita quadraginta etiam annorum nata præſcriptio, eamque in rebus fisci, aut fundo patrimoniali, contra ſilcum, aut Principem opponi placuit *l. 14. C. de fund. patrim.* Eadem præſcriptione quadragenaria perimi juſſit Juſtinianus actionem hypotheccariam, ſi ageretur adverſus iſpum debitorem, aut heredem *l. 7. C. de præſcript. trig. vel quadrag. annor.* & generatim actiones omnes, de quibus ſemel conteſtata lis foret *l. 9. C. eod.* Proinde ſi recte rationes ineas, ex jure civili actiones perpetuæ nullæ ſunt, quæ ultra tri-

triginta , aut ad summum quadraginta annorum ævum perennent . Ipsas autem actiones Ecclesiæ Romanæ competentes ulterius ex jure civili extendi non oportere , diligenter ostendi alias *libr.2. tit. 6. §. 14.* Tantum in Regno Neapolitano cautum a Friderico II. ut ob bona fisco intercepta, seu allodialia, seu feudalia ea forent , intra centum annos fisco jus esset agere , eique tantum centenaria præscriptio opponi posset *const. un. de prorogat. præscript.* Id ipsum tamen de regalibus intelligi nolim . Cum enim regalia accessio ipsius Principatus videri debeant , ob ea præcepta perpetuo agi potest , neque inde nascentes actiones quacumque præscriptione temporis possunt eludi .

IV. Licet autem actiones ex jure civili manantes intra triginta , aut quadraginta annos recte instituantur, complusculæ sunt tamen in Regno actiones ex jure civili proficiscentes , quas ultra certum tempus non ob præscriptionem quidem , sed ob præsumptam solutionem instituere non licet , si scripturæ non allegentur , quæ præsumptam illam solutionem evertant . Ita ad fraudes præcavendas pridem Sacro Consilio in generali suo conventu visum anno 1738. Id vero placitum, cum literis Regis Catholici sit confirmatum, vim legis in Regno habet : Ipsamet ejus verba hic juvabit exscribere , cum frequentissimi sit in foro usus . *Sacrum Consilium censet -- causidicos & procuratores litium , ex quo vel patrocinium sunt iussi relinquere , vel mandato sunt defecti, pro honorario , vel palmario , sive laboribus intra biennium agere posse ; post id tempus repellendos . Notariis a die confectarum scripturarum, quousque earum exemplum non tradiderint , me-*
rita-

uitarum mercedum causa non ultra biennium agere licere; traditis vero quodcumque copiis, quidquam petendi jus non esse. Pharmacopolis ob vendita medicamenta, si adversus eum, qui ea acceperit, acturi sint, biennium concedi; si vero post ipsius obitum ab herede repetere instituant, intra duos menses agendum; post ab iudicio removendos. Fabros omnes, atque artifices de pretio rerum manufactarum, laborumque mercede recuperanda intra annum experiri debere, post annum a die operis expleti actionem penitus negandam. Denique famulis, ceterisque, qui operas suas locant, postquam a famulatu, ministeriove discesserint, intra duos menses dumtaxat petendi salarium facultatem esse tribuendam. Ita in pragm. 3. de præscript. ex edit. noviss.

V. Atque ita quidem veteris juris rigorem temperatum voluere Principes, si actiones ex jure civili descenderent. Mitius adhuc actum in actionibus, quæ proficiscebantur ex jure Prætorio. Cum enim annuum Prætoris esset imperium, æquitas ipsa suasit, ne ultra annum actiones extenderentur, quæ a Præторе proditæ edicto forent. Proinde actiones a Prætoris jurisdictione pendentes plerumque intra annum vivere scribit Tribonianus *princ. b. t.* Ne tamen cuiquam sit fraudi Triboniani locus, accurate distinguatur, oportet, inter actiones pœnales, easque, quæ nudam rei persequutionem continent. Et actiones quidem Prætoris nudam rei persequutionem continentes exemplo civilium sunt & ipsæ perpetuæ. Sat enim iniquum fuisset, anno finire actionem, qua quis, quod patrimonio sibi abesset, persequeretur. Ita quidem perpetuam esse placuit actionem Publica-

cia-

cianam, de constituta pecunia, exercitoriam, institutoriam, ex jurejurando, & complures id genus alias *l. 35. ff. de obligat. & act.* Perpetua quoque erat actio, quam bonorum possessori, ceterisque, qui loco heredum essent, accommodavit edicto Prætor *d. princ. b. t.* Loco heredum hic esse eos intellige, quibus ex fideicommissio restituenda foret hereditas. Actionem enim, qua ex fideicommissio peti solebat hereditas, ex Prætoris jurisdictione manasse vel inde revincas, quod eam hereditatis petitioni opponit Jurisconsultus *in l. 2. ff. de fideic. hered. pet.* Contra actiones Prætoris poenales annales erant *l. 35. de oblig. & act.* Id ita fortasse placuit, ne cui ultra annum ob delictum molestia fieret, quod ex regulis juris civilis coerendum non videbatur. Complures tamen poenales actiones edicto proditæ perpetuæ erant, veluti actio furti manifesti *princ. inst. h. t.* actio furti adversus nautas, caupones, stabularios *l. ult. ff. naut. caup. stabul.* actio depositi miserabilis *l. 18. ff. de pos.* actio servi corrupti *l. 13. ff. de serv. corrupt.* & id genus aliæ. Hæ autem actiones ideo fortasse perpetuo competeabant, quod ex jure civili origine sua manarent, & in iis tantummodo quædam præter juris regulas immutasset edicto Prætor.

VI. Jam supra monuimus, actiones poenales, ex quibus poena pecuniaria apud Romanos olim applicabatur actori, in Regno Neapolitano exolevisse. Perperam igitur quærat hic aliquis, an adhuc in Regno post anni spatium perimantur poenales actiones ex Prætoris jurisdictione manantes. Opportunum fuerit tamen hic quærere, an perpetuæ actiones seu ex jure civili, seu ex Prætoris edicto proficiscentes per lapsum triginta, vel qua-

quadraginta annorum apud nos perimantur in Regno. Quæstionis decisio inde pendet, an in Regno Neapolitano sit admittenda præscriptio. Ea enim generatim admissa, actionibus quoque præscribi poterit. Rex quidem Ferdinandus, ne rerum dominia incerta forent, præscriptionem in Regno Neapolitano servari jussit *pragm. 1. de præscript.* Verum ea iratis pragmaticis conscripta fuit, neque umquam apud nos servata videtur. Siquidem a renata jurisprudentia dissidium in dicenda sententia apud nos fecere doctores, an in Regno foret præscriptioni locus. Complures etiam eo procliviores fuerunt, ut e Regno Neapolitano præscriptionem prorsus arcerent. Sacrum quidem Consilium in generali conventu suo anno 1738. censuit, *præscriptioni, qua actiones extinguuntur, in quocumque Regni foro locum esse oportere*, ejusque placitum Regiæ quoque literæ confirmarunt anno 1743. verum ejus Senatusconsulti vix ullam hactenus rationem habitam, rerum periti norunt, ut admonui alias *libr. 2. tit. 6. §. ult.* Sane usu quotidie in foro venit, ut quis exempli gratia ob rem hypothecæ sibi suppositam adversus tertium possessorem agat; nusquam tamen audiui, ei triginta, vel quadraginta annorum præscriptionem opponi jus esse; licet tertius ille sine fraude rem emerit, & bona fide putarit, hypothecæ vinculo rem affectam non esse. Proinde, rationibus accurate subductis, ex recepta fori sententia locum quidem præscriptionibus esse crediderim, si de servitutibus agatur; in aliis vero juris articulis præscriptionibus actionum in Regno Neapolitano locum patere non oportere. In eo igitur argumento potissimum dici potest, leges per mores subactas
 est.

esse. Sed, his omissis, alteram rubricæ partem edisseramus.

VII. Actiones igitur seu civiles, seu Prætoriz non æque heredibus, aut contra heredes competunt. Quædam enim & heredibus, & contra heredes dantur; quædam heredibus quidem accommodantur, contra heredes tamen haud competunt; quædam denique neque ab heredibus, neque contra heredes possunt institui. Quod ad primum actionum genus, heredibus quidem, & contra heredes competunt actiones generatim omnes, quæ nudam rei persequutionem continent. Si autem actio præter rei persequutionem aliud non complectatur, heredibus, & contra heredes perpetuo competet sine discrimine, ex contractu, an maleficio ea profluat. De actionibus quidem ex contractu manantibus res est expeditior. Passim enim definiunt Jurisconsulti veteres, actiones ex contractu profluentes, licet in eo adsit delictum etiam, dari in heredes in solidum *l. 49. ff. de oblig. & action. & l. 157. ff. de reg. jur.* Verum de actionibus rei persequutoriis ex delicto proficiscentibus addubitavere complusculi, utrum eas in solidum contra heredes dari oporteret, an quatenus ad eos ex defuncti delicto pervenerit. Ejusmodi sunt condictio furtiva, & rerum amotarum actio. Haud pauci post Cujacium 7. *observat.* 37. contra heredes quidem has actiones institui posse docuerunt, quatenus tamen ex delicto defuncti ad eos pervenisse dicatur. Rectius tamen statuerunt alii, actiones rei persequutorias ex delicto venientes contra heredes in solidum jus Romanum accommodare. Sane condictio furtiva, & rerum amotarum actio in heredem dari dicuntur *in l. 2. ff.*

de condict. furt. § l. 6. ff. de act. rer. amot. Atqui quoties actio dari simpliciter in heredem dicitur, in solidum ea dari censeretur debet. Si enim non datur in solidum, clausulam jurisconsulti addunt, *quatenus ad heredem pervenit*, ut sexcentis in locis est proditum. Sed argumentis haud opus. Diserte enim scribit Jurisconsultus, in conditione ex causa furtiva heredem in solidum obligari *l. 9. ff. de condict. furt.* Cum autem, auctore Paulo, ex causa rerum amotarum perinde teneatur heres, ac conditione furtiva *l. 6. §. 4. ff. de action. rer. amot.* actione rerum amotarum etiam heres in solidum conveniri potest.

VIII. Quod ad alterum actionum genus, quæ heredibus quidem, contra heredes tamen haud competunt, ejusmodi sunt actiones omnes pœnales ex maleficio §. 1. *h. t.* Cum enim eæ ex delicto defuncti profluant, non oportebat, alienum delictum in herede puniri, neque eo usque porrigi repræsentationem heredis, ut in ipso quoque delicto defunctum repræsentaret. Alias pœna ibi fuisset, ubi noxa non esset. Has ipsas tamen pœnales actiones heredibus accommodari placuit. Ita quidem adversus furem recte experitur heres actione furti, & recte de vi bonorum raptorum adversus raptorem agitur *d. §. 1. h. t.* Sed prolixior hic esse nolim, cum pœnales actiones, quæ lucro actorum cedebant olim, in Regno aut exoleverint, aut numquam receptæ fuerint.

IX. Denique quædam etiam sunt actiones, quæ neque heredibus, neque contra heredes accommodantur. Ejusmodi scribit esse Tribonianus injuriarum actionem. Ea enim non tantum adversus heredes, sed ne heredibus quidem ipsis experiri licet

licet §. 1. *h. t.* Ejus juris ratio inde repetenda, quod remisisse defunctus injuriam censeatur, quam ipsemet judicio non sit persequutus. Ceterum præter actionem injuriarum complures aliæ actiones sunt in jure prodiæ, quæ neque heredibus, neque contra heredes competunt. Ejusmodi enim actio quoque est, qua donatio revocatur ob donarii ingratitudinem *l. ult. C. de revoc. donat.* actio adversus calumniatores in quadruplum *l. 4. ff. de calumn.* Verum inofficiosi testamenti querela ad heredes quidem haud transit, contra heredes tamen potest institui *l. 8. princ. ff. de inoff. test.* At vero cum per litis contestationem quasi contractus quidam iniri, & nova obligatio judicati solvendi inter actorem, & reum contrahi videatur *l. 3. §. 11. ff. de pecul.* actiones omnes per litis contestationem judicio semel inclusæ & heredibus, & contra heredes generatim accommodantur *d. §. 1. h. t. & l. 58. ff. de oblig. & act.*

X. Denique monet Tribonianus §. 2. *h. t.* quod, si ante sententiam reus actori satisfaciat post litem contestatam, officio judicis convenis reum absolvere. Æquum enim est visum, cum audiri, qui post acceptum judicium satisfactionem offert, modo solidum offerat, quod actori debetur, & in quod alias condemnatio fieret. Id autem fieri a reo solet non solum ad præcavendos sumptus injustæ litis, sed præsertim etiam ad effugiendam infamiam famosi judicii. Complura sunt enim judicia, ex quibus damnatos infamia sequitur. Quod autem Tribonianus ait, oblata celeri satisfactione, officio judicis convenire, reum absolvere, duplicem sententiam habere potest; vel ut satis-

faciens reus scilicet a judicii molestiis dimittatur; vel ut sententia judicis absolvatur etiam. Consultius sibi reus prospiciet, si sententia judicis se absolvi curet: id enim si factum fuerit, exceptionem rei judicatæ nanciscitur, & eadem de causa frustra porro convenietur.

T I T U L U S XIII.

De exceptionibus.

CUM de actionibus hactenus commentati cum Triboniano simus, de exceptionibus porro videamus, oportet, per quas adversus actorem se reus tueri solet. Quod enim actori actio, reo præstat exceptio. Ea autem haud absurde definietur *jus reo ob æquitatem tributum se defendendi adversus actionem, quæ alioquin summo jure competeret princ. h. t. § l. 2. ff. de except.* Exceptionem *jus* appellare malui, quoniam non ipse defensionis actus eo vocabulo continetur (quid enim si quis judicio non contestetur exceptionem, uti cum ea possit?) sed potius ejus allegandæ ipsa facultas. Ut autem proprietas exceptionis intelligatur, advertendum in primis, reos judicio conventos aut inficiando, aut depellendo actionem se tueri solere. Se tuetur inficiando reus, si aut factum simpliciter neget, unde actio profisciscitur, veluti si conventus actione mutui omnino neget, mutuam pecuniam sibi aliquando datam; aut non neget quidem actori adversus se actionem aliquando fuisse, addat tamen, novo aliquo facto actionem ipso jure peremptam, veluti solutione, acceptilatione. Se tuetur actionem depellendo

lendo reus, si actionem adversus se competere rigore juris haud neget, eandem tamen ob æquitatem dicat elidi oportere. Ita sane, si quis metu promiserit, eaque de causa in jus vocetur, is actionem ex stipulatione manantem negare quidem haud debet; ei tamen præsto est metus exceptio, qua actori regerit, adversus æquitatem esse, ut quis præstare adigatur, quod metu promiserit. Ea autem defensio, qua se tuetur actionem depellendo reus, a jurisconsultis proprie exceptio dici solet. Ceteræ autem allegationes, quibus se quis tuetur inficiando, defensiones sunt quidem, non tamen exceptiones. Stet illud igitur, defensionem nomen esse generis, speciei vocabulum exceptionem esse. Verum ceteras quoque rei defensiones *exceptiones facti* pragmatici vocant, quemadmodum exceptiones veras *exceptiones juris* appellant.

II. Exceptiones autem in præsentī argumento inde dictæ videntur, quod eæ per reum oppositæ sub exceptionis modo a Prætore proponebantur in formula, qua iudices pedaneos judicare jubebat. Ita quidem si Sempronio Cajus promississet centum metu coactus, conventus a Sempronio Cajus se tuebatur exceptione metus. Interpellatus eo nomine Prætor actionem actori non denegabat: verum iudicibus judicare jussis hanc formulam præscribebat. *Judices estote, Quid, si paret, Cajum centum promississe Sempronio, Cajum in centum Sempronio damnate, SI NON, EXTRA QUAM SI DE METU LIQUEAT.* Vide Cujac. *observat.* 5. 34. & Brissou. *de formul.* 5. Inde autem facile intelliges, cur exceptio omnis *conditio* etiam in jure dicatur *l. 22. ff. de except.* In formula

enim apponebatur exceptio tamquam conditio, qua vera comperta, reus necessario absolvendus erat. Facile inde etiam ratio reddi potest, cur exceptiones in jure dicantur quoque *præscriptiones*. Ita enim sæpiusculè dixerè veteres præscriptionem doli mali, præscriptionem fori, præscriptionem rei judicatæ. Sub præscripta enim non minus actionis, quam exceptionis formula judices pedanei judicare debebant. Notionem haud abfimilem appegere Græci vocì παραγραφη, ut observat Budæus *in voce παραγραφη*.

III. Exceptiones autem adversus juris rigorem indulgeri solent, vel quia obligatio ab initio vitiosa est ob æquitatis vinculum ei deficiens, vel quia ab initio non vitiosa ob aliquod factum mox superveniens æquitatis vinculo destituatur. Utriusque generis exempla prostant in præsentì rubrica. Prioris generis sunt exceptiones, quod metus causa, de dolo, in factum, de pecunia non numerata denique. Primo igitur si quis latroni promiserit metu coactus, rigore juris obligatur is quidem; voluntas enim licet coacta, voluntas est tamen. Aliunde quod metus tempore quis pollicetur, boni rationem habet; ita enim promissor cavet majus, quod imminet fortasse, malum. Cum tamen ab initio voluntas isthæc non fuerit libera, & metu quidem extorta, ipsa promissio æquitatè deficitur. Adversus actorem igitur metus præsto erit exceptio, quo probato, exitu inutilis fiet actio §. 1. *h. t.* Verum inquires, promissorem obligare promissiones a magistratibus per metum mortis, aut carceris extortas; quidni igitur efficaciter obligetur & ille, qui metu promiserit? Id ego quidem intelligo, longe tamen inter utrumque inter-

interest. Ut enim recte observat Pufendorffius *de jur. Nat. & Gent.* 3.6.10. ut ex promissione quis efficaciter obligetur, oportet, ut acceptandi jus ille habeat, cui promittitur. Et latro quidem metum incutiens omni caret acceptandi jure. Secus de Magistratu est, qui jus acceptandæ promissionis a lege habet. Idem de eo dicendum, qui dolo, aut errore promiserit. Nam juris rigore quidem obligatur, qui dolo adversarii sit circumventus, & qui erraverit in promittendi causa. Nam in contractibus stricti juris, ut monuimus alias, ut verbis nuncupatum esset, ita jus esse jubebatur nullo discrimine, seu dolo, seu errore quis promississe diceretur *l. 36. ff. de verb. oblig.* Cum tamen iniquissimum esset, ea præstare adigi quempiam, quæ promississet aut dolo adversarii circumventus, aut errore lapsus, exceptione doli, aut in factum ex rigore juris manantem actionem elidi curavit edicto Prætor *d. §. 1. h. r. & l. 2. §. 1. ff. de dol. mal. except.* Quæ ob errorem accommodabatur exceptio, *in factum* dicebatur. Cum enim variis modis quis errare posset, error, seu factum ipsum exponendum in jure erat, ut Prætor æstimare posset, an ob errorem indulgenda foret exceptio. Aliquando tamen in factum exceptio non tantum ob errorem datur, sed ob dolum etiam. Si enim persona agat, cujus pudori parcendum sit, adversus eam, omiſſa mentione doli, in factum opponi debet exceptio, ne doli nota ei videatur inuri *l. 14. §. 16. ff. eod.* Ab initio denique vitiosa quoque est obligatio, qua quis stipulanti pecuniam promittit, quæ revera tamen a stipulatore sibi numerata non fuerit. Is quidem ob interventum stipulationis obligatur rigore juris: cum tamen æquitas ipsa non

patiatur, ob pecuniam, quam non acceperit, condemnari quempiam, is exceptione non numeratæ pecuniæ tueri se poterit. Sed de exceptione pecuniæ non numeratæ confer, quæ supra disserui *libr. 3. tit. 22.* Actum agere hic ego nolim.

IV. Atque prædictæ quidem exceptiones inde promanant, quia ab ipso initio obligationes æquitate destituuntur. Aliæ tamen, ut diximus, in jure proditæ exceptiones sunt, quæ non ob vitiosum obligationis initium, sed ob factum aliquod post obligationem superveniens indulgentur. Ejusmodi exempla tria Tribonianus affert in exceptione pacti, jurisjurandi, & rei judicatæ §. 3. 4. *U. 5. h. t.* Primo igitur si quis ab initio rite se obligarit, is quidem conventus omnino præstare debet, quod deductum in obligationem fuerit. Finge tamen, ejusmodi promissorem cum stipulatore pactum iniisse, ne, quod promissum fuerit, amplius peti liceat, is juris rigore quidem adhuc conveniri poterit. Quemadmodum enim per nuda pacta actionem acquiri noluere veteres, ita & actionem semel quæsitam non nudis pactis, sed modis a jure proditis perimi voluerunt *l. 7. U. 27. ff. de pact.* Iniquum tamen Prætori visum, adversus pacta conventa calumniam cuiquam faceffi. Proinde in præsentī specie exceptionem reo ex pacto dedit, qua quidem opposita, debitorem absolvi oportebat §. 3. *h. t.*

V. Exceptio jurisjurandi quam proxime accedit ad exceptionem pacti. Actor enim, si deferret reo juramentum, tacite cum eo pacisci videbatur, ut, si jurasset, se non debere, cum eo amplius eo nomine agi non posset. Si quis igitur centum a Sempronio peteret, & ob probationum inopiam ju-
ramen-

ramentum Sempronio detulisset, isque, conditione delata, jurasset, se nil debere, si post jusjurandum adversarius ageret, exceptione jurisjurandi repellatur. Id autem servari placuit non solum, si in personam, sed etiam si in rem actio instituta foret. Nam ille etiam, qui actione in rem conventus, petitore juramentum deferente, juraverat, exceptione jurisjurandi adjuvabatur, si eandem rem rursus vindicaret actor *l. 3. §. 1. de jurejur. C. §. 4. h. s.* Quid si adversarii perjurium revincere queat actor? Iniquum esse de perjurio quizri, definit ipse Imperator *§. 7. h. s.* Id autem inde repetendum, quia jusjurandum vim transactionis habet *l. 2. ff. de jurejur. C. l. 21. ff. de dol. mal.* Quemadmodum igitur jure civili transactio infringi nequit, ita & propter jurisjurandi conventionem audiri non debet actor, qui, jurandi copia reo facta, mox ejus perjurium arguere velit. Id tamen eo pertinet, ne causa, ob quam præstitum juramentum sit, retractetur. Ubi enim revictus fuerit de perjurio reus, perjurii poenam non potest effugere *l. 22. ff. de dol. mal.* Perjurii autem in præsentī negotio poenam invenies *in l. si duo. §. ult. ff. de jurejur.*

VI. Denique exceptio quoque rei judicatæ non ob vitiosum obligationis initium, sed ob ipsam sententiam, quæ lata fuerit, accommodatur. Comparata autem exceptio rei judicatæ est ejus tuendi gratia, qui semel sententia judicis sit absolutus. Scilicet non statim perimitur jus actoris, ubi absolutus sit judicio quispiam. Fieri enim potest, ut judex perperam judicarit. Verum si res judicatas perpetuo retractari jus esset, nullus litium finis in Civitate foret. Proinde si absolutus sit

sit reus sententia judicis, & adversus sententiam non appellarit actor, si rursus eo nomine reus conveniatur, præsto ei erit exceptio rei judicatz, qua quidem opposita, ei calumnia faceffi nequit §. 5. *h. t. et l. 6. ff. de except. rei judic.* Verum ea quidem exceptio utiliter tandem opponitur, si eadem personæ sint, idem corpus, eademve quantitas, idem jus, atque eadem causa petendi *l. 12. ff. eod.*

VII. Jam vero exceptiones non ex eodem fonte promanant omnes. Quædam enim ex legibus, quædam ex senatusconsultis, quædam ex constitutionibus Principum proficiuntur. Ita quidem ex legibus duodecim tabularum exceptio rei judicatz descendit. Ex Senatusconsultis Macedoniano, & Vellejano filiorumfamilias, & scæminarum exceptio profluit adversus creditores de pecunia filiisfamilias credita, aut ob fidejussionem mulieris. Ex Principum constitutionibus repetendæ exceptiones sunt divisionis, ordinis, & ne singulas memorem, præscriptio triginta, aut quadraginta annorum in actionibus personalibus, aut in realibus etiam ob eas res introducta, quæ ob aliquod vitium, aut privilegium præscriptione decem, aut viginti annorum præscribi nequeunt *l. 3. et 4. C. de præscript. trig. ann.* Unde unde autem exceptiones manent, earum aliæ perpetuæ, & peremptoriæ sunt, aliæ temporales, & dilatoriæ. Accurate de utrisque videndum.

VIII. Peremptoriæ, seu perpetuæ dicuntur exceptiones, quæ semel oppositæ actionem perpetuo perimunt, eademque de re amplius agi non sinunt. Proinde ejusmodi exceptiones vires principalis negotii dicuntur exhaurire *in l. 2. C. de præc. Imper. offer.*
Qua-

Quapropter pro indebito id habetur, quod si petat actor, peremptoriis exceptionibus repelli possit. De his igitur exceptionibus intelligenda juris est regula, nihil interesse, actionem quis non habeat, an per exceptionem perpetuam repelli queat *in l. 112. ff. de reg. jur.* Ejusmodi autem exceptiones plerumque quocumque lapsu temporis non intercedunt. Quamvis igitur nascantur ex causa, ex qua actio temporalis oritur, adhuc perpetuo competent. Ita quidem quamvis de dolo actio biennio finiatur, doli tamen exceptio perpetuo opponi potest. Id autem ita cautum oportuit, quia in actoris quidem potestate est, quando agere velit, in rei tamen potestate non est, pro lubitu exceptionem opponere, neque id ei licet, nisi conveniatur *l. 5. §. ult. ff. de dol. mal. except.* Proinde si reus de jure suo apud judicem pro arbitrio experiri queat, exceptiones licet perpetuæ intra definitum a jure tempus in judicio proponi debent. Cum igitur intra biennium debitor de pecunia non numerata protestari possit, exceptio non numeratæ pecuniæ frustra post biennium opponetur. Exceptionum autem peremptoriarum tria profert exempla Tribonianus *§. 9. b. r.* Ibi enim tantum memoratur exceptio doli mali, exceptio quod metus causa, exceptio denique pacti conventi, ne omnino pecunia petatur. Plura tamen exceptionum peremptoriarum in pandectis prostant exempla, veluti erroris, jurisjurandi, rei judicatæ, & sexcenta id genus alia.

IX. Exceptiones temporales, & dilatorie sunt, quæ reo profunt ad certum usque tempus. Ex, quia litem differunt, dicuntur *dilatoria*; quia litem tamen ad certum usque tempus differunt,

sem-

temporales vocantur . Ita quidem si paciscatur cum creditore debitor , ne intra quinquennium conveniatur , si , quinquennio nondum exacto , judicio molestus sit ei creditor , temporali exceptione pacti creditor ad quinquennium exactum usque removetur §. 10. *h. t.* eoque tantum exemplo Tribonianus utitur *dict.* §. 10. Verum in pandectis , & Codice complures ejusmodi exceptiones prostant . Primo enim inter temporales exceptiones referri debet præscriptio moratoria , qua Princeps quibusdam debitoribus indulget certi temporis inducias , intra quas a creditoribus conveniri nequeant *l. 2. et 4. de precib. Imper. offer.* Eodem pertinet exceptio fori declinatoria *l. ult. C. de except.* Dilatoriis etiam accenseri debent exceptiones non impleti contractus , libelli nimis generalis , aut obscuri , cedendarum actionum , aliarque quam plurimæ . Apud Romanos etiam cum criminale judicium plerumque ante civile expediri oporteret *l. 4. C. de ord. judic.* si reus actorem civili actione secum agentem de crimine accusaret , temporalem exceptionem consequeretur , neque civili judicio agi cum eo poterat , nisi prius de criminali judicio sententia lata foret . Ea tamen exceptio non obtinet in Regno hodie . Cum enim compertum Friderico foret , adversus actores sæpiusculæ accusationes criminales a reis institui , ut sententia in judicio civili differretur , cautum ab eo est , ut si factum id esset , judicium criminale simul , & civile perageretur , neque criminalis actio civili impedimento foret *const. si civiliter. de litis contestat. in crimin. vel civil. ab advers. proseq.* Quibus autem in casibus apud Romanos olim criminalis actio civili præferri jubebatur .

beretur, enarrat docte pro more suo Cujacius *observat.* 20. 25.

X. Jure Neapolitano quoque temporales quædam exceptiones sunt institutæ. Ejusmodi sunt exceptio hostici, exceptio compromissi, & judicis suspecti. Quod ad exceptionem hostici, ea Fridericum II. auctorem habet *in const. hostici. de except. host. pon.* Ea cautum, ut miles ad exercitum jam iturus quindecim ante professionem diebus, totidem post reditum conveniri nequeat. Quod ad compromissi exceptionem, ejus apud nos natales habes *in pragm. 1. de arbitr.* Cum enim compertum esset, odia litibus excitata cognatos, & affines, quos propinquitas cariores facere oportebat, insensissimos plerumque facere, cautum pragmatica prædicta fuit, ut, si qua lis coepta-
retur inter cognatos, aut affines ad quartum usque gradum, posset alteruter litigator compromissum petere, modo tamen ante termini dationem id fieret. Controversiam compromitti placuit in duos seu propinquos, seu extraneos. Ita autem electi arbitri de jure, non de facto pronunciare debent. Si tamen ita litigantibus placuerit, de facto controverso etiam per arbitros pronunciari poterit. Ibidem cautum, ut electi arbitri, si concordēs fuerint, *laudum*, seu sententiam dicant intra menses duos. Si discordēs fuerint, ultimo die, vel quodocumque ante lapsum duorum mensium, quos arbitris præstitutos diximus, tertium partibus non suspectum arbitri jubentur eligere, quicum arbitrium de re controversa ferant. Proinde coram arbitris litigantes rejicere suspectos pragmatica jubet. Si utraque, aut alterutra pars suspectos non rejecerit, arbitri quidem electi
adhuc

adhuc tertium arbitrum eligere jubentur, quicum alii duo arbitri, vel saltem alteruter, intra mensem sententiam dicant. Salarium arbitrorum per pragmaticam constitutum est quinta trigesima totius summæ controversæ. Cum tamen ea quantitas tenuior videretur, ex receptis Regni moribus in ipsa trigesima passim hodie salarium constituitur. Partem vero in salario facient, & accipient tantum arbitri, qui concordēs fuerint. Quod si intra prædictum spatium a dicenda sententia cessarint arbitri, duplum salarii ipsis præstituti in solidum singuli præstare debent. Si vero partes sententiæ dictionem urgeant, ut sententiam dicant, aliis quoque pœnis coerceri poterunt. Ad compromissum tamen pragmatica provocari vetat non solum, si de feudis sit controversia, verum etiam si pro alterutro litigante instrumenta, sententiæ, vel liquidæ obligationes proferantur, unde constet, alterum ad effugendam solvendi necessitatem ad arbitrium provocasse. Porro in *pragm. 2. eod.* post arbitrorum sententiam ad publicos judices lis deferri permittitur, qui ex iisdem actis, auditis arbitris, sententiam dicent intra mensem unum, aut ad summum alterum. Per publicos vero judices dicta sententia, adversus eam nullum gravamen afferri potest, nisi sententia exequutioni mandata jam fuerit. Denique cautum *pragm. 7. §. 3. de offic. judic.* ut nullus Magistratus seu Sacri Consilii, seu Cameræ Summarie, seu Magnæ Curie possit in quacunque lite arbitrium recipere. Si quis tamen ejusmodi Magistratum gerens singulari Principis indulgentia arbiter fuerit assumptus, quovis colore salarium non solum nequit exigere, sed & si quid

quid sponte per litigatores fuerit oblatum, id ipsum respuere debet.

XI. Quod ad exceptionem suspecti judicis, ea apud ipsos Romanos olim non fuit ignota. Veteri tamen Romanorum jure pro litigatorum arbitrio, causa qualiquali reddita, judices tamquam suspecti recusari poterant: recusationis causam adprobare non oportebat. Tantum, qui judices rejiciebat, dicto sacramento jurare adigebatur, justam sibi videri recusationis causam. Hinc frequens apud veteres formula; *ejero, quem dedisti, judicem; iniquus est, timidus est*. Vide Briffon. de formul. 5. Secus id tamen est jure novo. Cautum enim ab Justiniano fuit, ut recusationis causa per libellum judici porrigeretur, eaque adprobaretur etiam *l. ult. C. de judic.* Ne autem judicum rejiciendorum obtentu judicia diutius differerentur, ab eodem Justiniano cautum *novell. 53.* ante litem contestatam judicem recusandum esse intra viginti dies, ex quo in jus vocatio facta foret; recusato etiam judice, alterum recusari non posse, qui primum recusato suspectus esset. Vide Cujacium *observat. 9. 23.* Hoc postremum tamen in Regno non obtinet: si enim justa sublit recusationis causa, suspecti judices recusari perpetuo poterunt. Stat apud nos tamen illud, ante litem contestationem ceterarum dilatoriarum exemplo exceptionem suspecti judicis opponendam esse. Quin Rex Robertus, ne usquam esset vitiligatorum effugio locus, ne ob causas quidem post litem contestationem exortas recusationes judicum admitti jussit, nisi liquido constaret, novam suspicionis causam revera post acceptum judicium exortam esse *cap. 217.*

XII. Cau-

XII. Causæ autem, ex quibus tamquam suspecti judices recusari possunt, ex amore, vel odio adversus alterutrum litigantem proficiuntur omnes. Ab eis recensendis prudens abstineo, cum facile hauriri possint ex pragmaticis sub *tit. de susp. official.* Illud observasse præstiterit, negligentia publicorum Magistratuum eo usque jurisdictionem suam extendisse apud nos olim Episcopos, ut contenderent, de recusatatione publicorum judicum per se, aut vicarios suos cognosci oportere. Post varias in ea contentione vices occasione Episcopi Acheruntini, qui pertinaciter id cœptabat, sub Carolo V. malo obviam itum *pragm. 2. de susp. offic.* eaque cautum, ut Acheruntinus Præsul ab ejusmodi causis cognoscendis abstineret. Cum tamen prædicta pragmatica de singulari tantum causa lata videri posset, opportunius malo consultum sub Philippo II. *pragm. 3. eod.* eaque generatim cautum, ne porro in Regno Episcopi de recusatationibus publicorum judicum cognoscere molirentur.

XIII. Justæ autem suspicionis causæ scripto proponi debent, iisque ab ipso avvocato causæ subscribendum. Si advocatus subscribere recuset, suspicionibus subscribet aut dominus, aut ex mandato specialissimo procurator *pragm. 15. de susp. offic.* Suspensiones proponi debent intra dies quadraginta, ex quo libellus est reo traditus: eo termino elapso, amplius proponi nequeunt, modo ne earum causa sit omnino nova *d. pragm. 15. de susp. offic.* At vero ne ad recusandos judices temere quis profiliat, certam apud nos pecuniam ab eo deponi placuit, qui judicem recusare cœptat. Pecunia ita deposita, partim fisco, partim ipsi recusato judici adjudicatur, si suspicio injusta declarata fuerit.

Quan-

Quantitas vero depositi pro causarum diversitate aut legibus est definita, aut arbitrio judicantium definiri debet. Si causa ultra quingentos ducatos excurrat, ducatos sexaginta deponi jubet *d. pragmat. 15. §. 2. de susp. offic.* Sin incertæ quantitatis sit causa, quantum ipsius suspicionis arbitris æquum videbitur, deponi debet. Verum adversus id judicium arbitrium nullum remedium proponi potest, & si jam terminus sit datus in causa, ducatorum sexaginta depositum duplandum erit *d. pragmat. 15. §. 2.* Sed desino de his ego plura; ea enim ipso rerum usu facilius intelligentur.

XIV. Quod ad exceptionum opponendarum tempus, diversum jus fuerat olim inter exceptiones perpetuas, & temporales. In ipsis etiam perpetuis exceptionibus intererat adhuc inter judicia bonæ fidei, & stricti juris. Si in judicio bonæ fidei perpetua exceptione reus tueri se posset, non solum post litem contestatam, sed & quandocumque ante sententiam eam opponere poterat. Cum enim in judiciis bonæ fidei nullis esset adstricta vinculis religio judicantis, atque in iis ex bono, & æquo sententiam judex dicere juberetur, in iis ipso jure contineri videbatur exceptio, si perpetua foret *l. 84. §. 5. ff. de legat. 1.* Contra cum in judiciis stricti juris Prætoris formulæ judex esset adstrictus, neque inde discedere ei jus esset, in iis post litem contestatam ipsæ exceptiones perpetuæ frustra opponebantur *l. 9. C. de except.* Scilicet in judiciis stricti juris ipsi formulæ a Præto-
re inferebatur exceptio, ut supra monuimus. Ex præscripta formula jubebatur pronunciare judex. In judicio igitur post litis contestationem nulla exceptionum ratio haberi poterat, quæ ipsa formu-

la inclusæ non forent. Vide Noodt. *de form. emendand. dol. mal.* 5. Cum tamen moribus hodiernis inter judicia bonæ fidei, & stricti juris vix quicquam intersit, usu fori receptum apud nos est, ut passim in Europa alibi, ut in ipsis judiciis stricti juris post litis contestationem ante sententiam perpetuæ exceptiones possint opponi. At vero post sententiam rei judicatæ impediendæ causa exceptiones ipsæ perpetuæ frustra opponuntur. Singulare igitur illud est, quod exceptiones Senatusconsulti Macedoniani, & Vellejani etiam post sententiam opponi queant: quo quidem facto sententiæ executio impeditur *l. 11. ff. de Senatuscons. Maced.* Hic tamen non subistit doctores: complusculas enim addunt exceptiones, quas oppositas etiam post sententiam ejus executionem impedire censent. Confer Gail. *observat.* 113.

XV. Quod ad exceptiones dilatorias, eæ non solum ante litem contestatam debent opponi, sed decidi quoque *l. penult. & ult. C. de except.* Vulgo hinc tamen excipiunt dilatoriam solutionis exceptionem, quam quandocumque ante sententiam vulgo statuunt opponi posse. Ita post Bartolum interpretes pene omnes ad *l. exceptionem. C. de probat.* Id ipsum tamen admitti debet, si ea simpliciter opponatur solutionis differendæ gratia, veluti si dicat reus, pactum intercessisse, quo intra quinquennium peti nequeat. Si enim ejusmodi exceptionem opposuerit reus judicii omnino defugiendi causa, eam ante litis contestationem opponere omnino debet. Vide Gudelin. *de jur. noviss.* 4. 7. Ceterum secundum juris civilis regulas in Regno Neapolitano quoque in litis exordio, & ante contesta-

tio-

tionem dilatorias exceptiones opponi Fridericus jussit *in constit. exceptiones. de except. & dilat. propon.* Si de opposita dilatoria exceptione in continenti constare non posset, ejusque probandæ causâ dilationem postularet reus, ad ejus probationem octo ei dies indulgeri cavit, prævio juramento tamen, ejusmodi exceptionem reum dolo malo non opposuisse judicii differendi causâ. Si tamen diceretur a reo, se ex longinquis locis probationes petere oportere, ei longioris temporis inducias concedi jussit; eundem tamen in litis impensas damnari voluit, si exceptionem judici non adprobasset. Cum tamen in prædicta constitutione Fridericus juris communis vestigia sequi profiteatur, si quæ ex præscripto Romani juris dilatoriæ exceptiones post litis contestationem opponi possunt, easdem apud nos hodie post litem contestatam licebit opponere. Ita quidem dilatoria exceptio, quæ gravamen, ut ajunt, *successivum* insert, post litem contestatam opponi poterit; ejusmodi est exceptio loci non tui, vel suspecti. Idem cautum de exceptione cedendarum, quæ jure civili non tantum post litem contestatam, sed & post sententiam opponi poterit *l. 41. ff. de fidejuss.* Vide de Franch. *decis. 476. n. 2. et 662. n. 1.* Adde Gudelini. *de jur. noviss. libr. 4. c. 7.*



T I T U L U S XIV.

De replicationibus.

Replicatio haud absurde definiri queat *secunda actoris allegatio ad firmandam actionem adversus exceptionem a reo oppositam*. Ut enim actionem exceptio, ita exceptionem ipsam actoris replicatio solet elidere. Proinde ipsa replicatio exceptio dici potest, non rei quidem respectu, sed ipsius actoris. Hinc recte Paulus in *l. 22. §. 1. ff. de except. contrariam exceptionem replicationem appellat*. Probe enim is norat, per replicationem exceptionem elidi, quemadmodum alias per exceptionem ipsa actio infringi solet. Hoc ipsum autem facilius intelligetur, si advertatur, non minus reis, quam actoribus in judiciis favendum esse. Cum igitur sapiuscule fieret, ut prima fronte opposita per reum exceptio æqua videretur, penitius tamen inspecta iniqua re vera foret, denegari actori non oportebat, ut & ipse iniquam rei exceptionem per replicationem posset eludere; quemadmodum ipsi reo concessum fuerat, iniquam actionem per exceptionem infringere. Rem totam hoc exemplo Tribonianus enucleat *princ. h. t.* Pone, cum creditore pepigisse debitorem, ne a se pecuniam peti liceat; mox aliam inter utrumque pactiorem intercessisse, ut peti possit. Conventus in ea specie debitor pactum opponit de non petendo. Justa ea quidem videtur exceptio; reipsa tamen iniqua est, cum iterum convenerit, ut peti liceat. Proinde in ea specie ad retundendam iniquam rei exceptionem actori replicatio denegari non

non debet. Verum inquit fortasse quispiam, in replicationibus præsentis speciei applicandis Jurisconsultos operam suam abufos. Cum enim ipso jure per nudum pactum perimatur obligatio naturalis *l. 95. ff. de solut.* posterius pactum, quo rursus peti placuerit, ipso jure alterum tollere oportebat. Res igitur eo redire debuisset, quasi prius pactum de non petendo interpositum omnino non foret. Id tamen ipsa juris ratio facile diluit. Quemadmodum enim, non obstante priori pacto, juris subtilitate quidem adhuc competit creditori actio, ita & semel quæsitæ per prius pactum exceptio per alterum de petendo pactum non perimitur ipso jure, sed ad eam infringendam replicatione, & facto actoris opus. Ut enim jura per pactum quæsitæ pro sint, factum, & contestationem ejus desiderant, pro quo interposita fuerint. Alias inutile exitu pactum erit. Eo fortasse respicit Jurisconsultus *in pactis factum versari*, scribens *l. 27. §. 2. ff. de pact.* Verba enim isthæc indigitare videntur, pacta quidem ad liberationem prodesse nobis, factum tamen nostrum exigere, quo pactum ipsum coram judice allegetur. Sed hæc hodie frustra quærentur, cum inter pacta, & contractus ipsos nil quicquam intersit.

II. Jam vero quemadmodum ad injustam exceptionem rei infringendam replicationem instituerent veteres, ita, si ipsa replicatio actoris iniqua foret, duplicationem accommodarunt reo, qua injustam actoris replicationem eluderet. Quod si rei duplicatio & ipsa videretur iniqua, triplicationem actori dabant. Adversus actoris etiam triplicationem quadruplicatio reo concessa. Earum autem exceptionum ultro citroque numerus

pene in infinitum poterat olim excurrere, si mutæ allegationes ab actore, & reo perpetuo produci possent §. 3. *h. t.* In eandem rationem igitur deinceps nomina fingeantur, si præter quadruplicationem ultiores adhuc exceptiones litigantibus præsto essent. Ne tamen infinita isthæ exceptionum series lites implicet potius, quam explicet, ultra duplicationem hodie procedi vix solet. Quin usu fori ipsa triplicationis, aut quadruplicationis vix nota vocabula: ipsa etiam rei duplicatio vix in foro distinguitur. Reus enim, accepto judicio, producere statim solet omnia, quæ sibi expedire censuerit. Quemadmodum igitur in prima exceptione reus elisurus actionem defensiones suas allegat omnes, ita & in prima replicatione actor allegationes suas omnes adversus reum producit. Non mirum igitur, si ne ipsa duplicatio quidem frequentis sit in foro usus. Ceterum ultimam allegationem recepta fori sententia reo tribuit. Id æquitas ipsa videbatur exposcere, ne eo res rediret, ut non auditus quispiam damnaretur.

III. Redit ad exceptiones Tribonianus §. 4. *h. t.* generatim docens, exceptiones, quibus debitor uti potest, plerumque fidejussoribus etiam accommodari solere. Si enim rei principalis exceptio non prodesset fidejussori quoque, effectum juris ne ipsi quidem reo principali prodesset exceptio. Quod enim fidejussor solvit, ab ipso reo repetere mandati actione potest *l. 14. C. de fidejuss.* Quod de fidejussoribus diximus, idem de heredibus intelligendum etiam. Plerumque enim quæ exceptio reo competit, ea heredibus etiam accommodari debet. Id ipsum tamen generatim quidem haud obtinet. Complurculæ sunt enim in jure species, in quibus
exce-

exceptio reo competens heredibus, aut fidejussoribus denegatur. Proinde aliqua generali regula definiamus, oportet, quæ exceptiones ipsis tantum reis principalibus, quæ fidejussoribus etiam, & heredibus accommodari debeant.

IV. Utrum igitur exceptio reo principali competens fidejussoribus etiam, & heredibus sit accommodanda, pro diverso exceptionum genere diverse respondentum. Accurate enim distinguatur, oportet, num exceptio ipsi causæ, seu rei, an tantum personæ competat. Ipsi causæ competere dicuntur exceptiones, si ipsius negotii gesti ratione competant. Ejusmodi est exceptio rei judicatæ, jurisjurandi, doli mali, pacti conventi, Senatusconsulti Macedoniani, Vellejani, & sexcentæ id genus aliæ. Personæ competere dicuntur exceptiones, si eas certæ personæ tantum intuitu leges indulgeant. Ejusmodi erit exceptio pacti, quo convenit, ne a solo debitore petatur, exceptio competentis, præscriptio moratoria alicui concessa per Principem. His ita constitutis, generatim affirmare licet, exceptiones ipsi causæ tributas fidejussoribus etiam, & heredibus accommodari oportere *l. 19. ff. de except. et l. 32. ff. de fidejuss.* Contra exceptiones personæ competentes ultra personam ipsius debitoris extendi non debent *l. 12. ff. solus. matrim.* Hinc facile intelliges, cur definitum a Triboniano fuerit §. 4. *h. t.* competentis exceptionem, qua utitur, qui bonis cessit, ejus fidejussoribus denegari oportere. Cum enim eam ob ipsius debitoris commiserationem leges indulgeant, eodem favore fidejussores, aut heredes prosequendi non videbantur. Illud tamen hic adverti velim, læsionis exceptionem ob minorem

ætatem accommodari solitam mixtam causam complecti, eamque partim rei, partim personæ tributam videri. Ipsi quidem rei in eo tributa videtur, quia minoris etiam heredibus, quicumque ii fuerint, accommodatur *l. 6. ff. de restit. in integr.* In eo tamen ipsi tantum personæ minoris videtur indulta, quod ea uti fidejussores nequeant *l. 7. ff. de except.* Id ipsum tamen caute intelligendum. Si enim quis fidejusserit pro minori adversarii fraude circumvento, cum ob dolum generatim omnibus concedatur exceptio, ea quidem in specie ob minoris læsionem ipsis quoque fidejussoribus exceptio deneganda non erit *d. l. 7. §. 1. ff. de except.*

T I T U L U S X V.

De interdictis.

COntroversiæ aut de jure, aut de possessione institui solebant olim. Si jus affereret sibi quispiam, eam ob rem prodiæ actiones erant. Sin controversia de possessione foret, eaque vel adipiscenda, vel retinenda, vel recuperanda, reddebat interdicta Prætor, iisque, donec de proprietate pronunciatum esset, possessionem jubebat quempiam vel adipisci, vel retinere, vel recuperare. Quo quidem casu Prætor *interdictum reddere* dicebatur; qui vero possessionem ipsam petebat, *interdicere*. Sæpissime enim non solum apud alios auctores, sed in jure quoque interdicere dicitur non Prætor ipse, sed qui controversam possessionem petit. Ubi vero interpellatus de possessione Prætor interdictum dabat, certa ab initio

tio formula quid fieri jubebat, vetabatve. Ejusmodi quidem formulæ passim occurrunt *in libr. 43. ff.* quem fere totum interdicta occuparunt. Interdicta autem longe ab actionibus distabant olim. Per actiones enim non petebat actor, ut statim Prætor quid juberet, aut vetaret, sed agebat exempli gratia rem esse suam, ex locato, ex mutuo sibi deberi, atque ita judicium petebat, aut judices. Eo igitur casu ante condemnationem nil quicquam præstare reus compellebatur. Secus in interdictis erat. Per ea enim statim ab initio Prætor aliquid circa possessionem jubebat, prohibebatve. Id vero factum oportuit, ne in libera Civitate inter possessionis jurgia ad vulnera, & cædes profiliretur. Interdicto autem a Prætore reddito, si pars adversa injuste interdictum esse contenderet, ad judices pedaneos pro recepto judiciorum ritu litigantes ire juebantur, apud quos res transigebatur solitis judiciorum ambagibus *l. 1. §. 41. ff. de vi, & vi armat. & l. 15. §. 7. & sequ. ff. quod vi, aut clam.* Confer de tota re Antonium Schultingium ad Pauli *recept. sent. libr. 5. tit. 6. not. 1.* & Cujacium *observat. 5. 17.* De possessione autem coram Prætore controversia *lis vindiciarum* dicebatur, quia controversam possessionem quisque sibi vindicabat actor, & reus. Hinc Asconius Pædianus ad Ciceron. *Verr. 3. lis*, inquit, *vindiciarum est, quum litigatur de ea re apud Prætorem, cujus incertum est, quis debeat esse possessor.* Vide Heinecc. *in antiquit. Rom. libr. 4. tit. 6. §. 24.*

II. Ita quidem jus fuerat olim, quamdiu judicia ordinaria obtinuerunt, & Magistratus per se ipsi lites plerumque non dirimebant. Ex quo tamen omnia

omnia judicia extraordinaria cœperunt esse, & contra veterum morem ipsi magistratus lites per se definire sunt jussi, non solum Magistratus de controversa possessione interdicta interpoluerunt, sed, si injuste interdictum esse alteruter litigator contenderet, extra ordinem de interdicti justitia cœperunt ipsi cognoscere. Hodie igitur non in antecessum, ut olim, interdicta interponuntur a Magistratibus, sed interdictorum causæ, ut aliæ actiones, coram Magistratibus agitantur *l. 4. & 5. C. de interd. & §. ult. inst. h. r.* Hanc juris mutationem indigitaturus Tribonianus ita rubricam pandectarum inscripsit, *de interdictis, sive extraordinariis actionibus, quæ pro his competunt*. Olim scilicet ordinariæ dicebantur actiones, in quibus pro recepto judiciorum ritu judices pedanei a Prætore dabantur; extraordinariæ appellabantur actiones, si de re controversa Prætor ipse cognosceret, sententiamque ferret. Cum igitur jure novo controversias de interdictis Magistratus ipsi definiant, interdicta, ut actiones ceteræ, actiones extraordinariæ hodie censi debent. Ceterum ea quoque sententia dici hodie interdicta possunt extraordinariæ actiones, quod in iis instituendis accuratior illa causæ cognitio, & scrupulosus judiciorum ordo in aliis actionibus adhiberi solitus contemni soleat *l. 8. C. und. vi. & l. un. C. si de moment. poss.* Neque vero tantum scrupulositate ordinis, sed in aliis quoque capitibus a ceteris actionibus interdicta differunt. Primo enim actiones ceteræ tantum ob privata negotia, interdicta ob res quoque publicas instituuntur. Ita quidem interponi interdictum a Magistratu solet, ne quid in via publica fiat, quo deterior sit ejus usus; ne quid cœptetur in publi-

co flumine, quo deterius navigetur, ut passim inculcat liber 43. ff. Deinde actiones ideo instituuntur, ut res perpetuo sit penes actorem; interdictis ideo agitur, ut temporalis tantum rei possessio obtineatur. Denique, ne singula persequar, actiones vel in rem, vel in personam instituuntur; contra interdicta omnia in personam sunt actiones, licet in rem concepta sint illa, & adversus quemlibet possessorem recte quidem instituuntur l. 1. §. 3. ff. de interd.

III. Jam vero interdicta, seu de possessione controversiæ (eas *judicia possessoria* pragmatici vocant) frequentissimæ fuerunt apud Romanos olim, frequentiores adhuc sunt in Regno hodie, ut passim alibi, idque non uno nomine. Primo enim possessores rem controversam retinere pergunt, donec eam suam esse non probarit actor §. 4. *inst. h. t.* Liberantur igitur ab editione, & probatione tituli l. 11. C. de *petit. hered.* In dubio etiam pro possessoribus sententia ferri debet, cum in pari causa potior eorum conditio sit censenda l. 125. ff. de *reg. jur.* & l. 2. ff. *uti possid.* Præterea non solum fructus ex re perceptos possessores suos plerumque faciunt, sed privata quoque auctoritate sibi possessionem tueri possunt l. 1. C. *und. vi.* Hinc possessione dejecti dejicientem in continenti dejicere non prohibentur l. 17. ff. de *vi*, & *vi armat.* Horum igitur commodorum intuitu recte quidem Glossa possessores *beatos* appellat. Proinde Cajus in l. 24. ff. de *rei vindic.* actorem rem petiturum monet, ut aliquo interdicto rei controversæ possessionem sibi asserendam curet. Ubi enim actor possessionem fuerit adeptus, ea quidem haud excidet, nisi adversarius rei proprietatem ad se pertinere liquido demonstra-

strarit. In re celeberrima ipsa Jurisconsulti verba juvat hic sistere. *Qui instituit rem petere, animadvertere debet, an aliquo interdicto possit nancisci possessionem, quia longe commodius est, ipsum possidere, & adversarium ad onera petitoris compellere, quam, alio possidente, petere.* Vide Strykium in *jur. mod. pand. libr. 43. tit. 1. §. 2.* Ceterum licet nudæ possessionis causa interdicta redderentur olim, aliquando tamen ipsam proprietatis, aut quasi proprietatis causam complectebantur. Eo sane pertinent interdicta de itinere, actuque privato, de aqua quotidiana, & æstiva, de locis sacris, & religiosis *l. 11. & sequ. ff. de itin. actuque privat. & l. 1. ff. de aqu. quot. & æst.* Licet enim interdicta isthæc possessionem principali nomine persequantur, veluti per consequentiam tamen ipsam proprietatis litem definiunt. In rei enim controversæ usu per hæc interdicta præsertur ille, qui evicerit, jus, de quo agitur, ad se pertinere *l. 3. ff. de itin. actuq. privat.*

IV. Non uno autem modo dividi interdicta possunt. Prima eorum divisio a forma repetitur, qua interdicta reddebantur olim. Ea vero interdictorum divisio latissime patet, suoque ambitu comprehendit interdicta generatim omnia, seu circa res divinas, aut humanas, seu circa res privadas, aut publicas interponantur. Eo respectu igitur dividi interdicta possunt in *prohibitoria, restitutoria, & exhibitoria.* Prohibitoria sunt, quibus Prætor aliquid fieri vetat; veluti ne sine vitio possidenti vis fiat, ne in publico loco ædificetur, ne quid coëptetur in flumine publico, quo pejus navigetur §. 1. *h. t.* Restitutoria sunt, quibus Prætor aliquid restitui jubet, veluti bonorum possessori possessionem

eorum , quæ quis pro herede , aut bonorum possessore possidet ex ea hereditate , cujus alteri bonorum possessio decreta fuerit *d. §. 1. h. t.* In hoc enim argumento is pro herede possidere dicitur , qui heredem se falso jactat nullo discrimine , seu sciat , seu nesciat , hereditatem ad se non pertinere . Contra pro possessore possidere dicitur , qui excepto , quod possidet , nullam aliam causam possidendi habet *l. 11. & sequ. ff. de hered. petit.* Denique exhibitoria interdicta sunt , quibus aliquid Prætor exhiberi jubet , veluti eum , de cujus libertate agitur *d. §. 1. h. t.* Ne tamen hinc inferas , inter actionem ad exhibendum , & interdictum exhibitorium nullum interesse discrimen . Interdicta enim exhibitoria tantum in causa possessionis accommodantur ; contra actiones ad exhibendum iis accommodari solent , qui mox litigaturi de proprietate sunt *l. 1. ff. ad exhib.*

V. Altera interdictorum divisio minus late patet : tantum enim ad res privatas cujusque pertinet , ut proinde potius subdivisio quædam interdictorum videri debeat . Ea autem ab ipso interdictorum fine repetenda videtur . Cum enim omnis de possessione controversia institui inter privatos soleat vel possessionis nunc primum nanciscendæ causa , aut ejus retinendæ , aut amissæ recuperandæ denique , eo respectu quidem ita dividi interdicta possunt , ut quædam comparata sint possessionis adipiscendæ causa , quædam retinendæ , quædam recuperandæ . De singulis accurate videndum .

VI. Primo igitur possessionis nunc primum adipiscendæ causa complura interdicta sunt in jure prodita . Eo enim pertinent interdicta *quod lega-*
to.

torum, de tabulis exhibendis, de glande legenda præter alia, quæ singularibus titulis in pandectis enucleantur. Verum ejusmodi duo tantum, usus quidem frequentioris, Tribonianus exequitur in §. 3. *h. t.* interdictum scilicet *quorum bonorum*, & *Salvianum*. Quorum bonorum interdictum a verbis edicti initialibus ita nuncupatum competit heredi Prætorio, cui scilicet bonorum possessio a Præторе decreta fuerit *l. 1. ff. quor. bon.* Ex recepta tamen in foro Glossæ sententia ad *l. 1. C. eod.* ceteris quoque heredibus hoc interdictum hodie accommodari solet. Id autem interdictum ideo bonorum possessoribus accommodari placuit, ut rerum hereditariarum corporalem possessionem nancisci possent. Bonorum enim possessio a Præторе concessa non corporis quidem, sed juris erat. Proinde corporali possessioni parandæ hoc interdictum instituendum erat *l. 3. §. 1. ff. de bonor. posses.* Peti autem hoc interdictum potest non solum adversus eum, qui falso pro herede, aut possessore possidet §. 3. *h. t.* sed & adversus eos, qui dolo malo possidere desierint *l. 2. C. quor. bon.* Inter hoc autem interdictum, & petitionem hereditatis id quidem interest, quod inter judicium possessorium, & petitorium alias interesse solet. Igitur in interdicto quorum bonorum accuratior illa causæ cognitio, & rigidior illa probatio non requiritur, quas petitio hereditatis postulat. Ceterum utrumque judicium universitatem complectitur: utroque enim is tantum conveniri potest, qui pro herede, vel bonorum possessore possidet *d. l. 1. §. 1. ff. quor. bon.* Neque regeas, petitione hereditatis in eum etiam agi posse, qui vel unam rem hereditariam fortasse possidet: qui enim unam rem hereditariam pro herede possidet, sibi universita-

tem

tem asserit. Ex dictis vero facile colliges, hoc interdictum frustra postulari adversus eum, qui titulo singulari possidet, veluti pro donato, pro empto; neque enim ejusmodi possessor petitione hereditatis conveniri posset *l. 7. C. de petit. hered.*

VII. Salvianum interdictum possessionis etiam nunc primum adipiscendæ causa comparatum domino fundi accommodatur de rebus coloni, quæ ei mercedum causa obligatæ fuerint §. 3. *h. t.* Facile autem mihi persuaferim, ab initio hoc interdictum non tantum de solis coloni rebus pro mercedibus obligatis fuisse proditum, sed etiam adversus solum colonum institui potuisse. Inde fortasse factum, ut adversus tertium possessorem causam a colono habentem Salvianum interdictum utile tantum accommodari dicatur *in l. 1. princ. ff. de interd. Salvian.* Ceterum ex interpretum communi sententia latius hoc interdictum extenditur. Eo enim utiliter experiri docent creditores omnes adversus tertios possessores rerum, quæ ipsis obligatæ fuerint. Si tamen adversus tertios possessores agatur, non solum ostendi debet, res fuisse obligatas, sed fuisse etiam in bonis debitoris, quo tempore obligabantur. Confer doctores ad §. 7. *de action.* Argumento tamen *novell. 4. c. 2.* recte plerique censuerunt, principalem quoque debitorem excuti oportere, neque antea adversus tertium possessorem interdictum instituendum. Huic autem interdicto affinis est actio Serviana; ea enim, ut in tempore memoravimus, de rebus coloni pro fundi mercedibus obligatis ab initio accommodata fuit, licet mox ad alias etiam hypothecæ species fuerit extensa §. 7. *de action.* Inter interdictum autem Salvianum, & Servianam actionem id potissimum

simum interest, quod actionem Servianam instituens probare debet, rem fuisse in coloni bonis, quo tempore hypothecæ subijciebatur; qui autem hoc interdictum instituit, probare sufficiet, rem, de cujus possessione agitur, in fundum investitam, aut illatam per colonum esse. Vide Ulricum Huberum in *prælect. h. r. n. 6.* Cautius igitur creditor sibi prospicit, si, omissa Serviana, hoc interdictum instituat. Eo enim instituto, nil ultra ab eo requiritur, quam ut probet, rem in fundum illatam obligatam fuisse: contra, Serviana instituta, quæ judicii petitorii est, probare debet, rem in bonis debitoris fuisse, quo tempore primum obligabatur *l. 23. ff. de probat.*

VIII. Retinendæ possessionis gratia interdicta dicuntur institui, per quæ quis retinere postulat earum rerum possessionem, quas ipse jam possidet. Si autem res soli sint, locus erit interdicto *uti possideris* a verbis edicti initialibus ita appellato; si res sint mobiles, aut se moventes, locus patebit interdicto *utrubi l. 1. ff. uti possid. & l. un. ff. de utrub.* Interdictum autem *utrubi* ab initialibus etiam edicti verbis veteres appellarunt. Utrique est interdicto locus, si de proprietate inter aliquos mox sit litigandum. Antequam enim judicium proprietatis instituat, de possessore discerni debet. Nam quamdiu incertum de possessore est, judicium petitorium cœptari nequit: in petitorio enim alter possidere, alter petere debet *l. 62. ff. de judic.* Cum igitur fieri queat, ut duo possidere videantur propter diversos possessionis actus a pluribus fortasse usurpatos, antequam ad *petitorium* deveniatur, discernendum de possessione est. Possessionis commoda supra præcepimus: proinde
stul-

stultissimus ille erit, qui, cum retinere possessionem per interdictum possit, iudicium *petitorium* instituerit, adversario possessione relicta. Cum tamen ex ignorantia, & iusto errore id factum præsumi debeat; contra juris rigorem invaluit, ut, suspenso petitorio, ad interdictum redeundi jus esset *l. 12. §. 1. ff. de acquir. posses.*

IX. Porro in utroque hoc interdicto *uti possidetis*, & *utrubi* diversum jus fuerat olim. In interdicto enim *uti possidetis* is in possessione præferebatur, qui possidebat, quo tempore reddebatur interdictum ipsum, modo nec vi, nec clam, nec precario nactus ab adversario possessionem esset: in interdicto *utrubi* possessio ei addicebatur, qui maiore parte anni possederat *§. 4. h. r. c. l. 156. ff. de verb. signif.* Hinc diversa utriusque interdicti formula. Verba enim interdicti *uti possidetis* ad præsens tempus referebantur. Ea sic exhibet Ulpianus in *l. 1. princ. ff. uti possidet. uti eas ædes, quibus de agitur, nec vi, nec clam, nec precario alter ab altero possidetis, quominus ita possideatis, vim fieri veto.* Contra formula interdicti *utrubi* præteritum tempus respiciebat, eamque ita conceptam fuisse testatur idem Ulpianus in *l. un. ff. de utrubi. utrubi hic homo, quo de agitur, maiore parte huiusce anni fuit; quominus is eum ducat, vim fieri veto.* Ævo Justiniani tamen inter utrumque interdictum ea differentia non servabatur. Pridem enim cautum ante Justinianum fuerat, ut in utroque interdicto possessio interim addiceretur ei, qui tempore litis contestatæ neque vi, neque clam, neque precario ab adversario possideret *d. §. 4. h. r.*

X. Jure Pontificio in utroque interdicto possessio non adjudicatur ei, qui litis contestatæ tem-

pore sine vitio possidet, sed ei, qui antiquiorem possessionem suam ostendit *c. licet. X. de probat.* Et jus Pontificium quidem in Europa passim servari docent Damhouderus, Menochius, alique pragmatici. Id æquum in foro fortasse visum, quia, qui antiquiorem possessionem habent, justiore possidendi causam habere præsumi debent. Quod ad Regnum Neapolitanum, judicia hæc possessoria in frequenti sunt usu quidem; verum in possessionum controversiis definiendis non minus a jure civili, quam Pontificio recepti in Regno mores desciverunt. Plura etiam in præsentī negotio apud nos evaluerunt præter juris Romani regulas. Nimirum judicium possessorium retinendæ possessionis causa cœptari solitum dividere nostrates pragmatici vulgo solent in *summarium summarissimum, & summarium plenarium*. Summarium plenarium quidem Romanos ignorasse facile constat. In eo enim, non summatim causa cognita, ut apud Romanos olim, procedi solet, sed omnes judiciorum ambages sunt adhibendæ. Hoc igitur judicium vere ordinarium censerī debet. At ex interdicto *uti possidetis* sæpe judicium ordinarium apud Romanos nasci solitasse inquires, si quis contenderet, male interdictum esse, ac partes ad iudices pedaneos missæ forent. Id quidem haud diffiteor, ubi tamen id fieret, judicium ipsum ordinarium peragendum erat. Si igitur accurate rationes ineas, judicium de possessione summarium plenarium, seu, quod eodem redit, ordinarium contradictionem quamdam involvit. Simile enim monstro est, ut summatim, & plenarie causa cognoscatur. Proinde nugæ doctores agunt, qui hujus judicii natales in jure Romano quærunt. Judicii etiam sum-

summarii, quod *summariissimum* vocant, in jure Romano frustra quærat^{ur} origo. Egregie igitur falluntur pragmatici fere omnes, qui interdicto *uti possideris*, & *utrubi*, illud comparandum docent. In summario enim summariissimo non de qualitate quidem possessionis disceptari solet, utrum scilicet vi quis possideat, clam, aut precario, quod in interdicto *uti possideris*, & *utrubi* quæritatum vidimus: tantum in eo quæritur, quis in præsentⁱ possideat.

XI. Utcumque hæc fuerint, in controversiis retinendæ possessionis inter judicium summarium summariissimum, & summarium plenarium longe quidem apud Neapolitanos interest. Nam in summario summariissimo, summatim causa cognita, in possessione retinetur ille, qui tempore judicii instituti possidet. In possessione igitur hic decernenda non qualitas possessoris inspicitur, sed ipsa possessio. Neque enim aliud in eo requiritur, cui in summariissimo possessio addici solet, quam ut tempore instituti judicii quoquo modo possideat, etiam si vitiose possideat. Conf. Leonard. Riccium *in observat. ad Ros. c. 10. dist. 1. n. 7.* Neque vero perperam id receptum in Regno est. Cum enim, ubi de possessione inter privatos agitur, facile ad cædes, & arma res redire queat, publice visum est expedire, ei, qui possidet, temporariam possessionem adjudicari. Nam ea quidem possessio nullum adversario detrimentum allatura erat, cum mox omnia in integrum restitui in *petitorio* facile possent. In summario hoc judicio, qui possessionem sibi conservari postulat, *conservatorias* sibi expediri curat; in iis expediendis summatim procedi placuit. Per eas tamen iis præjudicium fieri ne-

quit, qui in jus eo nomine vocati non fuerint *pragm. un. de conservator*. Contra in summario plenario non statim quoquo modo possidenti possessio adjudicatur in Regno, sed accurata causæ cognitione, & solemnī ritu judiciorum agitur, eique tandem possessio decernitur, qui potius jus suum ostenderit. In eo scilicet non de possessione temporaria quæritur, verum de causa perpetua: is enim, cui possessio semel adjudicata fuerit, pro legitimo possessore habebitur, donec victus in petitorio fuerit. In eo igitur iudices non nudos possessionis actus, neque ex jure Pontificio vetustiorē possessionem inspiciunt, sed ipsam causæ iustitiam, ut in foro loquuntur, *degustare* solent. Proinde neque in summario summariissimo, neque in summario plenario jus Romanum servari constat.

XII. Interdictum *uti possidetis*, & *utrubi* solis possessoribus accommodari potest, ut vidimus. Ut igitur decerni queat, quibus hæc interdicta competant, accurate cum Triboniano videndum, quis in jure possidere dicatur, quomodo acquiratur possessio, quomodo denique acquisita amittatur. Quod ad primum igitur, is tantum in jure possidere dicitur, qui tamquam dominus possessioni incubat. Quapropter si qui rem detineant alieno nomine, neque *ψυχῇ δεσποζοντες*, ut Theophilus ait, ii in possessione quidem dicuntur esse, revera tamen haud possident. Proinde tantum in possessione sunt conductor, commodatarius, depositarius, ac generatim omnes, qui rem possident alieno nomine *l. 3. §. 30. ff. de acquir. possess.* Quapropter qui in ejusmodi possessione sunt, interdictis retinendæ possessionis, qua carent, frustra
expe-

experiuntur *l. 3. §. 8. ff. uti possid.* Modo autem quis tamquam dominus possessioni incubet, præsentibus interdictis uti non prohibetur, nec quicquam intererit, iuste, an iniuste possideat. Hinc injusto etiam possessori interdicta isthæc accommodantur, modo vi, clam, precario ab adversario ipso nactus possessionem haud fuerit *l. 1. §. 2. ff. uti possidet.* Contra cum fructuarius tamquam dominus prædium fructuarium non detineat, rigore juris inspecto, is quidem his interdictis experiri non posset. Verum benigne placuit, ut, licet fructuarius, alieno nomine in possessione foret, in interdictis tamen instituendis pro possessore haberetur. Hinc interdictum *uti possideris* ei reddi debet *l. ult. ff. uti possidet.* ac, si possessione dejectus is fuerit, interdicto unde vi uti non prohibetur *l. 3. §. 13. ff. de vi, §. vi armat.*

XIII. Cum animus possidendi pro domino possessionem comitari debeat, possessio tunc tandem acquisita videbitur, si ea corporaliter apprehendatur cum affectu rem retinendi pro sua *l. 1. §. 3. de acquir. poss.* Proinde neque solo animo, neque solo corpore possessio potest acquiri *l. 8. ff. eod.* Aliquando quidem veteres Jurisconsulti ita loquuti videntur, quasi solo animo possessio acquiri posset; ubi tamen id faciunt, non qualemqualem corporis actum excludunt, sed tantum scrupulosam illam apprehensionem, quæ manibus, aut pedibus fieri solet. Ita longa quidem manu e longinquo tradi possessio potest *l. 79. ff. de solut. & vicinum fundum mercato cuiquam si venditor e turre demonstret, vacuamque ejus possessionem dicat se tradere, non minus emptor possessionem acquisivisse videbitur, quam si pedes finibus intu-*

lisset *l. 18. §. 2. ff. de acquir. possess.* Neque regeras, solo animo possessionem retineri posse; igitur & solo animo eam nancisci jus esse. Primo enim facilius retineri, quam acquiri quid potest. Deinde semel acquisita possessio jus porro possidendi parit: ex jure semel quæsito igitur solo animo retineri possessionem jus patitur. Quapropter licet exiverit e fundo quispiam, retinetur ab eo possessio, quamdiu animus amittendæ possessionis abest *l. 6. ff. de acquir. possess.* Id autem utilitatis causa receptum oportuit, ne alias aut testudinis more se domi perpetuo continere, aut possessionem amittere cogerentur homines. At vero solo quidem animo possessio retinebitur, si liberum possessori sit, in prædium redire pro lubitu *l. 3. §. 13. ff. eod.* Proinde si quis dejectus possessione fuerit, eam statim post dejectionem amittet. Is igitur interdicto unde vi potius uti debet. Qui enim interdictum retinendæ possessionis instituit, duo is quidem probare debet, possessionem scilicet ex parte sua, turbationem ex parte alterius; si se dejectum dicat, in possessione, qua excidit, frustra retineri se postulabit.

XIV. Licet vero solo animo retineri possessio queat, nobis tamen invitis non uno modo ea potest amitti. Ita quidem dominus prædii possessionem amittit, ubi flumen illud jam occupavit *d. l. 3. §. 17. ff. eod.* Possessio etiam amissa videbitur, si prædio sint potiti prædones, eoque dominus prohibeatur accedere *l. 6. ff. de acquir. possess.* Licet etiam per alios possessio retineri possit, veluti per colonum, inquilinum, procuratorem, ea tamen statim amittitur, si in possessione relictæ dejecti vi fuerint *l. 1. §. 22. ff. und. vi.* Quod si

nostro nomine in possessione relictæ ultro inde discedant, nos voluntaria illa discessione possessionem etiam amittere post Sabinum censuit Africanus in *l. 40. §. 1. ff. de acquir. possess.* Contra Proculo visum, adhuc retineri possessionem, si in ea relictus sponte discedat, licet animum derelinquendæ possessionis is habeat *l. 31. ff. de dol. mal.* Verum, si qui nostro nomine in possessione sunt, possessionem alteri cesserint, nos possessionem statim amittere Paulus ipse non diffitetur, qui sententiam sequutus est Proculi *l. 3. §. 9 ff. de acquir. possess.* Ceterum eam veterum controversiam sustulit Justinianus in *l. ult. C. de acquir. possess.* Ibi enim generatim ab Imperatore cautum, ut possidentes alieno nomine sive dereliquerint possessionem, eamque alius occuparit, sive possessionem alteri tradiderint, nihil ex ea re damni dominis afferatur. Si igitur meo nomine in possessione relictus eam alteri prodiderit, interdicto *uti possideris* experiri non prohibebor. Sed, his omisis, interdictum recuperandæ possessionis expediamus.

XV. Interdictum recuperandæ possessioni comparatum a verbis edicti initialibus *unde vi* dicitur. Ita enim edixit Prætor: *unde tu illum vi deiecasti, aut familia tua deiecit, de eo, quæque ille tunc ibi habuit, tantummodo intra annum; post annum de eo, quod ad eum, qui vi deiecit, pervenerit, iudicium dabo l. 1. ff. de vi, & vi armat.* Hoc autem interdictum ad eos tantum pertinere videri poterat, qui de possessione fundi, vel ædium deiecerentur: ad rerum enim mobilium possessionem recipiendam vindicatio, furti, bonorumve raptorum actio sufficere videbatur *l. 1. §. 6. ff. eod.* Verum ad res etiam mobiles, quæ tempore deie-

tionis forent in prædio, hoc interdictum produci placuit: nam per vim illatam, veluti per accessionem, earum possessione quoque possessor videbatur excidere *d. l. 1. §. 6. ff. eod.* Ceterum, inspecto jure civili, rerum tantum mobilium possessionem per hoc interdictum recipere non licet. Secus tamen Pseudoisidoro placuit: is enim etiam ad res mobiles hoc interdictum extendi jussit apud Gratianum *caus. 3. quæst. 1. c. 3.* eoque jure passim in foro utimur. Cum autem ex ipso jure civili hoc interdictum accommodari placuisset ob res quoque mobiles, quas quis haberet in prædio, unde vi dejectus esse diceretur, frequentiores erant olim in foro lites, cujus æstimationis res deperditæ, aut direptæ per dejectionis occasionem essent. Ad lites igitur præcidendas cautum per Principes fuit, ut ipsi dejecto de rerum suarum æstimatione juranti fides haberetur, modo ne is juraret ultra taxationem a judice præstitutam. Recte igitur judex ante juramenti delationem ipse definiet, quem non liceat excedere jurando modum *l. 9. C. und. vi.*

XVI. Jure veteri is tandem hoc interdicto experiri poterat, qui aut e prædio dejectus esset, aut eo reversus ab ingressu prædii prohiberetur *l. 1. §. 24. ff. de vi, & vi armat.* Humanius tamen Justiniano visum, & coercendæ invasorum audaciæ opportunius, interdictum etiam adversus eos extendere, qui vacuum rei alienæ possessionem scientes occupassent *l. ult. C. und. vi.* Dejici autem quis intelligitur, non solum si ipsemet dejectus possessione sit, sed per eos etiam, qui suo nomine possident, veluti per colonum, inquilinum, hospitem. Si quis eorum igitur de-

jectus possessione fuerit, ipsi domino hoc interdictum non denegandum. Ut enim per colonum, inquilinum, hospitem ipse dominus possidere dicitur, ita, iis possessione dejectis, ipse dominus effectum juris dejectus videri debet *d. l. 1. §. 22. ff. de vi, & vi armat.* Inde tamen sæpiusculum fiebat, ut, absentibus dominis per colonos, aliosve dejectis, impune grassaretur inuasorum improbitas. Ex juris enim subtilitate ipsis colonis interdictum reddi non oportebat; contra ipsi domini propter absentiam experiri non poterant. Ne absentibus igitur ea juris subtilitas detrimento foret, cautum a Constantino fuit, ut omnibus, qui nomine absentis in possessione forent, nullo absentis expectato mandato, absentis nomine hoc interdicto experiri jus esset *l. 1. C. si per vim, vel al. mod. possess.* Ita obviam itum & absentium detrimento, & improborum audaciæ.

XVII. Hoc autem interdicto reddito, ob vis illatæ odium dejectus restituendus est statim, quod *emendationem spoliis* pragmatici dicunt *§. 6. h. t.* Qua quidem in re discrimen advertatur, oportet, inter hoc interdictum, & superius illud *uri possideris*. In interdicto enim *uri possideris* succumbit ille, qui ab adversario suo vitiose possidet, vi scilicet, clam, precario; verum in interdicto *unde vi* illi etiam restitui possessio debet, qui ab adversario suo vitiose possidet *d. §. 6. h. t.* Adeo scilicet inimica juri vis est. At vero id quidem obtinet, si quis dejectorem post aliquale temporis intervallum dejiciat. Si quis enim dejectus dejectorem in continenti dejecerit, atque ita, quod licet, vim vi repulerit, is vitiose non censendus est possidere, neque adversus eum interdictum *unde*

de vi reddi debet l. 3. §. 9. ff. de vi, & vi armat. Per ejusmodi enim dejectionem in continenti factam in pristinam causam videtur reverti possessio. Ceterum Jurisconsultorum ævo non promiscue dejectio ex intervallo facta vitiosum possessorem facere videbatur. Ita enim fortasse distinctum, ut si vi privata, & sine armis dejectorem ex intervallo quis dejecisset, sine vitio is possidere crederetur: is igitur interdicto unde vi non tenebatur. Contra si vi publica, & armis ex intervallo dejectorem quis dejecisset, vitiosus possessor is censebatur. In interdicto igitur unde vi succumbebat. Eo plerique pertinere pronunciant Pauli locum *sent. 5. 6. 7. Qui vi, aut clam, aut precario possidet, ab adversario impune dejecitur.* Impune scilicet etiam ex intervallo deijcitur, si sine armis dejiatur. Ceterum postquam Principum constitutiones eam adversus invasores statuere pœnam, ut, si dominus is rei foret, rei dominium amitteret, sin res esset aliena, rem ipsam, & pretium domino restitueret *l. 5. §. 7. C. und. vi*, sine discrimine præferri fortasse in hoc interdicto coepit, qui ex intervallo dejectus esset, seu armis, seu sine armis dejectus ab adversario foret. Hanc juris immutationem animo fortasse volvens Tribonianus hoc interdicto dejectum omnino restituendum esse scribit sine discrimine, armis, an sine armis ex intervallo dejectio facta fuerit *d. §. 6. h. t.* Id si verum sit, perperam Hotmanus observat. 7. 6. Tribonianum vellicat, quasi de interdicto *unde vi* confuse loquentem. Multo minus Paulum carpere eum oportebat, quasi non distincte rem proponentem *loc. cit.* cum præsertim nemo unus ignoret, sententias Pauli ad nos integras

gras non pervenisse, sed sæpissime decurtatas, sæpius etiam incondite congestas per Anianum. Conf. Schulting. ad *Paul. sent. n. 1.*

XVIII. At vero inuasor hoc interdicto non solum occupatam possessionem restituere compellitur, sed & fructus generatim omnes, atque omne emolumentum, quod ad dejectum redire potuisset ex prædio, si dejectus vi non fuisset *l. 1. §. 40. ff. de vi, & vi armat.* Proinde recte subdit ibidem Ulpianus, dejectum hoc interdicto tantum consequuturum, quanti sua interfit, se vi dejectum non esse. Id ipsum igitur religione judicis æstimabitur *d. l. 1. §. 41. ff. de vi, & vi armat.* Ceterum qui vi quempiam de possessione dejecerit, lege quoque Julia de vi privata, vel publica coercetur: de vi privata tenebitur, si sine armis; de vi publica, si quem armis de possessione dejecerit. Damnato autem de vi publica aqua, & igni interdicitur *l. 10. ff. de ad leg. Jul. de vi public.* De vi privata si quis damnetur, pars tertia bonorum ejus publicatur *l. 1. princ. ff. ad leg. Jul. de vi privat.*

XIX. Ultima interdictorum divisio ex ipsis litigatorum personis desumpta est. Cum enim quibusdam in interdictis uterque litigator unam personam sustineat, in quibusdam contra uterque litigator duplicem personam sustinere videatur, Tribonianus post Paulum in *l. 2. ff. de interd.* interdicta dividit in *simplicia*, & *duplicia* §. 7. *h. r.* Simplicia igitur interdicta sunt, in quibus liquido constat, quis actor, quis reus sit: contra duplicia sunt interdicta, in quibus dignosci nequit actor, & reus, & in quibus uterque litigator tam rei, quam actoris personam sustinere videtur *d. §. 7. h. r.* Id ipsum

ipsum tamen in genere definitum intellige. Si enim ad ipsam interdicti speciem devenias, interdicta duplicia in eam sententiam vix fingi possunt. In singulis enim interdictis duplicibus, qui primus ad iudicium provocarit, actor, qui provocatus fuerit, reus censi debet. Id autem in nudo litis ordine non consistit, sed in ipsa etiam ejus definitione vim suam exerit. Nam ex juris regula, eo non probante, qui ad iudicium provocavit, qui provocatus fuerit, absolvi debet. Vide doctores ad *l. 13. ff. de judic.* Simplicia autem sunt interdicta omnia restitutoria, & exhibitoria. Prohibitoria vero non ejusdem generis censi debent: ex eis enim alia simplicia sunt, duplicia alia. Ita quidem prohibitorium interdictum, ne quid fiat in flumine publico, simplex est. Qui enim desiderat, ne quid fiat, actor est; qui cœptat id facere, reus censi debet *d. §. 7. h. t.* Contra prohibitorium interdictum *uri possidetis*, & *ut rubi*, duplex est. In formula enim hujus interdicti generatim a reo actor discerni non potest. Qui enim actor in hac formula dignosci queat? *Uti possidetis*, *quominus ita possideatis*, *vim fieri veto*.

T I T U L U S XVI.

De pœna temere litigantium.

Maxime cavendum legislatori est, ne succrescant in Civitate lites. Earum enim frequentia non solum civile scœdus inter cives dissolvit, sed eorum quoque animos inter iudiciorum ambages alio avertit, eosque quidvis potius, quam
pacis

pacis artes meditari patitur . Hinc factum ejus non improbavit edicto Prætor , qui ultro rei suæ possessionem dereliquit , ne propter eam sæpius litigare compelleretur . Ea enim verecunda cogitatio ejus , qui lites execrabatur , eo comparata erat , ut præciderentur in Civitate lites *l. 4. §. 1. ff. de alienat. judic. mut. caus. fact.* Cum vero nihil præ multitudine litium infestius Civitati futurum celeberrimi philosophi pronunciarint , publice quidem expediret , ut aut nullæ inter cives controversiæ excitarentur , aut eæ excitatæ statim dirimendæ permitterentur amicorum arbitrio . Illud tamen rerum civilium ipsa conditio vix optari patiebatur ; hoc ob jurisdictionis defectum in privatis arbitris litibus finiendis vix opportunum . Id unum supererat igitur , serio cavere , ne quis temere lites cœptaret . Hoc avide sunt quidem amplexi Romani legislatores in id unice incumbentes , ne ad fori jurgia quis temere profiliret . Proinde litigantium temeritatem partim jurisjurandi religione , partim pœna pecuniaria , partim etiam infamiæ metu coercuerunt . De singulis pro instituto videndum .

II. Primo igitur juramento calumniæ litigantium temeritatem coerceri placuit . Calumniæ jusjurandum qui præstat , id jurat , sibi justam videri litigandi causam , neque vexandi adversarii gratia litem aut intendere , aut calumniæ facessendæ causa ad inficias ire . Veteri Romanorum jure nusquam præscriptum ego comperio , ut in causis generatim omnibus juramentum hoc præstaretur ; quibusdam tantum in litibus jurari id jubebatur . Receptum Paulus id memorat in judicio familiæ erciscundæ , communi di-
vi-

vidundo, finium regundorum *l. 44. §. 4. ff. famil. ercisc.* Idem calumniæ juramentum præstandum ab illis erat, qui jusjurandum alteri delaturi forent, præterquam si illud deferrent parentes, aut patroni liberis, libertisve Paul. *recept. sent. 22. C. l. 34. ff. de jurejur.* Qui denique, ne singula recenseam, novum opus nunciaret, jurare quoque compellebatur, se calumniæ causa novum opus non nunciare *l. 5. §. 14. ff. de oper. nov. nunciat.* Præter has species, aliasque sat paucas, nulla calumniæ ejerandæ necessitas. Verum Justinianus cum lites ipsas, tum calumniatores imminuendi studio non minus ab actore, & reo, quam ab ipsorum etiam patronis in causis omnibus hoc juramentum præstari jussit. Ita enim censuit a calumniosis litibus homines deterri posse, si se in judicio, tamquam in sacrario, fisti cernerent *l. 2. C. de jurejur. propt. calumn. C. §. 1. h. t.* At nescio ego quidem, num ea constitutione satisfactum voto Imperatoris fuerit, an potius calumniosis litibus scelus perjurii quoque sit additum. Sane de ætate sua testatur Baldus ad *l. si post. C. de evict.* id sacramentum oboli æstimari non solitasse, quod religionis immemores evasissent homines. Id autem referens Maranta *de ord. jud. part. 6. de juram.* facete scribit, quod ætatis suæ litigatores de calumnia potius committenda, quam cavenda jurarent. Inde factum, ut apud plerosque Europæ populos legum gloria florentes ejusmodi juramentum pridem exolverit. Vide Van-Espen. *jur. Ecclesiast. part. 3. tit. 7. c. 4.* Juramenti, quod *malitiæ* vocant, & natales suos juri Pontificio refert acceptos, fatum haud ab simile. Inter utrumque id quidem interest, quod juramentum calumniæ semel præstandum post litis con-

contestationem esset ; juramentum vero malitiæ ante , & post litis contestationem toties præstari oporteret , quoties judex id expedire putaret . Vide Damhouder. *in prax. rer. civil. cap. 151. n. 32.* Ceterum recte nostrates consuluerunt , qui in præsentī argumento exploserunt Justiniani constitutionem , qua per judices calumniæ juramentum remitti vetuit *d. l. 2. C. de jurejur. propt. calumn.* Apud nos enim calumniæ , aut malitiæ juramentum præstari perraro solet . Si tamen adversarius jurari postulet , aut lite desistendum , aut necessario jurandum ab altero erit secundum Glossæ sententiam ad *cap. 1. de juram. calumn. in 6.* In Regno igitur vix viget hodie Friderici II. constitutio sub titulo *de juram. calumn.* qua cautum , ut juramentum calumniæ actori , aut reo deferretur a judice , si exceptio , aut replicatio dolose opposita videretur .

III. Quod ad pœnas Jurisconsultorum 2vo temere litigantium infligi solitas , discrimen fuisse videtur inter lites , in quibus calumniæ juramentum præstari soleret , easque , in quibus ejusmodi sacramentum non præstabatur . Quod ad lites , in quibus de calumnia jurabatur , cum contra juramenti religionem perjurus litigator calumniosum aperte se proderet , eum calumniatorum pœnas subire oportebat . Pœna autem calumniatorum pro diversitate judiciorum diversa erat . Nam in publicis quidem judiciis calumniatores jure ordinario coercerentur , pœna scilicet , quæ lege Remmia infligi jubebatur *l. 1. §. 1. ff. ad Senatusc. Turpil.* Eam K fuisse calumniatorum frontibus inuri solitum ex Cicerone plerique colligunt *pr. Sen. Rosc. 20.* Veteres enim pro calumnia kalumniam

mniam scribere solitabant, ut norunt grammaticorum filii. In extraordinariis vero criminibus poena extra ordinem adversus calumniatores irrogabatur, ut a Paulo proditum *recept. sent. 5. 4. 11.* exilii scilicet, relegationis, aut amotionis ab ordine. Quod enim apud eundem legitur *recept. sent. 1. 5. 2.* & *in privatis, & in publicis judiciis* extra ordinem calumniosos punitos esse, is quidem locus corruptus ab Aniano fuit. Recte enim Cujacius ibi adnotat, pro publicis *extraordinariis* legi oportere, quemadmodum legitur *in l. 3. ff. ad Senatuse. Turpil.* In privatis denique judiciis, siquidem de calumnia præstitum sacramentum esset, qui temere litem coëptasset, & perjurii notam subibat, & viatica, litisque sumptus adversario sarcire compellebatur *l. 79. ff. de judic.* Quod si ejusmodi lis esset, ut in ejus contestatione de calumnia jurari non oporteret, solos litis sumptus adversario præstare jubebatur *d. l. 79. ff. de judic.* Conf. Anton. Schulting. ad *recept. Paul. sent. 1. 5. n. 3.* Licet autem Justinianus in litibus generatim omnibus calumniæ juramentum præstari jusserit, ut supra vidimus, in temeritate tamen litigantium coercenda a veteri jure vix quicquam discessit. Qui enim temere litigaret privato judicio, & litis injustæ sumptus, & damnum omne per litem temere susceptam victori illatum sarcire jussit §. 1. *h. t.*

IV. Quod ad sumptus, & damna litis ab injusto litigatore præstanda, a jure Justiniano numquam in Regno Neapolitano descitum. Cum tamen ob laxiorem temporum disciplinam saluberrimus ille rigor Romani juris in dies remitteretur, Rex Catholicus litium, ut bonum Principem decet, in Regno amputandarum studiosissimus juris
Ro.

Romani scita adversus litigantium temeritatem servari jussit *pragm.* 1738. *de ord. & form. judic.* 18. *in edit.* 1772. Ibi enim §. 1. n. 33. ad temeritatem litigantium coercendam providentissimè cautum, ut in quocumque judicio seu *ordinario*, seu *exequutivo*, quod vocant, in sumptus injustæ litis damnarentur, qui temere litigarent. Ubi autem rei judicatæ vim sententia nacta foret, & in sumptus damnatus esset temerarius litigator, eos præstari jussit secundum computationem ejus, qui scriba fuisset in causa. Adversus scribæ calculum unam dumtaxat revisionem admittendam cavit. Adversus eam quidem nullitatum remedium afferri permisit cum deposito tamen. Cum igitur jus Neapolitanum æque cum jure Romano temeritatem litigantium odio prosequatur, quamvis litis sumptus ab adversario per libellum petiti non fuerint, ex officio judex injustum litigatorem in litis sumptus damnare non prohibetur. Id enim usque adeo judici jure Romano licet, ut, si in sumptus injustæ litis victum non damnet, rem periculi sui faciat *l. 13. §. 6. C. de judic.* At vero, an lis temere suscepta fuerit, religioni judicantium æstimandum relinqui debet. Neque enim, si quis causa excidit, sine discrimine is in sumptus litis damnari debet, tamquam temerarius litigator. Sane si quis probabilem litigandi causam habuisse videatur vel ob rem obscuram, vel, quod frequentius fieri amat, ob juris incertitudinem ex discrepantium doctorum sententiis profluentem, eum ab expensarum præstatione ipse Justinianus excusari jubet *novell. 82. c. 10.* De ceteris pœnis pecuniariis in jure irrogatis adversus calumniosos litigatores vide doctores ad §. 1. *h. t.*

V. Postrema poena, qua coercentur temere litigantes, infamia est. Ea tamen, si accuratius loqui velis, ex dolo potius, quam temeritate litigatoris est repetenda. Et publico quidem iudicio damnatos infamia plerumque sequitur: verum in præsentī rubrica de infamia agitur, quæ vel ob privata delicta, vel ob dolum in quibusdam contractibus adhibitum damnatis infligitur §. 2. *h. t.* Primo igitur ob privata delicta damnati quidam ignominiosi fiunt. Infamiam irrogari tradit Tribonianus in actione furti, vi bonorum raptorum, injuriarum, de dolo *d. §. 2.* Indidem tamen aperte liquet, judicia isthæc tantum exempli gratia produxisse Tribonianum. Nam complures adhuc ex privatis delictis actiones in jure Romano sunt proditæ, quæ infamiam damnatis infligunt. Ita quidem famosum est sepulcri violati iudicium *l. 1. ff. de sepulcr. viol.* famosa est expilatæ hereditatis actio *l. 12. C. ex quib. caus. infam.* famosa quoque adversus mulierem est actio, quæ, ut possessionem bonorum ventris nomine adipiscatur, aut prægnantem se finxit, aut ex alio, quam cui ventrem addicit, concepisse arguatur *l. 15. ff. de his, qui not. infam.* At vero neque interdicta famosa sunt, quamvis ex causa delicti reddantur *l. 13. ff. und. vi*, neque condictiones ex delicto manantes, veluti condictio furtiva, & rerum amotarum actio *l. penult. ff. de condict. furt. & l. 26. ff. de act. rer. amor.* In infamia autem, quæ propter delicta isthæc infligitur, illud singulare est, quod non solum ea inuritur iis, qui sententia iudicis damnati fuerint, sed illis etiam, qui cum adversario paciscuntur. Qui enim de crimine paciscitur, illud confiteri videtur §. 2. *h. t. & l. 5. ff. de his, qui not. infam.*

V. Qui.

V. Quibusdam etiam ex contractibus bonæ fidei damnatos infamia notari placuit; modo quis suo nomine, & perfidia sua, directoque iudicio damnatus esset. Eam autem ob contractus pœnam eos tantum edicto Prætor subire iussit, qui tutelæ, mandati, depositi, aut actione pro loco damnati forent §. 2. *h. r.* Æquissimum autem Prætori visum, infamia eos notari, qui eo nomine damnati essent. Licet enim in omnibus bonæ fidei contractibus fidem violare perinde sit nefas, cum tamen in prædicta contractuum quadriga fidem sub obtentu amicitiae contrahentes fallant, deterior isthæc improbitas infamia etiam punienda fuit. In iis enim dolus admissus res duas inter mortales sanctissimas, amicitiam, & fidem, videbatur impetere. Si tamen ex his causis reus actione famosa conventus pecuniam, quanta peteretur, actori solveret, eamve, actore accipere recusante, apud acta deponeret, infamiam effugiebat *l. 73. ff. de procur.* Non mirum igitur, si ex iis causis paciscens reus infamis haud fieret, cum præsertim in iis pactio potius ob illud, quod adversarii interesset, quam ob conscientiam doli interposita videri posset *l. 7. ff. de his, qui not. infam.* Sed desino de his ego plura, cum remissa nostrorum temporum disciplina hujus ob iudicia isthæc infamiæ vix ullam rationem haberi finat.



T I T U L U S XVII.

De officio judicis.

Jure pandectarum maxime olim intererat judicis inter, & Prætoris officium. Jurisdictionem expediebat Prætor, judex nuda notione defungebatur. Magistratum publice gerebat Prætor; judex privatus in Civitate erat, & auctoritate Prætoris privatorum controversiis definiendis vel ex decuriis judicum, vel aliunde legebatur Gell. *noſt. Att.* 14. 2. Cum enim tot controversiis dirimendis per se ipse Prætor superesse non posset, jure ordinario quidem per se Prætor non judicabat, sed judicium tantum jubebat. Initia judiciorum igitur, & quæ viam controversiæ perimendæ sternerent, atque, ut verbo dicam, quæ ad jus dicentis pertinebant officium, coram ipso Prætore expediri oportebat. Jus dicentis officium ad litis contestationem usque se potissimum exerebat. Ubi coram Prætore litigantes litem contestati jam essent, interquiescebat Prætoris officium, ac dati nuda cum notione judices rem cognoscebant, sententiamque ferebant, quam ipsorum religio suaderet. Quæ igitur jurisdictionis erant, per Prætorem, quæ ex nuda notione manabant, per judicem expediri solebant. Ad Prætorem itaque pertinebat actionem dare, minores in integrum restituere, bonorum possessionem decernere, dare possessionem, judices litigantibus præstituire, judicum denique sententiam exequi: ejusmodi enim facultates a jurisdictione manabant. Contra judicis partes erant, causam ipsam accurate cognoscere, dilationes in judicio

mo-

moderari, stipulationes judiciales exigere, &, ne singula memorem, sententiam ferre denique. Hæc enim omnia ab ipsa judicum notione profluere videbantur. Ea tamen litium finiendarum ratio perpetua Romæ non fuit. Ab ipsis enim Diocletiani, & Maximiani temporibus ipsi Prætores, & Magistratus ceteri controversias suamet sententia sunt jussi dirimere, ac, si nihil intercederet, tantum in causis humilioribus pedaneos judices ex veteri ritu Magistratibus dare concessum *l. 2. C. 5. C. de pedan. judic.* Ex quo autem placuit, ipsos Magistratus controversias per se definire, vocabula judicum, & Magistratuum confundi cœperunt, ut indicat ipsa rubrica Codicis *de offic. omn. judic.* Licet autem idem sit jure novissimo judicis, & Magistratus officium, in judicibus tamen hodie duplex quoque officium distinguunt interpretes, *nobile* scilicet, & *mercenarium*. Nobile appellant, quod circa jurisdictionem; mercenarium vocant, quod circa nudam notionem versatur. De hoc postremo potissimum in præsentī rubrica judices Tribonianus admonet.

II. Primum omnium igitur illud cogitandum est judici, se legibus alligatum esse, neque cerebro-sæ æquitatis obtentu posse a jure scripto recedere. Proinde aliter judicare non debet, quam legibus, constitutionibus, moribusve sit proditum *princ. h. t.* Quod si lex in specie, de qua pronunciandum fuerit, prorsus iniqua videatur, aut meminerit judex decantatum illud, durum id quidem, sed legem ita scriptam esse *l. 12. §. 1. ff. qui, C. a quib. manum.* aut ad summum rem totam referre Principi debet, cujus tantum est, si res id flagitet, legis veniam facere *l. ult. C. de legib.* Cete-

rum si contra juris scita per judicem sententia dicta fuerit, addubitarunt interpretes, num ea prorsus sit nulla, an per appellationem sit infirmenda. Totius controversiæ definitio apprimè repetenda ex *l. 1. §. 2. ff. quæ sentent. fin. appellat. rescind.* Ita enim distinguit ibi Macer Jurisconsultus, ut, si contra leges ipsas judicetur, nullius momenti sententia sit ipso jure; sin contra jus litigatoris sententia dicatur, utilis sit ea quidem, & per appellationem rescindi debeat. Doctores ita rem totam enunciare solent: *sententia contra jus in thesi lata, nulla est; utilis est in hypothesis contra jus dicta.* Conf. Stryk. in *jur. modern. pand. libr. 42. tit. 1. §. 14.* Exemplum ex ipso Macro proferre lubet. Finge, quempiam numero liberorum a tutela se excusare; judicem autem in dicenda sententia decernere, ad excusationem a tutela filios non prodesse; ea sententia per se nulla est, quia adversus jus in thesi lata. Contra finge, numerum liberorum probasse quempiam, eumque sententia sua judicem tutelæ non eximere negando, liberorum probasse numerum, utilis quidem ea sententia sua sponte erit, quia contra jus in hypothesis lata. Sed ipsa Jurisconsulti verba juvabit hic sistere. *Cum contra sacras constitutiones judicatur, appellationis necessitas remittitur. Contra constitutiones judicatur, cum de jure constitutionis, non de jure litigatoris pronunciatur. Nam si judem volenti se ex cura muneris, vel tutelæ beneficio liberorum, vel ætatis, vel privilegii excusare, dixerit neque filios, neque ætatem, aut ullum privilegium ad muneris, vel tutelæ excusationem prodesse, de jure constituto pronunciasse intelligitur. Quod si de jure suo probantem admiserit,*
sed

sed idcirco contra eum sententiam dixerit, quod negaverit, eum de aetate sua, aut numero liberorum probasse, de jure litigatoris pronuntiassse intelligitur; quo casu appellatio necessaria est. Hinc facile intelliges, cur judicati agi possit adversus eum, qui in usuras usurarum damnatus fuerit, si justo tempore non appellarit *l. 27. ff. de re judic.* Ubi autem adversus jus litigatoris sententia lata fuerit, non solum actionem judicati parit, sed & eam, ne si velit quidem, judex immutare potest *l. 42. ff. eod.* Ejusmodi apud Romanos de sententiis latis adversus leges jus erat olim. An vero in ea re per Regni leges sit ab jure Romano descitum, infra liquebit in *excurs. de appell. c. 4.*

III. Pergit porro Tribonianus de officio suo judicem admonere, eumque variis actionum exemplis instruit, quomodo sententiam dici oporteat. Ut igitur sententia rite dicta videatur, ac vim judicati nancisci possit, aut absolvendus, aut damnandus est reus *l. 1. ff. de re judic.* Sententia rem, aut quantitatem certam complecti debet; alias effectus juris sententia dici nequit. Proinde si quis exempli gratia conventus judicio noxali fuerit, aut in certam pecuniam damni nomine, aut noxam dedere damnari debet §. 1. *h. t.* Ipsa tamen rei petita natura aliquando non patitur, ut certam rem, aut quantitatem sententia complecti possit: id potissimum usu venit in petitione hereditatis, & familiae erciscundae judicio. Quod si actione in rem, seu vindicatione sit actum, aut absolvere judex possessorem debet, aut eum jubere, rem ipsam cum fructibus, & omni causa restituere §. 2. *h. t.* Cum autem officio judicis restitutio fructuum contineatur, eorum restitutionem judex jubere potest, licet ab

actore petiti non fuerint *l. 35. §. 1. ff. de rei vindic.* Jure autem civili inter actionem in rem, & in personam tantisper interest. Si enim actione in rem actum fuerit, statim possessor eam restituere compellitur, modo ne sine frustratione modicum temporis laxamentum a possessore petatur, intra quod commode restitui res petita queat *d. §. 2. h. t.* Contra si actione in personam conventus quis fuerit, ad solutionem statim post sententiam urgeri nequit, eique pecuniæ corradendæ indulgentur quadrimestres induciæ *l. ult. C. de usur. rei judic.* Hæ tamen quadrimestres induciæ exarumissim apud nos non servantur. Quotum autem temporis laxamentum reis actione personali conventis in Regno sit indulgendum, melius pro diversis causarum adjunctis religione sua iudices æstimabunt.

IV. Judicem Tribonianus admonet *in §. 3. h. t.* quid ei facto sit opus in actione ad exhibendum. Actio ad exhibendum viam vindicationi instituendæ munit *l. 1. ff. ad exhib.* Est autem in præsentī argumento exhibere, copiam in publico rei facere experiundi causa *l. 2. ff. eod.* Actio igitur ad exhibendum veluti præparatio quædam ab eo plerumque instituitur, qui rem mobilem vindicaturus est. Ubi enim res exhibita visa, contrectata publice fuerit, eam, si suam esse constiterit, mox petit actor. Hac vero actione conventus non tantum rem ipsam, sed & eam rei causam exhibere debet, quæ petitionis tempore ei hæserit *d. §. 3. h. t.* Res ipsa exhiberi videbitur, si idem corpus eadem specie exhibeatur, qua tempore litis contestatæ fuerit *l. 9. §. 3. ff. ad exhib.* Eadem rei causa dicetur exhibita, si ejus exhibeantur accessiones, & com-

commoda, veluti foetus animalium, partus ancillarum, atque ea generatim omnia, quæ sequuta fuissent actorem, si ei litis contestatæ tempore res fuisset exhibita *d. §. 3. h. t. C. l. 31. ff. de reb. cred.* Ceterum quod de eo diximus, qui conventus vindicatione fuerit, idem ad eum etiam produci debet, adversus quem ad exhibendum actione sit actum. Si enim sine frustratione aliquod temporis laxamentum rei exhibendæ petat, ei illud indulgebit iudex, modo is caveat, se mox rem cum omni causa restitutum. Verum si neque exhibeat, neque ita caveat reus, in id, quod interest, actori damnari debet, in id omne scilicet, quod is habuisset, si res ab initio fuisset exhibita *d. §. 3. h. t.* Sed desino ea de re plura, cum actionis ad exhibendum rarior sit usus hodie.

V. Denique iudicem admonet Tribonianus §. 4. *C. 6. h. t.* quid ei facto sit opus in duplicibus judiciis familiæ erciscundæ, communi dividundo, finium regundorum. Licet enim in aliis actionibus conformis esse libello sententia debeat, illud tamen ex æquo, & bono in his judiciis dari iudici placuit, ut ab eo æquius melius divisio expediretur. Mutuas igitur præstationes litigantibus indicare non prohibetur, licet in libellum eæ deductæ non fuerint, modo eas res ipsa flagitet. Ita quidem in familiæ erciscundæ iudicio non solum res singulas singulis heredibus potest adjudicare iudex, verum etiam, si cui res adjudicata sit pretiosior, eum alteri certam pecuniæ quantitatem solvere recte compellet *d. §. 4. h. t. C. l. 52. ff. famil. ercisc.* Eo quoque nomine coheres alteri damnari poterit, quod solus fructus hereditarii fundi perceperit, aut rem hereditariam corruperit, consumpse-

ritve

ritve l. 16. & 18. ff. *cod.* Haud abfimilis facultas judicis cenferi debet in communi dividendo judicio, feu plures, feu rem unam dividi oporteat. Ita quidem fi æque fundus dividi nequeat, & alterius pars prægavare videatur, eum, cui partem majorem adjudicarit, in certam pecuniam judex alteri damnare poterit. Si vero ita res comparata fuerit, ut commodè dividi nequeat, aut omnino divisionem refpuat, eam solidam alterutri addicet; eundem vero juftam pretii partem alteri præftare jubebit d. §. 5. h. t. & l. 3. C. *commun. divid.* Denique in judicio finium regundorum quoque facultas eft aliquando judici ad mutuas præftationes eos adigere, qui ad judicium provocarunt. Eo quidem judicio de re communi dividenda non agitur. In eo enim id litigantes poftulant, ut, finibus ad normam fuam redactis, veterem fuum agrum quifque retineat l. 4. & 8. ff. *fin. regund.* Aliquando tamen res ipfa flagitat, ut res adjudicatione, & condemnatione tranfigatur. Finge enim, rectè dirigi non poffe fines propter loci naturam, aliudve quid tale, necelfe hic quidem erit, ut vicinis præcidatur jurgiorum occasio, alterius agri partem alteri adjudicari; ad fervandam tamen æqualitatem ad certæ pecuniæ folutionem alterum alteri damnari quoque §. 6. h. t. & l. 2. §. 1. ff. *fin. regund.*

VI. Judiciis autem duplicibus familiæ ercifeundæ, communi dividendo, finium regundorum id fingulare eft, quod res femel adjudicatæ ftatim poft fententiâ judicis fine traditione ei acquiruntur, cui femel adjudicatæ fuerint, licet earum traditio nulla fiat. Falluntur igitur interpretes, qui ftatuunt, per fententiâ judicis generatim alias transferri dominium. Primo enim cum his judiciis tantum

tum hunc effectum Tribonianus asserat §. 7. *h. t.* & ipse etiam Ulpianus *fragm.* 19. in aliis judiciis nuda sententia judicis dominium parari nequit. Deinde si generatim per sententiam judicis dominium acquireretur alias, actionem judicati non in personam quidem, sed in rem esse oporteret. Atqui ipsi dupondii norunt, actionem judicati in personam esse. Vide Heinecc. ad *Vinn.* §. 7. *h. t.*

Excursus I.

De ordine judiciorum, seu processu civili in Regno Neapolitano adhiberi solito.

UT mandari sententiæ executioni possint, ac nancisci vim judicati queant, præscriptas in judicando solemnitates, & receptos in causarum cognitione ritus Magistratus servare debent. Ut enim de jure litigantium melius conflaret, formam suam judicia leges habere voluerunt. Ea judiciorum forma pendet a quibusdam actibus semet præscripto ritu excipientibus: hi actus si suo ordine processerint, consurgit quidem inde judicium, cujus sententia vim judicati parit. Hos actus suo quemque loco expeditos *processum* pragmatici vocant; cum veteres *judiciorum ordinem* appellarunt. Si is neglectus in judicando foret, sententia frustra lata videbatur olim, ejusque executionem victor urgere non poterat. Eo pertinet Alexandri rescriptum in *l. 4. C. de sent. & interlocut.* *Prolatam a præside sententiam contra solitum judiciorum ordinem auctoritatem rei judicatæ non obtinere certum est.*

II. Jam vero non in omnibus quidem judiciis
scru-

scrupulosum hunc ordinem perinde servari placuit. Ita scilicet ab initio comparata judicia apud veteres erant, ut causæ quædam summatim ab ipso Prætore cognoscerentur, in quibus definiendis receptas judiciorum ambages controversiarum ipsarum ingenium negligi suadebat. Ejusmodi, ut in tempore monuimus, interdicta erant, atque ea generatim omnia, quæ longiores judiciorum moras pati non posse videbantur. Contra de aliis plerisque causis per se ipse non cognoscebat Prætor, sed eas pedaneis judicibus definiendas delegabat. Hi autem in delegatis controversiis definiendis a præscriptis judiciorum ambagibus, & recepto in judiciis ordine recedere impune non poterant. Ubi judicis, & Prætoris confusa sunt munia, & vocabula, & per ipsos Magistratus causæ omnes definiri coeptæ, publice visum est expedire, vetus judiciorum retineri discrimen. Causæ, de quibus ipse olim summatim cognoscebat Prætor, sine scrupulosis judiciorum ambagibus summatim adhuc sunt definitæ. De controversiis pedaneis judicibus delegari solitis subtiliori judiciorum ordine ex veteri ritu pronunciatum. Ita evaluit in Regno Neapolitano, ut passim alibi, judicii divisio in *summarium*, & *ordinarium*. In hoc receptus judiciorum ordo examissim servari debet; in illo negliguntur pleræque judiciorum ambages. Quapropter operæ pretium facturi videbimur, si partes potiores ordinis in judiciis ordinariis adhiberi soliti, veluti digito demonstrato ad fontes, hic enarremus. Ne tamen prolixior fiat hic Ajax, potiora tantum hic sistam, quæ aut jure Romano novissimo, aut patriis Regni legibus de præsentī argumento sunt definita. Neque regeat mihi quispiam, me tironibus Neapo-

politianis scribentem hunc laborem frustra cœptare, cum *pragmat. 1. de ordin. judic.* sit cautum, ut in Regno procedatur *sine figura judicii, facti veritate inspecta*. Cum enim statim ibi subdatur, ne per eam legem derogatum censeatur juris, constitutionum, & capitulorum Regni præscripto, facile inde constat, scrupulosis quidem formularum verbis apud nos litigantes solutos esse, non vero recepto judiciorum ordine, quem ipsorum litigatorum utilitas servari postulat. Potiores autem judicii partes sunt in jus vocatio, litis contestatio, in causa cognoscenda probationes, sententia ipsa denique. Sit igitur

C A P U T I.

De vocatione in jus.

PRimum omnium, ut judicium recte procedat, ubi per libellum aditus Magistratus ab actore fuerit, reus in jus vocari debet. Vocatio enim in jus judicii primus est actus §. *ult. inst. de pœn. tem. litig.* Hunc actum *citationem* pragmatici passim appellant; sat inepte tamen: ad judicem enim citari dixere veteres non tantum reum, sed testes etiam, & actorem ipsum. Ita autem ab initio receptum jus Romæ fuerat, ut ipsi actori privatim reum in jus vocare facultas esset. Quod si e vestigio in jus vocantem reus non sequeretur actorem, ab eo auctoritate privata obtorto collo in jus rapi poterat. Cum igitur per vocationem in jus privatim factam injuria quædam reo videretur inferri, edicto cautum a Prætore fuit, ne quis sine ipsius venia in jus vocaret parentes, aliove, quibus æquum

quum cum parentibus honorem haberi oporteret *l. 4. ff. de in jus voc.* Emollitis tamen Romanorum moribus, ea in jus vocandi ratio asperior posteritati visa. Ita cum reo modestius agi coeptum. Prævio igitur Magistratus jussu, quod apud nos hodie fieri solet, reo per viatorem futuram litem denunciari placuit *l. 5. ff. de judic.* Verum ex vetusta consuetudine in Regno Neapolitano obtinebat olim, ut vocationis edictum ipsi actori traderetur; eo autem exhibito, ab ipso actore juberetur in jus ire reus. Id ipsum tamen injurium Friderico visum. Proinde is cavet, ut edicta isthæc reo patefierent vel per tertium honestum hominem, aut certe per aliquem actoris nuncium *const. edictorum. de lit. citat.* Per eam tamen Friderici constitutionem non omnis omnino injuria a reo videbatur arceri. Quapropter in Regno publicos viatores auctoritate Magistratuum adprobatos constitui placuit, per quos in jus vocationes publice expedirentur *pragm. 2. de ord. judic.* Ibi autem additum, ut duo testes subscriberent, in jus vocatum reum per viatorem esse; si literati testes haberi non possent, per ipsum viatorem testium nomina in relatione apponerentur. Verum advertit Rovitus, testium subscriptionem ex recepta consuetudine non requiri ad *d. pragm. 2. de ord. jud.* Idem Rovitus admonet, in vocationibus in jus factis per Sacri Consilii viatores (*porteros* vulgo eos appellant) ita jus esse, ut ipsis in jus quempiam vocasse referentibus credi oporteat, licet testes non fuerint adhibiti ad *pragm. 2. de citat. n. 16.* Verum ex recepta consuetudine viatoribus omnibus intra hanc principem Regni Urbem aliquem in jus vocasse nunciantibus fides ha-

haberi solet. Quod si extra Urbem in jus vocatio expediatur, necessario adhibendi sunt testes. Igitur si accurate rationes ineas, prædicta *pragm. 2. de ordin. judic.* ad citationes in solis Provinciis expeditas coerceri debet.

II. Veteri Romanorum jure, ubi vocatus in jus quis esset, eique edita jam foret actio, plerumque in diem perendinum se judicio sisti promittebat. Inde factum comperendinationi nomen, per quam actor, & reus coram judice se sistebant. Verum Justiniani ævo post vocationem decem dies reo præstituebantur; iis exactis tandem, judicio cum sisti oportebat. Decendii hujus inducias placuit indulgeri reo, ut interea secum æstimaret, num liti cedere, an judicio cum actore contendere sibi expediret. Hunc decem dierum numerum reo duplicari jussit Justinianus. Igitur jure novissimo post vocationem reo viginti dierum conceduntur induciæ. Iis transactis, judicio is sisti debet *novell.*

53. c. 3. In Regno tamen nullum temporis spatium est præstitutum, intra quod in jus vocatus reus se sistere debeat. Id igitur apud nos remittitur arbitrio judicis. Illud tamen apud nos differte cautum, ne dies vocationis in spatio computetur, intra quod reus sui copiam jussus est facere *rit. 219.* Ita quidem si quis intra dies sedecim se sistere jussus fuerit, in sedecim termino dierum dies vocationis non numeratur. Irritam etiam haberi placuit in jus vocationem, si die feriata reo denunciaretur *rit. 116.* Vocatio autem a Magistratu subscripta intra legitimum tempus reo denunciari debet; alias eam *circumduci* pragmatici ajunt, eamque eo nomine inutilem esse jubet *rit. 219.* Ad eum scribit Tapia *de jur. Regn. libr.*

3. rubr.

3. *rubr. 9.* in Civitate intra mensem, extra Civitatem intra menses duos vocationem nunciari oportere, si de *tenore instrumenti* agatur; alias eam circumduci; in aliis judiciis intra sex menses sine circumductionis periculo vocationem in jus nunciari posse. Tapiz quidem sententiam firmare videtur ritus 122. verum ex receptis moribus hodie cujuscumque temporis lapsu in jus vocationes a Magistratu semel decretæ *circumductioni* non subsunt. Ad fraudes tamen præcavendas cautum a Rege Catholico *pragm. 1738. §. 1. n. 8.* ut *provisiones*, quas vocant, in Neapolitanis tribunalibus expeditæ, & in Audientiis, aut Regni Curiis exequendæ circumducerentur, nisi intra mensis spatium nunciatæ forent. Ceterum ut rite in jus vocatus reus apud Romanos videretur olim, ipsam actionis nomen aut voce, aut libello ei edi oportebat, ut recte statuit Gudelinus *de jur. noviss. libr. 4. c. 5.* Verum apud nos hodie, ut passim alibi, nomen actionis impune potest omitti. Recte enim vocatus in jus reus censetur, si ex ipsa facti in libello narratione actio possit intelligi ob receptam juris Pontificii æquitatem in c. *dilecti. X. de judic.*

III. Jam vero ex quacumque causa in jus vocatus quis fuerit, ad Magistratum venire cum oportet. Si cui fori sit privilegium, is adhuc se sistere debet, ut hoc ipsum dignosci possit *l. 2. ff. si quis in jus vocat. non ier.* Quod si quis se non sistat nulla justa causa distentus, plura sunt prodita in jure remedia, quibus ejus contumacia coerceri queat. Primo enim contumax ad Magistratum trahi potest invitus *novell. 53. c. 4.* Multa etiam auctoritate judicis adversus contumacem ir-

rogari potest. Verum frequentissimum olim remedium adversus contumaces erat, ut in possessionem bonorum contumacis mitteretur actor, eaque veluti pignoris causa detineret, donec tædio affectus reus se sisteret *l. 2. ff. quib. ex caus. in posses. eat.* Et olim quidem possessio bonorum omnium decernebatur actori; verum jure novissimo possessio decerni jubetur pro modo debiti *d. novell. 53. c. 4.* Quod si in rem instituta sit actio, in solius rei petitiæ possessionem ex jure veteri missio decerni debet *l. 7. §. 17. ff. ex quib. caus. in posses. eat.* Ubi autem possessio ita decreta fuerit, eam non recipere reus, nisi & se judicio sistat, & expensas omnes actori sarciat *d. novell. 53. c. 4.* At vero in actione in rem si pergat in contumacia reus esse, vera possessio, & omnia possessionis commoda transferuntur in petitem, quæstione tantum proprietatis relicta reo *l. 2. C. ubi in rem act.* Eam autem quæstionem ultra annum reus differre non debet *l. 8. §. 3. C. de præscript. trig. vel quadrag. ann.* Quod si lite jam contestata judicio reus absit, eo licet absente, causæ cognitio expediri potest, atque ipsa sententia definitiva ferri *l. properandum. C. de judic.* Ea tamen in specie, si res ita suaserit, etiam secundum absentem sententia dici poterit *l. 73. princ. ff. de judic.* Antequam tamen absente reo, causa peragatur, is tribus edictis evocari debet *d. l. properandum. C. eod.* Licet judici tamen hunc edictorum numerum moderari, ac duobus, aut uno uti pro tribus, modo unum hoc sit peremptorium, & comminationem contineat, absente etiam reo, causam peractum iri *l. nonnumquam. ff. eod.*

IV. In reorum contumacia coercenda per Re-

Tom. IV.

O

gni

gni leges vix descitum a jure Romano. Cautum enim in Regno est *pragm. 3. de ord. judic.* ut, triduo post incusationem contumaciæ elapso, pro lubitu actoris vel possessio bonorum ex primo decreto, quo possessionem bonorum rei nanciscatur actor, vel termini ad probandum datio peti possit. Si possessionem petere maluerit actor, pro modo debiti possessionem obtinebit. Post decretam possessionem reus tantum intra tres menses contumaciam purgare poterit, modo expensarum damnum actori farciat *d. pragm. 3. de ord. judic.* Quod si ultra tres menses ab interposito primo decreto pergat contumax reus esse, si, secundum decretum petente actore, is judicio se non sistat intra terminum a judice præstitutum, incusata contumacia, secundum etiam decretum interponendum erit. Si ab interposito secundo decreto reus intra mensem copiam sui non fecerit, rei per secundum decretum possessæ dominus per adjudicationem actor constitui poterit. Res tamen ita adjudicanda prius per tabularios æstimari debet, ut pro modo debiti adjudicatio fiat *pragm. 4. de ord. judic.* Quid si in contumaciam incidat ipse actor, & intra terminum reo præstitutum se judicio ipse non sistat? Eo quidem casu audiendus actor porro non esset, nisi impensas reo solvat, & judicio sisti cautionem præstet. Verum remissa fori disciplina hæc fervari vix patitur, ac nullo cum actorum incommodo, in præsentī specie apud nos eadem actiones exerceri solent. In aliis, quæ adversus actorem contumacem veteribus placuerunt, jus Romanum in Regno hodie viget. Jure civili autem, absente quidem actore, primo se absolvi judicio permittitur postulare reo *l. 6. post. ff. de judic.*

judic. Deinde, si reus ita maluerit, petere is quoque potest, ut causa cognita de lite pronuncietur. Verum antequam sententia definitiva feratur, & edictis actor evocari debet, & ante anni moras de causa pronunciari non potest *novell.*

112. Ceterum quæcumque de contumacia, atque eremodicio litigatorum disserui, sic intelligenda moneo, ut iusta absentiae excusatio admittatur, idque non minus jure Romano, quam patriis Regni legibus præscriptum constat *l. contumacia. C. l. quæsitum. ff. de re judic. prag. 3. C. 4. de ord. judic.*

V. At vero, in jus vocatione rite peracta, plures eam sequuntur effectus. Primo enim per eam causa controversa ad ejus judicis jurisdictionem pertinere incipit, cujus jussu in jus vocatus quis fuerit. In jus autem vocatione expedita, licet reus ad alterius forum pertinere cœperit, quasi præventus tamen privilegio novi fori se tueri nequit *l. 7. ff. de judic.* Deinde per vocationem in jus veluti usurpatum it actor, & præscriptionem, quam fortasse metuit, interrumpit *l. 3. C. de præscript. trig. vel quadrag. ann.* Licet autem ex *l. properandum. C. de judic.* intra triennium post actionem institutam de controversia pronunciari debeat, & lapsu triennii in jus vocatio cum libello, seu *instantia* perimatur, apud nos tamen is legis rigor facile eludi potest *per insuflationem spiritus*, quæ facultas est Sacri Consilii. Nam per insuflationem spiritus libellus, seu instantia per lapsum triennii jam perempta novam veluti vitam censetur acquirere. Ex dictis hætenus facile constat, per vocationem in jus *litis pendentiam* induci, quam vocant. Veteri quidem

dem Romanorum jure litis pendentia per contestationem tandem inducebatur *l. 15. ff. rem rat. dom. habit.* Primus Justinianus *novell. 112. c. 1.* discrimen fieri jussit inter actiones in rem, & in personam; in his jus vetus servari cavit, in illis per solam in jus vocationem litis pendentiam nasci voluit. Verum ulterius processit Clemens V. *Clem. 2. ut lit. pend. nihil innov.* Ibi enim cautum, ut in actionibus generatim omnibus per simplicem in jus vocationem litis pendentia induceretur. Lex isthæc Pontificia apud omnes plerosque populos æquitate sua se commendavit. Ita consuetudo apud Neapolitanos evaluit, ut, per vocationem in jus, lite veluti coepta, quæcumque actio sit instituta, res litigiosa videri debeat, neque de ea quidpiam innovari possit, antequam per sententiam judicis controversia definita fuerit.

C A P U T II.

De litis contestatione.

PER in jus vocationem futurum tantum judicium reo denunciatur; per litis vero contestationem judicium re vera incipit. Quomodo jure veteri litis contestatio peracta fuerit, in tanta literarum luce liquido non constat adhuc. Eam vocabulum mutuam esse a formula *testes estote* a litigatoribus, coram Prætoribus adhiberi solita, auctor Festus est in *voc. contestari*. Sic enim ibi Grammaticus. *Contestari litem dicuntur duo, vel plures adversarii, quod ordinato judicio utraque pars dicere solet, TESTES ESTOTE.* Vero igitur haud absimile videri queat, veteri Romanorum jure

jure litis contestationem fieri solitasse, ubi vadium sistenti reo coram Prætoribus edita jam foret actio. In ea autem expedienda litigatores testes antestabantur, qui perpetuo testari possent, sub certa formula iudices judicare iussos, certisque sponsonibus litigatores se mutuo provocasse. Ita enim receptum jus Romæ fuerat, ut ante litis contestationem in jure actor, & reus certæ pecuniæ sponsonem se mutuo provocarent, quæ expedito iudicio victori cederet. Vide Rævard. *protribun. c. 10. & sequ.* Litis autem contestatione peracta, quamdiu judicia ordinaria obtinuerunt olim, litigatores ad iudices pedaneos mittebantur, qui causam cognoscerent, sententiamque ferrent. Conf. Noodt. *de jurisdict. & imper. 1. 15.* Hinc facile rationem reddes, cur litis contestatio iudicii fundamentum dicitur soleat, & ab ipsa iudicium dicatur incipere in *l. un. C. de lit. contest.*

II. Porro ubi veteres iudiciorum formulæ exolverunt, litis contestatio per narrationem actoris, & rei contradictionem expediri coepit. Hinc rescribunt Imperatores in *l. unic. C. de lit. contest.* litem contestatam videri, ubi ex narratione actoris, & contradictione rei audire causam Magistratus occipit. Ita enim iudex facile intelligit, quo cognitio omnis referri debeat, & quis sit causæ status, ut Rhetores loqui amant. Neque vero quælibet rei contradictio litis contestationem inducit. Si enim ipsum principale negotium ea non attingat, neque circa ipsam principalem causam versetur conflictus partium, lis contestata videri non debet. *l. rem non novam. C. de judic.* Ut autem reo ad deliberandum aliquod temporis laxamentum esset, ante viginti dies, ex quo in jus vocatus is esset,

ad litis contestationem deveniri vetuit Justinianus *novell. 53. c. 3.* Inde desumpta est *authent. offeratur. C. de lit. contest.* Verum ne longiores moræ judiciorum essent, ab eodem Imperatore cautum, ut præstaretur ab actore cautio, se vel intra duos menses litem contestaturum, vel reo convento omne damnum illatum restitutum iri *novell. 96. c. 1.* unde *authent. libellum. C. cod.* At immensa causarum vis in Regno Neapolitano saluberrima isthæc Justiniani consilia servari non patitur. In Regno autem eo jure utimur, ut lis contestata videatur, ubi *terminus ab probandum* per judicem partibus præstitutus fuerit Car. Anton. de Ros. *in civil. decret. prax. c. 2. n. 4.* Ejus vero termini spatium jure patrio ita definitum fuit, ut, si testes degerent intra viginti a principe Urbe lapides, quindecim dierum esset; si longius abessent testes, pro singulis dietis præter quindecim quinque alii dies dati censerentur. Quæquæ tamen testium foret absentia, non ultra tres menses terminum extendi placuit *pragm. 7. de ord. judic.* Verum in Regno hodie termini spatium pendet ab arbitrio judicis. Quod si de causis agatur, ubi litis contestatio fieri non solet, primus actus, quo cognoscere incipit de causa judex, apud nos locum contestationis habet Carleval. *de judic. disput. 2. t. 2. n. 8.*

III. Termino ad probandum jam præstituto, positiones quædam a litigatoribus per scripturam proponi solent, ut aut alteruter, aut uterque litigator eximatur a quarundam, aut omnium etiam probationum onere. Positionum usus, utpote litibus cito dirimendis opportunissimus, Neapolitanis legibus seu ex jure Pontificio, seu civili potius est adoptatus. Apud nos autem, ut
pas-

passim in Europa alibi, per positiones rogatus adversarius eis omnino respondere debet seu ajendo, seu negando, quod positum ab altero fuerit. Ex præscripto etiam juris Neapolitani ritu solemni verbo *credo*, aut *non credo* positionibus litigator respondere compellitur. Si secus faxit, & quoquo modo respondere renuat, pro ea positione, cui respondere renuerit, habetur loco confessi. Quod si quis ita rogatus factum proprium dolo malo negarit, neque intra triduum bonam mentem induat, pro arbitrio judicis coercetur. Hæc, aliaque sollicitè cauta in *pragm. 8. de ord. judic.* Si positionibus responderi oporteret, patronorum quoque consilium adhibere concessit Fridericus II. eo tamen addito, ut juratos ad respondendum judex litigatores adigeret, si suspicio foret, falso quempiam responsurum esse *const. partes. de interrog. litigat. a judic.* Procuratorum tamen, patronorumve consilium a litigatoribus adhiberi vetat ritus 79. Opportunius id quidem ad verum exculpandum videtur esse: veritas enim longe facilius a litigantibus exprimitur, si dolus malus, & jurisconsultus absit. Ceterum etiam per procuratorum operam positionibus jus nostrum responderi patitur, si ad respondendum speciale mandatum acceperint *rit. 70.* Ad lites vero citius dirimendas placuit Regi Catholico, ut intra decem dies, ex quo ab adversario petatum id foret, ipse per se litigator respondere compelleretur, si præsens is esset; si is abesset a loco judicii, positionibus responderi jussit per procuratorem in *actis*, licet ei non esset *mandatum specialissimum ad sic, aut sic respondendum pragm. 1738. §. 1. n. 22.* Ibidem cautum, ut positionibus litigator cum ante, tum

post litem contestatam , & in quacunque parte judicii respondere compelli posset. Cum vero apud nos hodie sublatus sit actus ille , qui *conclusio causæ* dicebatur *d. pragm. §. 1. n. 28.* in Regni tribunalibus hodie ad sententiæ monitionem usque de positionibus interrogari litigatores poterunt . Verum desino ea de re plura , cum ob perfidiam litigatorum auctam raro in judiciis ordinandis hodie ad positiones deveniri soleat , ut rerum periti norunt .

IV. Interpretes plerique omnes positionum in judiciis usum repetunt ex jure Romano sub rubrica pandectarum *de interrogat. in jure faciend.* Eam vero sententiam late tuetur Boehmerus *in jur. Eccles. prorest. libr. 2. tit. 5. §. 7. & sequ.* Interrogationes tamen in judiciis apud Romanos olim adhiberi solitæ non unius generis erant . Quædam enim interrogationes ante litem contestatam interponi solebant pro acquirenda actione , quæ antea non competeret . Inde interrogatoriæ actiones enascebantur , de quibus vide Rævardum *protrib. c. 5. & Rosin. libr. 9. c. 13.* Ejusmodi tamen actiones ætate Callistrati jam exoleverant , ut constat ex *l. 1. §. 1. ff. de interrog. in jure faciend.* licet non poenitenda mihi visa sit semper Fabri conjectura existimantis, in ea lege Triboniani emblemata cubare . Is enim cum videret, Justiniani ævo interrogatorias actiones exolevisse , ita ibi Callistratum loquentem inducit, quasi ætate sua ejusmodi actiones per consuetudinem explosæ jam forent . Vid. Fabr. *in ration. ad d. l. §. 1.* Quædam interrogationes quoque non pro actione quærenda , sed pro judicio rectius ordinando proponebantur . Eæ apud Romanos nunquam explosæ , & ipso jure novissimo usur-

furpari jubentur, ut passim constat ex *d. tit. ff. de interrog. in jur. faciend.* Hæ quidem interrogationes ad nostri ævi positiones proxime accedunt. Quemadmodum enim apud nos positiones ea de causa potissimum sunt inventæ, ut minuantur probationum incommoda, ita interrogationes prodidit olim edicto Prætor, ut facilius quid probari posset *l. 2. C. 3. ff. eod.* Ita sane si quis legatum ex testamento peteret, cum quidem probare oportebat, hereditatem ab adversario fuisse aditam. Difficillimum tamen probatu erat, hereditatem adiisse quempiam. Ea enim vel factio quoque adiri poterat *l. 20. ff. de acquir. vel omitt. hered.* Atqui facta omnia ambigua plerumque sunt, ut proinde diversas pati interpretationes queant. Opportunum igitur Prætori visum, ipsos in judicio reos interrogari, ut vel confitendo, vel negando semet onerarent *l. 4. ff. de interrogat. in jur. faciend.* Proinde ejusmodi interrogationes non minus in actionibus in personam, quam in rem quoque fieri consueverunt. Vide Stryk. *in jur. modern. pandect. libr. 11. tit. 1. §. 12. C. sequ.* Ex dictis autem fat, puto, liquet, positionum in judiciis usum potius ex jure civili, quam Pontificio repeti oportere. Inficias tamen ego non ierim, Pontificum præsertim opera earum usum restitutum esse. In Europa autem eæ videntur increbuisse post rescriptum Innocentii III. *in c. 6. X. de juram. calum.*

V. Litis contestatio quoque complures effectus in jure parit. Primo enim, cum, lite jam contestata, de jure suo statim incipiat dubitare reus, litis contestatio malam fidem inducit *l. 25. §. 7. ff. de heredit. perit.* Deinde cum per litis contestationem possessio civiliter interrumpatur, per

per eam veluti usurpatum it actor, & usucapionem, præscriptionemve adversarii interruptit *l. 10. C. de præscript. long. tempor.* Sequens igitur post contestationem possessio cum priori jam interrupta conjungi non potest *l. 1. §. 1. ff. pro empt.* Id ipsum tamen impedimento non est, quominus porro possidendo præscriptio adversus alios a judicio quidem absentes possit induci. Vide Gregor. Tholof. *syntagm. 20. 12. 3.* Inde autem facile intelliges, cur per possessorem post litem contestatam fructus acquiri desinant, atque inde incipiant victori deberi *l. 15. §. 7. ff. de heredit. petis.* Præterea litis contestatio temporarias actiones perpetuas facit. Actiones igitur, quæ triginta annorum circumscriptæ sunt spatio, si semel contestatæ quândocumque fuerint omissæ, possunt ad annos usque quadraginta post contestationem repeti *l. ult. C. de præscript. trig. vel quadrag. ann.* Rursus litis contestatio non tantum litigatores in eodem judicio retinet, sed eos etiam in conjuncto retinet. Id eo pertinet, ut coram eodem iudice actorem mutæ petitioni reddat obnoxium, &, ut verbo pragmaticorum utar, a reo actor reconveniri possit *l. 14. C. de sentent. & interlocut.* Denique, ne singula persequar, per litis contestationem novatio quædam, & quasi contractus iniri videtur inter actorem, & reum *l. 11. §. 1. ff. de novat.* Vide Noodt. *de jurisdict. & imper. 1. 15.* Hinc facile intelliges, cur actiones morte rei perimi solitæ, ubi cum reo contestatæ jam fuerint, transmittantur etiam adversus heredes.

C A P U T III.

De probationibus in causæ cognitione adhiberi solitis.

Ubi per positiones per ipsius confessionem expressa veritas a reo non fuerit, ab actore probationes aliunde cœptandæ. Eæ autem testibus, aut scripturis potissimum peragendæ. Ne frustra tamen tempus teratur, quod per positiones primo constiterit, de eo nullæ probationes instituuntur: suscipienda probatio tantum eorum est, quæ reus inficiatur. Idcirco ad ea probanda, quæ adversarius inficiatus fuerit, propositiones quædam conflare solent, quas *articulos* pragmatici vocant, ex quorum probatione causarum fata plerumque pendent. Actori generatim incumbit probatio eorum, quæ ipse asseruerit *l. frustra actor. C. de probat.* Si quid tamen excipiendo reus asseverarit, & ipse illud probare debet. Recepta enim juris est regula, affirmantem probare oportere seu reum, seu actorem *l. 2. C. de probat.* Per rerum enim naturam nulla directa probatio potest ab eo fieri, qui factum inficiatur. Si tamen affirmans pro se præsumptionem alleget, adversarius ipse, nisi damnari velit, contrarium debet ostendere. Est autem præsumptio ratio quædam probabilis, propter quam, quod asseritur, verum existimari debeat. Præsumptio dicta sic fuit, quasi præsumpta quædam opinio, ita, ut asseritur, fieri solere; perraro contra. Non omnium tamen præsumptionum vis eadem. Eas vulgo distinguunt interpretes in *præsumptiones juris, præsumptiones juris,*

¶ *De jure, ac præsumptiones hominis.* Præsumptionem juris doctores appellant indicium aliquod ab ipsa lege probatum, quod veluti normam oporteat in judicando esse, nisi contrarium ostendatur. Ita quidem possessio præsumptionem inducit, dominum possessorem esse. Possessori igitur lis debet addici, nisi contrarium probarit actor. Ita etiam cum jus præsumat, sub spe proximæ numerationis chirographum a debitore creditori plerumque tradi, reus conventus intra biennium ex proprio chirographo absolvi debet, nisi ostensum a creditore fuerit, revera pecuniam numeratam esse *l. si ex cautione. C. de non numer. pecun.* Præsumptio juris, & de jure dicitur indicium aliquod adeo firmum, ut nulla in contrarium probatio audiri debeat. Ita quidem rem judicatam veram jus præsumat, & adversus ejusmodi præsumptionem probationes afferri vetat *tot. tit. ff. de re judic.* Præsumptio denique hominis, seu judicis, est opinio quædam ex aliqua conjectura manans. *Hominis* ea dicitur, quia non ab ipsa lege probatur, sed eam ipse sibi judex ex conjecturis efformat. Ita quidem si prope cadaver cum cruento gladio deprehensus sit quispiam, statim præsumat judex, ab eo cædem patratam esse. Cum incertæ sua sponte conjecturæ sint, postrema isthæc præsumptio minimi roboris haberi debet, eique haud multum deferendum. Recte igitur Damhouderus judices admonet, ne ob nudas ejusmodi præsumptiones ad sententias definitivas temere prosiliant *prax. rer. civil. c. 178.*

II. In controversiis autem dirimendis ad probationes ex testibus repetitas sæpissime deveniri solet. Interpretes plerique omnes a dicendo testimo-

nio

nio infamēs generatim arcant. Nusquam id tamen in jure proditum. Quin licet publico calumniæ judicio damnatos infamia notarit edicto Prætor *l. 1. ff. de his, qui norant. infam.* eosdem tamen nulla lege testimonium dicere prohiberi scribit Papinianus in *l. quæsitum. ff. de testib.* At monet jurisconsultus, inquires, in teste producto explorari oportere, honestusne sit, & inculpatus, an vero notatus, & rephensibilis *l. 3. princ. ff. eod.* Id quidem haud inficior; id ipsum tamen haud evincit, a dicendo testimonio infames prorsus arcendos esse. Inde potius inferri licet, minus fidei notatis infamia, quam honestis hominibus accommodari oportere: qua ratione monet ibidem Callistratus, minus plebejo homini, quam in dignitate constituto credendum. Scribit ibi quidem Jurisconsultus §. 5. quosdam propter infamiam ad testimonij fidem admittendos non esse, res ipsa tamen suadet, non qualemqualem infamiam a dicendo testimonio quemquam arcere, sed eam tantum, quæ in lege Julia de vi designabatur. In ea re igitur nil certi quidpiam definiri potest, & potius religioni judicis æstimandum relinqui debet, quanta fides habenda sit testibus *d. l. 3. §. 1. ff. de testib.*

III. Porro duo testes fidem generatim faciunt *l. ubi numerus. ff. de testib.* Si quibus in negotiis tamen plures testes leges interrogari jubeant, res probata non intelligetur, nisi præscriptus testium numerus fuerit adhibitus. Ita quidem ex Justiniani constitutione ut probet debitor, se solvisse pecuniam ex chirographo debitam, quinque testium fides requiritur, qui sint *idonei*, & *summæ*, atque *integræ opinionis* *l. 18. C. de testib.* Sapienter id ab imperatore cautum, ne quis redemptos testes ad
pro-

probendam solutionem produceret. Generatim etiam testes ipsi fortuiti ad rem probandam produci possunt: verum si quibus in negotiis rogatos testes jus adhiberi jubeat, ad ea probanda fortuiti testes frustra producentur. Ita quidem tantum rogati testes fidem testamenti faciunt *l. heredes palam. ff. qui testam. fac. poss.* Scripto etiam debitor obligatus tantum per rogatos testes fidem facere solutionis potest *novell. 90. c. 2. & sequ.* Sed & generatim non temere fides testibus adhiberi debet, qui fortuito, & veluti transeuntes adfuerint, si negotii non levis facienda sit fides, ut recte statuit Gudelinus *de jur. noviss. libr. 4. c. 10.* Testes autem vel inviti in judicium venire compelluntur; sumptus tamen itineris, & dierum, quibus a solitis laboribus cessare coguntur, a litigatore, qui eos producit, ipsis rependi debent *l. 3. ff. de testib.*

IV. Jam vero testes ab eo iudice sunt interrogandi, coram quo instituta lis fuerit *d. l. 3. ff. de testib.* Id & in quolibet Regni foro servatur hodie. Si tamen res agatur in Sacro Consilio, jure ordinario testes per *examinatores* rite probatos interrogari debent *pragm. 15. de testib.* *Examinatorum* numerus ibidem intra quadraginta coercitus, licet hodie sit longe minor. Ceterum si qui inter *examinatores* litigatoribus sint suspecti, pro lubitu rejici possunt, antequam ad ipsorum electionem processum fuerit. Sed recte etiam monet Caravita ad *rit. 147.* post ipsam electionem recte *examinatorem* rejici, si post electionem suspicionis causa fuerit exorta. Ita quidem recte rejicitur *examinator*, si post ipsius electionem affinitatis vinculo junctus adversario fuerit. Ad interrogandos autem testes ille censetur electus, qui, omnium
no-

nominibus in urnam coniectis, fortuito inde fuerit desumptus. Jure civili autem adversario præsente testes interrogari debent *l. si quando. C. l. judices. C. de testib.* Verum in omnibus Europæ tribunalibus inolevit, ut remotis partibus testes interrogentur. Id factum tamen ob male intellectam Zenonis constitutionem *in l. 14. C. eod.* Ibi enim *secretarium* non locus est, ubi secreto testes audiuntur, sed locus, in quo judices causarum cognitioni vacant, ut docet Hefychius *in voc. σερρητον*, & Suida *in voc. στυλη*. Cum tamen ipsorum litigatorum interfit, ut testimonium testes jurati dicant, citari saltem litigatores debent, ut judicio adsint inspecturi juramenta testium. Si adversarius vocatus non fuerit ad videnda testium juramenta, testimonia vitiosa censentur Tapia *de jur. Regn. libr. 3. rubr. 27. ad rit. 154.* Ipsi etiam testes citari debent, ne affectati, & ultro in judicium venisse arguantur. Quod tamen ad testium citationem, viatoribus curiæ credi debet. Vid. Petr. *ad rit. 178.* At vero ne lites longius producantur, in judiciis ordinariis testes ultra quadraginta, aut, si ita judici videatur, ultra quinquaginta interrogari nequeunt *pragm. 51. de offic. Sac. Reg. Consil.* In singulis tamen articulis ultra septem audiri non debent. Decem audire licet, si de antiquis finibus controversia sit instituta *pragm. 1. de test. refran.*

V. Testibus rite rogatis, postquam terminus probationibus præstitutus fuerit elapsus, ipso jure *in causa publicatio*, quam vocant, facta censetur *pragm. 11. de ord. judicior.* Cautum ibidem tamen, ut, si intra quatuor dies post exactum termini spatium justas causas litigator alleget, cur publicatio facta censi non debeat, secun-

cundum jus dicentis religionem publicatio retardetur : Ita quidem si *examinator* testes rogatum profectus nondum regressus in Urbem fuerit , iustissima ea quidem causa videri debet , cur in causa publicatio producat . Hæc autem in causa publicatio apud nos fuit inducta , ut totius *processus* copia litigatoribus fiat . Ex ejus enim inspectione facilius constare posse videbatur , si quid vitii , aut calumniæ in eo fuerit admissum . Licet autem in *d. pragm. 11. de ord. judic.* octo dierum spatium ad *processum* inspiciendum præstituitur , ea tamen dilatio arbitrio judicis passim hodie produci solet .

VI. Post publicationem in causa *repulsa* , quam vocant , utrique litigatori competit . Ea appellata inde fuit , quod in ejus termino ab adversario producti testes repellere possint vel quia inimici , vel quia aliunde testimonium dicere prohibentur , ut proinde ipsorum dictis denegari fidem oporteat . Licet autem in *d. pragm.* certum tempus definiatur , intra quod sit *repulsa* petenda , in foro tamen eo jure utimur , ut , si dolus absit , ad monitionem usque *repulsa* peti non prohibeatur . Vide Rovit. ad *d. pragm. 11. de ord. judic.* *Repulsa* autem isthæc solas testium personas respicit , idque advocatorum fraude prope neglectum servari iussit Rex Catholicus discrete cavens , ne novi rerum articuli in *repulsa* consilari possent *pragm. 1738. §. 1. n. 25.* Ibidem cautum , ne *repulsam repulsæ* , quam vocant , litibus producendis quam maxime comparatam porro indulgeri jus esset . Hodie igitur in ipso *repulsæ* termino per adversarium infringi debet , si quid litigator in *repulsa* adversus testes attulerit . Plura ibidem cavet Princeps providen-

videntissimus, ne in longum. causæ prōtraherentur. Ibi enim sublatus *terminus secundi beneficii* personis, aut locis privilegiatis concedi solitus; ademptus terminus, qui *ad impugnandum*, & *concomitandum* appellabatur; sublatus actus *ad publicandum*, *ad concludendum*, & ipsa quoque *causæ conclusio*, quam vocant *d. §. 1. n. 26. & sequ.* Hodie igitur, cum conclusionis actus a nostris iudiciis exulet, quidquid causæ prodesse queat, ad monitionem usque sine periculo allegari potest.

VII. Non solum ex testibus, sed ex scripturis etiam sæpissime in iudiciis probationes desumi solent. Majorem auctoritatem litibus dirimendis habent scripturæ publicæ. Publicarum scripturarum vocabulo hic intellige non eas tantum, quas publice constituti tabelliones rite conficiunt, sed & eas generatim omnes, quæ actis publicis continentur. Ejusmodi sunt, quæcumque in iudicio confectæ fuerint, & in eum locum translata, in quo publice asservari solent; quascumque etiam privatim scriptas apud Magistratus professus quis fuerit, iisque auctoribus, publicis tabulariis sint commendatæ *l. in hac. C. de donat.* Earum autem scripturarum tanta vis est, ut ipsarum fides ne testibus quidem possit elidi *l. census. ff. de probat.* Ceterum privatis quoque scripturis, ubi veræ compertæ fuerint, sua constat auctoritas. Licet enim privatæ adnotationes scriptori non prosint *l. exemplo. C. de probat.* cuique tamen sua scriptio nocet, eaque fidem quoque facit adversus heredes. Ita quidem si quis in testamento affirmarit sui patrimonii modum, ea defuncti affirmatio heredibus nocere debet. Generatim tamen Justinianus defunctorum in testamento declarationes heredibus

tantum, non vero creditoribus nocere jussit *novell.* 48.

VIII. Opportune hic illud addubitari queat, an in *semplena* probatione, quam vocant, ei, qui *semplene* probavit, juramentum *suppletorium* iudex deferre possit, eique, si pro se jurarit, *litem* addicere. Jure Pontificio quidem per iudicem id fieri potest *c. fin. X. de juram.* Communis quoque doctorum sententia est, ejusmodi juramentum jure civili non improbari. Rectius tamen cum Duarenno statues *annivers. disput. c. 3.* *suppletorium* hoc juramentum in jure civili nullum præsidium invenire. Primo enim *semplenam* probationem, cui hoc juramentum accedere oporteat, jus Romanum prorsus ignorat. Argumentum autem, quo *semplenam* probationem firmabat Accursius, merito Cujacius deridiculo habet ad *c. licet universis. X. de testib.* Neque enim dividua probatio est, neque, quia plena probatio occurrit in jure, *semplena* inde probatio inferri potest: alias & *semplenum* testamentum admitti oporteret, quia testamentum in jure plenum, & perfectum sexcenties appellatur. Sæpiusculæ etiam in jure definitur, unius testis nullam rationem haberi oportere *l. 9. §. 1. C. de testib.* Atqui *semplenam* probationem unius testis fide vulgo constare docent. Eo accedit, quod neminem in causa propria idoneum testem jus civile censet *l. 10. ff. de testib.* Atqui si in *semplena* probatione ad juramentum *suppletorium* confugere jus esset, per iudicem jurare jussus effectu juris in causa propria testis constitui videretur. Recte igitur Antonius Faber hoc juramentum veluti interpretum, & pragmaticorum errorem explodit *Cod. libr. 4. tit. 1. de fin. 1. nos. 5.*

Rem

Rem totam feliciter peroravit Heineccius in *exercit. de lubricis. juram. supplet.* Stet illud igitur, neque civili, neque municipali jure hoc juramentum usquam præscriptum esse. Proinde hodierna fori praxis rectius instituta in plenæ probationis defectu ad illud deveniri non patitur.

C A P U T U L T I M U M.

De sententiis, earumque executione.

Veteri Regni jure sententiis præmittendus in judicio erat actus ille, qui *causæ conclusio* dicebatur; ubi in causa rite conclusum esset, testes amplius produci non poterant *pragm. 14. de ord. judic.* Ejusmodi quidem actum ignorarunt Romani veteres, ei tamen haud absimile fuisse crediderim monitum judicis, quo litigantes interrogabantur ante sententiam, *numquid novi addere desiderarent?* Ejus ritus diserte meminit Constantinus in *l. 9. C. de judic.* Constat etiam, Justiniani ævo ad sententiam dicendam procedere judices non potuisse, nisi utraque pars ulterioribus allegationibus renunciasset. Id ipsum igitur per causæ conclusionem, quamdiu obtinuit, apud nos fieri videbatur olim. Ceterum jure civili cum ad sententiam procedi non posset, nisi utraque pars ulterioribus allegationibus renunciasset, occasionem inde desumebant vitiligatores prolixius protelandi lites. Fraudi igitur obviam ab Justiniano itum *novell. 115. c. 2.* Si enim alteruter litigator ulterioribus allegationibus renunciare nollet obtendens, adhuc sibi esse, quod produci oporteret, mensem unum, & alterum præstitui ei jussit ad ea producenda, quæ

causæ usui forent . Si eo elapso spatio moras is adhuc neceret , mensem tertium ei indulgeri voluit . Tertio hoc mense tandem exacto , sine longiori mora sententiam a iudice pronunciari iussit . Sed desino de his ego plura . Ea in judiciis enim hodie arbitrium iudicis moderari solet . Ceterum cum conclusionis actu ad lites potius protrahendas litigantes abuterentur , sublatus is fuit a Rege Catholico , ut supra monui . In Regno igitur hodie , neglecta conclusione , post actum , qui *monitio ad sententiam* dicitur , ad ipsam sententiam recta proceditur *pragm.* 1738. §. 1. n. 28. At vero monitio isthæc sine iudicii vitio omitti nequit . Ea enim omissa , præcluderetur via litigantibus allegandi , quod causæ prodesse posset .

II. Veteri Romanorum jure in dubiis juris articulis referre ad Principem Magistratus solebant , ut ab ejus numine judicandi formam acciperent : passim id liquet ex rubrica C. *de relation.* Cum vero ex Magistratum relatione causarum fata penderent , cautum per Principes fuit , ut antequam ea deferretur ad Principem , relationis exemplum litigatoribus ederetur . Ea enim per partes inspecta , facile refutari , aut emendari posse videbatur *l. 2. C. 3. C. eod.* Licet autem consuetudo isthæc pluribus Justiniani novellis comprobata fuerit , cum comperisset tamen Imperator , relationum obtentu plerumque produci lites , earum usum prorsus abolere iussit *novell.* 125. Verum novella isthæc in Europa hodie videtur explosa . Certe apud nos non servatur , cum frequenter in Regno Magistratus in dubiis legum interpretationibus ad Principem referre soleant . Ubi autem quid relatum Principi fuerit , res iudicibus integra esse definit , atque

que ante rescriptum Principis ad sententiam deveniri nequit. Ceterum si ambigua juris interpretatio relationem ad Principem non suadeat, ubi causa cognita rite fuerit, sententia dici debet. Ne qua autem controversia de sententia ipsa coepsetur, eive pro arbitrio iudex mox addat, aut demat, sapienter cavere Principes, ut sententiæ scriberentur, ac de scripto partibus recitarentur *l. 1. C. de sequ. C. de sentent. ex brevicul. recit.* Solemne etiam sententiarum est, ut ministerio ipsorum iudicum recitentur *d. l. 1. C. de sentent. ex brevicul. recit.* Illustribus tantum iudicibus concedi placuit, ut per suos administratos sententias pronunciare possent. Ita quidem Præfecto Prætorio per officia sua sententias recitare permissum *l. 2. C. eod.* Verum hodie solemnitas isthæc a iudiciis exulat, & ubique fere Gentium per scribas, actorumve magistratos sententiæ recitari solent. Illud apud nos Sacri Consilii singulare est, ut sententias in eo latas recitari non oporteat. Statim enim, ubi prolatae fuerint, pro *lectis latis* habentur, ut pragmatici loqui amant. Eæ igitur ipso jure litigantibus patefactæ censentur. Proinde post fatales *reclamationis* dies ob sententias in Sacro Consilio latas *mandatum de parendo* adversus victos expediri solet, idque vel armata manu executioni mandari poterit *pragm. 5. de offic. Sacr. Reg. Consil.*

III. Quod ad sententias executioni mandandas jus ipsum Romanum hodie in Regno viget. Primo igitur peti executio rei judicatae debet super rebus mobilibus, deinde super rebus soli, denique super nominibus debitorum *l. 15. §. 2. C. 8. ff. de re judic.* Cum vero vitiligatorum artibus invaluisse, ut mandata pro executione expedita

debitores eluderent aut obtentu litis pendentis, aut alterius causæ coram altero iudice agitandæ, cautum in Regno est *pragm. 81. §. 14. de offic. Sacr. Reg. Conf.* ne mandatorum exequutionem impediri jus esset eas ob causas, quæ in dicta pragmatica memorantur. Cum tamen facile fraudes fieri possint, si rei iudicatæ exequendæ gratia mandata expediri solita longo post tempore exequutioni mandentur, in Regno Neapolitano ex recepta consuetudine eo jure utimur, ut *litteris exequutorialibus* intra annum quidem, ex quo expeditæ fuerint, libere creditor uti possit; verum post anni lapsum earum exequutio peti nequeat, nisi in iudicium vocato reo. Eo tandem audito, si nil productum fuerit, cur impedienda sit exequutio, *exequutoriales* iudex exequutioni mandabit.

IV. Jam vero si in rebus exequutio peracta fuerit, eæ jussu iudicis divendi sub hasta debent, ut ex redacta pecunia creditoribus satisfieri possit. Ante venditionem tamen *mandatum*, quod ad *re-luendum* appellant, nunciari debitori debet, ut intra certum tempus luendi pignoris ei sit copia. Si post lapsum præstituti temporis, oblata pecunia, res suas non luat debitor, ad venditionem pro modo debiti devenietur. Si emptor non inveniatur, iudicati exequendi causa res debitoris creditori possunt adjudicari *d. l. 15. §. 3. ff. de re judic.* Verum ut adjudicatio recte fiat, in inferioribus quidem tribunalibus per *peritos*; in Sacro Consilio per tabularium per sortem electum æstimari res debent. Si iusto plus minus res æstimatæ dicantur, *Primario*, quem vocant, revisio deferretur. Si a revisione Primarii alterutra pars reclamavit, duobus adhuc tabulariis per sortem electis

Etis etiam nova revisio committi debet. Post eorum æstimationem partes ultra non audiuntur, ac melius sibi consulent, si se porro inani sumtu non vexent.

Excursus II.

De appellatione, aliisque remediis adversus sententias.

C A P U T I.

De appellatione.

Licet in Civitate maximam rerum judicatarum oporteat auctoritatem esse, easque ipsa societatis ratio exequutioni mandari suadeat, ad corrigendam tamen judicantium seu imperitiam, seu iniquitatem apud omnes fere Gentes legum gloria florentes constitutum est appellationis perfugium. Quamvis enim periculum aliquando foret, ne sententias recte latas appellatio reformaret in pejus, neque melius pronunciaret semper, qui novissimus judicaturus esset, re tamen utrimque pensata, institutum appellationum visum est opportunius, ubi ipso rerum usu compertum, plus inde commodi plerumque sequi. Quapropter, cum graviter ferrent nonnulli iudices, appellationis auxilio subinde suas retractari sententias, & carcerem, aliasve contumelias appellantibus minarentur, recte vetuit Constantinus, ne ob libellos appellatorios ipsis oblatos cujuslibet injuriæ genus cuiquam inferrent *l. 2. C. Theod. de appell. & pæn. car.* Verum enimvero ut aliquis tandem

litium esset in Civitate finis, neu quod ad innocentium remedium repertum esset, calumniolos fieret effugium, serio consultum oportuit, ne perpetua series appellationum ingrueret. In appellationibus autem coercendis diversæ Gentes diversis usæ sunt institutis. Rex quidem Gothorum Athalaricus in eadem causa appellari secundo vetuit; si quis appellationem iterare auderet, eum damno litis multari iussit Cassiodor. *g. var. 18.* Verum Romani veteres alteri quoque iudicio non omnino confisi secundam victis appellationem concedi voluerunt. Cujacius quidem inferebat ex *l. un. C. Theodos. de possess. ab eo, qui bis provoc. transfer.* veteri Romanorum jure bis appellari prohibitum, docte tamen eum refellit Jacobus Gothofredus ad *d. l. un. C. Theod.* Primus Theodosius Magnus secundæ appellationis licentiam tantisper imminuit. Si enim possessor secundo appellasset, secundæ appellationis pendente iudicio, eum possessione carere iussit *d. l. un. C. Theod. de possess. ab eo, qui bis provoc. transfer.* Jus tamen vetus restituit Justinianus, neque ullum damnum eos subire voluit, qui iterum appellarent. Hodie igitur in eadem causa iterum appellare licet, ac tantum tertiæ appellationis facultas adimitur *l. unic. C. ne lic. in un. eademqu. caus. tert. provoc.* At vero per appellationes juris publici forma inverti non debet. Id eo pertinet, ne præpostera sit appellatio, neu, quod ajunt, *per saltum* fiat. Proinde apud Romanos olim si quis recta ad Principem appellasset, ad Præsidem redire jubebatur *l. 21. princ. ff. de appellat.* Romæ igitur a iudice a Prætore dato Prætor appellandus erat; a Prætore Præfectus Urbi *l. 17. C. deod.* In Provinciis a sententiis Duum-

viro.

virorum Præsidem; a Præside Principem, aut Præfectum Prætorio appellari oportebat *l. 19. C. cod.* Inde igitur argumento deducto, in Regno Neapolitano a Regiis Audientiis ad Magnam Curiam, a Magna Curia ad Sacrum Consilium appellari solet. Appellationes tamen ad Curias Baronales, & ad ipsas Regias Audientias interpositæ in duabus appellationibus a jure concessis jure Neapolitano non computantur.

II. Jam vero ne lites diutius perennarent, appellationi interponendæ, introducendæ, proseguendæ certa tempora sunt præstituta. Ea *fatalia* sunt appellata, quia, si servata non forent, appellationem perimerent, eique veluti fatum afferrent. Quod igitur ad appellationis interponendæ tempus, olim quidem intererat inter causam propriam, & alienam, quam scilicet alieno nomine tutor, curator, procurator ageret. Interponendæ appellationi in causa propria biduum, in aliena triduum præfinitum erat *l. 1. ff. quand. appell. sit, & intr. qu. temp.* Verum sine causarum discrimine Justinianus intra decem dies a latæ sententiæ scientia appellationem interponi jussit *novell. 23.* Hi quidem fatales appellationi interponendæ dies adhuc in Regno Neapolitano vigent. Idem Justinianus, modo ne legibus vetaretur, appellationem recipi jussit *novell. 82. c. 12. & sequ.* Veteri tamen Romanorum jure appellator vehementer, & sæpius libellos dimissorios, seu apostolos petere cogeatur, quibus testabatur judex appellatum esse *l. un. ff. de libell. dimiss.*

III. Quod ad appellationis introducendæ tempus, jure veteri pro locorum diversitate diversum id fuit. Confer Huberum lib *11. ff. quand. appell.*

appell. Ceterum Justinianus intra triginta dies, ex quo interposita foret appellatio, iudices, a quibus appellatum esset, acta litis cum relatione sua ad superiores Magistratus transmittere iussit *novell. 126. c. 3.* Si appellator id fieri negligeret, appellationem haberi pro deserta voluit. Apostolorum in appellationibus usum, & per actorum transmissionem intra certa tempora appellationis introducendæ necessitatem jus etiam Patrium confirmavit *const. appellationum tempora. de appellat.* Transmittendis actis quinquaginta dies ibi præscribuntur, si appelletur ad Principem; sin ad alios Magistratus, tempus, intra quod oporteat acta transmitti, ab ipsis Magistratibus definiri jubetur, modo ne ii ultra dies quinquaginta præstintuant. Verum apostolorum usus pridem in Regno exolevit. Proinde ob nudum temporis lapsum appellatio deserta apud nos hodie non censetur, nisi appellator, petente adversario, & Magistratum jussu prævio, constituatur in mora. Quin cum in Sacro Consilio, tum in Magna Curia ob æquitatem invaluit, ut, quodcumque tempus fuerit elapsum, si acta jam transmissa reperiantur, ex iisdem actis appellationis causa definiatur, licet pars adversa petat, ut appellatio deserta declaretur. Vide de *Ros. prax. civil. part. 2. c. 1. n. 14.*

IV. Quod ad appellationis expediendæ tempus, in eam rem veteri Romanorum jure biennium olim præstitutum erat *l. ult. §. 2. C. de tempor. appellat.* Verum jure novissimo intra annum appellationis iudicium expediri debet: si tamen vel iudex, vel alia iusta causa impedimento fuerit, alter annus appellationis peragendo iudicio indulgetur *novell. 49. c. 1. unde authent. ei, qui. C. cod.* Si ulte-

ulterius res protrahatur , appellatio pro deserta habetur , & prior sententia exequutioni mandatur . Ceterum novissima Justiniani lege id quoque cautum , ut , intra biennium appellatore causam negligente prosequi , dum adhuc mensis ex biennio superest , adversario postulante , sententia in appellationis causa feratur *d. novell. 49. c. 1.* Ne cujus contumacia tamen impunis esset , in sumptus litis appellatorem damnari jussit Justinianus , licet secundum eum sententia dicta foret . Verum perraro fieri solet apud nos hodie , ut ob anni , vel biennii lapsum deserta appellatio declaratur . Primo enim tanta vis litium quotidie magis ingruens intra præstituta tempora appellationum causas expediri non patitur . Deinde tot muneribus Magistratus apud nos distinentur , ut litibus suo tempore dirimendis superesse vix possint . Atqui , ut ipsemet Justinianus testatur *in l. ult. C. de tempor. appellat.* iniquum foret , propter occupationes florentissimi ordinis causas hominum deperire . Ceterum si ob appellantis negligentiam in appellationis causa pronunciatum non esse adversarius ostendat , ego non video , cur , eo petente , appellatio deserta declarari non debeat . Vide Car. Anton. de Ros. *prax. civil. p. 2. c. 1. n. 23. & sequ.*

V. Jure Romano cujuscumque pretii sit controversia , ad ipsum Præfectum Prætorio , aut Principem etiam per appellationem ea deferri non prohibetur . Experiundo compertum est tamen , perpetuam incommodorum , & injuriarum segetem in Regno Neapolitano inde potissimum promanare , quod omne genus appellationes ex Provinciis in principis Urbis tribunalibus sine discrimine recipien-

perentur. Rarissimus enim quisque in animum inducebat, e longinquis Provinciis reum ad hæc tribunalia appellantem sequi ob levissimas controversias, quarum emolumentum, si vicisset actor, vix itineris impensas sarcire poterat. Proinde optime meruit Rex Catholicus de Regni Neapolitani Provinciis, cum veteres Regni leges ea de re latas, & ævitate sua jam languescientes restitutum ivit *pragm.* 1738. §. 1. n. 1. Ibi enim cautum, ne ex Provinciis utriusque Calabriae, Hydruntina, Barrii, utriusque Aprutii, & Lucaniae per appellationem ad Neapolitana tribunalia causæ deferri possent, quæ ducentorum ducatorum summam haud excederent. Ex aliis Provinciis Urbi proximioribus ad urbana tribunalia appellari vetitum, nisi ultra summam ducatorum centum causa pertingeret. Summam tamen non ex simplici sorte, sed ex coacervatis etiam usuris æstimari voluit. Ceterum ubi ejusmodi controversiæ in Regiis Audientiis definitæ jam forent, eas quidem ad Urbana Tribunalia per appellationem deferri concessum, quod ad actum tantum *devolutivum*, ut ajunt, neutiquam vero *suspensivum*. Si sententia tamen per Audientias executioni demandaretur, victores fidejussores jussi sunt dare (cautionis periculum ipsos actorum Magistros præstare placuit) qui caverent, pecuniam restitutum iri, si Audientiarum sententiæ per Neapolitana Tribunalia revocatæ forent.

VI. At vero a sententia definitiva tantum jus Romanum appellari patitur; ab interlocutoria appellari non sinit, nisi interlocutio aut gravamen inferat, quod per definitivam emendari nequeat, aut definitivæ vim habeat *l. 2. ff. de appell. recipiend.* & *l. 7. §. 2. ff. de minor.* Opportu-
ni m

num id censuere veteres, ne appellationum effrā-
ni licentia lites immortales fierent . Cum enim
in eadem controversia iudices pluries interloqui
oporteret , citius vitæ , quam controversiæ finis
expectari poterat , si in singulis interloquutionibus
litigantibus facta fuisset appellandi copia . Verum
Romani Pontifices ab interloquutionibus omnibus
sine discrimine appellationem recipi voluerunt
c. super . X. de appellat. Licet autem Tridentini
Patres jus Romanum restituendum curarint, ne-
que appellationes adversus interloquutiones inter-
poni jusserint , nisi eæ aut definitivæ vim habe-
rent , aut gravamen inferrent , quod per definiti-
vam emendari non posset , in Regno Neapolitano
tamen jus Pontificium, quod ante Tridentina co-
mitia obtinebat , retineri placuit . Hinc in Regni
tribunalibus viget hodie consuetudo appellandi
adversus interloquutiones omnes . Quoniam tamen
ea facultas ex Pontificio jure profluxit , usu fori
receptum est , ut appellationes adversus interlo-
quutiones ex ipso jure Pontificio fere legem acci-
piant . Inde apud nos invaluit , ut appellatio ad-
versus interloquutiones inferioris judicis jurisdictio-
nem haud impediāt , donec a superiori iudice ea
fuerit inhibita ob *c. audita . X. de restit. spoliat.*
In appellationibus autem adversus interloquutio-
nes apud nos inhibitiones duæ per superiores ju-
dices inferioribus indici solent , temporaria una,
perpetua altera . Ubi enim adversus interloquu-
tionem appellatum fuerit , jurisdictio judicis infe-
rioris primo inhibetur ad tempus , donec , trans-
missis actis , de gravamine cognoscatur . Deinde ,
si de gravamine revera constiterit , causa apud
superiorem iudicem agi jubetur , ac præcipitur in-
fe-

feriori iudici, ne in causa procedat amplius. Vide de Ros. in civil. decret. prax. part. 2. c. 1. dist. 2. n. 12. & sequ. Eiusdem juris Pontificii æquitate receptum in Regno est, ut ob futurum quoque gravamen, quod per interloquutionem inferri timetur, appellatio interponi possit. Hinc apud nos inolevit, ut ab appellante superior iudex interpellatus inferiori præcipiat actorum transmissionem, si appellanti, quod timet, gravamen meditetur inferre. At vero licet ab ipsarum Audientiarum interloquutionibus ad Urbana hæc tribunalia appellationes deferri queant, si tamen de minutulis summis agatur, de quibus memoratum est supra §. 5. ob interloquutiones in ejusmodi causis interpositas ad Urbana hæc tribunalia appellatio deferri non potest *pragm. 1738. §. 1. n. 1.* Illud prope exciderat, quod, si a Magnæ Curiae interloquutione ad Sacrum Consilium sit appellatum, in appellatione adversus sententiam definitivam in eadem aula causa sit deleganda *pragm. 10. de appellat.*

VII. Ubi in sententia definitiva recepta per superiorem appellatio fuerit, jurisdictio inferioris iudicis statim suspenditur, & causa ad superiorem omnino devolvitur *l. 32. C. de appellat.* Hinc si iudex inferior post appellationem quid in causa innovarit, primum omnium attentata, quæ vocant, a superiori iudice sunt emendanda *l. un. ff. nih. innovar. appell. interp.* Cum igitur jure civili suspensio sententiæ per iudicem inferiorem latæ potissimus esset appellationis effectus, dicendi sunt ignorasse Jurisconsulti veteres divisionem appellationis in *suspensivam*, & *devolutivam*, ut pragmatici loqui amant. Ea appellationis divisio ju-
ri

ri Pontificio natales suos refert acceptos . Primi enim Pontifices in causis momentaneæ possessionis usum appellationis devolutivæ tantum instituerunt; exequutione sententiæ non impedita . Ad turbas præcavendas in ejusmodi judiciis opportunum id visum . Vid. Huber. ad titulum *ff. de appell. recip. vel non n. 5.* Ab his primum initiis in plurimis adhuc causis apud plerosque Europæ Populos appellationis nude devolutivæ usus utilitate sua se commendavit . Sane sexcentæ species in jure Neapolitano sunt proditæ , in quibus , tantum quod ad actum devolutivum, appellatio potest institui. Appellatio autem, *devolutivam* quam vocant, superiori quidem judici rem cognoscendam defert, sententiæ tamen exequutionem non remoratur. At vero cum appellatio controversiam generatim deducat intra terminos litis contestatæ, post appellationem novum judicium cœptari debet . In eo igitur peragendo ea fere omnia sunt adhibenda, quæ in judiciis ordinariis superiori excursu adhibenda monuimus .

C A P U T II.

De supplicatione, seu reclamatione in Supremis Regni Tribunalibus interponi solita.

Quemadmodum adversus sententias a Principe latas appellatio concedi non potest (appellatio enim ad superiorem interponi debet *l. i. §. i. ff. a quib. appell. non lic.*) ita in Principatu non temere inter Magistratus quispiam tanta instrui potestate debet , ut ab ejus sententia appellari non liceat . Ejusmodi enim potestas ab ipso Principi-

cipatu parum abesset. Hinc inter imperandi præcepta & hoc dedit Augusto Mæcenas, ne quem Magistratum adeo præcellentem in imperio constitueret, ut ejus sententiæ per appellationem rescindi non possent. Vide Dion. *libr. 53.* Inde factum, ut ab ipso Præfecto Prætorio, cujus maxima fuerat sub Principatu potestas, libera olim appellandi facultas esset *l. un. ff. de offic. Præfect. Præt.* Verum enimvero cum nonnisi spectatæ industriæ, ac fidei homines ad hujus officii magnitudinem assumi solerent, eosque Principes existimarent, non aliter judicaturos esse, quam ipsi judicaturi forent, Præfectis Prætorio id præ ceteris Magistratibus præcipuum dari voluerunt, ut ab eorum sententiis appellandi facultas haud esset *d. l. unic. ff. eod.* Hinc amplissimum Præfecturæ Prætorianæ judicium vocant Imperatores *in l. un. C. de sent. Præf. Præt.* Indidem Præfectos Prætorio *vice sacra judicare* veteres frequenter ajunt. Verum enimvero cum longa inde manaret injuriarum seges, nec cuiquam legum auxilium in Civitate denegari oporteret, sedulo cautum oportuit, ne, dum tanti Magistratus dignitatem auctum Principes irent, nulla spe reliqua, cujusquam fortunas pessumdarent. Quapropter aliquid excogitandum fuit, quo & Præfectorum dignatio nil quicquam imminui videretur, & perperam decisa negotia per errorem, aut fraudem posteriori sententia emendari possent. Ita, necessitate ipsa suadente, a veteri rigore descitum Diocletiani, & Maximiani fortasse temporibus. Per eos sane Principes constitutum comperio, ut intra biennium facultas victo supplicandi foret adversus sententias, quæ a Præfectis Prætorio latæ dicerentur *d. l. unic. C. de sentent. Præ-*

Præf. Præt. Biennium hoc Principes non statim a lata sententia numerari jusserunt , sed ex quo successorem Præfectus accepisset . Periculum enim erat , ne , si coram eodem Præfecto supplicandum foret , semel lata sententia vix rescinderetur . Ita enim comparati sunt homines plerique omnes , ut suas revocari sententias ægre patiantur . Proinde cum post biennium Præfectus successorem acciperet , biennium supplicationi præstitutum numerari jussere Principes , ex quo Præfecto datus successor esset *d. l. un. C. de sent. Præf. Præt.*

II. Jam vero per supplicationem sententia retractari petebatur . Hinc non semel in jure supplicationis , & retractationis vocabula in præsentī argumento promiscue adhibentur *d. l. un. C. de sent. Præf. Præt.* & *l. un. C. de fid. instrum.* Verum veteribus vocabulis repudium misere pragmatici , eisque *reclamationis* vocabulum magis arrisit . Ejusmodi autem supplicationem proponi jussit Justinianus vel intra decem dies , vel intra biennium , ex quo sententia lata foret . Maximi tamen interesse voluit , utro tempore ea proponeretur . Si enim intra decem dies a lata sententia supplicaret victus , sententiam exequutioni demandari jussit , prius tamen per victorem satisfactione præstita , rem ipsam cum fructibus , aut pecuniam cum usuris adversario restitutum iri , si in supplicationis judicio sententia revocata foret . Sin post decem dies supplicaretur intra biennium , sine ejusmodi cautione sententiam exequutionem fortiri voluit *novell. 119. c. 5. unde authent. quæ supplicatio . C. de precib. Imper. offer.* Hujus temporis discrimen obtinet in Regno adhuc . Nam pro diversitate temporis , quo proposita apud nos reclamatio fue-

rit, cautio isthæc in exequutione sententiæ o-
mittitur, aut præstatur, ut rerum periti norunt.

III. Apud omnes Europæ populos cum suprema omnia tribunalia judicent vice sacra, ab ipsorum sententiis appellari non potest. Veterum tamen Imperatorum exempla in Europa passim sequuti Principes supremorum tribunalium sententias per supplicationem in iisdem tribunalibus retractari posse voluerunt. Experientia enim docuit, in dies homines doctiores fieri, & secundas eorundem judicum curas, accuratius re perpensa, plerumque rectiores esse. Ita apud nos in supremis tribunalibus nata *reclamatio*: ea examussum in Regno supplicationi respondet, quæ adversus sententias Præfectorum Prætorio proponebatur olim. Suprema enim apud nos tribunalia, ut ipse apud Romanos Præfectus olim, judicant vice sacra. In hunc censum referri debent Suprema Juncta abusuum, Regalis Camera Sanctæ Claræ, Sacrum Consilium, Regia Camera Summaria, Supremus Commerciû Magistratus, Tribunal denique Mixtum. Adversus horum tribunalium sententias non appellatio quidem, sed reclamatio debet institui.

IV. Porro discrimen inter appellationem, & reclamationem potissimum illud est, quod appellatio inferioris judicis sententias plerumque suspendit, reclamatio vero earum exequutionem haud impedit. Eo illud accedit, quod, appellatione interposita, novum judicium instituitur, atque alius processus cœptatur; proposita reclamatione tamen ex iisdem actis de controversia pronunciari solet. Si hinc discedas, in aliis plerisque reclamatio cum appellatione convenit. Quemadmodum enim intra dies decem a lata sententia appellari
de.

debet, ita & intra dies decem adversus sententiam reclamandum erit, si ad satisfactionem victor sit compellendus. Quemadmodum etiam sua sunt appellationi fatalia, intra quæ ea necessario expedienda est, ita & reclamatio suos terminos fatales habet, quibus elapsis, nisi peracta fuerit, ea perimitur. Quod autem supra docuimus, jure civili intra duos annos reclamari posse, si satisfactio non exigatur, id ipsum in Regno obtinet ex *pragm. 5. de offic. Sacr. Reg. Consil.* Quod ad biennii numerationem tamen discrimen hic adverti velim inter jus Romanum, & patrios Regni mores. Apud Romanos enim, ut supra vidimus, biennium computandum erat, ex quo Præfectus, qui sententiam dixerat, successore accepto, munus suum deposuisset; in Regno tamen id biennium numerari debet, ex quo sententia lata fuerit. Cum enim apud nos suprema tribunalia sint perpetua, eorumque judices successorem post biennium non accipiant, non aliunde, quam ab ipsa sententia id tempus computari oportebat. Ceterum viget etiam in Regno hodie juris Romani scitum, post reclamationem scilicet nullum victo superesse remedium, ubi prior sententia confirmata fuerit, idque de Sacro Consilio diserte cautum *d. pragm. 5. de offic. Sacr. Reg. Consil.* Recte igitur Regiis literis *ann. 1759.* declaratum est, per suprema tribunalia priori sententia confirmata in judicio reclamationis, nullitatum, aut restitutionis in integrum, aliud a victo remedium frustra allegari.

V. Jam vero fatalis terminus, intra quem expediri judicium supplicationis oportet, post eam propositam annus est ex jure civili. Quod si justa causa supplicationi expediendæ impedimento fue-

rit, alterum adhuc annum indulgeri Justinianus supplicanti iussit. Si intra id tempus supplicatio expedita non foret, eam peremptam censeri voluit *novell. 119. c. 5. unde authent. quæ supplicatio. C. de precib. Imper. offer.* Ex jure Pontificio tamen ut in appellatione, ita in supplicatione quoque tertium annum peragenda causæ reclamantibus indulgere pragmatici. Et in appellatione quidem in Regno fatalia isthæc observari iussit *pragm. 1. de appellat.* Dubitatum est tamen a pragmaticis olim, an in reclamatione quoque prædicta fatalia servari oporteret, & an, iis elapsis, reclamatio perempta censenda foret. Proinde *pragm. 53. de offic. Sacr. Reg. Consil.* cautum in Regno est, ut fatalia isthæc non minus in appellationibus, quam in reclamationibus observarentur. Si recte igitur rationes ineas, rigore juris inspecto, si intra triennium reclamationis iudicium peractum haud fuerit, reclamationem peremptam censeri oporteret. Verum, quod supra de appellatione monuimus, receptis moribus obtinet in reclamatione quoque. Scilicet ob tantam vim causarum quotidie magis ingruentem reclamationis iudicium non negligentia reclamantis quidem, sed ab ipsis iudicibus productum censeri debet. Proinde nisi reclamans ipse contumax per iudicem declaretur, lapsus fatalium ei non nocet, atque, ipso triennio jam exacto, reclamationis iudicium, quod iusto tempore fit institutum, prosequi non prohibetur. Prædictæ autem pragmaticæ rigor vix umquam obtinuisse videtur in Regno. Vide de Marin. *resol. jur. 2. c. 79.*

C A P U T III.

De restitutione in integrum.

UT negotium restitutionis in integrum probe intelligatur, & arceatur omnis in præsentī argumento confusio, duplex in integrum restitutio distingui debet. Ea enim considerari potest vel ut actio quædam, qua personæ quædam jus suum recipiant rigore juris amissum, vel ut exceptio, seu remedium quoddam, quo, sententiæ executione suspensa, novum iudicium instituitur, ut prioris sententiæ emendetur iniquitas. Igitur operæ pretium facturi videbimur, si sub utroque aspectu restitutionem in integrum hic perpendamus. De ea autem primo differemus, quatenus actio est; deinde quatenus est exceptio, & sententiam executioni demandari non patitur.

II. Principio in integrum restitutio, quatenus actio est, haud absurde definiri cum Cujacio queat ad *Paul. sent. 1. 7. 1. actio rescissoria, qua res nobis certa, vel. ius, vel qualibet alia causa redintegratur*. Brevius definitur a Paulo *loc. cit. redintegranda rei, vel causæ actio*. Recte advertit ibi Schultingius n. 3. inter rem, & causam jus civile non distinxisse. Id admoneri oportebat, ne negotium cui facessat causæ vocabulum a Paulo in definitione additum. Res vero redintegrari in præsentī argumento dicitur, sive sit adhuc imperfecta, & negotium in sola promissione versetur, seu res in alium translata jam fuerit *l. 9. §. 3. ff. quod met. caus. gest. er.* Restitutionis autem in integrum initia Prætori referri debent accepta.

Q 3

Cum

Cum enim negotia quædam, rigore juris inspecto, rata viderentur habenda, eorum firmitati tamen obstaret æquitas, solitis fictionibus usus edicto Prætor factum infectum haberi iussit. Igitur, adversus negotium jam perfectum actione concessa, veterem actoris causam redintegrabat, quasi res peracta non foret. Ita quidem si læsus diceretur ex contractu minor, per restitutionem in integrum ei concessam contractus ipse rescindebatur, quasi se numquam obligasset minor.

III. Jam vero restitutio in integrum non temere a Prætoribus indulgebatur. Primo enim ad eam veluti odiosam, & contra jus institutam deveniri non poterat, si qua alia ordinaria actione læsio emendari posset *l. 2. C. in quib. caus. in integr. restit. neccs. non sit*. Deinde certas tantum ob causas tribuebatur. Restitutionis impetrandæ causas has enarrat Paulus *sent. 1. 7. 2. Integri restitutionem Prætor tribuit ex his causis, quæ per metum, dolum, & status permutationem, & justum errorem, & absentiam necessariam, & infirmitatem ætatis gesta esse dicuntur*. Ipsum Prætoris edictum restitutionis causas complectens prostat in *l. 1. §. 1. ff. ex quib. caus. major. 25. ann. in integr. restit.* Cum tamen periculosa videretur omnis in jure definitio, & ob alias aliquando causas rem redintegrari æquitas ipsa suaderet, edicto suo restitutorio hanc clausulam Prætor addidit. *Item, si qua alia mihi causa justa esse videbitur, in integrum restituam d. l. 1. §. 1.* Eam clausulam necessitas ipsa flagitabat. Ut enim scribit Ulpianus in *l. 26. ff. cod. multi casus evenire potuerunt, qui deferrent restitutionis auxilium, nec singulatim enumerari potuerunt; & quoties æquitas re-*
stiterit

stitutionem suggerit, ad hanc clausulam erit descendendum. Cum vero Civitates minorum jure Principes uti jusserint, minorum exemplo restitutionis auxilium eis quoque non denegandum *l.4.C. quib.ex caus.major.in integr.rest.* A Civitatibus etiam argumento deducto, non solum vicis, & pagis, sed Ecclesiis quoque, & licitis collegiis hoc auxilium indulgere pragmatici de Marin. *ad decis. Revert.156.n.1.* & de Ros. *in prax.civil.pars.2.c.2.n.9. & sequ.* At vero cum restitutio ex privilegio manet, ac proinde sit odiosa, si alio remedio ordinario læsio reparari possit, ad restitutionem deveniri non debet, ut recte post Bartolum docuere doctores *in l. fin. C. si advers. rem judic.* Cumque in privilegiorum conflictu ad jus commune sit redeundum, si æque privilegiarius ille sit, adversus quem restitutio petitur, ea deneganda erit. Vide de Marin. *resolut. 2.200.n.14.*

IV. Porro quemadmodum ceteris actionibus instituendis certa in jure præstituta sunt tempora, ita restitutio quoque intra certum tempus debet institui; alias lapsu temporis in jure præfiniti perimitur. Veteri Romanorum jure in integrum restitutio postulanda erat intra annum utilem, ex quo læsus quis diceretur. Annus utilis ille dicebatur, in quo tantum dies numerabantur, quibus, sui copiam faciente Prætor, de jure suo experiundi facultas esset. Cum tamen anni utilis computatio molestissimi laboris esset, in ejus locum quadriennium continuum substitui jussit Justinianus. Hodie igitur jure novissimo intra quadriennium restitutio in integrum postulari debet *l. ult. C. de tempor. in integr. restit.* Licet autem restitutioni postulandæ quadriennium continuum

sit præstitutum, id ipsum tamen numerari debet non ex die læsionis, sed ex quo cessavit causa, ob quam restitutio implorari potest. Ita quidem si minoris ætatis intuitu restitutio peti queat, quadriennium numerari debet, ex quo minor major evaserit *l. 5. C. eod.* Itidem si ob absentiam restitutio obtineri possit, a die reditus quadriennium numerandum erit *d. l. ult. C. de tempor. in integr. restit.* Cum autem actiones ex contractu proficiscientes heredibus quoque competant, læsi etiam heredibus restitutio indulgeri debet *l. non solum. ff. de in integr. restit.* Hæc vero actio, prout opportunum auctori fuerit, modo in personam, modo in rem potest institui. Si enim contractus rescindi petatur adversus eum ipsum, cum quo fuerit initus, actio in personam erit; sin ad rem recipiendam adversus rei possessorem agatur, quicum non cotraxit læsus, in rem erit actio *l. 13. ff. de minor. 25. ann.* Sed, his omissis, de restitutione videamus, quatenus exceptio est, & sententias exequutioni demandari non patitur.

V. Restitutionem exequutioni sententiarum tamquam exceptionem opponi solitam non ignorant Romanæ leges. Si quis enim eorum, cui rescissoria restitutionis actio competeat, per sententiam judicis læsus esse diceretur, beneficio restitutionis opposito, sententiæ exequutio sistebatur, & novo judicio retractanda res erat. In eo si de læsione constaret, sententia priori rescissa, læsio omnis emendabatur. Dignissima memoratu est *l. unic. C. in integr. restit. postul. ne quid nov. fiat.* In ea enim ita rescribit Gordianus. *Postulata in integrum restitutione, omnia in suo statu esse debere, donec res finiatur, perspicui juris est; idque curabit*

curabit is, ad cujus partes ea res pertinet. Hinc passim in Europa receptum, ut, pendente restitutionis judicio, prioris sententiæ executione suspensa, nihil innovetur. Cum tamen sententiarum auctoritas temere non oporteat in Civitate rescindi, nonnisi causa cognita jus Romanum restitutionem indulgeri jubet *l. 3. C. quib. ex caus. major. in integr. restit.* Hinc in Regno Neapolitano restitutio concedi non solet, nisi, prævia cognitione causæ, petitæ restitutioni locus esse pronuncietur de Ros. *in civil. decret. prax. p. 2. c. 2. n. 44. & sequ.* Ubi autem restitutio concessa fuerit, novum judicium inchoatur, atque in eo omnia fere solemnia adhibentur, quæ in judiciis ordinariis servari supra monuimus Boc. *class. 6. disput. 10. th. 100.* Licet autem in Regno Neapolitano, ut passim in Europa alibi, sententiæ executio per restitutionem impediatur, eo jure tamen in foro utimur, ut si cœpta jam sit executio, veluti si indictum victo fuerit *de paren. do monitum*, eam restitutio impedire nequeat. Proinde, si factum id fuerit, potius actio, quam exceptio restitutio cenferi debet Staiban. *resol. 55. n. 3. de Marin. resol. 2. 200. n. 5.* Intra quod tempus tamen postulanda sit restitutio, ut sententiæ executionem impediat, in jure seu civili, seu patrio definitum haud memini. In Regno Neapolitano tamen intra sex a sententia dies restitutio postulari debet: id autem apud nos invaluisse videtur, a nullitatibus argumento desumpto *pragm. 4. de dilat. n. 18.* Si serius restitutio postuletur, actionis potius naturam induet, & executionem sententiæ non impediet. Ceterum ne postulatæ restitutionis obtentu sententiarum executio longius protrahatur,

fapienter cautum in Regno est, ut, si consorti cuiusdam restitutio sit denegata, eandem ob causam ab alio litis consorte restitutio frustra postuletur *pragm. 8. cod.*

C A P U T IV.

De Nullitatibus.

Quod de in integrum restitutione monuimus superiori capite, ad nullitates etiam extendi debet. Ut enim in integrum restitutio alias ut actio, alias ut exceptio solet institui, ita nullitates etiam vel quatenus actio sunt, vel quatenus adversus sententiam sunt exceptio, considerari possunt. Nimirum nullitates aliquando proponuntur ad condicendum, quod per injustam sententiam solutum ab actore fuerit, eoque respectu exitum actionis habent. Eadem aliquando adversus sententiae executionem eo sub obtentu solent opponi, quod iniqua sententia sit, eique executio deneganda: quo quidem intuitu, ut exceptio, considerari debent. Ut igitur accurate procedat suscepta disputatio, sub utroque respectu nullitates hic exhibebimus.

II. Primo igitur apud nos nullitates actionis instar possunt institui. Iis autem postulari solet, ut, rescissa sententia, quæ executioni demandata jam fuerit, quod injuste solverit, præstiteritve, restituatur actori. Ejusmodi vero nullitates apud nos tandem proponi poterant, si executioni jam mandata sententia *notoria injustitia* laboraret. Verum, ut audax ingenium rabularum est, eo deducta olim in Regno res fuit, ut nullitatum ob-

tentu

tentu iustissimas quasque sententias vitiligatores oppugnatum irent. Inde plura quidem incommoda. Primo enim rerum judicatarum vix certa umquam auctoritas. Ea enim nullitatum actio intra ipsos triginta annos proponi poterat. Deinde, quod necessario sequebatur, lites ex litibus perpetuo ferebantur. Primo igitur cautum in Regno fuit, ne temere nullitates liceret institui; eas tandem proponi jus esset, si sententiæ iniquitas *notoria* revera foret. Ut autem vitiligandi præcideretur occasio, duobus tantum in casibus sententias *notorie* iniquas existimari placuit: primo scilicet, si sententia lata foret contra jus seu civile, seu municipale; deinde si ea adversaretur scripturæ publicæ in actis exhibitæ *pragm. 4. n. 20. de dilat.* Præterea, ut aliquando rerum rite judicatarum aliqua tandem certitudo foret, cautum ibidem fuit *n. 21.* ne post decem annos nullitatum actionem proponi jus esset. Cum tamen in prædicta *pragmatica n. 21.* declaretur, ex jure communi olim in Regno recepto intra ipsos triginta annos nullitatum judicium institui jus fuisse, operæ pretium facturi videbimur, si in jus Romanum tantisper hic divertamus, ut liquido constet, an adversus aliquas sententias ob ipsarum iniquitatem nullitatum actionem jus Romanum indulserit, ubi mandatæ exequutioni jam forent. Si id apud Romanos obtinuit, pene conclamatum jam erit de juris Romani regula, *res judicata pro veritate habetur.*

III. Ut igitur decernatur, an jure civili iniquæ sententiæ nullitatum judicio oppugnari potuerint, caute distinguatur, oportet; inter sententiam *παρανομον* (*contra leges latam*) & *αδίκον* (*injustam*).
Pri,

Priori casu de ipso jure perperam per sententiam pronunciatur; posteriori vero de facto aliquo, licet injuste, judicatur, ut recte Duarenus observat ad *l. 27. ff. de re judic.* Nimirum, quod alias me advertisse memini, iniqua esse sententia potest aut *in thesi*, aut *in hypothesisi*, ut loqui amant interpretes. Iniqua erit in thesi sententia, si adversus jus ipsum pronunciatur; iniqua in hypothesisi erit, si adversus jus litigatoris ea feratur. Ita quidem si, ob usuras usurarum convento quopiam, definiatur a judice, usuras usurarum peti jus esse, ac proinde usuras usurarum reus solvere compellatur, iniqua erit in thesi sententia. Contra si ob usuras usurarum centum a reo petantur, cumque in centum condemnet judex existimans, anatocismum jure non prohiberi, aut leges eum prohibentes ad controversiam non pertinere, sententia in hypothesisi erit iniqua. Priori quidem in specie *contra constitutiones, & leges*; in posteriori vero *contra jus litigatoris* Macer judicari scripsit in *l. 1. ff. quæ sentent. sin. appell. rescindant.*

IV. His positis, sententias in thesi contra jus latas per se irritas jus Romanum censeri jubet. Proinde, licet adversus eas interposita non fuerit appellatio, auctoritatem rei judicatæ nancisci non possunt *d. l. 1. §. 2. ff. quæ sentent. sin. appell. rescindant.* Eodem jure sententias censeri placuit, quæ errore calculi latæ forent, quæque in absentem pronunciatæ essent, ad cujus notitiam edictum peremptorium pervenire non potuisset *d. l. 1. §. 1. & 3. ff. eod.* Sine appellatione quoque per se corrumpere sententiam Paulus existimavit, cui pareri ipsa rerum natura non patitur *l. 3. ff. eod.* Eodem jure sententias censeri jussit Diocletianus, & Maximia-

nus,

nus, quæ per corruptos mercede iudices proferrentur in *l. 7. C. quand. provoc. non est necefs.* Præter has species, aliasque sat paucas, quas Tribonianus exhibet in *tit. ff. quæ sentent. fin. appell. rescind.* & sub *tit. C. quand. provoc. non est necefs.* generatim alias contra jus litigatoris latæ sententiæ, quas in hypothefi iniquas vocari diximus, ex jure civili utiles cenferi debent. Si igitur adversus eas appellatum haud fuerit, rei judicatæ auctoritatem obtinent *d. l. 1. §. 2. ff. eod.*

V. Cum igitur inspecto jure civili, appellatione non interposita, post fatales dies sententiæ contra jus litigatoris latæ exequutio urgeri possit, non ego quidem intelligo, qui passim pragmatici doceant, adversus iniquam in hypothefi sententiam exequutioni jam demandatam actionem nullitatis institui per jus civile posse. Id autem si admittatur, falsum erit *πολυρραλῆτον* illud, *rem judicatam pro veritate haberi*. Aliunde veteres probe norant, res judicatas labefactari non oportere, ne ex lite lites perpetuo orirentur. Habet enim iniqui aliquid omne magnum exemplum, quod adversus singulos publica utilitate pensatur. Nam publice quidem interest, aliquem sollicitudinum finem esse, & lites non retractari. Optimis Principibus id tanti visum, ut privatorum negotia ne eo sub obtentu quidem retractari voluerint, quia nova instrumenta dicerentur inventa *l. 35. ff. de re judic.* Neque regeas, eum, qui sententia in hypothefi iniqua damnatus solverit, adversus injustum victorem condictionem indebiti instituere posse. Vulgo quidem id inferunt ex *l. 58. ff. de re judic.* lex tamen isthæc potius

ca

ea de specie debet intelligi, si, nulla omnino sententia prævia, pignora distracta fuerint. Quod si de sententia per se nulla eam interpretari malis, per me quidem id liceat, modo de sententia παρρησιάζω, & in thesi injusta, non vero de sententia ἀδικῶ, & in hypothesi iniqua intelligatur. Neque cum Donello regeras ad *d.l. 58. ff. eod.* injuste solum quandocumque conditione sine causa peti posse. Id quidem non ignoro generatim Ulpianum asserere in *l. 1. ff. de condict. sin. caus.* id ipsum tamen temperandum juxta Callistrati monitum in *l. 32. ff. de re judic.* Totum Jurisconsulti locum juvat apponere. Cum prolatis constitutionibus contra eas pronunciat judex eo, quod non existimat, causam, de qua judicat, per eas juvari, non videtur contra constitutiones sententiam dedisse; ideoque ab ejusmodi sententia appellandum: **alioquin REI JUDICATÆ STABITUR.** Si accurate perpendantur isthæc, facile, puto, constiterit, ob rerum judicatarum auctoritatem adversus sententias contra jus litigatoris latas nullitates ex jure Romano, exactis fatalibus, afferri non potuisse, idque ne actum agi videretur. Hæc si vera fuerint, incitiam suam tueri nequit scriptor *pragm. 4. de dilat.* ubi edicit, jure civili intra triginta annos nullitatum judicium institui potuisse adversus sententias inique latas. Error inde manavit, quod doctorum vulgo deceptus ad sententias in hypothese injustas accommodarit, quod unice de sententiis in thesi iniquis jus civile caverat. Interea ego non negem, æquiores pragmaticam esse; neque alias patuit, glossatores pessimos quidem interpretes, in ipsis tamen erroribus æquissimi juris conditores esse.

VI. Quod

VI. Quod ad nullitates apud nos exceptionis instar opponi solitas, æquissimæ in Regno quidem eæ visæ sunt semper. Proinde, si justo tempore opponantur, sententiæ exequutio per eas impeditur. Iniquum enim est visum, exequutioni demandari sententiam, quam aperte iniquam adversarius paratus esset ostendere. Longa inde tamen apud majores injuriarum seges. Nam per nullitatum effugium rebus judicatis vix ulla constabat auctoritas. Ubi enim earum exequutionem urgeret victor, nullitatum obtentu exequutione sententiis denegata, novum judicium de ipsarum justitia coeptandum erat. Ita fiebat, ut vitæ potius, quam litis exitus expectari posset. Quotus enim quisque in tanta vitilitigandi libidine sententiam adversus se latam exequutioni mandari pateretur, cum præsto adversus eam nullitates essent, quibus oppositis, diutule adversarius vexari posset. Ne igitur institutum optimis profectum initiis in legum ludibrium verteretur, neu importunæ rabularum fraudes juri palam illuderent, compluscula sunt in Regno cauta, quibus & dolus malus præcideretur, & injustæ quoque sententiæ corrigendæ via pateret.

VII. Primo igitur cautum, ut sententiæ exequutionem exceptione nullitatum impediturus eas diserte in libello exprimat, neque jussus judicis expectetur, qui nullitates declarari jubeat *pragm. 4. de dilat. n. 16.* Deinde cum rebus judicatis impediendis nullitates *ex capite notoriæ injustitiæ* in Regno passim opponerentur, notoriæ vero injustitiæ caput sibi pro lubitu patroni causarum effingerent, cautum ibidem *n. 20.* ut notoriæ injustitiæ nullitates tandem censerentur, si sententia
ad.

adversus jus seu commune, seu municipale lata foret, aut adversaretur scripturæ publicæ, & ante decisum negotium in actis exhibitæ. Præterea ne ad nullitatum effugium quis temere prosiliret, multa etiam pecuniaria fisco cessura eos coerceri placuit, adversus quos pronunciatum esset, contra executionem sententiæ injustas nullitates opposuisse. Multa isthæc non est uniusmodi: nam pro causarum discrimine plus minus damnas est solvere, qui injustas nullitates opposuisse arguitur. Olim quidem ex *pragm. 5. de offic. Sacr. Reg. Consil.* in causis infra ducatos mille multa duodecim ducatorum erat; in causis, quæ graviores essent, injustarum nullitatum poena ad ducatos nonaginta pertinebat. Verum mox Regiis literis, quæ in prædictæ pragmaticæ margine memorantur, in utrisque causis poenam duplicari placuit. Ceterum hodie eo jure utimur, ut in Sacri Consilii decretis in causis executivis latis ducatorum duodecim depositum fiat; in causis ad ducatos mille non pertinentibus ducati viginti quatuor deponantur; in causis gravioribus ducati centum, & octoginta, ut rerum periti norunt. Cum vero multa isthæc negligentius fortasse exigeretur, ad temeritatem litigantium opportunius coercendam vetitum est *d. pragm. 4. n. 16. de dilat.* quascumque nullitates recipi, nisi prædictæ multæ depositum penes acta fieret. Quod si non in supremis tribunalibus quidem, sed in Magna Curia nullitates objiciantur, ex recepta consuetudine in causis ducatis septuaginta quinque minoribus ducatos sex deponi oportet; in causis majoribus duodecim de Ros. in *civil. decret. prax. p. 2. c. 3. n. 4.* Depositi necessitatem tamen pauperibus remitti placuit, qui in carceribus detinerentur *pragm. 3. de quæst.*
Inde

Inde igitur argumento desumpto , pauperibus omnibus depositi necessitas remitti solet , ubi , causa cognita , de paupertate constiterit . Præterea ut rei judicatæ auctoritas firma sit aliquando , non quoquo tempore opponi nullitates possunt , sed intra sex dies , ex quo auctoritate publica de sententia certior factus is fuerit , qui nullitates opponit *d. pragm. 4. de dilat. n. 18.* At vero ut temeritas omnis in nullitatibus opponendis abesset , eis non a principali , sed ab ipsis advocatis subscribi placuit *pragm. 5. de dilat.* Id cautum oportuit , ut ab advocatis ipsis , qui juris peritiores plerumque sunt , consultius statui posset , an nullitatibus locus esset . Proinde ubi nullitates ex jure promanant , ne ipsi quidem causæ procuratori nullitatibus subscribere licet . Neque regeas procuratori quoque permitti nullitatibus subscribere *d. pragm. 4. de dilat. n. 24.* ea enim ad casum coercenda videtur , si nullitates ex facto , non ex jure promanent . Quod si perperam , & calumniæ facessendæ causa nullitates quis opposuerit , prima quidem vice advocatus per menses quatuor a suo munere suspendi debet ; si iterum id sit aggressus , per annum ; si tertio ausus id fuerit , amplius advocati munus exercere nequit *d. pragm. 4. de dilat. n. 24.* Ceterum , ubi per modum exceptionis nullitates fuerint oppositæ , sine novo termino ex iisdem actis de ipsis decerni debet . Contra si , sententiæ executioni jam demandata , per modum actionis propositæ sint nullitates , novo termino constituto , novum judicium cœptandum erit Afflictus *con. trovers. 33. n. 46.*

TITULUS ULTIMUS.

De publicis judiciis.

HActenus sub Imperatoris auspiciis privati juris capita fere omnia exequuti sumus. Tempus jam foret igitur vela colligere, & longam veluti navigationem emensos Deo Optimo Maximo in portu vota persolvere. Verum nondum hic finis. Licet enim Tribonianus jus tantum privatum in institutionibus enucleandum suscepit, de publico jure tamen partem illam delibandam hic censuit, quæ complectitur judicia publica. Cum enim id argumentum quotidiani sit usus in foro, opportunum Triboniano visum, de eo veluti mantissam hic addere, ne quid in patrocinio causarum adolescentibus deesset olim. Quam brevissime tamen eam Spartam Tribonianus excoluit suimet moniti memor, novorum Justinianeorum ingenia sublimioris juris publici scientia sub ipsa studiorum auspicia prægavari non oportere. Et nos igitur ipsius sequuti vestigia in hoc auctario edisserendo quam brevissime agemus, digito veluti demonstrato ad fontes, unde, firmatis auditorum ingeniis, mox per se ipsi aquas uberiores hauriant.

II. Principio judicia publica inde dicta scribit Tribonianus §. 1. *h. t. quod cuivis ex populo executionis eorum plerumque datur. Plerumque* addit, quia quibusdam denegabatur accusandi facultas, ut constat ex l. 8. *et sequ. ff. de accusat.* Complura tamen apud veteres judicia fuisse novimus, quæ publica quidem haud erant, licet in eis cuivis ex populo agendi jus esset. Ejusmodi popu-

populares erant actiones. Proinde nota, qua publica judicia distinguit Tribonianus, sat incerta videri possit. Quapropter graves auctoritate viri judicia isthæc inde potius publica dici malunt, quod in iis de delictis agatur, quæ maxime ad læsionem Reipublicæ pertinent. Verum & Reipublicæ detrimentum continent extraordinaria crimina: ejusmodi sunt annonæ flagellatio, ruptio aggerum Nili, collegia, & corpora illicita. Proinde ne posterior quidem hæc nota judicia publica certo distinguit. Neque enim tuto licet inferre, publicum aliquod crimen esse, quia complectitur publicam læsionem. Quapropter, ut de re tota liqueat, accuratius perpendamus, oportet, quid intersit inter actiones populares, & crimina seu publica, seu quæ extraordinaria dixeret veteres.

III. Principio in popularibus actionibus cuius quidem ex populo agendi jus erat, in eo tamen a publicis judiciis recedebant, quod illæ civilem multam actori applicandam complecterentur, hæc ad publicam animadversionem comparata forent. Ita sane albi corrupti actio popularis erat, quia eam quisvis ex populo instituere poterat, eique cedebat pecuniaria poena per Prætorem irrogata adversus eos, qui album corrupisse arguerentur. Contra publicum erat Majestatis judicium, quia ad publicæ severitatis exemplum proditores capite scelus luebant. Nondum hinc liquet tamen, quid inter publica, & extraordinaria crimina interfuerit. Nam & extraordinaria crimina publicam animadversionem complectebantur. Sic habet igitur. Publica, & extraordinaria crimina in eo conveniunt, quod ad animadversionem publicam tendunt utraque, eadem tamen differunt non uno

batur, quia in eo cuivis accusare non licuit; privatis vero actionibus vel eo nomine accenseri non poterat, quia poena publica coercebatur.

IV. His igitur præstitutis, judicia publica haud absurde definiri queant ea, quæ ex certa lege descendunt, ubi certa sit poena ob crimina, quæ aut Rempublicam recta lædunt, aut perinde habentur, ac si ipsam Rempublicam lædere videantur. Ad primum genus referri debet crimen Majestatis, peculatus, ambitus, repetundarum. Hæc enim maleficia ita comparata sunt, ut ipsam Rempublicam recta lædant. Posterioris sunt generis parricidium, veneficium, adulterium, plagium. Ea enim licet Rempublicam ipsam directe non impetant, publicis tamen criminibus accenseri placuit, quia civium vitam, aut libertatem lædunt. Vid. Anton. Matth. in proleg. c. 4. n. 8. Hinc autem facile intelliges Macri illud in l. 1. ff. de public. judic. Non omnia judicia, in quibus crimen vertitur, & publica sunt, sed ea tantum, quæ ex legibus publicorum judiciorum veniunt, ut Julia Majestatis, Julia de adulteriis, Cornelia de sicariis. Cetera igitur apud Romanos crimina, quæ ex publicorum judiciorum legibus non venirent, aut crimina extraordinaria erant, aut privata delicta. Verum apud nos hodie quæ privata delicta dixere veteres, publicorum fere criminum formam induerunt omnia. Poenæ enim pecuniariæ in privatis judiciis actoribus olim applicari solitæ fere exoleverunt in Regno, & privatorum etiam delictorum rei coerceri apud nos poena corporali solent. Proinde si accurate rationes ineas crimina in Regno omnia in publica, & extraordinaria rectius devidentur. In illis certa poena in jure statuitur; in his

nusquam definitur in jure pœna, sed arbitrio judicis definienda relinquitur. Cum tamen innumera sint, quæ publica crimina vel elevare, vel exasperare possint, apud nos crimina ferme omnia extra ordinem arbitrio judicum acrius, mitiusve pro rerum adjunctis coerceri solent. Id ipsum apud Romanos invaluit ab ipsis Ulpiani temporibus, ut constat ex *l. 13. ff. de pœn.* Sapienter enim a Platone pronunciatum *q. de legib. magna, parvaque omnia lege determinare, prope impossibile est.* Ubi vero judicia recte pro viribus sunt constituta, judicesque bene educati, & omni diligentia adprobati, rectissime multa judicibus de punitione, conditioneque condemnatorum committi possunt. Porro judicia publica nil quicquam simile cum privatis actionibus habere scribit Tribonianus, eorumque a privatis judiciis magnam fuisse diversitatem seu *in instituendo*, seu *in exercendo princ. h. t.* Breviter igitur ad antiqui juris intelligentiam admonuisse præstiterit, coram quibus Magistratibus publica judicia instituerentur apud Romanos olim, & quibus legibus ad ea exercenda admitterentur accusatores. Ita enim facile intelligetur, quid illud fuerit, in quo a privatis judicia publica seu in instituendo, seu in exercendo recederent.

V. Quod ad primum igitur, cum sub Romanæ libertatis initia consules Regibus suffecti forent, publicis judiciis non secus, ac Reges olim, ipsi Consules præfuerunt, ut exemplum Junii Bruti prodit apud Livium 2.5. Mox tamen per Valerium Poplicolam de provocatione ad Populum lege lata, de capite civis per Consules injussu Populi quæri vetitum. Si quod igitur facinus capite luendum ad-

mis-

missum esset, publici quæstiores a populo creabantur, qui de re capitali cognoscerent, sententiamque dicerent *l. 2. §. 23. ff. de orig. jur.* Hæc ipsa tamen non unam passa sunt vicem. Ab ipso enim anno Urbis 604. quæstiones perpetuæ de publicis criminibus cœperunt institui. Primo enim lege de repetundis per Lucium Pisonem eo anno lata placuit, ut ea quæstio singulari Prætori cederet Cicer. *in Brut. 27.* Deinde Lucius Sylla de Majestate judicium singulari Prætori detulit. Exemplo inde deducto, aliæ quoque quæstiones suis quæque Prætoribus sunt demandatæ. Cum tamen ultra octo Prætores raro renunciarentur olim, eorumque numerum judicia publica excederent, eisdem Prætori pro Senatus arbitrio plures quæstiones deferri solebant, ut probat Sigonius *de judic. 2.* Ubi igitur Prætor, cui quæque quæstio obtigisset, dedisset accusationem, de objecto crimine lecti quotannis ab eo iudices in sententiam mittebantur. Conf. Heinecc. *in antiquis. Rom. h. r. §. 15. & sequ.* Is tamen publicorum judiciorum expediendorum ritus perpetuus Romæ non fuit. Jure pandectarum enim Præfectus Urbi, vel Præsides de publicis criminibus extra ordinem ipsi cognoscunt *l. 8. ff. de publ. judic. & l. 15. §. 1. ff. ad Senatusc. Turpil.*

VI. Quod ad leges, quibus in publicis judiciis accusator adigeretur, potissimæ quidem erant inscriptio, & subscriptio in crimen. Est autem inscriptio professio accusatoris, qua profitetur se deferre quempiam de crimine publico, eumque a se reum peractum iri. Id vero fit vel libello judici porrecto, vel in codice publico querela deposita *l. 2. C. de exhib. & transmitt. reis. l. 3. C. de his,*

qui accusar. non poss. Inscriptioni addebatur subscriptio. Per eam, qui libellum accusationis obtulerat, testabatur, se professum esse: per eandem ad poenam talionis se obligabat, si calumniæ convictus foret *d. l. 2. C. de exhib. & transmitt. reis*. Alia plane sententia in publicis quoque judiciis accusationem causidici subscribere dicebantur. Eorum enim subscriptio eo pertinebat, vel ne reorum opera accusatores corrumpere, de cujusmodi subscriptionibus sermo Ciceroni est in *Verr. 1.* vel ut adjuvarent submissius quidem agentes accusatorem, quod Alconius adnotat ad *d. Verr. 1.* Subscriptionem autem cautio sequebatur, qua ab accusatore cavendum erat, se ad sententiam usque in crimine perseveratum ire, quam quidem cautionem datis fidejussoribus præstari oportebat *l. 7. §. 1. ff. de accusar.* Si, abolitione criminis non impetrata, ab accusatione destitisset actor, non solum per fidejussores promissa pecunia poenæ nomine peti poterat, sed in Senatusconsultum quoque Turpilianum accusator incidebat *l. 1. C. ad Senatusc. Turpil. & l. 1. ff. eod.* In criminibus igitur vetita accusatori transactio; neutiquam vero reo, si crimen capitale foret, & sanguine luendum esset *l. 18. C. de transact.* Vide Noodt in *Dioclet. & Maximian. c. 1. & sequ.* Principes enim præter juris rigorem ignoscendum censuerunt illis, qui sanguinem suum qualiterqualiter redemptum irent *l. 1. ff. de bon. eor. qui ant. sent. mort. sib. consciver.* Neque tamen in criminibus omnibus inscriptio, subscriptiove requirebatur. Primo enim, inscriptione omissa, leviora crimina de plano discutiebantur *l. 6. ff. eod.* Deinde in quibusdam gravioribus quoque criminibus negligeatur inscriptio.

Ita

Ita quidem ea cessabat in adulterii crimine, si uxorem adulteram jure viri quis accusaret *l. 30. C. ad leg. Jul. de adul.* Inscriptio omittebatur etiam, si liberorum mortem parentes, aut vice versa liberi parentum necem exequerentur. Iis enim in speciebus inscriptionem necessario remittenda fuit, cum accusatori, qui reum non peregisset, Senatusconsulti Turpiliani pœna non immineret *l. 4. C. de calumniar. & l. 15. ff. ad Senatusc. Turpil.*

VII. Atque hæc quidem in publicis judiciis exercendis apud Romanos valescebant olim. Eadem tamen neque in Regno obtinent hodie, neque fortasse umquam obtinuerunt. Nimirum promiscua in publicis criminibus accusandi facultas ita quidem comparata erat, ut sub unius imperio admitti vix posset, & regimini populari potius, quam Regio conveniret. In regimine populari enim cives omnes legislatores censi debent: cujusvis ex populo igitur interesse videbatur, ne publica crimina admitterentur. Proinde, promiscuis concessis accusationibus, quivis ex populo juris publici vindex constituendus erat. Nam per publici juris violationem ipsius populi Majestas videbatur imminui. Secus in Principatu est: in eo enim ad ipsum Principem legum & latio, & tutela pertinet. Cum igitur sub unius imperio, jure publico violato, ipsa Principis Majestas videatur imminui, per ipsum Principem publicos accusatores constitui oportebat, qui sub ejus nomine jus publicum ultum irent, & in publicis judiciis pœnas a reo reposcerent. Eo accedebat, quod promiscua accusandi facultas virtutem in accusatore requirat. Atqui pridem observavit Montes-

tesquicus, honorem potius, quam virtutem columen Principatus esse *esprit des loix livre 3. chapitre 3.* Ita apud nos, & passim apud populos, qui regnantur, alibi, primum moribus, deinde etiam lege scripta promiscua accusandi licentia privatis adempta. Ex constitutione quidem Friderici II. *præsenti lege. sub tit. de prohib. official. nostr. occas.* in Regno confirmata promiscua accusandi facultas, ei derogatum est tamen per ritum 191. Nam ibi cautum, ne quis in publicis judiciis ad accusandum prosiliret, nisi suam, aut suorum injuriam persequuturus esset. In Regno igitur tantum patroni fisci in publicis criminibus accusatorum munus exercent. Proinde non mirum, si inscriptio, & subscriptio in crimen, & ipsius Senatusconsulti Turpiliani pœna apud nos exoleverit. Cum enim patroni fisci ad accusandum necessitate muneris compellantur, calumniæ facessendæ causa accusationem in quemquam coëptare præsumi non debent. Id ipsum tamen illis impune non erit, si calumniæ manifestæ rei arguantur. Ceterum ne fisci patronorum incuria publicæ securitati detrimento foret, neque cuiquam delinquendi pateret occasio, ei quidem incommodo per patrias Regni leges obviam itum. Primo enim adversus maleficos jure Neapolitano ex officio Magistratibus licet inquirere *capit. cura nobis. 219.* modo ne de crimine agatur, in quo ex officio judex vetatur inquirere *capit. ut delatas. 236.* Deinde quivis ex populo maleficos denunciare. Medicibus non prohibetur *rit. item servat. 199.*

VIII. Jam vero jure civili si is, adversus quem civilis actio instituta foret, criminali judicio conveniret actorem, criminale judicium utpote majus

jus actioni civili præferri oportebat *l. 4. C. de ord. judic.* Longa inde tamen in Regno injuriarum seges. Usu enim sæpissime apud nos veniebat, ut civili actione pulsati homines calumniam per criminale judicium actori facefferent. Primo igitur a Friderico cautum, ut, si civili, vel criminali judicio conventus quispiam quoquo de crimine accusaret actorem, criminale judicium civili non præferretur, sed in utraque causa simul procederetur a iudice *constit. si criminaliter agens. de lit. contest. in crimin.* Deinde, cum prædicta Friderici constitutione abuterentur fortasse calumniosi homines, neque per eam prohiberi videretur, quin alio criminali judicio accusatorem vexare possent, priori accusatione pendente, Robertus accusatorem accusari vetuit *capit. 258.* Id ipsum tamen intellige, modo ne nova accusatio ex eodem fonte promanet. Ita quidem de perjurio instrumenti causa quis accusatus de perjurio in eodem instrumento admissio accusatorem accusare non prohibetur. Vide Tapiam *in jur. Regn. libr. 5. rubr. 1. pag. 13.* Denique cum semel delati rei, quoniam ipsis ea facultas per leges adimi videbatur, per necessarios suos accusatorem suum accusari curarent, huic etiam incommodo obviam itum *pragm. 1. de accusat.* Ibi enim cautum, ne *accusatus, ejus conjun, liberi, parentes, aut fratres utrimque conjuncti insimul habitantes de crimine aliquo privato, vel publico quantumcumque majori, prima denunciatione pendente, accusatorem, ejus uxorem, liberos, parentes, fratresve utrimque conjunctos in eadem tamen habitatione manentes per quamvis viam in judicium evocare, vel alterum denunciationis cer-*

Regno Neapolitano, quod ad Regni universitates Fridericus servari jussit. Eas enim per procuratores & agere, & conveniri voluit *const. generalia jura. ut universis. accus.* Idem privilegium ob matronarum pudorem maritis mulieribus indulgendum cavit. Utraque tamen in specie contra ipsas principales personas executioni sententias demandari jussit. Jure etiam patrio si plures ultra decem de eodem delicto accusentur, vel de diversis etiam ex eodem orientibus facto tamen, per procuratorem se defendere non prohibentur ex Roberti *capit. 204. & capit. 211.*

X. Publica autem judicia ita dividit Tribonianus §. 2. *h. t.* ut quædam *capitalia* dicat esse, quædam *non capitalia*. Capitalia ea vocat, quæ aut ultimum supplicium irrogant, aut libertatem, Civitatemve damnatis adimunt. Licet enim in jure civili ipsa quoque familia capitis vocabulo designari soleat, in præsentī tamen argumento vitam, libertatem, aut Civitatem tantum caput indigitat. Non capitalia vero ea scribit esse, quæ damnum pecuniarium, aliamve pœnam, libertate cum Civitate salva, reis infligunt. Cuicunque tamen publica sint judicia, eis damnatos infamia generatim sequitur, licet de infamia taceat in sententia judex *l. 7. ff. de publ. judic.* Ea publicorum judiciorum divisione præmissa, non crimina quidem omnia hic edisserit Tribonianus, sed pauca quædam veluti exempli gratia tironibus suis enucleat. Nos Ajaci prolixiori fortasse finem imposituri crimina tantum a Triboniano proposita edisseremus. Uberior enim publicorum judiciorum scientia ex latioribus pandectarum libris hauriri debet, quod ab ipso Justiniano monitum §. 12. *h. t.*

IX. Pu-

XI. Publicorum judiciorum primum exemplum Tribonianus affert in crimine Majestatis §. 3. *h. r.* De Majestate præter alios ipsum Augustum leges tulisse constat, postquam potentiae securus legem censuit ferri posse, quibus Romanus orbis pace, & Principe uteretur. Lex igitur Julia Majestatis, quæ memoratur *d. §. 3. h. r. & in rubr. ff. ad leg. Jul. Majest.* ea ipsa est, quam de Majestate tulit Augustus. Majestatis autem reus est, qui summam in Republica potestatem lædit, qualecumque sit ejus regimen seu Democraticum, seu Aristocraticum, seu Regium Grot. *de jur. bell. & pac.* 1. 3. 7. & *sequ.* Nam libera quidem Republica apud ipsum populum Majestas fuit; ubi firmatus est Principatus, ea Principi cessit. Profana enim, & in publicum exitiosa est eorum opinio, qui sine discrimine ipsi populo Majestatem addicunt, quam quidem sententiam in perniciem Civitatum excusam pro more suo docte profligavit Grotius *loc. cit.* §. 8. Hinc facile intelliges, cur Jurisconsulti, qui sub Republica libera floruerunt, læsæ Majestatis exempla ab eis desumant, qui hostili animo adversus ipsam Rempublicam animati forent, qui hostes adversus Romanos concitassent, qui cives hosti tradidissent, qui denique de dignitate, aut potestate Populi Romani quid derogassent: cur contra, qui sub Cæsaribus floruerunt, reos Majestatis pronuncient, qui sacra Principum capita parricidiali furore, vesaniaque appeterent, imperium affectarent, & quoquo modo adversus Principes ipsos moliti quid forent. Si sub ipsis enim Augustis in læso populo aliquando Jurisconsulti Majestatis exempla proferunt, morientis libertatis vestigia sequebantur, aut blandiri populo pergebant exemplo ipsius Augusti,

gusti, qui Principatum adeptus veterem in populo Majestatem simulabat agnoscere. Vide Huber. *observat.* 1.25. Hinc frustra doctores discrimen excogitarunt inter perduellionem, & Majestatis crimen. Norunt enim Grammaticorum filii, hostem perduellem dixisse veteres. Igitur quia sub Republica libera hostibus adversus Rempublicam concitandis Romanorum Majestas plerumque solebat imminui, hoc crimen perduellio sæpius appellabatur: sub Principatu id crimen Majestatis frequentius dici cœpit, quia non hostibus concitandis, sed Majestate ipsius Principis impetenda plerumque solebat admitti. Atrocissimum tamen Majestatis crimen videbatur, si quis hostibus concitandis hostilem animum adversus Rempublicam prodidisset. Inde factum, ut, quemadmodum alias ad crimen exacerbandum cædes omnis parrieidii dicebatur, ita perduellio quoque diceretur, si atrociori facinore læsa Majestas populi foret, aut Principis. Ita apud Livium 1.26. duumvir perduellionem ob sororis cædem Horatio judicat, licet is non hostes Reipublicæ concitasset quidem, sed eos potius internecioni dedisset.

XII. Jam vero facile mihi persuaferim, Augustum in rogatione Julia de Majestate veteres loquendi formulas usurpasse, eique ipsius prætendisse Reipublicæ Majestatem. Si enim in lege memorasset Majestatem suam, evalescentem Principatum Romani sensissent. Atqui ex Mæcenatis consilio nil æque cavebat Augustus, quam ne se regnare Romani intelligerent. Ita enim ad Augustum Mæcenæ apud Dionem *libr.* 52. Ὡς ὅγε το μεν πραγμα το της μοναρχιας αλη, το ονομα της βασιλειας ως και ιπαρατον φοβησης. (ut summam quidam

dem Regiam potestatem re ipsa occupes, nomen autem Regni ut abominabile metuas.) Aliunde ad suam incolumitatem tuendam nova Majestatis lege Augusto nil opus erat. Nam ipsum sat tuebatur Tribunicie potestatis sanctitas. Constat enim, id summi fastigii vocabulum Augustum excogitasse, quo non secus, ac tribuni olim, sacrosanctus fieret, & reus perduellionis esset, qui se violaret Tacit. ann. 3. 56. Ab initio igitur lex isthæc Julia eos tantum coercuisse videtur, qui quidquam adversus Populum, ejusve securitatem admisissent, aliove quo modo Majestatem publicam imminuissent, cujusmodi exempla Populo adhuc adblandientes Jurisconsulti exhibent in l. 1. C. sequ. ff. ad leg. Jul. Majest. Verum ubi, firmato jam Principatu, munia Senatus, Magistratum, legum, nullo adversante, traxere in se Principes, eisque vetus Romanorum Majestas aperte cessit, statim adversus eos etiam extensa lex Julia, qui de Principis Majestate quid derogassent. Ubi autem lex isthæc ad injurias adversus Principes fuit extensa, ad civilis animi fidem faciendam Imperatores facta quidem sinebant argui, dicta impune esse patiebantur. Verum eo res tandem rediit, ut inconsulta etiam verba in judicium vocarentur, & *Majestatis unicum crimen eorum esset, qui crimine vacarent* Plinius in paneg. & Tacit. ann. 1. 72.

XIII. Porro lex Julia de Majestate duo saltem capita complexa videtur. Diserte enim in l. 2. ff. ad leg. Jul. Majest. primum ejus legis caput Ulpianus memorat. Primo legis capite, atrociora majestatis crimina, quæque ad perduellionem pertinere ajunt interpretes, persequutus est legislator.

lator. Vide Antonium Matth. *ad libr. 48. ff. tit. 2. c. 2. n. 2.* Altero complexus videtur Majestatis crimina minus atrocia, & quæ non incolumitatem Reipublicæ quidem, sed ejus splendorem, dignitatemve læderent. Ab initio, ut morientis libertatis vestigia flagitabant, ipsius Populi, aut Reipublicæ prætenta amplitudo; mox, ut supra præcepi, ad ipsum Principem lex per interpretationem extensa. Ubi enim Principi, & in Principem delatum jus Populi fuit, ipsa valescentis principatus ratio postulabat, ut lex, quæ Reipublicæ Majestatem ab initio vindicasset, ad tuendam amplitudinem Principis transferretur.

XIV. Primo igitur legis capite tenebantur, qui adversus securitatem Populi Romani quid commississent, qui ad seditionem conflandam armatos homines collegissent, consilio juvissent hostes, iique, quorum opera Magistratus occisi forent *l. 1. ff. ad leg. Jul. Majest.* Idem legis caput eos ulciscébatur, qui bellum gessissent injussu Principis, quive privatus pro potestate, Magistrature dolo malo quid expediisset, aut successori non tradidisset exercitum *l. 3. ff. eod.* Alterum legis Juliæ caput scriptum fortasse fuerat adversus eos, qui minus atrociter Majestatem Reipublicæ violassent. Quia tamen juniorum Jurisconsultorum ævo de veteri Reipublicæ Majestate præter nomen nil quicquam supererat, & læsa sæpius Principis amplitudo in judicium deduci solebat, inde factum existimarim, ut criminum ad secundum hoc caput pertinentium exempla potius ex persona Principis Jurisconsulti corraferint. Hoc igitur legis Juliæ capite tenebatur, qui imagines Principis jam consecratas vendidisset, aut

conflasset *l. 5. §. 2. & l. 6. ff. eod.* Quo minus mirari subit, si sub Tiberio inter accusationis capita objectum Falanio fuerit, quod in venditione hortorum Augusti simul statuam mancipasset, & quod inter ejus cultores Cassium quemdam infamem corpore minimum ascivisset Tacit. *annal. 1. 73.* Eodem fortasse capite, aut ejus interpretatione potius, ii quoque puniebantur, qui maledictis nomen Principis laceffissent, ejusve temporum fuissent obtrektatores. Cum tamen id aut levitate, aut insania factum videri posset, in præsenti specie ad poenas in lege statutas pientissimi Principes Theodosius, Arcadius, & Honorius per Magistratus procedi noluerunt: rebus igitur integris ad ipsum Principem referri jusserunt, ut, pro personarum diversitate dictis diverse pensatis, numine Principali decerni posset, puniri, an negligi injuriam oporteret *l. unic. C. si quis Imper. maledix.* Digna ibi clementia Principum sententia est: *si id ex levitate processerit, contemnendum est; si ex insania, miseratione dignissimum; si ab injuria, remittendum;* ad Principem scilicet. Sed gratulor ego humano generi, quod hodie hoc legis effatum Principes plerique omnes non verbis quidem, sed facto comprobant.

XV. Quod ad poenam Julia rogatione pro Majestate vindicanda statutam, nihil usquam in pandectis proditum: ex loco Pauli tamen *sent. 5. 30. 1.* interpretes passim inferunt, damnatos eo judicio perpetuo exilio fuisse coercitos, seu in primum, seu in alterum legis caput quid admisissent; pridem tamen ante Pauli ævum moribus invaluisse, ut humiliores bestiis objicerentur, aut exurerentur, capite plecterentur honestiores. Ita enim Juris-

risconsultus *loc.cit.* His antea in perpetuum aqua, & igni interdicebatur; nunc vero humiliores bestiis obijciuntur, aut exuruntur; honestiores capite puniuntur. Id si verum fuerit, Stoicum fuisse legislatorem oportuit, qui id genus crimina æqua lance pensarit eadem pœna paratus ulcisci,

Qui teneros caules alieni fregerit horti,

Et qui nocturnus Divum sacra legerit.

Aliunde quotusquisque a tumultibus, ab hostibus adversus Rempublicam concitandis, a Populi Majestate impetenda deterreri potuisset per comminationem exilii, cui præsertim lata fuga inesset? Quapropter facile mihi persuaserim, in primo legis capite Majestatis reos morte, in secundo exilio luisse pœnam; Pauli vero locum per Aniani operam corruptum ad nos pervenisse, idque ego miror, cuiquam non suboluisse hætenus. Neque regeras, legem Porciam cives non minus a verberum nota, quam a capitali supplicio immunes esse jussisse: nam sub ipsa floreante Republica ob perduellionis crimen pœnam capitis sexcenties irrogatam constat. Utcumque id ab initio fuerit, saltem a Pauli ævo omne genus Majestatis crimen capite lui cœpit. Neque enim *loc.cit.* Jurisconsultus distinguit inter primum, & secundum legis Julię caput. Vid. Antonium Matth. *ad libr.48.ff.sic. 2.c.3. n. 2.* Explorati autem juris est, ex primo capite Majestatis reos constitutionibus Principum non solum morte afficiendos esse, sed eorum etiam bona omnia fisco vindicari; ipsorum vero filios non solum expertes esse patris perduellis hereditate, verum etiam neque maternam, neque avitam, neque extraneorum quorumlibet hereditatem capere posse aut ex testamento, aut ab intestato *l. quisquis.*

C. ad leg. Jul. Majest. Licet enim solidissimis argumentis Gothofredus ostenderit, eam quidem legem non latam adversus eos, qui vecordi vesania ipsius Principis securitatem impetant, eamque adversus eos potius scriptam videri, qui in necem virorum illustrium, quos Principes ibi memorant, factionem inierint, potiori tamen jure lex isthæc ad eos debet extendi, qui parricidiali furore ipsam Principum Majestatem aggrediantur. Unis perduellium filiabus ibi conceditur, ut legitimam ex bonis maternis petere possint, seu cum testamento, seu intestata mater decesserit. Ex quo autem ejusmodi crimen fuerit admissum, irritæ prorsus erunt non solum donationes, sed dotes etiam sine fraude constitutæ *d. l. quisquis. §. 4.*

XVI. At vero ob ipsam hujus criminis atrocitatem in Majestatis judicio haud pauca contra juris regulas invaluerunt. Primo enim ipsi servi audiuntur suos dominos deferentes, & liberti patronos accusare non prohibentur *l. 7. §. 2. ff. ad leg. Jul. Majest.* ipsæ quoque mulieres audiri debent *l. 8. ff. eod.* Deinde, licet alias digniores homines equuleo non sint imponendi *l. 16. C. de quæst.* in quæstionibus Majestatis tamen nulla dignitas tormentis eximit *l. 3. C. sequ. C. eod.* Quod mirum autem videri queat, ipse etiam accusator in hoc judicio potest quæstioni subjici, si manifestis indiciis accusationem non adprobarit *d. l. 3. C. eod.* Præterea sola hujus criminis cogitatio in judicium vocari potest, ac, de ea si revictus sit reus, prædictas poenas haud effugiet *d. l. quisquis. princ. C. eod.* Denique, licet alias crimina generatim omnia morte extinguantur, perduellis tamen accusatio etiam post mortem inchoari potest, aut peragi. Ab eo igitur

tur crimine nisi purgetur ab herede defunctus, memoria damnata rei, fisco ejus hereditas addicetur *l. 11. ff. ad leg. Jul. Majest. & l. 8. C. eod.* Sed piget in præfenti crimine immorari diutius præsertim apud Populum, qui suis Principibus devotissimus esse consuevit.

XVII. Alterum publicum judicium in institutionibus memoratum est adulterium. Id quoque nefas coercitum lege Julia ab Augusto fuit; quæ ipsa lex Julia est memorata §. 4. *h. t.* eaque singularem titulum occupavit *in ff. ad leg. Jul. de adult.* Licet autem jure Naturæ non minus Christi lege, quam sacris Ecclesiæ regulis confirmato adulterium censeatur admitti non ab uxore tantum, sed a viro quoque, si præter matrimonii fidem cum alia consuescat, jure civili tamen cum aliena tantum uxore adulterium admitti potest. Proinde adulterium cum nupta tantum committi scribit Papinianus *in l. 6. ff. ad leg. Jul. de adult.* & adulteros alienarum nuptiarum temeratores Tribonianus appellat *d. §. 4. h. t.* Hinc frequentes apud veteres matronarum querelæ, quod pudicitiam exigerent a se viri, quam per leges ipsi præstare non cogerentur. Instar omnium tibi sit Syra apud Plautum *in mercat.*

Ecastor lege dura vivunt mulieres,

Multoque iniquiore misera, quam viri.

Nam si vir scortum duxit clam uxorem suam,

Id si rescivit uxor, impune est viro.

Uxor viro si clam egressa est foras,

Viro fit causa, exigitur matrimonio.

Utinam lex esset eadem, quæ uxori est, viro!

Mirum autem videri non debet, si cum aliena tantum uxore admissum adulterium puniri jusserint

Romani legislatores . Cum enim a Civitate ea potissimum arceri debeant , quæ civibus majorem perniciem , ac fœditatem afferunt , optime Civitati consulere veteres majorem a mulieribus pudicitiam exigentes . Alieni enim tori temerationi & major fœditas inest , & major inde in Civitatem perniciēs . Primo enim fœdissimum videri debet , præter sexus verecundiam lascivire mulieres , quibus major pudicitiae ratio constare decet . Deinde pessimo publico fieret , ut ab alio sati liberi alienas hereditates invaderent . Hinc ipse Deus Optimus Maximus capite quidem eum plecti jubet , qui alienam uxorem polluit , tamen extra legum poenas jussit maritos esse , si maritalem fidem cum in-nupta fallerent *Levit. 19. & sequ. Vid. Anton. Matth. ad libr. 48. ff. tit. 3. c. 1.*

XVIII. Quod ad adulterii poenas , sanctioribus rei Romanæ temporibus ipsi viri ex propinquorum consilio poenas irrogare solebant adversus adulteram *Dionys. Halicarn. antiquit. Rom. 2.* Ubi tamen , exolescente consuetudine contrahendi nuptias ritu civili , maritalis potestas est imminuta , vix quicquam atrocius de adulteris mulieribus viris statuere concessum . Proinde ad mulierum libidinem coercendam *Papia* primuni rogatione cavit *Augustus* , ut , ob mulieris adulterium matrimonio divertente , sextam dotis viro retinendi jus esset *Ulpian. fragm. tit. 6. §. 12.* Verum , lege *Julia* lata ab eodem *Augusto* , ulterius mox processum . Nam ea cautum , ut parenti adulterum cum filia deprehensum liceret occidere , modo ipsam quoque filiam de medio tolleret , seu domi suæ , seu apud generum deprehendisset adulterum . Minus viro concessum . Ei enim adulterum tandem impune licebat

bat occidere, modo eum apud se deprehendisset, & uxori parceret *Paul. recept. sent. 2. 26. 1. C. 7.* Lenius tamen maritum puniri placuit, qui iusti doloris impatientia cum adultero deprehensam interfecisset uxorem *Paul. loc. cit. 5.* Occiso autem adultero statim maritus dimittere compellebatur uxorem; si uxorem non dimisisset, ob eandem adulteri in iudicium vocari poterat *Paul. loc. cit. 6.* Quod si evasisset adulter, uxorem a viro statim adhuc dimitti oportebat; alias tamquam lenocinii reus maritus recte postulabatur *Paul. loc. cit. 8. C. l. 29. ff. ad leg. Jul. de adult.* Ceterum adversus adulteras Augustus ad mortem usque sœviri noluit. Adulterii enim manifesti reas dimidio dotis, & tertia parte bonorum, atque in insulam relegatione coerceri iussit; adversus adulteros in insulam quoque relegationem indixit, eisque dimidiam bonorum partem auferri voluit *Paul. loc. cit. n. 14.* Primus Constantinus adversus adulteros, adulterasve extremam fati necessitatem indixit, ut videtur evicisse *Noodt. in Diocletian. & Maximian. c. 19.* Verum Justinianus in viris quidem eam pœnam servari voluit, mulieres fustibus cœsas in monasterium detrudi iussit, viris eas intra biennium repetendi facultate concessa: biennio exacto, aut viro mortuo, reliquo vitæ tempore adulteram in monasterio detineri cavit *novell. 134. c. 10.*

XIX. Jam vero quæ de pœnis adversus adulteros lege Julia cavit Augustus, pleraque jure patrio sunt confirmata. Quemadmodum enim maritus uxorem cum adultero deprehensam lege Julia statim dimittere cogeatur, si lenocinii pœnas vellet effugere, ita in Regno Rogerius lenocinii pœnas maritum subire iussit, qui uxorem in adul-

terio deprehensam retinere pergeret *const. maritum. de pæn. marit.* Quemadmodum etiam ex lege Julia marito adulterum apud se in adulterio deprehensum impune licebat occidere, eodem jure in Regno maritos adversus adulteros Rogerius uti voluit. Is tamen ultra processit; neque enim solum adulterum, sed uxorem quoque interficiendi viro jus esse voluit, modo tamen in continenti utriusque cædes patrata foret *const. si maritus. de pæn. uxor. in adulter. deprehens.* Hinc facile mihi persuaferim, apud nos in Regno sub Northmannis olim ex veteri Constantini lege adulteros capite luisse pœnas. Primus in Regno Fridericus gladii pœnam adversus adulteros mollium iovit: eos enim tantum publicatione bonorum multari jussit, modo filii ante adulterium suscepti eis haud essent. Quod ad adulteras vero, parentes, aut viros adversus eas ad mortem usque sævire vetuit. Justæ ipsorum iracundiæ tantum indulgit, ut adulteræ nasum decurtare possent. Si maritus suo jure adversus uxorem non uteretur, ne impune adulterium uxori foret, eam fuste cædi publica auctoritate jussit *const. legum asperitatem. de adulter. & lenocin.* Idem Fridericus lenocinii causa viro calumniam fieri noluit, si dimissam uxorem post institutum adulterii crimen domum reduceret *const. qui post. crimen.* Id & juri Romano conforme est. Nam per mulieris reductionem crimen adulterii aboleri dicitur *in l. 13. §. 9. ff. ad leg. Jul. de adult.* At vero adversus adulteras ex officio procedi per Magistratus haud potest. Multo minus, qui suspectam fidem uxoris habet, si eam domi retineat, lenocinii reus censeretur debet *const. quamvis. de prohib. quæst. fœm.*

XX. Eadem lege Julia cautum de stupro quoque §. 4. *h. t.* Stuprum impudicitiam omne genus generatim indigitat . Hinc ipsum adulterium eo vocabulo designari solet *l. 6. ff. ad l. Jul. de adult.* Quin & turpitudine omnis apud veteres stuprum appellabatur . Notum Nævii illud .

Seseque ii punire mavolunt , quam cum stupro redire ad suos populares .

In præsentī tamen argumento in vidua honeste vivente , virgine , vel puero stuprum committi dicitur *l. 34. §. 1. ff. eod.* Ipse autem Imperator docet §. 4. *h. t.* adversus stupratores eam pœnam legem Juliam comminatam esse , ut , si honesti forent , dimidiæ partis bonorum publicationem subirent ; sin humiles essent , verberibus prius cæsi relegationi subjicerentur . Quod si per vim stuprum cuiquam fuerit oblatum , summo supplicio stuprator afficietur , idque spectasse Paulum crediderim in *l. 1. §. ult. ff. de extraord. crimin.* Aliunde cum raptor mulieris capite sit plectendus , etiamsi sceleris effectū is potitus haud fuerit *l. un. C. de rapt. virg.* stuprator violentus non absimili pœna videtur afficiendus . Qui enim per vim stuprum offert , nequior raptore est , & effectū inspecto pro raptore censi debet . Vid. Anton. Matth. ad *libr. 48. ff. rit. 3. c. 5.* Verum in laxiori nostrorum temporum disciplina , si vis absit , stupratori facile sit pœnæ gratia ; ubi mulierem , cui vitium obtulit , uxorem duxerit . Nam ob incuriam advocatorum fisci apud nos pœna fisco præstanda non raro remittitur . Ne autem ab invito matrimonium extorqueri videatur , apud nos iudices in dicenda sententia ita decernere adversus stupratorem solent ; *ducat , aut dotet* . Verum ne simplici datio-

tione dotis matrimonii necessitas effugiatur, poenam addere iudices in sententia dicenda solent, si stuprator dotem dare maluerit. At vero cum inhumanum sit filiae pudicitiam vendi per matres, Rogerius nasum matribus amputari iussit, quæ accepto pretio filias vitiandas stupratori traderent *const. matres virgines. & const. matres, quæ. de pæn. matr. fil.*

XXI. Ad judicia quoque publica pertinet lex **Cornelia** de sicariis. Ea a Lucio Cornelio Sylla Dictatore lata adversus eos, qui aut quempiam interficerent, aut cujusquam occidendi causa cum telo ambulant *§. 5. h. r.* Ordinaria igitur legis poena eos etiam persequutus est Legislator, qui, cæde haud admissa, hominis occidendi causa cum telo incederent *l. 1. ff. ad leg. Cornel. de sicar.* Ita enim vir prudentissimus Romanos propter bella civilia pridem ferocientes censuit a cædibus deterreri posse, si non tantum cædes ipsas, sed earum quoque conatum ulcisceretur. Verum hodie a veteri rigore descitum; sceleris enim cujuscumque conatus apud plerosque Europæ populos mitius, & extra ordinem coerceri solet. Vide Anton. Matth. ad *libr. 48. ff. tit. 5. c. 3. n. 11.* Eadem lege eos teneri scribit Tribonianus *loc. cit.* qui mala medicamenta vendunt; veneficos etiam, seu veneno, seu magicis susurris homines occiderint: Verum hodie adversus magicos susurros legum tutela non opus: nam adversus magorum carmina, & sagarum deliramenta recta ratio homines in philosopho sæculo sat tuetur. Illud autem mirari subit, cur ultore ferro crimina isthæc lege **Cornelia** punita scribat Tribonianus *d. §. 5. h. r.* cum nemo unius ignoret, ea admittentes aquæ, & ignis interdictio-

ditione lege Cornelia fuisse coercitos l. 3. §. 5. ff. ad leg. Cornel. de sicar. Quid igitur, dicamne eo nomine Triboniano scribemus? Neutiquam vero. Solemne enim ipsis Jurisconsultis fuit, in legum pœnis enarrandis non ipsas memorare pœnas primum a lege statutas, sed quas ætate sua receptas viderent. Ita quidem Marcianus in d. l. 3. §. 5. ff. ad leg. Cornel. de sicar. adversus ficiarios deportationem irrogatam scribit, quia ætate sua aquæ, & ignis interdictione deportatio frequentior erat. Nam Syllæ quidem ævo deportatio nondum inventa fuerat. Idem a Paulo factum 5. senten. 23. 1. Igitur exemplo veterum Tribonianus usus adversus homicidas, ac veneficos extremum supplicium legem Corneliam irrogasse scribit, quia eam pœnam ætate sua receptam cernebat. Indidem repetendum, cur idem Tribonianus adulteros lege Julia gladio punitos scripserit §. 4. instit. h. licet longo post tempore Constantinus fortasse primum adulteria capitali supplicio coerceri jusserit.

XXII. Facile autem rationem reddes, cur tam mite supplicium adversus homicidas, ac veneficos irrogatum a Sylla fuerit. Ea ætate scilicet in tanta Reipublicæ libertate per Syllam feliciter restituta dignitas Romani civis in immensum excreverat, & peregrini cum civibus comparati vix homines videbantur. Igitur aquæ, & ignis interdictione, per quam cives fiebant extorres, & Civitatis expertes, ejus ætatis hominibus sat atrox videri debuit. Eo accedebat, quod ætate Syllæ lex Porcia vigeat adhuc, qua cautum constat, ne cives verberari, aut necari jus esset Liv. 10. 9. Ne igitur restitutor libertatis ille leges adversus cives armare gladio videretur, adversus ficiarios

carios, ac veneficos ultra aquæ, & ignis interdictionem procedi noluit. Verum enimvero ubi, firmato jam Principatu, imminuta Romanorum civium amplitudo fuit, ad cædes arcendas a veteri lenitate descitum oportuit, atque homicidas persequi ultore ferro, quæ quidem poena Jurisconsultorum ævo jam inoleverat *l. 3. §. 5. ff. ad leg. Cornel. de sicar.* Neque tamen jure pandectarum poena capitis irrogatur promiscue adversus homicidas omnes. Distinguendi sunt enim in honore positi, honestiores, & humiliores homines. Qui in honore sunt positi, deportari solent; honestiores capite puniuntur; humiliores aut tolluntur in crucem, aut bestiis objiciuntur *d. l. 3. §. 5. C. l. 16. ff. eod. Conf. Schulting. ad Paul. recept. sent. 5. 23. n. 9.*

XXIII. Ad publica quoque judicia pertinet parricidium. Eo quidem vocabulo ad atrocitatem criminis detestandam cujusvis civis cædem veteres indigitare solebant. Hinc in veterum legum sanctionibus frequens hæc formula, *parricida esto*, ad homicidii poenam indigitandam. Verum in §. 6. *h. t.* parricidium per eos censetur admitti, qui parentes, aut liberos interficiunt secundum Constantini definitionem in *l. un. C. de his, qui parent. aut liber.* Veteri Numæ lege in duodecim tabulas quoque translata insuti culleo parricidæ cum simia, vipera, cane, & gallinaceo aut in profluentem, aut in mare proximum mergebantur, ut inter ferales angustias omni elementorum usu carentibus cælum vivis, terra mortuis auferretur. Vide Gothofred. ad *l. un. C. Theod. de parricid.* Hinc intelliges, quæ sit parricidii poena more majorum instituta in *l. 9. ff. ad leg. Pomp.*
de

de parricid. Post varias in ea re vices lege Pompeja de parricidis generatim parricidii omnes teneri placuit, qui patrem, matrem, avum, aviam fratrem, sororem, patrualem, matrualem, patruum, avunculam, amitam, consobrinum, consobrinam, uxorem, virum, generum, socrum, vitricum, privignam, privignum, patronum, patronam occiderent *l. 1. ff. eod.* Eos omnes lege Cornelia de sicariis punitos fuisse scribit ibi Jurisconsultus. Verum negligentius ibi Marcianum egisse facile, puto, constiterit ex *d. l. 9. ff. eod.* ubi veterem cullei poenam Modestinus adversus parricidas suo ævo servatam monet. Proinde facile mihi persuaserim, legem quidem Pompejam ad augendam facinoris atrocitatem parricidas pronunciasse omnes, qui quemquam eorum, quos supra memoravimus, interficerent, eo cum discrimine tamen, ut, qui parentes interimerent, veteri cullei poenæ subessent; qui cognatos alios, punirentur lege Cornelia de sicariis. Id aperte constabit, si conferatur *d. l. 1. § 9. ff. eod.* Utrumque id erit, ex Constantini definitione in *d. l. un. C. de his, qui parent. vel liber. occid.* ii. tantum hodie parricidium censentur admitttere, veterique cullei poenæ subsunt, qui parentes, aut liberos interficiunt. Suo autem ævo Paulus parricidas testatur aut viros exustos, aut bestiis devorandos obiectos *5. sent. 24.* Id tamen ex Hadriani constitutione videtur interpretandum in *d. l. 9. ff. eod.* Ibi enim cautum ab Hadriano dicitur, ut, si mare tandem longius abesset, parricidæ bestiis objicerentur. Sed circa patulum orbem diutius immorari nolim: de parricidio sat nota fabula: de eo, si plura desideras, vide Goldastum ad Dositheum *3. sent. 16.* & Christophorum Colerum
par-

parerg. c. 13. apud Otton. thesaur. jur. Rom. tom. 1.

XXIV. Crimen etiam falsi publico judicio vindicatur. Veteribus eo de crimine legibus ævitate sua jam exolescentibus, legem quoque Corneliam de falsis tulit Sylla Dictator Cicer. *Verr. 1. 42.* Eam testamentariam, & nummariam appellat Cicero *loc. cit.* quia altero fortasse capite fraudes circa testamenta, altero circa nummos admitti solitas coercerebat. Priori igitur capite tenebantur, qui falsa testamenta scriberent, recitarent, subjicerent; qui vera quoque supprimerent, amoverent, resignarent, delerent, quique signa adulterina exculperent, facerent, exprimerent Paul. *5. sent. 25. 1. & l. 30. ff. de leg. Cornel. de fals.* Recentioribus vero Senatusconsultis eadem lege coerceri placuit, qui alia instrumenta præter testamenta falsarent, signarent, quique falsas testationes invicem dicendas curarent *collat. leg. Mosaic. & Rom. 8. 7.* Hinc mentio falsi, & quasi falsi in *l. 1. §. ult. ff. de leg. Cornel. de fals.* Falsum scilicet videbatur admittere, qui quid eorum auderet, quæ in lege Cornelia de falsis diserte continebantur; quasi falsum is admittebat, qui adversus recentiora Senatusconsulta faceret, per quæ ad alias quoque species lex Cornelia de falsis producta fuerat. Vide Cujacium, & Antonium Schulting. ad Paul. *loc. cit.* Contra altero legis capite tenebantur, qui nummos adulterarent, conflarent, laverent, raderent, corrumperebant, aut quoquo modo vitiarent *l. 8. & 9. ff. eod.* Utriusque criminis ab initio poena fuit in liberis quidem hominibus aquæ, & ignis interdictio, in servis extrema fati necessitas *l. 1. §. ult. ff. eod.* Verum ætate Pauli honestiores in Insulam deportabantur, humi-

miliores aut in metallum damnari, aut in crucem tolli solebant, ut ipse testatur §. *sent.* 25. 1. Id monitum oportuit, ne cui fucum Tribonianus faciat in §. *h. t.* ubi rem sat negligenter edisserit.

XXV. Publico quoque judicio de vi quæri placuit, eaque de re sub ipsa libera Republica lata lex Plautia anno Urbis 675. qua ipsa monui alias fuisse vetitum, ne fundum vi possessum usucapiendi jus foret *libr. 2. tit. 6.* De vi etiam legem tulit Cæsar, & ante Cæsarem Pompejus ipse *Sigon. de judic. 2. 33.* Verum legibus omnibus de vi latis offecit Augustus per legem Juliam de vi seu publica, seu privata, quæ memoratur §. *8. h. t.* & duobus titulis in pandectis enucleatur. Vulgo autem docent interpretes, vim publicam armis, vim privatam sine armis admitti, cui quidem sententiæ astipulari videtur ipse Tribonianus *d. §. 8. h. t.* Verum enimvero vim privatam armis etiam fieri potuisse, testatur diserte Paulus §. *sent.* 26. 3. Proinde non improbarim conjecturam Cujacii ad Paul. *loc. cit.* existimantis, legem Juliam de vi publica non de iis generatim cavisse, qui armis alteri vim intulissent, sed de Magistratibus tantum, qui publica auctoritate abusi contra cives Romanos iniquius quid statuissent; lege vero Julia de vi privata privatos ipsos fuisse coercitos, qui seu armis, seu sine armis vim civibus intulissent. Utcumque id erit, adversus vis publicæ reos lege Julia aquæ, & ignis interdictio decernebatur; vis privatæ rei tertia bonorum parte multati relegabantur *l. 10. §. ult. ff. ad leg. Jul. de vi publ.* & Paul. §. *sent.* 26. 3. Quod si qua mulier vi rapta foret, raptores, quique flagitio opem afferrent, gladio feriri Justinianus jussit *d. §. 8. h. t.*

XXVI. Pu-

XXVI. Publico etiam judicio quæri solet de peculatu, de plagio, de ambitu, de repetundis, de annona, de residuis. Peculatus est reus, qui pecuniam publicam, remve religiosam, aut sacram furatur. *l. 1. C. 4. ff. ad leg. Jul. pecul.* Plagii tenetur, qui hominem liberum, aut servum alienum suppressit, vendit, donat *l. 1. C. 3. ff. de leg. Fab. de plagiar.* Ambitus ab illis admittitur, qui corruptis suffragiis petunt honores *l. un. ff. de leg. Jul. ambit.* Reus repetundarum est, qui in publico munere constitutus pecunia se corrumpi patitur, quo magis, aut minus ex officio quid faciat *l. 3. C. 4. ff. de leg. Jul. repetund.* Crimen annonæ ab eo admittitur, qui annonam quoquo modo flagellat, aut vexat *l. 2. ff. de leg. Jul. de annon.* Residuum denique reus est, qui pecuniam publicam in usum aliquem sibi numeratam apud se retinet, neque in demandatum usum expendit *l. 2. ff. ad leg. Jul. pecul.* Verum de publicis judiciis veluti summo digito hæc attigisse sufficiat: ipse enim Justinianus monet, ex latioribus pandectarum libris eam scientiam hauriendam esse. Aliunde nimium hic Ajax inter manus excrevit, & recte fortasse quispiam incivile illud occlamet,

Scriptus C in tergo, necdum finitus Orestes?

F I N I S.

605642



